

### 



明 宋 濂 等撰

華 書 局

中

卷一四八至卷一六一(傳)第 一 二 册

## 元史卷一百四十八

### 列傳第三十五

董俊 子文蔚 文用 (文忠) 文直 〔文忠〕〔〕

立的 夢兵、射上中者拔爲將。 董俊字用章,真定藁城人。少力田,長涉書史、善騎射。 衆莫能弓,獨俊一發破的,遂將所募兵迎敵。 金貞祐間,邊事方急, 歲乙亥,國王炑 藁城令

華黎帥兵南下,俊遂降。

承制 俊軍時屯曲陽,僊銳氣來戰,敗之黃山下,僊脫走。 我用、請備之。」木華黎然其言、承制授左副元帥。 入眞定,逐僊走之,定武治城復去僊來附。 授俊龍虎衛上將軍、行元帥府事、駐藁城。 己卯,以勞擢知中山府事,佩金虎符。 庚辰奉, 金大發兵益應, 治中李全叛中山應之。 金將武應據眞定,定武諸城皆應僊。 俊嘗謁木華黎日二一武優點不可測,終不為 陸藁城縣為永安州、號其衆為匡國軍 獻捷于木華黎,由是隱以窮降。 俊率衆夜 木華黎 士, 事

三四九一

列幕第三

十五五

量化

居反側間,戰士不滿千人,拒守永安。 真定,僊走死, 🖹 乃納史天倪弟天澤爲帥。 「汝欲得民,而奪之食,無道賊不爲也。」隱慚而去,俊出兵掩擊之,偃敗走。 久之,俊復夜入 委俊。(己)[乙]酉,[三] 僊果殺都元帥史天倪,據眞定以叛,旁郡縣皆爲 [僊攻之期年,無所利,乃縱兵蹂禾稼,]俊呼語之曰: **德守。** 俊提孤軍

壬辰、會諸軍圍汴。 明年,金主棄汴奔歸德,追圍之,金兵夜出,薄諸軍於水,俊力戰死

焉,時年四十有八。

其軸爲賢,延歸教諸子。 夫耳,遭天下多故,徒以忠義事人,僅立門戶。 「祀,以孝先也,禮宜如是。」待族親故人,皆有恩意,里夫家僮,亦接之有道。 俊早喪父, 事母以孝聞。 嘗曰:「射,百日事耳,詩、書,非積學不通。」 屢誡諸子曰:「吾一農 歲時廟祭、非疾病、跪拜必盡禮、子雖孩乳、亦使之序拜、曰: 深願汝曹力田讀書,勿求非望,爲吾累也。」 

動。 困 臣也,敵在前,不死,乃趨安脫危乎」先是,戊子歲,朝於行在,諸將獻戶口,各增數要利, 吏請如 [也。] 行元帥府時,狂男子三百餘人期日作亂,事覺, 戮其渠魁, 餘並釋之。 深、 冀間妖人 | 俊忠實自許,不爲夷險少移,臨陣,勇氣懾衆,立矢石間,怡然若無事,雖中傷亦不爲 每慕馬援爲人, 曰:「馬革裹屍,援固可壯。」故戰必持矛先士卒,或諫止之,俊曰:「我人 、衆,俊曰:「民實少而欺以數多,他日上需求無應,必重斂以承命,是我獨利,而民日

成 降武僊於威州,俊下令曰:「逆者一人,餘能去逆,卽忠義士,與其家財,仍奏官之。」衆果去 惑衆,圖爲不軌,連逮者數萬人,有司議當族,俊力請主者, 不爲也。」衆義不取。 降。 沃州民寨天臺爲盜,旣破降之,他將利其子女,欲掠之,俊曰:「城降而俘其家, 南征 [時,人多歸俊願爲奴者,旣全其家,歸悉縱爲民。 ,但誅首惡。 永安節度使 鄰境人有被掠 劉 成 叛

賣者,亦與直贖還之。

其天性之美類如此。

傳、開府儀同三司、上柱國,封壽國公,諡忠烈。 司、上柱國,改封趙國公。 治 田廬,必召與歡語,有惰者,則怒罰之,故其部完實,民惟恐其去也。 俊器度弘遠,善戰而不妄殺,故人樂爲之用。 子文炳、文蔚、文用、文直、文忠,文炳自有傳。 加贈推忠翊運效節功臣、太傅、開府儀同三 大小百戰,無不克捷。 贈 翊 爲政寬明,見人善 運效節 功臣、太

俛首幾至于地,徐徐起拱,人所難能。 膂力絕人。 文蔚字彥華,俊之次子也。 事母 至孝,接人謙恭,凡所與交,貴賤長幼,待之無異,至於一揖,必正容端體, 重厚寡言,不事嬉戲,立志勤苦,讀書忘倦。 兄文炳爲藁城令,厲精於政,家務悉委之,凡供給祭 及長,善騎射,

辛丑,起民兵南征, 文炳命文蔚率十有七人,私整鞍馬衣甲, 自為 隊, 與衆軍渡淮

列

傳

第三

祀賓客之事,無不

盡

心。

甲寅, 怒辱,不恤困苦。今董侯慈惠若此,我曹安忍負之。」各盡力成之。 力,時其饑飽,藥其疾病,見執役者,常以善言撫之,弗事威猛。衆咸處曰:「他將領役,鞭箠 光化,乙卯,立毗陽,丙辰,築棗陽。文蔚悉總之,治板幹,具畚鍤,儲餱糧,運木石,程其工 賞之,授藁城等處行軍千戶。南鎭鄧州,與荆、襄接境,沿邊城壁未築。是年冬十一月,修 世祖收大理,還駐六盤山。文炳以文蔚孝謹公勤,可委以事,解所佩金符以讓,帝嘉

親見之,加以賞賚。 往攻,迺激厲將士,挾雲梯,冒飛石,履崎嶇以登,直抵其寨苦戰,頃之,兵士被傷,迺還。帝 竹諸寨,長驅而前,至釣魚山,崖壁巉峭,惟一徑可登,恃險阻未卽降。帝命攻之,文蔚以次 兵西上,由褒科歷劍閣,而劍、閬諸州,平地不能守,置州事於山。師行大獲、雲頂、長寧、苦 復統拔都軍以當前行,奪其外城,論功居最。 木拔根,立於水,實以薪草爲橋梁,頃之卽成,至曉,師悉渡, 圍已合, 城中大驚異之。 文蔚 丁巳,攻襄,樊城南據漢江,北阻湖水,卒不得渡。文蔚夜領兵士,於湖水狹隘之處,伐 己未、憲宗伐朱、入川蜀、文蔚奉韶、將鄧之選

疾卒于上都之炭山。 據 濟南,文蔚以麾下軍圍其南 中統二年,世祖置武衛軍,文蔚以鄧兵入爲千戶。 弟文忠,時爲樞密僉院,乞護喪南還,帝甚憫之。 一面、春秋力戰、城破堕誅、奏功還。至元五年七月十七日,以 帝北狩,留屯上都。 泰定中,贈明威將 三年,李璮反,

始從文炳謁太后于和林城。世祖在潛藩,命文用主文書,講說帳中,常見許重 成,弱冠試詞賦中選。時以眞定藁城奉莊聖太后湯沐,庚戌,太后命擇邑中子弟來上,文用 文用字彥材,回俊之第三子也。生十歲,父死,長兄文炳敎諸弟有法。 文用學問早

甲胄、擇大艦授之,大破宋師。 拒,水陸軍容甚盛。九月,世祖臨江閱戰,文炳求先進戰,文用與文忠固請偕行,世祖親料 方。己未,伐宋,文用發沿邊蒙古、漢人諸軍,理軍需。將攻鄂州,宋賈似道、呂文德將兵來 世祖令授皇子經、是爲北平王、雲南王也。又命召遺老竇默、姚樞、李俊民、李冶、魏璠於四 癸丑,世祖受命憲宗自河西征雲南大理。 文用與弟文忠從軍,督糧械,贊軍務。丁巳,

當行。」阿朮曰:「潛邸舊臣,不得引此爲說。」文用謝病不行。 辭曰:「新制,諸侯總兵者,其子弟勿復任兵事。今吾兄文炳,以經略使總重兵鎭山東,我不 年,李璮叛據濟南,從元帥闊闊帶統兵誅之,山東平。阿朮奉詔伐宋,召文用爲 文謙宣撫大名等路,奏文用爲左右司郎中。二年八月,以兵部郎中參議都元帥府事。 世祖 即位,建元中統。文用持詔宣諭邊郡,且擇諸軍充侍衛,七月還朝。 中書左丞張 其屬,文用

列

甘、庸、瓜、沙等州之土 文用 至,鎭之以靜,乃爲書置通衢 至元 改元,召爲西夏中興等路行省郎中。 |為水田若干,於是民之歸者戶四五萬,悉授田種,頒農具; 更造舟置 諭之,民乃安。 中興自渾都海之亂,民間 始開 唐來、漢延、秦家等渠,墾中興、西涼、 相 恐動,竄匿 山谷。

黄河

中,受諸部落及潰叛之來降者。

非汝 省 順 王 下 法。 ·毒虐 府 王 王 意。 事 等所當 其 時 刨 (徒積 諸王 頗立。 二年,入奏經略事宜還,以上旨行之,中興遂定。 百姓,凌暴官府,傷王威名,於事體不便。」因歷指其不法者數十事,其傳驚起,去白 召文用謝之曰:「非郎中,我殆不知。 文用謂之曰:「我漢人,生死不足計。所恨者,仁慈寬厚如王,以重 問,請得與天子所遣爲王傅者辨之。」王卽遣其傅訊文用。 念, 醫文用於王, 王怒, 召文用, 使左右雜問之, 意叵測。 一只必鐵木兒鎭西方,其下縱橫,需索無算,省臣不能支,文用坐幕府, 郎 中持此心事朝廷,宜勿怠。」自是譖不行而 文用 其傅 曰:「我 一成鎭 中朝舊臣,不肯 、遠方,而其 天子命吏, 輒面折以

代紀石里。 勸 勵 地地 無間 利畢 年,立司 幽僻。入登州境,見其墾闢有方,以郡守移刺某爲能,作詩表異之。 興,五年之間,政績爲天下勸農使之最。 <u></u> 統石里,阿合馬私人也。 農司,授山東東西道巡行勸農使。 其徒旣讒間安童罷相,即使鷹監奏曰:「自紇石里去, 十二年,丞相安童奏文用 山東自更叛亂,野多曠土,文用巡行勸 為工 於是列郡咸 一部侍

I |部侍郞不給鷹食,鷹且瘦死。」帝怒,促召治之,因急捕文用入見,帝望見曰:「董文用乃爲

爾治鷹食者耶!置不問,別令取給有司。

不必 任之。 議,立驛置法,民力以舒。 可役者無幾, 文用憂之曰:「吾民弊矣,而 病 不堪 重煩吾民 十三年,出文用 民 力役。 得以 且江淮風水, 時耕,而運事 也。」主者曰:「汝言誠然,萬一有不虞,則罪將誰歸!」文用卽手書具官姓名保 會初得江南,圖 爲 衛輝路總管, 亦不廢。諸郡運江淮栗于京師,衞當運十五萬石,文用曰:「民籍 舟不能以時至, 而先爲期會, 是未運而民已因矣。」 乃集旁郡通 又重妨耕作,殆不可。」乃從轉運主者言:「州縣吏卒,足以備用, ·籍、金玉、財帛之運,日夜不絕于道,警衞輸 佩金虎符。 郡當衝要,民爲兵者十之九,餘皆單弱貧 輓,日役數千夫。

沁水平,勢不可開也。」事遂寢。 來,豈惟無衞,將無大名、長蘆矣。」會朝廷遣使相地形,上言:「衞州城中浮屠最高者, 地 ·最下,大雨時行,沁水輒溢出百十里間,雨更甚,水不得達于河,即浸淫及衞,今又引之使 十四年,詣汴漕司言事。 適漕司議通沁水北東合流御河以便漕者,文用曰:「衞爲郡, 纔與

臣言三董文用勳舊忠良,何以不見用一十八年,臺臣奏起文用爲山北遼東道提刑按察使, 十六年,受代歸田里,茅茨數椽,僅避風雨,讀書賦詩,怡然燕居。 裕宗在東宫,數爲臺

列

廷議 所憚,民有所赴訴。 風 御史臺,譬之臥虎,雖未噬 江淮省臣有欲專肆而忌廉察官,建議 采薾然,無可復望者矣。 以爲不可,使阿合馬售私恩, + ·九年,朝廷選用舊臣,召文用爲兵部尚書。 則是按察司者,國家當飭勵之,不可摧 一人,人猶畏其爲虎也。 昔阿合馬用 而朝廷驟斂怨也。 行臺隸行省, 狀上, 事時,商賈賤役,皆行賄 今虚名僅 自是朝廷有大議,未嘗不與聞。 乃使按察司劾去其不可者, 集朝臣 抑 存,紀綱猶不振,一 也。」悉從文用 入官,及事敗,欲 議 之。 文用 議 旦 議 盡 一推 曰:「不可。 然後吏有 去其人, 抑 二十年, 之,則

獻之, 眞仁人之言哉。」世榮竟以是得罪。 中 限,取之以時,猶懼 於右丞之家,則不 擾 爲貴官,陰結貪刻之黨,以錙銖掊克爲功,乃建議曰:「我 也。」 曰:「董尚書眞不虛食俸祿者。」議者出,皆謝文用曰:「君以一言,折聚斂之臣,而厚邦本, 轉禮部尚書、遷翰林、集賢二院學士,知祕書監。 則主者固悅 詔下會議, ·敢知;若取諸民,則有 其得毛之多矣, 人無敢言者。 其傷殘也。 今盡刻剝 文用陽問曰:「此錢取 然而羊無以避寒熱, 說矣。 無遺, 牧羊者, 猶有 百 時中書右丞盧世榮,以貨利得幸 姓乎」世榮不 歲嘗 於右丞之家耶? 卽死 立法治財,視常歲當 1兩剪其毛,今牧 且. 一盡,毛又可得哉 能對。 將取 人日 丞 之於民耶? 旧倍增, 相 ! 民財 剪 安童謂坐 而 其 -權要 民不 毛 亦

而

取

請入奏事,大略言:「疲國家可寶之民力,取僻陋無用之小邦。」列其條目 甚悉。言 上,事 耶」其人意沮,遂稍寬其期。二十三年,朝廷將用兵海東,徵斂益急,有司大爲奸利。文用 伐木、死者數百人、猶欲併建大寺。 文用謂其人曰:「非時役民、民不堪矣、少徐之如何?」長 官者曰:「參政奈何格上命耶。」文用曰:「非敢格上命,今日之困民力而失民心者,豈上意 所遷就,雖數忤之,不顧也。有以帝命建佛塔於宋故宮者,有司奉行甚急,天大雨雪,入山 多傲,同列莫敢仰視,跪起禀白,如小吏事上官。文用至,則坐堂上,侃侃與論是非可否,無 卿者,不在錢穀細務也,卿當察其大者,事有不便,但言之。」文用遂行。行省長官者,素貴 二十二年,拜江淮行中書省參知政事,文用力辭。帝曰:「卿家世非他人比。 **股所以任** 

惲、雷膺、荆幼紀、許楫、孔從道十餘人爲按察使,徐琰、魏初爲行臺中丞,當時以爲極選。 矣。外難未解而 食於丞相府矣。」文用又不答。 丞,獨不附之。桑哥令人風文用頌己功於帝前,文用不答。 方是時,桑哥當國,恩寵方盛,自近戚貴人見之,皆屛息遜避,無敢誰何。 二十五年,拜御史中丞。 內伐其根本,丞相宜思之。」於是遠邇盜賊蜂起,文用持外郡所上盜賊之目, 文用曰:「中丞不當理細務,吾當先舉賢才。」乃舉胡祗遹、王 會朔方軍興、糧糗粗備,而誅求愈急,文用謂桑哥曰:「民急 桑哥又自謂文用曰:「百司皆具 文用以舊臣任中

列

沮撓尚 謂 善視 狀, 臺事之不行也。」忤其意益深,乃摭拾臺事 相當 桑哥曰:「百姓豈不欲生養安樂哉!急法暴斂使至此 詔報文用, 語密而外人不知也。 之。 助之,不當抑之也。 .書省、請痛治其罪。」帝曰:「彼御史之職也,何罪之有! 遷大司農。 時欲奪民田爲屯田,文用固執不可。 御史臺不得行,則民無所赴愬;民 桑哥日誣譖文用于帝曰:「在朝惟董文用戆傲不聽令, 百端,文用日與辨論, 爾。 遷爲翰林學士承旨 (無所赴愬,而 御史臺所 且董文用端謹、朕所素 不爲屈。 以救政事之不 政 於是具奏桑哥姦 日亂, 將 不 知,汝 止

文用 每講說經旨,必附以朝廷故事,丁嚀譬喻,反復開悟,皇孫亦特加敬 二十七年,隆福太后在東宮,以文用舊臣,欲使文用授皇孫經,具奏上,以帝 命命之。

每召入 且 狩三不 爲 臣 聞 三十一年, 刺 帳 至 人 之地 中,問先朝故 君 再三,終不以見。 **猶北辰然**,居其所而衆星拱之,不 文用曰:「先帝新 帝命文用以其諸子入見,文用曰:「臣蒙國厚恩,死無以報,臣之子, 事 て、文用 是歲,世祖崩,成宗將即位 亦盛言先帝虛 棄天下,<br />
陛下巡狩,不以時還,無以慰安元元,<br />
宜趣還 在勤 心納賢、開 遠略也。」帝悟,卽 上都,太后命文用從行。 或 經世 之務,談說或至夜半 Ħ 可其奏。 旣卽位,巡 是行 京師 "也,帝 何能

也。 文用 帝在 自 .東宮時,正旦受賀,於衆中見文用,召使前曰:「吾向見至尊,甚稱汝賢。」 輒親 先帝: 時,每侍燕,與蒙古大臣同列,裕宗嘗就楊 上 賜酒,使毋下 拜 跪 飲,皆異數 取酒

列傳第三十五 董俊

飲之。 祖宗世系功德、近戚將相家世勳績,皆記憶貫穿,史舘有所考究質問,文用應之無遺失。 至是,眷資益厚。是年,詔修先帝實錄,陞資德大夫、三知制誥兼修國史。文用於

少保、(壽)〔趙〕國公,「K〕諡忠穆。 十有四。 大德元年,上章請老,賜中統鈔萬貫以歸,官一子,鄉郡侍養。 子八人:士貞,士亭,士楷,士英,士昌,士恒,士廉,士方。 六月戊寅,以疾卒,年七 贈銀青(光)[榮]祿大夫、

睦也。 酒相勞。 予粥藥。 儉"始終不替。 初,兄文炳及季弟文忠,去事世祖,次文用亦在朝,俱有仰於家,而食者餘百口,文直勤 文直字彥正,俊之第四子也。 性好施而甚仁,里閈或貧不自立,每陰濟其急,不使之知恩所從來。 或止之,曰:「不忍以其賤違吾愛心。」及棄官,浮沉里社,任眞適意,親賓過從,尊 家門日以烜赫,己獨恬然,不見諸辭色。以病卒,年五十有二。 內則養生送死之合禮,外則中表賓問之中度,奉上接下,一敬一愛,藹乎其 剛毅莊栗,簡言笑,通經史法律。爲藁城長官,佩金符。 微至僮病,必手

|忠曰:「吾少讀書、惟知入則孝於親,出則忠於君而已。 文忠字意誠,俊第八子也。歲壬子,入侍世祖潛邸。王鶚嘗言詩,因問文忠能之乎,文 詩非所學也。」癸丑,從征南詔。

,伐宋,與兄文炳、文用敗宋兵於陽羅堡,得蒙衝百艘,進圍**鄂**。

懇悃 忤旨,文忠曰:「丞相素有賢名,今秉政之始,人方傾聽,所請不得,後何以爲。」遂從旁代對, 爲容悅,隨事獻納,中禁事秘,外多不聞。 詳切,如身條是疏者,始得允可。 世 祖 即位 ,置符寶局,以文忠爲郎,授奉訓大夫,居益近密,嘗呼董八而不名。 至元二年,安童以右丞相入領中書,建陳 十事。言 文忠不

者。」文忠對曰:「陛下每言:士不治經講孔孟之道而爲詩賦,何關修身,何益治國!由是海 其說、故以是上惑聖聽、恐非陛下敎人修身治國之意也。」事遂止。 內之士,稍知從事實學。臣今所誦,皆孔孟之言,焉知所謂道學!而俗儒守亡國餘習,欲行 教,道學類禪。 八年,侍講學士徒單公履欲奏行貢舉,知帝於釋氏重教而輕禪,乃言儒亦有之,科舉類 帝怒、召姚樞、許衡與宰臣廷辨。文忠自外入,帝曰:「汝日誦四書,亦道 學

嘗薄汝也。 非預知汝曹不足恃乎」帝深善之。 也。」帝問文忠:「此言何如。」文忠因詰之曰:「似道薄汝矣,而君則貴汝以官,富汝以祿, 者、皆曰:賈似道當國、薄武人而重文儒、將士怨之、莫有鬭志。故大軍旣至,爭解甲歸命 十一年,伐宋,民困供饋,文忠奏免常歲橫征,從之。帝嘗見宋降將,從容問宋所以亡 今有怨於相,而移於君,不肯一戰,坐視國亡,如臣節何!然則似道薄汝者, 有旨徙大都獵戶於郢中,文忠奏止之。 叉請罷 官鬻田 未

器之稅,聽民自爲。

容諫 原之。 知子,所以相救於危急者,蓋爲國平刑,豈望子見報哉」」却其物不受。 必 遽 怒,命殺 贖莫甚,恐乖陛下好生之德。」敕革之。或告漢人毆傷國人,及太府監屬盧甲盜剪官布。 取議中外矣。」因賜文忠金尊,曰:「用旌卿直。」裕宗亦語宮臣曰:「方天威之震,董文忠從 加之重典!宜付有司閱實,以俟後命。」乃遣文忠及近臣突滿分覈之,皆得其誣狀,遂詔 正, 時 帝因責侍臣曰:「方朕怒時,卿曹皆不敢言。非董文忠開悟朕心,則殺二無辜之人, 多盜、詔犯者皆殺無赦。 以懲衆。 實人臣難能者。」太府監屬奉物詣文忠泣謝曰:「鄙人賴公復生。」文忠曰:「吾素非 文忠言:「今刑曹於囚罪當死者,已有服辭,猶必詳讞,是豈可因人一言, 在處繫囚滿獄。文忠言:「殺人取貨,與竊一錢者均死,慘

以臣所知,不若令有司先啓而後聞,其有未安者,則以詔敕斷之,庶幾理順而分不踰,太子 子,累使明習軍國之事,然十有餘年,終守謙退,不肯視事者,非不奉明詔也,蓋朝廷處之未 還。」從之。 丞行省江陵。 其道爾。 自安童北伐,阿合馬獨當國柄,大立親黨,懼廉希憲復入爲相,害其私計,奏希憲以右 十六年十月,奏曰:「陛下始以燕王爲中書令、樞密使,纔一至中書。 自册爲太 夫事已奏決,而始啓太子,是使臣子而可否君父之命,故惟有唯默避遜而已。 文忠言:「希憲,國家名臣。今宰相虚位,不可使久居外,以孤人望,宜早召

必不敢辭其責矣。」帝卽日召大臣,面諭其意,使行之。復語太子曰:「董八,崇立國本者,其

之。文炳爲中書左丞卒,太傅伯顏乃表文忠可相,帝使繼其官,文忠辭曰:「臣兄有平定南 言之,汝用學問何爲!必今日開是省。」三日,廷臣奏以文忠爲侍中,及其屬數十人。近臣 方之勞,可居是位。臣嘗給事居中,所宣何力,敢冒居重職乎!」 不言汝也。」其人忌文忠,欲中害之,然以文忠清慎無過,乃奉鈔萬緡爲壽,求交驩,文忠却 其顯言臣盜詐何事」一帝令言者出,文忠猶訴不止,且攻其害國之姦。 帝曰:「朕自知之,彼 其間,不可。」其言多指文忠。 文忠忿辨曰:「上每稱臣不盗不詐,今汝顧臣而言,意實在臣。 之, 韶廷臣雜議; 且怒翰林學士承旨王磐曰: 「如是有益之事, 汝不入告, 而使南方後至之臣 乘便言曰:「陛下將別置省,此實其時。 然得人則可以寬聖心,新民聽;今聞盜詐之臣與居 禮部尙書謝昌元請立門下省,封駁制敕,以絕中書風曉近習奏請之弊。帝銳意欲行

奪還中書,不報。是冬十月二十有五日,雞鳴,將入朝,忽病仆,帝遣中使持藥投救不及,遂 屯、禁兵、太府、少府、軍器、尚乘諸監,皆領焉。兵馬司舊隸中書,併付文忠。 密院事,卿如故。 十八年,陞典瑞局為監、郎爲卿,仍以文忠爲之。授正議大夫,俄授資德大夫、僉書樞 車駕行幸,詔文忠毋扈從,留居大都,凡宮苑、城門、直舍、徼道、環衞、營 時權臣累請

卒,甚悼惜之,賻錢數十萬。 後制贈光祿大夫、司徒、封壽國公、諡忠貞。

野食子忠濟 忠(範) C嗣] [t]

嚴實字武 叔,泰安長清 人。 略 知書,志氣豪放,不治生產,喜交結施與,落魄里社 間。

屢以事緊獄,俠少輩爲出死力,乃得脫去。

還, 而 宋因以實爲濟南治中,分兵四出,所至無不下,於是太行之東,皆受實節制 淸 實 尉。 為 癸酉秋 衆 長清破,俄以兵復之。 戊寅, 所服 太祖 命爲百戶。 權長淸令。 率兵 自紫荆口 甲戌春,泰安張汝楫 宋 取 有踏于行臺者,謂實與宋有謀,行臺以兵圍之,實擊 益都,乘勝而西,行臺檄實備芻糧 入,分略 山東、河北、河東 據靈巖,遣別 而歸。 將攻長淸,實破走之。 爲守禦計。 金東平行臺調民爲兵, 實 出督租 家避青崖。 以功授長 此 以

家屬 害省事 彰德、大名、磁、洛、恩、博、滑、濬等州戶三十萬來歸, 行 ,實獨以兵赴之,比至,而仲被擒。 庚辰三月, 金河南軍攻彰德, 守將單仲力不支, 降于宋。 進 文曹、濮、單三州,皆下之。 辛巳, 實以兵復靑崖, 實 擒信誅之。 知宋 偏將李信 不足恃。 ,留鎭靑崖,嘗 進攻東平, 數求救。 木華黎承制 七月,謁 太師 金守將和 實請於主 有 拜實 罪,懼誅,乘實 木華黎 金紫光祿大夫、 | 將張林, | 林逗遛不 <u>J</u> 於軍 剛 棄城遁, ·門,擊 之出,殺 行 實 所 其 尙 部

列傳

第

居之。

斌。 年,木華黎之子孛魯取益都:實皆有功焉。 實以帳下兵,陽助而陰伺之。實知勢迫,急赴孛里海軍與之合,遂與義斌戰,宋兵潰,擒義 斌聽其自領,而青崖所掠者則留不造。七月,義斌下真定,道西山,與孛里海等軍相望,分 且盡,乃與義斌連和。義斌亦欲藉實取河朔,而後圖之,請以兄事實。時麾下衆尚數千,義 多歸之。乙酉四月,遂圍東平。實潛約大將孛里海合兵攻之,兵久不(出)[至], [公] 城中食 不旬月,京東州縣復爲實有。是冬,木華黎之弟帶孫取彰德;明年,取濮、東平,又明 壬午,宋將彭義斌率師取京東州縣,實將晁海以青崖降,盡掠實家,義斌軍西下,郡縣

統,凡五十餘城,至是,惟德、兖、濟、單隸東平。丁酉九月,詔實毋事征 「嚴實,眞福人也。」甲午,朝于和林,授東平路行軍萬戶,偏裨賜金符者八人。 先是,實之所 庚寅四月,朝太宗于牛心之幄殿,帝賜之坐,宴享終日,賜以虎符。 伐。 數顧實謂侍臣曰:

我,豈可與執兵刃者同戮,不若留之,以供芻秣。」濮人免者又數萬。 兵力不能及,爲所脅從,果何罪耶!帶孫從之。 上黨皆然。 初,彰德旣下,又破水栅,帶孫怒其反覆,驅老幼數萬欲屠之。 時兵由武關出襄、鄧,實在徐、邓問,以爲河南破,屠戮必多,乃載金繒往贖之, 繼破濮州,復欲屠之。實言:「百姓未嘗敵 實曰:「此國家舊民,吾 其後於曹、楚丘、定陶、

衆。 死。 且約 之別將, 實部 束諸將,毋敢妄有殺掠。 叉 法,藏匿 聞 曲 義斌 有 逃歸 敗, 逃者,保社 將奔 益都 者數十人,益都破,皆獲之,以爲必殺, 怨爲嫌。 河南,實族屬在東平者,皆爲所害。 皆 坐。 靈壁一縣,當誅者五 其寬厚長者類若此 逃亡無所 託, 殭 尸蔽 萬 人,實悉救之。 野, 實 河南破,實獲義深妻子,厚 命 實置 作糜粥, 不 問。 會大饑,民 盛置 王義深者 一道傍, 北 徙者 全 周 義 活 多餓 斌 卹 者

武惠。 庚子卒,年五十九。 子忠貞,金紫光祿 大夫;忠濟, 遠近悲悼,野哭巷祭,旬月不已。 忠嗣、忠範、忠傑、忠裕、忠祐 中統二年, 追封實爲魯國公, 諡

之,送還鄉里,終不以舊

宗,纽 道第 --忠濟, 命佩虎符、襲東平路行軍萬戶、管民長官、開府布 領兵略地淮 一名忠翰, 、漢、偏裨部曲、戮力用命。 字紫芝,實之第二子也。 定宗、憲宗卽位之始、皆加 儀觀雄偉, 善騎射。 政, 一法其父。 辛丑,從其父入 養老尊賢, 褒 龍 治 見太 爲

向 由 戶,以次諸弟暨勳將之子爲千戶,城戍宿州 無前。 間 道會鄂。 忠濟初統千戶十有七、乙卯、朝命括新軍 大臣 親 有言其威權太盛者。 **率勇士**,梯衝登城。 中統二年,召還京師,命忠範代之。 師還,忠濟選勇敢二千,別命千戶將之, 、蘇縣,而忠濟皆統之。 山東、盆 兵二萬有奇。 己未、世祖 忠濟弟 忠嗣 甲仗精銳 南 伐、韶 忠範 率師 爲萬 所

省事,以老辭。二十九年,賜鈔萬五千縎、宅一區,召共子踰入侍。三十年,卒。 宋子貞、劉肅、李昶、徐世隆,俱爲名臣。至元二十三年,特授資德大夫、中書左丞、行江浙 之,悉命發內藏代償。東平廟學故隘陋,改卜高爽地于城東,教養諸生,後多顯者。 忠濟治東平日,借貸於人,代部民納逋賦,歲久愈多。及謝事,債家執文券來徵。 幕僚 帝聞 如

于義命,世以是多之。後諡莊孝。 |忠濟統理方郡凡十一年,爵人命官,生殺予奪,皆自己出。 及謝去大權,貴而能貧,安

邵伯埭、首立戰功。己未南征,從忠濟渡淮,分兵出(桂)[挂]車嶺、江〇與宋兵相拒三晝夜, 殺獲甚衆,始達蘄州。 及渡江抵鄂,分部攻城九十餘日,戰甚力。 師還,授金虎符。 東平人匠總管,遙領單州防禦使事。乙卯,充東平路管軍萬戶。丁巳,從忠齊略地揚州,取 忠嗣、實之第三子也。少從張澄、商挺、李楨學、略知經史大義。辛亥,其兄忠濟授以

不得親政,於是罷官家居。至元十年,卒。 所 爲宋兵所據。 殺獲。 中統三年,李璮叛、宋兵攻蘄(州)[縣]、三三勢張甚、徐州總管李杲哥降于宋,齊魯山寨 按脫論功以聞,賜銀二百兩、幣五十端。四年,朝廷懲靑齊之亂,居大藩者,子弟 忠嗣從大帥按脫救蘄縣,復徐州,執李杲哥殺之。攻鄒之嶧山、滕之牙山,多

#### 校勘記

- [一](文忠)文直[文忠] 道光本與本書原目錄及本卷傳文次序合,從改正。
- (三)(三)(乙)酉 道光本與本書卷一太祖紀二十年乙酉歲二月條、卷一四七史天倪傳合,從改。
- 僊走死 蒙史云:「舊傳云仙走死,殊誤。按金史武仙傳,仙以天興三年金亡後五月始走死澤

州。」疑此處「死」字行。

文用字彦材 常山貞石志卷二一閻復董文用神道碑、吳文正集卷三四董文用墓表「彥材」均作

「彦才」、疑作「才」是。

大夫、其加資德大夫則在大德元年上章請老時。疑此處「資德」爲「資善」之誤。 陞資德大夫按學古錄卷二○董文用行狀、吳文正集卷三四董文用墓表,詔修實錄時,陞資善

樂祿大夫。考元制,文散官第三十八階**爲金紫光**祿大夫,第三十七階爲銀靑榮祿大夫,並正一 贈銀青(光)〔榮〕祿大夫少保(壽)〔趙〕國公 沈濤常山貞石志董文用神道碑跋云:「碑題贈銀青

常山貞石志卷二一董文用神道碑、吳文正集卷三四董文用墓表改。 品、無銀青光祿之階、則本傳誤也。」從改。又按追封壽國公者爲董文忠、非文用、「壽」誤,今據

てより 忠(範)[嗣] 據本書原目錄及本卷傳文改。

列 傳 第三十 五 校 勘 記

- 兵久不(出)(至) 據遺山集卷二六嚴實神道碑改。 新編已校。
- ┌九 ∪ 辛丑從其父入見太宗 按嚴忠濟父嚴實死于庚子,不得于翌年辛丑入朝,此處史文有誤。
- [10] (桂)[挂]車嶺 按元豐九城志、讀史方輿紀要、嘉慶一統志等書皆云淮西桐城有挂車嶺。 挂車

宋兵攻蕲(州)[縣] 之名,早見于三國志卷五六朱桓傳。「桂」誤,今改。蒙史已校。

即有一救蘇縣」,「州」誤,今改。

蒙史云:「蘄縣時屬宿州,非蘄春所倚之蘄州也。 舊傳誤作蘄州。」按下文

## **元史卷一百四十九**

### 列傳第三十六

#### 耶律留哥

副之,營帳百里,威震遼東。 州發卒追捕、留哥皆擊走之。 民一戶,以二女眞戶來居防之。 耶律留哥,契丹人,仕金為北邊千戶。太祖起兵朔方,金人疑遼遺民有他志,下令遼 因與耶的合勢募兵,數月衆至十餘萬,推留哥爲都元帥,耶的 留哥不自安。歲壬申,遁至隆安、韓州,糾壯士剽掠其地。

還奏,當以征遼之責屬爾。」 何以爲信。」留哥乃率所部會按陳于金山,刑白馬、白牛,登高北望,折矢以盟。 國,道阻馬疲,故逗遛於此。」按陳曰:「我奉旨討女眞,適與爾會,庸非天乎! 太祖命按陳那行、渾都古行軍至遼,遇之,問所從來,留哥對曰:「我契丹軍也,往附大 然爾欲效順, 按陳曰:「吾

列

傅第三十六

耶律留

哥

引 兩 千 者 賞 騎 金 會留 銀 遣 亦 哥 胡 如之,仍 沙 與金兵對 帥 軍 世 六 製千 + 陣于 萬 戶 號 迪吉腦 0 白 留 萬,來攻 哥 兒。 度 不 留 留 能 哥 哥 敵 以 ~ 亟 聲言 姪 安奴 騳 表 有 爲 得留 聞 先鋒,橫衝胡 帝 哥 骨 命 按 陳 兩 者, 沙 孛 軍 賞 都 ·, 大 歡 金 敗之,以所 30 兩 魯 都 肉

俘

峭

重

獻

帝

召按陳還,而

以

可

特哥

副留哥

屯

其

地

哥,拒 遣使 餘萬 使 僧 青 家 求 攻 狗 奴 衆 之。 附。 耶 誘 以 敗之。 遼東 以 的、 於是 留 重 哥逆 李 未定,癸酉三月 祿 使降, 盡 家奴等為丞相、元帥、 戦于 有 遼東 不從。 歸仁 州 那 縣 ,推留哥為 青狗 逐都 北 河 度其 上 咸 尙 平, 金 勢不 書, 王, 兵 號 統 立 大 可 爲 古與、 妻 潰, 反反 中京。 姚 定之。 里氏 萬 著撥 奴 金左副 ( 收散 爲妃,以 行 金主 元 卒 帥 怒, 元 奔東京。 其屬 府 帥 事 復遣宣 移 ), 國 耶 刺 厮 都, 安東 號 撫萬奴 不 遼。 以 爲 同 兵十萬攻留 郡王, 甲戌, 知 領軍 阿憐懼 坡沙 四十 金遣

是逆 哥 金 稱 銀 牌 天 帝 乙亥,留 也,逆 留留 五 百 哥 至 天 哥 日 一按坦 者 破 向 必 東京,可 有 者 孛都罕 大 吾 答。」 與 特哥娶萬奴之妻 按陳 入 觐 衆 請 那 愈 衍 :盟,願 力,不 附 李 獲已,稱疾不 大蒙 **僊娥**,留哥 古國 削 出 不直之,有隙。 平 疆 潛 字。 與 其 子 倘 薛 食 旣而 其 闍 言 奉 耶 金 而 厮 幣 自 不 九 爲 等 東 勸留

帝 曰:「漢人先納 款者,先引 見。」太傅阿海奏曰:「劉伯林納款最先。」帝曰:「伯林雖先, 列傳第三十六 耶律留哥

客也。 草青馬肥,資爾甲兵,往取家孥。」 衆叛,殺所遣三百人,惟三人逃歸。 萬奴之妻,悖法尤甚。」其拘縶以來。 可特哥懼,與耶厮不等給其衆曰:「留哥 賜金虎符,仍遼王。 白之於天,乃可受。」遂以白氊陳於前, 三百 迫 於重 人往取之,汝亦遣 圍而來,未若留哥仗義效順也,其先留哥。」旣見,帝大悅,謂左右曰:「凡留哥 叉問 人偕往。」留哥遣大夫乞奴、安撫禿哥與俱。 戶籍幾何,對曰:「六十餘萬。」帝曰:「可發三千人爲質, 朕遣蒙古 事聞,帝諭留哥曰:「爾毋以失衆爲憂,朕倍此數封 七日而 後納 諸庫。 因問 舊 何官,對曰:「遼王。」帝命 且命詰 可特哥 已死。」 曰:「爾 逐 所獻, 以 其

留哥引蒙古軍數千適至,得兄獨刺幷妻姚里氏,戶二千。鴉兒引敗軍東走,留哥追擊之,還 監國,與其行元帥鴉兒,分兵民爲左右翼,屯開、保州關。 度遼河,招撫懿州、廣寧,徙居臨潢府。乞奴走高麗,爲金山所殺,金山又自稱國王,改元天 兄獨刺爲平章,置百官。方閱月,其元帥青狗叛歸于金,耶厮不爲其下所殺,推其丞相乞奴 統古與復殺金山而自立,喊舍又殺之,亦自立。 丙子, 乞奴、金山、青狗、統古與等推耶**厮不**僭帝號於澄州, 國號遼, 改元天威, 以留哥 金蓋州守將衆家奴引 兵攻敗之。

之,喊舍自經死。 戊寅, 留哥引蒙古、契丹軍及東夏國元帥胡上兵十萬,圍喊舍。高麗助兵四十萬,克 徙其民於西樓。 自乙亥歲留哥北觀,遼東反覆,耶厮不僭號七十餘日,金

山二年,統古與、喊舍亦近二年,至己卯春,留哥復定之。

救出 帝于 奴於 河西 當令善哥襲其父爵。」姚里氏拜且泣曰:「薛闍者、留哥前妻所 日三 氏奏曰:「留哥旣沒, 子所出,若立之,是私己而蔑天倫,婢子竊以爲不可。」帝嘆其賢,給驛騎四十一 權 領 俘 之,身中槊,又於蒲華、尋思干城與回回格戰,傷於流矢。 薛闍 朝,惟遣其季子(宗)[永]安從姚里氏東歸。[三] 河 其衆者七年。 庚辰, 西 人九口、馬九匹、白金九錠,幣器皆以 (含)[今]為蒙古人矣,日其從朕之征西域也, 呵 留哥卒,年五十六。 里湫 城。 丙戌,帝還,姚里氏攜次子善哥、鐵哥、永安及從子塔塔兒, 官民乏主,其長子薛闍扈從有年, 帝曰:「健鷹飛不到之地,爾婦 妻姚里氏 入奏,會帝征西域, 九計,許以薛闍襲爵,而留善哥、 人乃能來耶! 回 願以 回 圍太子於合迷城, 次子善哥代之,使歸 皇太弟承制以姚里氏佩虎符, 出,嫡子也,宜立。 以是積 |賜之酒,慰勞甚至。 功爲拔都魯,不可遣, ·, 從 塔塔兒、收國 孫收 薛闍 征 善哥者 國 河西,賜 引千軍 奴, 姚里 婢 見

情 貞 整可尚。 己丑,從太宗南征,有功,賜馬四百、牛六百、羊二百。 庚寅,帝命與撒兒台東征,收其 爾父,則 丁亥 ,帝召薛闍謂曰:「昔女眞猖 繼 爾猶吾子,爾父亡矣,爾其與吾弟孛魯古台並轄軍馬,爲第三千戶。」薛闍 而 奸人耶厮不等叛,人民離散。 獗,爾父起兵,自遼東會朕師,又能割愛,以爾事朕,其 欲食爾父子之肉者,今豈無人乎! 肸 以兄

父遺民,移鎭廣寧府,行廣寧路都元帥府事。 自庚寅至丁酉,連征高麗、東夏萬奴國,復戶

六千有奇。戊戌,薛闍卒,年四十六。

以石剌爲國宣力者三代,同命益金更造所佩虎符賜之, 己未卒,年四十五。 子收國奴襲爵,行廣寧府路總管軍民萬戶府事,易名石剌,征高麗,有功。辛亥,睿宗 佐諸王也苦及扎刺台控制高麗。

併廣寧于東京、去職、是歲卒、年三十六。子忒哥。 長子古乃嗣。中統元年,征河西,三年,征李璮,破嶧山:以功皆受賞。 至元六年,朝廷

至元元年卒,年五十二。子天祐,襲廣寧千戶,改廣寧縣尹。 充拔都魯。 壬辰, 引兵三千渡河, 會大軍平金。後伐宋, 拔光州、棗陽, 由千戶遷廣寧尹。 薛閣弟善哥,賜名蒙古歹,命從親王口溫不花。己丑,從攻破天城堡、鳳翔府,以功襲

# 劉伯林 [黑馬 元振 元禮] [8]

國為 不能 《何官,對曰:「都提控。」即以元職授之,命選士卒爲一軍,與太傅耶律禿懷同征討,招降 一敵,乃縋城詣軍門請降。太祖許之,遣禿魯花等與偕入城,遂以城降。帝問伯林,在金 劉伯林,濟南人。好任俠,善騎射,金末爲威寧防城千戶。 壬申歲,太祖圍威寧,伯林知

列

傅第

山後諸州。

燕京。 西京留守,兼兵馬副元帥。 地喪亂,人艱於食,力爭而止之。 攻下太原、平陽。己卯,破潞、絳及火山、聞喜諸州縣。 太祖 丁丑,復從大軍攻下山東諸州。 北還,留伯林屯天成,遏金兵,前後數十戰。 癸酉,從征山東,攻梁門、逐城,下之。乙亥,同國王木華黎攻破 部曲所獲俘虜萬計、悉縱之。 木華黎上其功,賜名馬二十匹、錦衣一襲。 進攻西京,錄功,賜金虎符,以本職充 時論欲徙聞喜民實天成,伯林以北 戊寅,同

封秦國公,諡忠順。 者後必封,吾之所活,何啻萬餘人,子孫必有興者乎!」辛巳,以疾卒,年七十二。累贈太師, 在威寧十餘年,務農積穀,與民休息,鄰境凋瘵,而威寧獨爲樂土。 子黑馬。 嘗曰:「吾聞活千人

略,年幾弱冠,隨父征伐,大小數百戰,出入行陣, 即奮劍入圍,手殺金兵數人,十三人皆得脫。 黑馬名嶷,字孟方,始生時,家有白馬產黑駒,故以爲小字,後遂以小字行。 略無懼色。 歲壬午,襲父職,爲萬戶,佩虎符,兼都 嘗獨行,遇<u>金</u>兵圍本部十三 驍勇有 志

癸未,從國王木華黎攻鳳翔,不克,回屯絳州。 又從孛羅攻西夏唐兀。 甲申,從按眞

元帥。

那 延攻破東平、大名。 乙酉,金降將武隱據眞定以叛,從孛羅討之,破眞定,武僊遁去。 金

將忽察虎以兵四十萬復取山後諸州,黑馬逆戰隘胡嶺,大破之,斬忽察虎

次之。 州 陽、宣德等路管軍萬戶,仍僉太傅府事,總管漢軍。從征回回、河西諸國,及破鳳翔、西(河) 東下。至三峯山,遇金大將合達,與戰,大破之,虜合達,斬首數萬級,乘勝攻破香山寨及鈞 [和]、沔州諸城堡。[吾] 庚寅,睿宗入自大散關,假道於宋以伐**金,命黑**馬先由興元、金、房 ,賜西錦**、**良馬、貂鼠衣,以旌其功。 歲己丑,太宗卽位,始立三萬戶,以黑馬爲首,重喜、史天澤次之,授金虎符,充管把平 會增立七萬戶,仍以黑馬爲首,重喜、史天澤、嚴實等

註誤者五百餘人,有司議盡戮之,黑馬止誅其爲首者數人,餘悉從輕 |][[ 入覲,帝慰勞之,賜銀鼠皮三百爲直孫衣。 辛丑,改授都總管萬戶,統西京、河東、陝西諸軍萬戶,夾谷忙古歹、田雄等並 癸巳,從破南京,賜綉衣、玉帶。 甲午,從破蔡州,滅金。乙未,同都元帥答海紺卜征西 葬命巡撫天下,察民利病。 典。 應州郭志全反,脅從 一聽節

禿立。 已,入觀,請立成都以圖全圈,帝從之。成都既立,就命管領新舊軍民小大諸務,賜號也可 癸丑,從憲宗至六盤山。 商州 與宋接境,數爲所侵,命黑馬守之,宋人斂兵不 · 敢犯。

馬曰:「國事方急,以此死,無憾。」遂卒,年六十三。 累贈太傅,封秦國公,諡忠惠。 子十二 以黑馬有膽智,使乘驛矯詔竟誅之。 年,命兼成都路軍民經略使。瀘州被圍,黑馬已屬疾,猶親督轉輸不輟,左右諫其少休,黑 人,元振、元禮顯。 中統元年,廉希憲、商挺宣撫川、陝,時密力火者握重兵,居成都,希憲與挺慮其爲變, 其子訴于朝,世祖諭之曰:「茲股命也,其勿復言。」三

宋,駐驆釣魚山,以元振與紐鄰爲先鋒。 元振攝萬戶,時年方二十。[8] 旣蒞事,號令嚴明,賞罰不妄,麾下宿將皆敬服之。|憲宗伐 元振字仲舉,黑馬長子也。隨父入蜀,立成都。 會商、鄧間有警,命黑馬往鎭商、鄧,以

以瀘降,情僞不可知,汝無爲一身慮,事成則爲國家之利,不成則當效死,乃其分也。」元振 李全何異,整此舉無可疑者。」遂行。 國,賞罰無章,有功者往往以計除之,是以將士離心,且整本非南人,而居瀘南重地,事勢與 送款求降,黑馬遣元振往受之。 諸將皆曰:「劉整無故而降,不可信也。」元振曰:「宋權臣當 至爐,整開門出迎,元振棄衆而先下馬,與整相見,示以不疑。明日,請入城,元振釋戎服, 中統元年,世祖卽位,廉希憲、商挺奏以爲成都經略使總管萬戶。 黑馬戒之曰:「劉整,宋之名將,瀘乃蜀之衝要,今整遽 宋瀘州守將劉整密

從數騎,與整聯轡而入,飲燕至醉,整心服焉。 獻金六千兩、男女五百人,元振以金分賜將

士,而歸還其男女。

急而 勢如 兵,大敗之,斬其都統一人,興退走。捷聞,且自陳擅造金銀牌罪,帝嘉其通於權變,賜錦衣 善游者齎蠟書至成都求援,又權造金銀牌,分賞有功。 襲、白金五百兩。入朝,又賜黃金五十兩、弓矢、鞍轡。 (乘)[棄]之。[+]且瀘之得失,關國家利害,吾有死而已。」食將盡,殺所乘馬犒將士,募 此,宜思變通,整本非吾人,與俱死,無益 宋瀘州主帥兪興、率兵圍瀘州、晝夜急攻、自正月至五月、城幾陷、左右勸元振曰:「事 也。」元振曰:「人以誠歸我,旣受其降,豈可以 未幾,援兵至,元振與整出城合擊興

裁抑,遂降爲成都副萬戶。十一年,命兼潼川路副招討使。十二年卒,年五十一。 黑馬卒,元振居喪,起授成都軍民經略使。至元七年,時議以勳舊之家事權太重,宜稍

西道宣慰司事。 韋 [釣魚山, 數戰有功。 子緯,數從父行軍。 入朝,進四川西道宣慰使,拜陝西行省參知政事,卒。 攻合州,授潼川路副招討,遷副都元帥,復授管軍萬戶,遷同知四川 元振卒,緯襲職,佩虎符,爲萬戶。 守潼川,創立逐寧諸處山寨。從

元禮 ,黑馬第五子也。 性沉厚有謀,常從父在軍中。歲甲寅,授金符,爲京兆路奧魯萬

戶。中統四年,遷興元、成都等路兵馬左副元帥。

披靡 金三錠、名馬一匹、金鞍轡、弓矢,召入朝,命復還潼川,立蓬溪寨。 得入,潼川非 屢破之,復大戰<mark>蓬溪,</mark>自寅至未,勝負不決,激厲將士曰:「此去城百里,爲敵所乘,則城不可 纔數千,衆寡不敵,諸將登城望貴軍,有懼色。<br />
元禮曰:「料敵制勝,在智不在力。」 ,將士咸奮,無一不當百,大敗貴兵,**斬首萬餘級**,生擒千餘人。 至元元年,遷潼川路漢軍都元帥。二年九月,宋制置夏貴率軍五萬犯潼川,元禮所領 國家有矣。 丈夫當以死戰取功名,時不可失也。」即持長刀,大呼突入陣,所向 捷奏,賜錦衣二襲、白 乃出戰,

費財力、元禮力爭之、寶臣是其言、遂興役、七日而畢、宋人駭其速。 入朝,乞解官養母,從之。九年,起授懷遠大將軍、延安路總管,卒。 之路。」世祖從之。四年,命平章趙寶臣往視可否,或以爲眉州荒廢已久,立之無關利害,徒 元 禮又奏:「嘉定去成都三百六十里,其間舊有眉州城,可修復之,屯兵以扼嘉定往來 元禮鎭守眉州五年,召

### 郭寶玉〔德海 侃〕公

汾陽郡公,兼猛安,引軍屯定州。歲庚午,童謠曰:「搖搖罟罟,至河南,拜閼氏。」旣而太白 郭 寶玉字玉臣,華州鄭縣人,唐中書令子儀之裔也。通天文、兵法,善騎射。 金末,封

經天,寶玉嘆曰:「北軍南,汴梁卽降,天改姓矣。」金人以獨吉思忠、僕散揆行中書省, 領兵

築鳥沙堡,會太師木華黎軍忽至,敗其兵三十餘萬,思忠等走,寶玉舉軍降。

軍,漢人有田四頃、人三丁者簽一軍,年十五以上成丁,六十破老,站戶與軍戶同,民匠限地 章,如出軍不得妄殺;刑獄惟重罪處死,其餘雜犯量情笞決,軍戶,蒙古、色目人每丁起一 用,宜先取之,藉以圖金,必得志焉。」又言:「建國之初,宜頒新令。」帝從之。於是頒條畫五 頃,僧道無益於國、有損於民者悉行禁止之類:皆寶玉所陳也。 木華黎引見太祖,問取中原之策,寶玉對曰:「中原勢大,不可忽也。西南諸蕃勇悍可

山,復帥抄馬從錦州出燕南,破太原、平陽諸州縣。 不在天上,至則取矣。」帝壯之,授抄馬都鎭撫。癸酉,從木華黎取永淸,破高州,降北京、龍 帝將伐西蕃,患其城多依山險,問實玉攻取之策,對曰:「使其城在天上,則不可取,如

前,破護岸兵五萬,斬大將佐里,遂屠諸壘,收馬里四城。 次暗木河、敵築十餘壘、陳船河中、俄風濤暴起,寶玉令發火箭射其船,一時延燒,乘勝直 迎 剖牛腹置其中,少頃,乃蘇。 了戰方酣,<br />
實<br />
玉望其衆,疾呼曰:「西陣走矣!」<br />
其兵果走,追殺幾盡。 甲戌,從帝討契丹遺族,歷古徐鬼國訛夷朶等城,破其兵三十餘萬。 尋復戰,收別失八里、別失蘭等城。次忽章河,西人列兩陣 進兵下撏思干城 寶玉胸中流矢,帝

列傳

雪山 功 封崑崙山 ,累遷斷 寶玉 辛巳 爲玄極 事官,卒于賀蘭山。 追之,遂奔印度。 可 弗 叉 王,大鹽池 國 唯算端罕破乃滿國,引兵據撏思干,聞帝將至,棄城 爲惠濟王。 帝駐 子德海, 大雪山前,時谷中雪深 德山。 從柘柏、速不台二先鋒 德山以萬戶破 二丈,寶玉 陝州 收契丹、 ′,攻潼 請 封 渤 關 南 Щ 卒。 走,入鐵門,屯大 海等諸國 Ш 神 、壬午 ·三月,

知 父 **育玉** 德 海 :字大洋,資貌奇偉,亦通 北 降,遁 入太行山,大軍至,乃出 天文、兵法。 降,爲抄馬 金末, 彈 爲謀克, 壓。 擊宋將彭義斌於山東,敗之。

Щ 野· 敵 吐蕃 從 軍 先鋒 帥 動 尼倫 柘 乘之, 柏西征,渡乞則里八海,〔10〕攻鐵山,衣幟與敵軍不相辨,乃焚蒿爲號,煙焰漫 、回紇帥阿必丁 斬首三萬級。 反,復破斬之。 踰雪嶺 西北萬 里,進軍 次答里國,悉平之。 乙 酉, 還至崢

海導 轉戰 軍由洛陽來會于三峯山,金人溝地立軍圍之。 大將魁欲那拔都,假道漢中,歷荆、襄而東,與金將武隱軍 人,直擣(凌風)[風 戊子春,從元帥 **僊**敗走, 斬首二萬餘級,復破金移剌粘 闊 陵〕渡寨、三一後兵 闊 出游騎入關中,金人閉關 不至,引 哥軍于鄧。 還。 拒守,德海引驍騎五百,斬關 睿宗令軍中祈雪, 又燒羊胛骨, 己丑 冬十一月,至鈞 秋,破南山 十萬遇於白河,德海 八十三寨,陝西 州 辛卯 入, 殺守者 春正 ト得吉 提孤軍 平。

陽。又破金將合喜兵於中牟,完顏斜烈復 完顏哈達、 兆,夜大雪,深三尺,溝中軍僵立,刀槊凍不能舉。 以功遷右監軍。 移刺 蒲兀走匿 壬辰正月,破金師於黃龍岡。 浮 圖 E, 德海 命掘 帥軍十萬來拒,戰于鄭,先登破之,殺其都尉 浮圖 癸巳,取申、唐二州。 基, 我軍 出 · 衝 圍 其柱 而出,金 而焚之,完顏斜烈單騎遁還洛 甲午, 人死者三十餘萬,其 河南復叛,德海 左崇。 帥

通事合住等領之,餘皆爲民。 子侃 先是,太宗詔 大臣忽都虎等試天下僧尼道士,選精通經文者千人,有能工藝者,則 又詔天下置學廪,育人材, 立科目,選之入仕,皆從德海之請 命小

往討之,砲傷其足,以疾歸,卒。

也。

閼伯臺, 辰,金將伯撒 侃字仲和,幼爲丞相史天澤所器重,留于家而敎養之。 即從速不台攻汴西門, 復取衛州 侃 拒之,破其兵四萬於新衛 金元帥崔立降。 以功授總把。 州 遂渡河,襲金主,至歸德,敗其 弱冠 從天澤屯太康,復以下德安 爲百戶 , 鷙勇有謀略。 兵於 壬

置壽 水中,侃 壬子,送兵仗至和林,改抄馬那顏。 破 其 、兵五 萬一下一 百二十八城,斬其將忽都答而 從宗王旭烈兀 西征。 兀朱算灘。 癸丑,至木乃兮。 算灘 華言王也。 其 國塹道,

功爲千戶

列

傅

世,勝 來降。 侃追之,至暮,諸軍欲頓舍,侃不聽,又行十餘里,乃止。 夜暴雨,先所欲舍處水深數尺。 明 以防其遁。城破,合里法算灘登舟,覩河有浮梁扼之,乃自縛詣軍門降。其將紂答兒遁去, 檀木,舉火焚之,香聞百里,得七十二弦琵琶、五尺珊瑚燈檠。 兩城間有大河,侃預造浮梁 拶答而算攤降。至乞石迷部,忽里算攤降。 西戎大國也,[18]地方八千里,父子相傳四十二 H 下令聞鉦聲則起。敵兵果來,伏發,盡殺之,海牙算灘降。又西至阿剌汀,破其游兵三萬,薦 之,莫能克。侃架砲攻之,守將(下)[火]者納失兒開門降。日三旭烈兀遣侃往說兀魯兀乃算灘 ,獲紂答兒,斬之,拔三百餘城。 丙 兵數(千)[十]萬。[三]侃兵至,破其兵七萬,屠西城。又破其東城,東城殿宇,皆搆以沉 其父阿力據西城,侃攻破之,走據東城,復攻破殺之。丁巳正月,至兀里兒城,伏兵, 辰,至乞都卜。其城在(檐)[擔]寒山上,CIEJ 懸梯上下,守以精兵悍卒,乃築夾城圍

襲,殺病卒,可乃算灘大驚曰:「東天將軍,神人也。」遂降。 已休,復驅兵起,留數病卒,西行十餘里頓軍,下令軍中,銜枚轉箭。敵不知也,潛兵夜來 侃與戰,大敗之,巴兒算灘降,下其城一百八十五。又西行四十里,至密昔兒。〔日〕會日暮, 為備,侃曰:「欺敵者亡,軍機多詐,若中彼計,恥莫大焉。」乃嚴備以待。 住石果來邀我師, 又西行三千里,至(大)[天]房,江公其將住石致書請降,左右以住石之請爲信然,易之不

懼,來降,得城一百二十。西南至乞里彎,忽都馬丁算灘來降。 也。」卽來降。 至賓鐵,侃以奇兵奄擊,大敗之,加葉算灘降。己未,破兀林游兵四萬,阿必丁算灘大 戊午,旭烈兀命侃西渡海,收富浪。侃喻以禍福,兀都算攤曰:「吾昨所夢神人,乃將軍 師還,西南至石羅子,敵人來拒,侃直出掠陣,一鼓敗之,換斯干阿答畢 西域平。 侃以捷告至釣魚

如其策。 揚、廬諸城,彈丸地耳,置之勿顧,而直趨臨安,疾雷不及掩耳,江淮、巴蜀不攻自平。」後皆 曰:「宋據東南,以吳越爲家,其要地,則荆襄而已。今日之計,當先取襄陽,旣克襄陽,彼 世祖 即位,侃上疏陳建國號、築都城、立省臺、與學校等二十五事,及平宋之策,其略

山,會憲宗崩,乃還鄧,開屯田,立保障。

哥。 州總管。杲哥之弟驢馬,復與夏貴以兵三萬來擾邊境,侃出戰,斬首千餘級,奪戰艦二百。 無資糧,外無救援,築城環之,坐待其困,計日可擒也。」帝然之,賜尙衣弓矢。 俱反,宋夏貴復來犯邊。史天澤薦侃,召入見,世祖問計所出,曰:「羣盜竊發,猶柙中虎。內 夏貴焚廬舍,徙軍民南去,侃追貴,過宿遷縣,奪軍民萬餘人而還。 至元二年,有言當解史天澤兵權者,天澤遂遷他官,侃亦調同知滕州。 中統二年,擢江漢大都督府理問官。(三〇三二年二月、日三益都李璮及徐州總管李杲哥 賜金符,爲徐、邳二 三年,侃上言 馳至徐,斬杲

列傅

務、擢爲萬戶、從軍下襄陽,由陽羅上流渡江。江南平、遷知寧海州、居一年、卒。 道士胡王反,討平之。七年,改白馬令,僧臧羅漢與彰德趙當驢反,又平之。帝以侃習於軍 出,足供軍旅一日之需。」四年,徙高唐令,兼治夏津、武城等五縣。五年,邑人吳乞兒、濟南 「宋人覊留我使,宜興師問罪。 淮北可立屯田三百六十所,每屯置牛三百六十具,計一屯所

侃行軍有紀律,野爨露宿,雖風雨不入民舍,所至興學課農,吏民畏服。子秉仁、秉義

#### 石天應

元帥。 南征。 應旌旗色用黑,人目之曰黑軍。屢從木華黎,大小二百餘戰,常以身先士卒,累功遷右副 太師、國王木華黎南下,天應率衆迎謁軍門。木華黎卽承制授興中府尹、兵馬都提控,俾從 石天應字瑞之,興中永德人。 天應造戰攻之具,臨機應變,捷出如神,以功拜龍虎衞上將軍、元帥右監軍,戍燕。天 善騎射,豪爽不羈,頗知讀書,鄉里人多歸之。太祖時,

軍所梗,緩急非便,宜命將守之,多造舟楫,以備不虞,此萬世計也。」木華黎然之,表授金紫 曰:「西戎雖降,實未可信。 辛巳秋八月,從木華黎征陝右,假道西夏,自東勝濟河,南攻葭州拔之。 此州當金、夏之衝,居人健勇,倉庫豐實,加以長河爲限,脫爲敵 天應因說太師

**葭守王公佐收合餘燼,攻函谷關,將圖復故地,及見橋成,遂潰去。於是分兵四出,悉定葭、** 耳。 留屯於此,今聞河〔中〕東西皆平川廣野,こら可以駐軍,規取關陝,諸君以爲如何。」或諫曰: 綏之地。 附者爭組 要 內旣定,長河以南,在吾目中矣。吾年垂六十,老耄將至,一旦臥病牀第,聞後生輩立功名, 北接汾、晉,西連同、華,地五千餘里,戶數十萬,若起漕運以通餽餉,則關內可剋期而定,關 之悔。」天應曰:「葭州正通鄜、延,今鄜已平,延不孤立,若發國書,令夏人取之,猶掌 「河中雖用武之地,南有潼關,西有京兆,皆金軍所屯,且民新附,其心未一,守之恐貽噬臍 死不瞑目矣。 路 且國家之急,本在河南,此州路險地僻,轉餉甚難,河中雖迫於二鎭,實用武立功之地, 一日,謁木華黎於汾水東,木華黎諭以進取之策。 秋 九月,遂移軍河中。 澤勇而 丽 去、敵乘隙 男兒要當死戰陣以報國,是吾志也」 ·嗜酒,是夕,方醉臥林中,金兵由間道已直抵城下。 入。天應見火舉,知敵已入,奮身角戰,左右從者四十餘騎,皆曰: 旣而金軍果潛入中條,襲河中。 天應還鎮, 召將佐謂曰: 「吾累卿等 天應知之,先遣驍將吳澤伏兵 時兵燼後,守具未完,新

中物

光祿

多言水漲波惡,恐勞費無功,天應下令曰:「有沮吾事者,斷其舌!」橋成,諸將悅服。 先時,

大夫、陝西河東路行臺兵馬都元帥,以勁兵五千,留守葭蘆。遂造舟楫,建浮橋,諸將

不武 吳澤誤我。」或勸西渡河,天應曰:「(先)先時 也。 縦太師不罪我, 何面 目以見同列 乎 ! 人諫我南遷、「川〇」吾違衆而來此,事 今日 惟 死 而 已,汝等勉之。」少頃,敵兵四合, 急棄去,是

天應飲血力戰,至日午,死之。木華黎聞而痛惜焉。

子 燥中 」, 知 興 中府 事 ·,執中,行軍千戶,受中,興中府相副官。

華黎行營、求得 初 一天應 死 蒙古軍數千, 事 時,弟天禹子佐中在軍中。 回 興敵 戰,敗之。 伺 木華黎嘉其勇,奏授金符,行元帥 敵 少解, 倒抽其斧,反斫之,突城 尋認 而出,趨木 將官

各就本城,授興中府千戶。

首,庸· 賜金虎符,後授大同等處萬戶,領 日:「願少容行伍 安琬討之。 子安琬、襲職、佩金符、從征大理、討李壇、皆有功。十三年、隆興之分寧叛、三三行省檄 卒非 我 賊背山 敵 也。 加 戦死 而 手刃中賊背,生擒之。 陣,安琬引兵出陣後,賊驚潰,退而 且 |不憾。」安琬從之,賊果出陣,安琬突陣而入,大呼曰:「吾止 江左 新附卒萬人,屯田 累功至 右衞親軍副都指揮使,進階懷遠大將軍 紅城 距守。 安碗揮兵直抵壘門,賊揚言 誅 贼

大德 三年,李萬戶 當成 和 寧,親老 且病,安琬請代其行,及還,以病卒。子居賺襲職,後

改忠翊侍衞親軍都指揮使。

# 移刺担兄(買奴 元臣)[三]

十策。帝召見,與語奇之,賜名賽因必闍赤。又問:「爾生何地?」對曰:「靍州。」因號爲霸 官、皆辭不受。聞太祖舉兵、私語所親曰:「爲國復讎,此其時也。」率其黨百餘人詣軍門獻 移刺捏兒,契丹人也。幼有大志,膂力過人,沉毅多謀略。遼亡,金以爲參議、留守等

州元帥

將,其勿替朕意。」 軍、兵馬都提控元帥。繼取遼東西廣寧、金、復、海、蓋等十五城。興州監州重兒反,復與烏 也兒討平之。帝遣使者詔之曰:「自汝效順,戰功日多,今錫汝金虎符,居則理民,有事則 兒、椆斡兒合兵討之。致拒戰,捏兒出奇兵掩擊,斬致。木華黎第功以聞,遷龍虎衛上將 四寨,平利州賊劉四祿。及錦州賊張致兵勢方熾,且盜名號,木華黎命捏兒與大將烏也 乙亥,拜兵馬都元帥,佐太師木華黎取北京,下高、利、興、松、義、錦等二十六城,破五

明 甚,裹創進攻丹、延。木華黎止之,對曰:「創未至死,敢自愛耶」」木華黎壯之,與所乘白馬。 (日)介其馬)飾以朱纓,簡驍衞七百人,與金兵戰。木華黎乘高,見其馳突萬衆中,日:「此 戊寅、從攻東平。辛巳、從攻延安。 壬午,從圍鳳翔,先登,手殺數十人,左臂中流矢,創

列

霸州元帥也。」諸軍繼進,金兵敗走,丹、延十餘城皆降,遷軍民都達魯花赤、都提控元帥,兼

興勝府尹。

十二城。戊子,得疾歸高州,卒。贈推忠宣力保德功臣、太尉、開府儀同三司、上柱國,追封 癸未,從帝征河西,取甘、合、辛、蛇等州。 師還,復從木華黎攻益都,下萊、膠、淄等三

興國公,諡武毅。子買奴。

法不小。」帝異其對,顧左右曰:「此兒甚肖乃父。」以爲高州等處達魯花赤,兼征行萬戶。 買奴,蚤從父習戰陣,初入見,太祖問曰:「汝年小,能襲父爵乎?」對曰:「臣年雖小,國

玉器以獻,卻不受。遂下龍、宣、雲、泰等十四城。 趨出戰,破之,誅首將,撫安其民。進攻開州,州將金沙密逆戰,擒之,城中人出童男女及金 庚寅,命攻高麗花涼城,監軍張翼、劉霸都殞於敵,買奴怒曰:「兩將陷敗,義不獨生」」

之。 健卒劉五兒,即寨北小徑上大樹,以繩潛引百人登寨,直前劫之,買驢投崖死,餘黨悉平。太 帝命從親王察合台帥師討之,斬賊將董蠻等,圍買驢於險樹寨,三月不能下。 癸巳,從諸王按赤台征女直萬奴部,有功。未幾召還。興州趙祚反,土豪楊買驢等附 買奴令

宗卽位,錄功,賜金鞍良馬。

通、泰、累有功。 權臣家婦賜之,元臣辭曰三臣家世淸素,不敢自污。」帝嘉嘆不已。 軍、後衞親軍副都指揮使,還鎭應昌。又三歲,召還,加昭勇大將軍。 兒濼,擒之,公主賜賚甚厚,奏請暫留元臣鎭應昌,以安反側。居一歲,召至京師,遷明威將 兒瓦台叛,圍應昌府,時皇女魯國公主在圍中。元臣以所部軍馳擊,只兒瓦台敗走,追至魚 子,非凡器也。」以爲怯薛必闍赤,襲千戶,將其父軍。從伐宋,攻淮西,戍淸口,取瓜洲,下 作亂,元臣親入其境,喻以禍福,賊首魯萬丑降。三十年,卒于官。贈安遠功臣、龍虎衞上 率家僮五十人見行在所,願效前驅。八年,移愈湖廣行樞密院,宣言時溪洞施、容等州 國公,諡顯懿。子元臣。 復命出師高麗,將行,以疾卒,年四十。贈推誠效義功臣、榮祿大夫、平章政事,追封興 至元十二年,從丞相伯顏平宋,進階武義將軍、中衞親軍總管,佩金虎符。 乙未,從征高麗,入王京,取其西京而還,賜金鎖甲,加鎭國上將軍、征東大元帥, 二十二年,進昭毅大將軍,同僉江淮行樞密院事,行院罷,歸高州。 元臣,別名哈剌哈孫,年十六入宿衞,應對進止有度,世祖謂丞相和魯火孫曰:「此勳臣 十九年,帝以所籍入 帝親征乃顏,元臣 十四年,只

佩金

列

第

三十

六

移 刺 揑 兒

**蠻狼** 

將軍、同知樞密院事,追封興國公,諡忠靖。 子迪,中奉大夫、湖廣宣慰使都元帥。

# 耶律禿花 禿滿答兒 忙古帶

扎刺兒、劉黑馬、史天澤伐金、卒于西河州。〔三〕 北,有功,拜太傅、總領也可那延,封濮國公,賜虎符、銀印,歲給錦幣三百六十匹。統萬戶 衆。 後侍太祖,同飲班(木)[朮]河水。[三]從伐金,大破忽察虎軍。又從木華黎收山東、河 耶律禿花,契丹人。世居恒州,太祖時,率衆來歸。 大軍入金境,為嚮導,獲所牧馬甚

傅、總領也可那延。 下流諸城,當先定成都,以爲根本,臣請往相其地。」帝從之,遂率諸軍往成都,攻嘉定,未下 而卒。 疾不任事。 子朱哥嗣,仍統劉黑馬等七萬戶,與都元帥塔海紺卜同征四川,卒于軍。子寶童嗣,以 子忽林帶嗣,總諸軍,立成都府,卒于軍。以兄百家奴嗣。自朱哥至百家奴,並襲太 朱哥弟買住嗣, 而以寶童充隨路新軍總管。買住言於憲宗曰:「今欲略定西川

禿滿答兒者,百家奴之弟,忽林帶之兄也,常留中宿衞。 後百家奴解兵柄爲他官,乃授

成都管軍萬戶,代將其軍。

改行尚書省左丞,進右丞,卒。 ,迎雲南王。 忙古帶,寶童之子也。 成宗卽位、授烏撒烏蒙等處宣慰使,兼管軍萬戶、遷大理金齒等處宣慰使都元帥。「大 列 傅 第 Ξ 、羅羅斯叛, 四型雲南行省命率師討平之。 + 六 耶 律 秃 花

慰使,仍兼變路招討,改同愈四川等處行樞密院事,遷四川等處行中書省左丞。 從 援 殺 下,禿滿答兒夜率兵,攻奪水城以進,黎明, 兵。 不花圍重慶,守將張珏搏戰,敗之城下,重慶降。 都統一人,嘉定降。 至元十一年,從忽敦攻嘉定,修平康寨以守之。 十三年,瀘州叛,從汪田哥攻之。 從忽敦徇下瀘、敍諸城,圍重慶,守合江口,又以舟 重慶遣兵援瀘,邀擊破之,獲七十人。 先登,入瀘城,克之,斬其將王世昌、李 賜虎符,授夔路招討使,遷 十二年,從汪田哥攻九頂山,公司改破之, 師塞龍門濠,遏其 四川 尚書省立, 瀘堅守不 都 統。 東道宣 復

戰,奪其戰艦八十七艘。又從雲南王攻羅必甸,破之。 緬境,開金齒道,奉王以還,遷副都元帥。 入緬 從行省也速帶兒征蜀及思、播、建都諸蠻夷,有功,陞萬戶。 金齒、白衣、答奔諸蠻,往往伏險要爲備,忙古帶奮擊破之,凡十餘戰,至 世祖時,賜金符,襲父職,爲隨路新軍總管,統領山西兩路新軍。 從諸王阿台征交趾,至白鶴江,與交趾偽昭文王 二十九年,入覲 從攻羅必甸,至雲南,韶以其衆

德]六年,烏撒 事聞,賜鈔三千貫、銀五十兩、金鞍

平章政事,仍追封濮國公,諡威愍。子火你赤,襲萬戶。 諸路行中書省左丞,行大理金齒等處宣慰使都元帥,卒于軍。 轡及弓矢,以旌其功。九年,討普安羅雄州叛賊阿塡,擒殺之。 至大四年,贈龍虎衞上將軍、 進驃騎衞上將軍,遙授雲南

### 王珣 子榮祖

王珣字君寶,本姓耶律氏,世為遼大族。金正隆末,契丹窩斡叛,祖成,從母氏避難遼

西,更姓王氏,遂爲義州開義人。父伯俊。伯父伯亨無子,以珣爲後。

買之,後乘以戰,其進退周旋,無不如意。又嘗行凌水濱,得一古刀,其背銘曰:「舉無不克, 動必成功。」常佩之,每有警,必先鳴,故所向皆捷。 青馬而貴。」珣未之信。居歲餘,有客以青馬來鬻,珣私喜曰:「道士之言或驗乎。」乃倍價 <u>眴武力絕人,善騎射,尤長於擊鞠。年三十餘,遇道士,謂珣曰:「君之相甚奇,它日因</u>

亥,太師木華黎略地奚(譽)[霽],[三]珣率吏民出迎,承制以珣爲元帥,兼領義、川二州 制。」乃召諸鄉人,諭以保親族之計,衆從之,推珣爲長,旬月之間,招集遺民至十餘萬。歲乙 丙子春,張致僭號錦州,陰結開義楊伯傑等來掠義州,珣出戰,伯傑引去。 初,河朔兵動,豪强各擁衆據地,珣慨然曰:「世故如此,大丈夫當自振拔,否則爲人所 會致兄子以

列傳第三十六 王珣

其馬 珣,珣但誅致家,其餘皆釋之,始還義州。 義,擒伯傑等,殺之。 及 千 城邑、人民,一以付汝,吾不吝也。 家,不意爲張致所襲。 興中平, 騎 幾 來 衝,珣選十八騎突其前 珣 時興中亦叛,木華黎圍之,召珣以全軍來會,致窺 無所 歸, 進攻錦州, 木華黎留之興中,遣其子榮祖馳奏其事,帝諭之曰「汝父子宣力我 歸語汝父,善撫其軍,自今以往,當忍耻蓄銳,俟逆黨平,彼之族屬、 ,復令左右掎角之,一卒以鎗 致部將高益,縛致妻子及其黨千餘人以獻,木華黎悉以付 仍免徭赋五年,使汝父子世爲大官。」珣 刺珣,珣揮刀殺之,其衆潰 覘 其虛,夜襲之,家人皆遇害 以木華黎兵 走,獲 復開

義、川 甲申春正月卒,年四十八。 滿城,令還鎮 國朝 丁丑,入朝,帝嘉其功,賜金虎符, 等州節度使。 經略中夏,宜以恩信結 ,<br />
戒之曰<br />
三<br />
彼新附之民,<br />
恃山海之險,<br />
反覆不常,<br />
非盡坑之, **珣貌黑,人呼爲哈刺元帥,** 人,若降者則殺,後寧復有至者乎!」遂還,以子榮祖代領其衆 加金紫光祿大夫、兵馬都元帥,鎭遼東 哈剌, 中國言黑也。 從木 終必 華黎 便宜 爲 兵 變。 略 Щ 行 東至 對 示,兼

珣 爲 政簡 易,賞罰 明信,誅强撫弱,毫髮無徇。 子四人,榮祖襲。

樂祖 字 敬先, 珣長 子 也。 性沉厚,語音如鐘, 勇力絕人。 珣初附於木華黎, 以榮祖為

時,榮 奏辨,事 去。 戰 遼 質 帝 死 餘 東 聞 稍 發 城 成成 其 祖 見 遵 高葛 石取之,猶 勇 沙 遣 平 任 與 止 部卒賈 不哥 路宣 高 用 選 奴 力 一撫使清 走 土 珣 出 實穴 生 死。 卒, 降。 三人 襲榮祿 其 金 鮮 迭 虜 軍 、城、城 萬 帥 生 顛 感 郭琛 奴 (之搏, 口千 激,樂爲效 大夫、 憯 崩 · 完顏· 號 餘, 被壓 於 皆 崇義軍節度使、 開 應 撒 曳魯 死。 衆謂 里台 元 手 而 馬、趙遵 遂命榮祖 有言義 已 欲散於 倒。 死,弗 欲 人懷 、李高. 義州 留置 顧 還 也。 反 副撒 管 宿 榮祖 奴等猶據石城,復 側 內觀 衞 楽祖 者, ,會金平章政事葛 里台進討之。 屢 際使。 撒 目:「士忘 請 里台將 皆 從 放 嗣 爲 屠 身 拔蓋 攻 或 民。 死國 拔 王孛魯 不哥 之, 州 榮祖 方 宣 安 行 城 曳 入朝, 魯馬 未 城 省於 馳 忍 棄

之,由 奉 從 子 也 表 將 城 忽 納 己 是発死 竹竹 略 唐兀 貢 丑: 遣 地三韓、降天龍 使諭 林 授北京等路 台 進 者衆。 寒、 討 討之,將行 之曰:「彼小國負險自守 苦古數島。 萬 奴, 再從 擒 征行 祭祖 之。 諸 征 堡,皆: 萬戶,換金虎符。伐高麗, 高 帝嘉 麗 趙 那 其 破 禁暴掠,民 以 功,賜 承 + 興州 餘 詔 `,釜中之魚,非久自 討逆 城,高 以 叛 金幣, 悦服 從諸 人耳 麗 遣 之。 一,豈可 王 官 子 按 犂 其 綽 破 其王京,高麗 只台平之。 子 | | | | | | | | 五. 入 興千 質。 死, 里 Ш 無辜,宜 緩 戶 帝 城 急可 請 賜 仍 錦  $\pm$ 確抗 於 賞其 否, 衣, 一力屈,遣 主 猶 卿 部 旌 我 剽 將,全其 當 掠 曲 其 者 熟思。 功 誅 其兄淮安公 一大 移 、民、遂 薊 鎭 」樂祖 叉 間 將 高 從 復 諸 然

乃募民屯戍,闢地千里,盡得諸島嶼城壘,高麗遣其世子倎出降,遂以倎入朝。

中統元年夏,詔榮祖詣闕,帝撫慰之曰:「卿父子勤勞於國,誠節如一。」進沿邊招討使,

兼北京等路征行萬戶,賜寶鞍、弓矢。還鎮,以病卒,年六十五。

江西湖東道提刑按察使。 戶,遇,襄陽路管軍萬戶,達,東京五處征行萬戶,延,鎭國上將軍、中衞親軍都指揮使,璲, 子十三人,顯者(六)[七]人:[三]通,興中府尹;泰,權知義、錦、川等州總管,興,征東千

#### 校勘記

- 一〕薛闍(舍)〔今〕爲蒙古人矣 從北監本改。
- [三](示)[永]安 從北監本改。按前文作「永安」。
- 辛亥睿宗以石刺爲國宣力者三代 據本書卷二太宗紀四年壬辰歲九月條及卷一一五睿宗傳,

拖雷死於壬辰。又按本書卷三憲宗紀,辛亥爲憲宗即位之年,上距睿宗死已十九年。「睿」當爲

「憲」之誤。新編已校。

- 【8】 〔黑馬元振元禮〕 道光本與本書原目錄合,從補。
- :5. 鳳翔 西(河)[和]沔州 按西河爲汾州屬縣,列此地望不符。 又按本書卷一二一按竺邇傅有「從

圍 鳳翔」、分兵攻西和州」、「復由兩當縣出魚關, 軍沔州」。此處「河」誤、今改。西和州、 屬陝

西鞏昌總帥府。新編已校。

元振字仲舉至時年方二十 蒙史卷五一云:「按黑馬舊傳」奉命守商州,在憲宗三年癸丑,請立

五十一,上數丁已年三十三,再上數(甲寅)(癸丑),年已二十九。 舊傳乃云 『時年方二十』,則年 成都,在七年丁巳。而元振舊傳云云,事實先後倒誤。又元振卒於至元十二年(丁)〔乙〕亥〕年

齡亦誤也。」

[4] 豈可以急而(乘)[棄]之 從殿本改。

八〕〔德海侃〕 據本書原目錄補。

契丹渤海等諸國 寬定吉思海諸國。 疑此處既誤「瀕」爲「渤」,乃又誤增「等」字。 此處「契丹」當指西遼。 「渤海等諸國一疑「渤」係「瀕」之訛。 瀕海諸國當指

乞則里八海 「乞則里八」,劉郁西使記作「乞則里八寺」。 此傳地名多本於西使記,

字。蒙史從祕史,改作「乞濕泐八失納兀兒」。

[11] (愛風) [風陵]渡寨 據本書卷一九三忠義傳所見改正。

(檐)[擔]寒山 據劉郁西使記改。按世界征服者傳語音,作「檐

[三](下)[火]者納失兒 據劉郁西使記改。按此人見于世界征服者傳。 蒙史已校。

- 至乞石迷部忽里算攤降西戎大國也 按劉郁西使記,此傳下文皆指征伐報達事,「西戎大國」
- 上當有脫文。 新編改作「至北印度乞石彌部」忽里算端降。 又匹至報達國」。
- [三] 勝兵數(千)[十]萬 據劉郁西使記改。新編已校。
- [六] (大) (天) 房 劉郁西使記有「報達之西,馬行二十日,有天房」。據改。按天房即穆斯林聖地

麥加。

- [14] 又西行四十里至密昔兒 新編改「十」爲一千」,較當。 按密昔兒係埃及自稱之名。 由天房至密昔兒,其道里當以千里計。
- 〇〇 (三) 二二年二月 嚴實傳附嚴忠嗣傳合一從改。 道光本與本書卷五世祖紀中統三年二月己丑、五月癸亥條及本書卷一四八
- 河〔中〕 下文有「或諫曰:『河中雖用武之地』」、據補。 元書已校。
- [110] (先)先時人諫我南遷 從北監本删。
- 十三年隆興之分寧叛 有「至元」二字。蒙史已校。 按本書卷一六八陳祐傳附陳天祥傳,事在至元十三年。「十三年」上當
- [三] [買奴元臣] 道光本與本書原目錄合,從補。
- 列 八年移僉湖廣行樞密院 僔 第 Ξ + 六 校 约 記 「八年」上有脫文。 按本書卷一六世祖紀至元二十八年二月乙酉、四 三五三九

月乙未條,是年立四行樞密院,湖廣其一。蒙史作「二十八年」,是。

後侍太祖同飲班(木)[朮]河水 本書卷一二八土土哈傳作一班朮河」,據改。

[三] 西河州 疑「河」爲「和」字之誤。參看本卷校勘記[三]。

汪田哥 按本書卷一五五汪世顯傳附汪良臣傳,攻九頂山者爲汪良臣,時汪田哥已死。「田哥」

當作「良臣」。下同。

印 [大德]六年烏撒羅羅斯叛 序錄招捕,烏撒、羅羅斯部起兵反元及其被鎭壓,均在大德五年。疑「六」爲「五」之訛。 據元文類卷四一經世大典序錄招捕補。 蒙史已校。又按經世大典

吕 木華黎略地奚(晉)〔響〕 按奚雪之地即西喇木倫河流域,「霅」誤,今改。蒙史已校。

(云) 子十三人顯者(云)(七)人 下文已列舉七人名及其官職,據改。元書已校。

# 元史卷一百五十

## 列傳第三十七

### 石抹也先

疾,命家人候日出則以報,及旦,沐浴拜日而卒。 稱 后族。 石抹也先者,遼人也。其先,嘗從蕭后舉族入突厥,及后還而族留。 遼亡,改述律氏爲石抹氏。其祖庫烈兒,誓不食金祿,率部落遠徙。 父脫羅(畢)[華]察見,日亦不仕。有子五 至遼為述律氏、號 年九十,夜得

人,也先其仲子也。

地、蕩其根本、中原可傳檄而定也。」太祖悅、命從太師、國王木華黎取東京。 遂深自藏匿,居北野山,射狐鼠而食。聞太祖起朔方,匹馬來歸。首言:「東京爲金開基之 智略,豪服諸部。 年十歲,從其父問宗國之所以亡,卽大憤曰:「兒能復之。」及長,勇力過人,善騎射,多 金人聞其名,徵爲冥部長,卽讓其兄贍德納曰:「兄姑受之,爲保宗族計。」

傳第三十七 石抹也先

列

械山積,降守臣寅答虎等四十七人,定城邑三十二。金人喪其根本之地,始議遷河南 將佐部伍。三日,木華黎至,入東京,不費一矢,得地數千里、戶十萬八千、兵十萬、資糧器 然,奈何欲陳兵以動搖人心乎」即命撤守備,曰:「寇至在我,無勞爾輩。」是夜,下令易置其 金人新易東京留守將至,也先獨與數騎,邀而殺之,懷其所受誥命,至東京,謂守門者曰: 「我新留守也。」入據府中,問吏列兵於城何謂,吏以邊備對,也先曰:「吾自朝廷來,中外晏 師 過 ?臨潢,次高州,木華黎令也先率千騎爲先鋒,也先曰:「兵貴奇勝,何以多爲。」 課知

花赤。 悉以付之。 通,也先追戮之,致已殺使者應其兄矣。<br />
致旣伏誅,也先籍其私養敢死之士萬二千人號黑 闍里必,監張鯨等軍,征燕南未下州郡。至平州,鯨稱疾不進,也先執鯨送行在所,帝責之 復屠之,則未下者,人將死守,天下何時定乎一」因以上聞,赦之。授御史大夫,領北京達魯 軍者,上于朝。 曰:「朕何負汝。」,鯨對曰:「臣實病,非敢叛。」帝曰:「今呼汝弟致爲質,當活汝。」,鯨諾而宵 歲乙亥,移師圍北京,城久不下,及城破,將屠之。也先曰:「王師拯人水火,彼旣降而 時石天應與豪酋數十據興中府,也先分兵降之,奏以爲興中尹。又命也先副脫忽闌 賜虎符,進上將軍,以御史大夫提控諸路元帥府事,舉遼水之西、灤水之東,

後從國王木華黎攻蠡州北城,先登,中石死,時年四十一。子四人:日查剌,曰咸錫,曰

之。」由是遂免。己卯,詔以黑軍分屯眞定、固安、太原、平陽、隰、吉、岢嵐諸郡。及南征,盡 以黑軍爲前列,敗金將白撒、官奴于河。渡河再戰,盡殺之,長驅破汴京,入自仁和門,收圖 諸郡,下之。遂攻益都,久不下,及降,衆欲屠其城,查剌曰:「殺降不祥,且得空城,將安用 查剌,亦善射,襲御史大夫,領黑軍。戊寅,從木華黎攻平陽、太原、隰、吉、岢嵐、關西

籍而還。帝悉以諸軍俘獲賜黑軍。

繼祖,襲萬戶。 錦衣以賜。辛丑,太宗嘉其功,授眞定、北京兩路達魯花赤。癸卯,卒于柳城,年四十四。 以功累陞昭毅大將軍、沿海副都元帥。二十一年,改沿海上副萬戶。大德十一年,告老。子 癸巳,從國王塔思,征金帥宣撫萬奴於遼東之南京,先登,衆軍乘之而進,遂克之,王解 子庫祿滿,襲職。 中統三年,從征李瓊,中流矢卒。子良輔,襲黑軍總管,至元十七年,

咸錫之子度劇,攻樊城,戰死。

亦剌馬丹子倉赤,爲湖廣行省平章政事。 膽德納後亦棄金官來歸,爲別失八里達魯花赤,卒。 其孫亦刺馬丹,仕至遼陽省左丞。

### 何伯祥 子瑋

去。 處軍民總管。 馬,子昌反射之,中手而貫槍,伯祥拔矢棄槍,策馬直前,徒手搏之,擒子昌。進聞之,亦遁 進堅守不下。子昌,金驍將也,柔命伯祥取之。兵逼其城,子昌出走,追及之,伯祥執槍馳 伯祥遂攻西山諸寨,悉平之。後攻汴梁,拔洛陽,圍歸德,破蔡州,論功居多,授易州等 何伯祥,易州易縣人。幼從軍于金,從張柔來歸。 太祖定河朔,惟保定王子昌、信安張

等寨,俘獲甚衆,器械山積。 丁酉,從主帥察罕伐宋,伯祥拔三十餘栅,獲戰艦千餘艘,又破芭蕉、望鄉、大洪、張家 察罕以其功聞、賜錦衣、金甲。

賴以出。 木,爲攻取勢。 其不意,而遂深入其地,彼不我測,乃可出也。」遂率兵突戰,直抵司空寨,疏布營壘,陵高伐 而鳴鼓其後。 壬子,諸軍入|宋境,|察罕自他道遽還,諸軍倉皇失措,|伯祥曰:「此必爲敵所遏,不若出 帝聞之,賜金二百兩 宋兵果來追,伏發,驚駭潰去,追擊,大破之,轉戰百餘里,他軍不能歸者,皆 旣夜,命爲五營,營火十炬,伏精銳于營側險要之地,天將明,令士卒速行,

世祖南伐,伯祥參預軍事,多所獻納,卒于軍。 贈儀同三司、太保、 上柱國, 追封易國

城,瑋曰:「建功立業,此其時也,何避焉!」乃率其衆,誓以死戰,開營門,以身先之,貴敗走。 來救,瑋時建營於城東北,當其衝。 至元十一年,丞相伯顏受命伐宋,辟瑋爲帳前都鎭撫。 瑋始襲父職,知易州。 兄行 軍千戶卒,瑋復襲之,鎭亳州。 貴兵縱火焚北關,遂進逼瑋,萬戶脫因不花等呼瑋入 師次陽羅堡,夏貴率戰艦列江 從圍襄樊,宋將夏貴率 舟

懷遠大將軍、太平路軍民達魯花赤,俄陞昭勇大將軍、行戶部尚書、兩淮都轉運使。 **瑋將勇敢士出戰,奪舟千餘艘,似道遁去。授武德將軍、管軍總管,佩金虎符。** ,瑋從元帥阿朮,率衆先渡,諸軍繼之,貴復敗走。 宋丞相賈似道,率舟師拒于丁家洲, 宋旣平,進

管。 相,專任賢也,今宰執員多,政出多門,轉相疑忌,請損之。」不從,遂乞代。 二十八年,遷湖南宣慰使。三十一年,拜中書參知政事,時宰執凡十一人,瑋曰:「古者 至元十八年,擢參議中書省事。二十年,擢爲江浙按察使。曰二十二年,改大名路總

師孔子廟 賽典赤、八都(高)[馬辛]等還自貶所,四復相位,瑋言三姦黨不可復用,宜選正 大德 成、瑋言:「唐、虞、三代,國都、閭巷莫不有學, 四年,授侍御史,以母病辭。 七年,授御史中丞,陳當世要務十條,成宗嘉納之。京 今孔廟旣成,宜建國學於 其 (側。」從 人以居

列

傅第三十七

何伯

觧

廟堂。」帝深然之。 監察御史郭章,劾郎中哈刺哈孫受贓,具服,而哈刺哈孫密結權要,以枉

問誣章。瑋率臺臣入奏,辨論剴切,章遂得釋。

阿忽台奉皇后旨,集廷臣議祔廟及攝政事,瑋難之,阿忽台變色曰:「中丞謂不可行,獨不畏 耶。」衆皆危懼,瑋從容曰:「死畏不義耳,苟死於義,夫復何畏!」未幾,以疾去位。 九年冬,將有事于南郊,議配享,瑋曰:「嚴父配天,萬世不易。」不果行。成宗崩,丞相

宗至自上都,臨朝,問曰:「孰爲何中丞。」」瑋出拜,帝曰:「朕知卿能以忠直爲國,朕有不逮, 武宗卽位于上都,授太子副詹事,遣使促使就職,復遙授平章政事,商議中書省事。 武

卿當勉輔。」

卿當 三年, 擢 河南行省平章政事,佩金虎符,提調屯田事,帝召至楊前,面諭曰:「汴省事重,屯田 爲國竭力。」賜黑貂裘一、錦衣二襲。 至大元年,遷太子詹事,兼衞率使。俄拜中書左丞,仍平章政事,商議中書省事。 改河南行尚書省平章政事,卒。贈太傅、開府儀同三司、上柱國,追封梁國公,諡 瑋至汴,建諸葛亮祠,立書院,以地三千畝贍之。 一人廢, 未幾,

#### 李守賢

伐,道平陽,見田野不治,以問守賢,對曰:「民貧窘,乏耕具致然。」詔給牛萬頭,仍徙關中生 撫之不可,乃自錦州遷河東南路兵馬都總管。旣至,河東人皆曰:「吾等可恃以生矣。」 節度觀察使,弟守忠爲都元帥,守河東。朝廷以全晉爲要害之地,人心危疑未定,非守賢鎮 朝太祖于行在所,即命庭植爲龍虎衞上將軍、右副元帥、崇義軍節度使,守賢授錦州臨海軍 天、交牙、蘭岩、香爐諸寨,皆望風俱下,守賢未嘗妄殺一人。 及攻河南,其渠魁强元帥者, 緣崖蟻附以登,殺其守卒,遂大縱兵入,破之,下令禁無抄掠,悉收餘衆以歸。不兩旬,連 中,度其帥完顏延壽無守禦之才,癸巳正月望夕,延壽擊毬爲嬉,守賢潛遣輕捷者數十人, 果下,逐搆浮橋。明年,清津南濟潼關。「邑二月,大破趙雄兵于芮城。 時河中未下,守賢建言,以爲將士逗留沮撓,多所傷溺,臣請自北面鑿城先登。 生口七十。主將分命將校殺所掠俘,苟有失亡者,罪死,放軍當殺五百人,皆縱之去。 墾地河東。辛卯,平陽當移粟萬石輸雲中,守賢奏以「百姓疲敝,不任輓載」,帝嘉納之。 李守賢字才叔,大寧義州人也。祖小字放軍,嘗從金將攻宋淮南,飛石傷髀,錄功,賞 歲戊子,朝于和林,加金紫光祿大夫,知平陽府事,兼本路兵馬都總管。庚寅,太宗南 金大安初,守賢暨兄庭植,弟守正、守忠,從兄伯通、伯溫,歸款於太師、國王木華黎,入 時方會師圍汴,留守賢屯嵩、汝。金兵十餘萬,保少室山太平寨,守賢以三千人介其 如其言,城

列傳第三十七

李守賢

三五四七

守賢威略,卽以所部來附,關東、洛西遂定。甲午冬十月卒,年四十六。 以其衆出奔,守賢追及,降之。秦藍帥王滿,聚衆數萬,據號之南山,守賢使人責滿,滿素憚

都,由廣元出葭萌,度木瓜坡。蜀之餘孽團聚為梗,聞彀至,潛爲伏以待。 戰於瞿塘,獲戰艦千餘艘。辛丑,朝行在所,授河東道行軍萬戶,兼總管。已已,進兵攻成 **衡枚疾進,出其不意,賊兵敗走,長驅至成都,破之。 壬子,襲嘉定。** 子戲嗣。 歲丁酉,從太師塔海紺布征蜀漢,有功。明年,攻碉門。又明年,下萬州,會 殼諜知之,令衆

伯溫,見忠義傳。 虎符,移京兆路,加昭勇大將軍,未幾,轉洛磁路。至元七年正月卒,年四十九。子十一人。 陣,視敵篾如,言勇者,如殼乃可耳。」賜白金二百五十兩。 召謂諸將曰:「汝輩平日自負鷙勇,及臨敵,不能爲朕立尺寸功。獨李彀身犯矢石,摧鋒陷 會江漲,梁中絕,宋將率舟師萬艘逆戰,觀以一旅先犯之,諸軍繼進,遂破之。明日,帝 戊午秋,憲宗南伐。己未,入梁州,至師次江上,造舟爲梁,以通援兵,且斷宋人往來之 中統三年,改河東路總管,佩金

### 耶律阿海

耶律阿海,遼之故族也。 金桓州尹撒八兒之孫,尚書奏事官脫迭兒之子也。 阿海天資

質。」明年,復出使,與弟禿花俱往,慰勞加厚,遂以禿花爲質,直宿衞。 雄 不治戎備,俗日侈肆,亡可立待。」帝喜曰:「汝肯臣我,以何爲信。」阿海對曰:「願以子弟爲 一毅,勇略過人,尤善騎射,通諸國語。 金季,選使王可汗,見太祖姿貌異常,因進言:「金國 阿海得參預機謀,出

之一妻以貴臣之女,給戶,俾食其賦。癸亥冬,進攻西夏諸國,累有功。 弟皆預焉。旣敗王可汗,金人訝其使久不還,拘家屬于瀛。 歲壬戌,王可汗叛盟,謀襲太祖。 太祖與宗親大臣同休戚者,飲辨屯河水爲盟,阿海兄 阿海殊不介意,攻戰愈厲,帝聞

入戰陣,常在左右。

關。 兵略 戰宣平,大捷澮河,遂出居庸,耀兵燕北。 即送來歸。 燕南、山東諸郡,還駐燕之近郊。金主懼,請和,渝其使曰:「阿海妻子,何故拘繫弗遣。」 阿海奏曰:「好生乃聖人之大德也。興創之始,願止殺掠,以應天心。」帝嘉納焉。 丙寅,帝建龍旂, 即大位, 敕左帥闍別略地漢南, [t] 阿海爲先鋒。辛未,破鳥沙堡,鏖 師還,出塞。 癸酉,拔宣德、德興,乘勝次北口,闍別攻下紫荆 逐分

坐。 監尋斯干,專任撫綏之責。 命禿花從木華黎取中原。 甲戌、金人走汴、阿海以功拜太師、行中書省事、封禿花爲太傅、濮國公、每宴享、必賜 未幾,以疾薨于位,年七十三。至元十年,追封忠武公。 阿海從帝攻西域,俘其酋長只闌禿,下蒲華、尋斯干等城,留

列傳

第

請還內郡,守中都路也可達魯花赤,佩虎符,卒。 旭 時,佩虎符,爲右丞,行省遼東。萬奴叛,舉家遇害。綿思哥襲太師,監尋斯干城,久之, 副元帥官、金紫光祿大夫,管領契丹漢軍,守中都,招安水泊等處,卒,無子。 子三人:長忙古台,次綿思哥,次捏兒哥。 忙古台在太祖時,為御史大夫,佩虎符,監戰 捏兒哥在太

|州同知,萬奴,爲人匠副總管。 右丞,文謙,興國路總管,卜花,早卒,蒙古不花,荆湖北道宣慰使,虎都不花,一名文炳,湖 孫服。二十五年,成哈丹禿,有戰功,以老乞骸骨。子六人:「云」五臺奴,襲職,拔都兒,中書 必闍赤,仕至右衞親軍都指揮使。至元二十四年,世祖宴于柳林,命驢馬居其父位次,賜只 氏,以哀毁卒,特贈貞靜。子七人:老哥,歷提刑按察使,入爲中書左丞。驢馬,備宿衞,爲 貸于民,買哥悉以私帑償之,事聞,賜銀萬兩。戊午,從攻閩,師次釣魚山,卒于軍。 子二人:買哥,通諸國語,太祖時爲奉御,賜只孫服,襲其父中都之職。時供億浩繁,屢 妻移刺

#### 何實

何實字誠卿 ,其先北京人。 會祖摶霄,雄於貲,好施與,鄉里以善人稱。 祖鼎敬。父道

忠,仕金,爲北京留守。

隰等州 恩、德、泰安、 萬,募兵三千,丙子春,來歸。 致,初以 也。 横 齊 衆,木華黎奏賜鞍馬弓矢 帥 見太祖 有 , 數郡 稍 擅剽掠者 左 監 時 實 歲 及長,通 突之,城破 癸未,木華黎卒,子孛魯嗣。 張致復據錦州 軍 ,悉平之。 ,獻軍民之數。 乙亥,中原 少孤,依叔 叛謀 使實 斬軍 於實,實属聲叱 諸 濟寧, (帥師) 武仙 國 盗起。 引兵掠太原、平陽、河中、京兆諸城,所向款附。 父居,氣節 ·中肅: 譯語,驍勇善騎射 四千, 勢如 實 走,逐北四 帝大悅,賜鞘劍一,命從木華黎選充前鋒 然,士民按堵。 錦州 與 破 以 取燕南、 竹。 勵之。 財遇於神水縣,挺身陷陣,殊死戰,殺三 不 曰:「天之曆數在朔 大將木華黎與論 張鯨,自立為 凡,家 薄維州 十里,大破 武仙 齊西之地,首擊邢州 以功,爲帳前 ;,倜儻 人常入 復叛,據邢。 | 孛魯命戍于|| 那,多著善政,|| 那民敬之如 ,與木華黎會。 不覊,遠近之民,慕 臨海 之,斬首二百餘級 臥 兵 內, 郡王,遣使納 軍 方,汝等恣爲不 事,奇變百出,拊髀欣躍, 一馬都 見一 實帥師五 彈壓。 遷兵馬都 ,徇趙郡,取 青蛇蜿 款于 千圍之,立雲梯,先士卒登堞, 其 ,是夜,仙 詔封 軌 蜒 雄 鎭撫,從 略,咸 衣被 太祖,尋以 木華黎錄其功,表實 ,徒自斃耳。」 魏鄴 木華黎太師 ||百餘人,獲戰馬兵械甚 中, 黨遁去。 下 歸 取 大加 心 駭 博關 大同 叛 神 而 伏 乃 、稱賞, 視之, 明。 ,襲曹 實 、雁門、石 國王,東下 誅。 籍 下 戶 令, 敢 甲申, 鯨弟 乃

口

列

傳

第

Ξ

+

七

何

É

三五五五

百餘 孛魯 級 征 西夏 一,俘工 匠 以 實 七 一百餘 分 兵攻汴、陳、蔡、唐、鄧、許、鈞、睢、鄭、亳、潁,所至 人。 孛魯復命駐 兵那州,分織 匠 五百戶 ,置局 課織 有 功, 計梟首 二千五

質子 即 憫 置 其 / 勞瘁 會 T 子 亥 , 写賜 使 權 勿出 金虎符,便宜 行 征,更檄 方,民獲貿遷之利。 行元 東平嚴實,與之分治軍民事。 帥府事。 庚寅,有旨收諸將金符。 邢因武仙之亂,歲屢饑,請移匠局于博,孛魯從之。 博値 兵 火後,物貨不 乙未,孛魯以實子仲澤爲 通 實以絲數

令射 貂帽 辭 臣被 與 人,生獲十餘人。 監 論 軍 堅執 減減 逐錫 以 軍 Ţ 觀 之職 中 酉 (鐵繫腰、貂衣一襲、弓一、矢百, 遣歸。 其 故 宴,取金符親 銳 太宗數召入見,實貢金幣紋綺三篚。 、强弱, 一幸得 從事 事,良久,曰:「思卿效力有年,朕欲授以征 :元佩: 锋鏑二十餘年,身被十餘槍,右臂不 實不 朝于幄殿,帝歡甚,問遇盗 賜之,授以漢字宣命,充 金符,督治 能射。 命入宿衞,密使 工匠、歲獻 之故, 織 御 丁巳,卒于博。 人覘之, 幣、優游 用 次陵州,遇寇, 命所獲寇勿殺,仍 局 行 能舉,已爲廢 人匠達魯花赤,子孫世其爵。 實臂果不能 以終其身,於臣足矣。」帝默 元 帥,後當 實與左右射之,斃二十餘 重任。」 入矣。 舉。 以 陽實。 固 實、叩 臣不 解 + 頭 是 敢 餘, 日,賜 辱 謝 然不 百三小 始可 更賜 命。 悦, 其 願

子九人,孫十七人。子崇禮,授應奉翰林文字、從仕郎、同知制誥兼國史院編修官。

#### 郝 和 尚拔都

郝 和 尙 拔 都,太原 人,以 小 字行。 幼爲蒙古兵所掠,在郡王迄忒麾下, 長通譯語, 善騎

射。 太祖 遣 使宋,往 返 數 四 ·; 以 辯 稱

宋 人,乘夜破關,入蜀,諸城悉下。 千 户。 兵大潰。 歲 戊子 乙未,從皇子南伐, 丙申,從都元帥 ,以爲 九原 府 主 塔海 至襄陽 帥 佩 明年,取夔府,抵大江,宋 征 金符。 中,旣出 蜀, ,宋兵四十萬逆戰漢水 下興元,宋將 庚寅,率兵南伐,略地潼 王連 兵三十萬軍於南岸。 上。 以 重 兵守劍閣 領先鋒 陝, 數百人 有 功。 乃募敢 ,直 辛 郝 卯,授行 前 和 死 衝 士十二 尙 其陣, 拔都

選饒勇九 人, 乘輕 舸先登,横馳陣 ·復入,宋兵不能支,由是以善戰名。

在所命解衣數其瘡痕二十一,嘉其勞,進拜宣德西京太原

平陽

延

庚子

歲

太宗

於行

都 五. 之行 路 萬 宮,賜銀萬鋌,辭以「賞過厚,臣不應獨受,臣得效微勞,皆將校協力之功」,遂奏將校 戶 ) 易 佩 金虎符,以兵二萬屬之, 復賜馬六騎、 金錦 弓鎧有差。 甲辰,朝定宗 於 宿

劉 天 禄等十一 人,皆賜之金銀符

、羊數干,以 戊 申,奉韶還治太原,請 助 或 用。 己 酉 凡遠道 陞 萬戶府為 租 一稅監課 河東北路行省 過 重者, 悉蠲 除之。 得 以便宜 歲饑,出 從 事, 白金六十 凡 四年。 ·鋌、粟 壬子

列

傳

第

Ξ

+

七

郝

和

尙

拔

都

三月,卒。追贈太保、儀同三司、冀國公,諡忠定。

管,天麟,京兆等路諸軍 鎭蠻都 子十二人:長天益,佩金符 元 帥、軍民宣慰 使,天學,大都路總管,兼府尹 奥魯萬 一太原 戶 天挺,河南江北行 路 軍民萬戶都總管,次仲威, ),天祐 中書省平章政事 陝西奧魯萬戶 襲五路萬戶,扎刺不花, ,天澤,夔州路總

## 趙琦 〔秉溫〕[10]

趙 瑨 雲中蔚州 父昆, 仕金爲帥府評事。 兄珪,以萬戶守飛狐城。 歲庚午, 昆卒,

**驛**輸矢二十餘萬至行在, 兄 中 贖 兵 兵 珪, 鼻側 (壓境 閉 一城之命。」哀懇 城 瑨 朝廷從之,改授瑨軍民總管,稍遷易州達魯花赤,佩 拒守 不降 自幼 ,鏃出腦後,拔矢再戰, 不 何待 國王裨將石抹也先戰死,王怒,將屠其城,晉泣 ·覊,開習武 一衆從之。 切至,國 帝大喜, 事。 王 義 丁丑 癸酉、太祖南伐、先鋒至飛狐、城中不知所爲。 七日破其城。 而 許之。 , 命權中都省事。癸巳,趙、楊據興州叛,瑨進軍平之,遷 太師、 從攻相州,抵其門,死士突出, 國王木華黎駐兵 論 功,授冀州行 金符。 桓州 曰:「 軍都 署爲 母與兄在 太宗下河南,瑨自易 元 帥, 百戶 佩 一暗 金虎 直 城 ,從攻 瑨詣縣曰:「大 前 中,乞以一 符。 擊之, 蠡 瑨 流 讓 州 身 中 馳 其 矢 金

## 山、眞定二路達魯花赤。

卒,年八十。皇慶元年,贈儀同三司、太保、上柱國,追封定國公,諡襄穆。 改太原路總管。 中統 元年,詔立十道宣慰司,以瑨爲順天宣慰使。曰三至元元年,轉淄萊路總管。 。十二年,陞燕南道提刑按察使。 十四年,遷河南道。 十六年,致仕。 子秉溫。 六年,

部事。 監,自己購求天下秘書。十九年,遷昭文館大學士、知太史院侍儀司事。授時曆 贈金紫光祿大夫、司徒、雲國公,自己諡文昭。 百錠,進階中奉太夫。二十九年,編國朝集禮〔成,帝〕特命其子慧襲侍儀使。曰三皇慶元年, 秉溫,事世祖潛邸,命受學於太保劉秉忠,從征吐蕃、雲南大理。 中統初,詔行右三 至元 [七年,創習朝儀,閱試稱旨,授尚書禮部侍郎、知侍儀司事。 明年,授 祕 書 少 子慧,後仕至昭文館大學士。 成,賜鈔二

### 石抹明安

生于 肅,無敢喧譁者,父老見而異之,曰:「是兒體貌不凡,進退有度,他日必貴。」旣長,歎曰:「士 ,世,當立功名、書竹帛,以傳無窮,寧肯碌碌無聞,與草木同腐邪! 石抹明安,桓州人。性寬厚,不拘小節。爲童子時,嘗騎杖爲馬,令羣兒前導,行列整

列

傳

第三十

七

趙瑨

石抹明安

顏。」帝善其言,釋之,命領蒙古軍,撫定雲中東西兩路 我而 明安初如所教,俄策馬來降,帝命縛以俟戰畢問之。 旣敗金兵,召明安詰之曰:「 麾下,九斤謂之曰:「汝嘗使北方,素識蒙古國主,其往臨陣, 後降也?」對曰:「臣素有歸志,向爲九斤所使,恐其見疑,故如所言。不爾,何由瞻奉天 歲壬申? 太祖 率師攻破金之撫州,將遂南向,金主命招討紇石烈九斤來援,時明安在其 問以舉兵之由,不然卽詬之。」 爾何以詈

之,明安奏曰:「此輩當死,今若生之,則彼之未附者,皆聞風 北諸郡而還。 定,兵貴神速,豈宜猶豫一帝從之。卽命明安引兵南進,所至,民皆具 若置不問,待彼成謀,併力而 旣而帝欲休兵於北,明安諫曰三金有天下一十七路,今我所得,惟雲中東西兩路 帝復命明安及三合拔都,將兵由古北口徇景、薊、檀、順諸州。 來,則難敵矣。 且山前民庶,久不知兵,今以重兵臨之,傳檄 而自至矣。」帝從之。 、簞食壺漿以迎,盡有 諸將議欲屠 而 河 口

追,迴擊,大破之,死及溺水者甚衆,獲李英及所佩虎符,得糧千 軍于京南建春宮。 而屠之。 遣右副元 乙亥春正 帥 未幾,金將完顏合住、監軍阿興鬆哥,復以步兵萬二千人、糧車五百兩援中都。 神撒, 月,取通州,金右副元帥滯察七斤,以其衆降,明安命復其職,置之麾下,遂駐 將四百騎迎戰,明安將五百騎繼之,遇于永清,將戰,命士卒佯敗,金兵 金御史中丞李英、元帥左都監烏古論 慶壽,領兵護軍食,以援中都 餘車。遂招諭永清,不降,拔 明 來

列傳第三十七 張榮

安復將三千騎往擊之,遇于涿州宣封寨,獲鬆哥,合住 通去, 盡得其輜 重, 還屯建春宫。 四

月,攻萬寧宮,克之,取富昌、豐宜二關,攻拔固安縣。

對曰:「 明安將攻中都,金相完 負固 初,順 不服,以至 有老父 州之破,兵士縛密雲主簿完顏壽孫以獻,明安釋而用之,不久,逸去復來,問 在城中,恐不能存,謀歸,欲得侍養,今已歿,故復來。」明安義而 |此極,非汝等罪,守者之責也。」悉令安業,仍以粟賑之,衆皆感悅。 顏復興飲 藥死。 辛酉,城中官屬父老緇素, 開門請降,明安諭 釋之。 其故, 五月,

公, 其得金府庫珠玉 兼管蒙古漢軍兵馬 明安 「早從 軍 錦 旅 浴,料 綺, 都元帥。 敵 明安悉具其數上進,未嘗以纖毫爲己有。 制 勝,算無遺策,雖祁寒盛暑, 丙子,以疾卒于燕城,年五十三。 未嘗不 與士卒均 中都 既下, 勞 加太傅、邵國 逸,同 甘苦。

行尚書省事 子二人:長咸得不,襲職爲燕京行省。 ,兼蒙古漢軍兵馬都元帥。 次忽篤華,太宗時,爲金紫光祿大夫、燕京等處

#### 張榮

額 而 拔之, 張 ※字世 神 色自 輝,濟南歷城 岩。 金 季 山東羣盜蜂起,樂率鄉民據濟南黌堂嶺 人,狀貌奇偉。 **嘗從軍,爲流矢貫眥,拔之不出,令人以足抵其** ,衆稍盛,遂略章丘 |劉

平、濟陽、長山、辛市、蒲臺、新城及淄州之地而有之,兵至,則清野**入**山。

服。」太祖壯之,拊其背曰:「真賽因八都兒也。」授金紫光祿大夫、山東行尚書省,兼兵馬都 問 元帥,知濟南府事。 時貿易用銀,民爭發墓劫取,榮下令禁絕。 .以孤軍數載,獨抗王師之故,對曰:「山**東地**廣人稠,悉爲帝有。 臣若但有倚恃,亦不款 歲丙戌,東平、順天皆內屬,榮遂舉其兵與地,納款於按(亦)[赤]台那行,口三引見太祖,

之,亦破其城,用安赴水死。乙未,拔邳州。丙申,從諸王闆端破宋棗陽、仇城等三縣。日日 之,唆蛾返走,率壯士追殺之,乘勝急攻,城破。就攻徐州,守將國用安引兵突出,榮逆擊 力止之。旣而城下,榮單騎入城撫其民。甲午,攻沛,沛拒守稍嚴,其將唆峨夜來擣營,榮覺 之,榮力爭而止。癸巳,汴梁下,從阿朮魯爲先鋒,攻睢陽,議欲殺俘虜,烹其油以灌城,又 艘,麾抵北岸,濟師,衆軍繼進,乘勝破張、盤二山寨,俘獲萬餘,大將阿朮魯恐生變,欲盡殺 卯,軍至河上,樂率死士宵濟,守者潰。詰旦,敵兵整陣至,樂馳之,望風披靡,奪戰船五十 庚寅,朝廷集諸侯議取汴,**榮請先六軍以淸**蹕道,帝嘉之, 賜衣三襲,詔位諸侯上。 辛

樂土。 擅交鄰境」却之。年六十一,乞致仕,後十九年,世祖卽位,封濟南公,致仕卒,年八十三。 是歲,中書考績,爲天下第一。 河南民北徙至濟南,榮下令民間,分屋與地居之,俾得樹畜,且課其殿最,曠野 李壇據益都,私飽以馬蹄金,榮曰:「身旣許 國 開爲

大都督府郎中,邦昌,奧魯總管,邦憲,淮安路總管。孫四十人,宏,襲邦傑爵, 子七人:長邦傑,襲爵,先卒,邦直,行軍萬戶,邦彦,權濟南行省,邦允,知淄州, 改真定路

#### 劉亨安

竭,世英言於王曰:「自古建國,以民爲本,今河東殺掠殆盡,異日我師復來,孰給轉輸? 收 于師,無子,國王學魯命其族兄德仁襲職。丙戌歲,金將移刺副樞攻絳州,城陷,死之。 存恤亡,此其時也。」王善之。以絳州邊地,難其人,奏授世英絳州節度使,兼行帥府 麾下,分兵收滅、趙、雲、朔、河東,以功充行軍副總管。庚辰,平陽諸郡被兵之餘,民物空 華黎承制命亨安領其衆,江北支賜金虎符,授鎭國上將軍、絳州節度使,行元帥府事,兼觀察 劉亨安,其先范陽人,後遷遼東川州。 初,國王木華黎經路遼東,兄世英率宗族鄉人隸 事。 木

帥塔察兒俾亨安往拒之,與宋軍遇龍門北,遂横槊躍馬,奮突而前,衆因乘之,宋師奔潰,追 壬辰,會大軍於鈞州,敗金人於三峯山。 甲午,平蔡。 庚寅冬,從王師渡河入關。 辛卯春,克鳳翔,歷秦、隴,屯渭陽。 既而宋兵二十萬攻汴,將 秋,出階城,沿漢抵鄧。 趨洛,都元

列

宋將陳侍郎。 巴蜀 擊百餘里,塔察兒拊其背曰:「真驍將也。」延坐諸將之右,勞賜甚厚。 ,攻散關 ,破<u>劍門,出奇制勝,戰功居多。</u> 有喬 長官 與亨安爭功,未幾,攻城,喬爲 進圍 [成都,亨安爲先鋒, 他所傷 ,亨安負之以出,喬感愧 大破之於城 丙 申, 都元帥塔海 西 生擒 征

卒。 亨安從軍十年, 子貞,嗣 職。 孫三人:弘、彊、弴。 累著勳伐,所獲金帛,悉推與將佐, 故士卒咸樂爲用。 癸卯冬十二月

#### 校勘記

- 脫羅( (畢)[華]察兒 據黃金華集卷二七石抹繼祖神道碑、許白云集卷二庫綠滿行狀改。
- 追封 }史 從 改、疑是。 易國公諡武 昌 按程雪樓集卷八何瑋神道碑、 卷二贈何伯祥諡 忠 殺制 一皆作 諡忠毅 }蒙
- 作「江 擢 爲 江 南 浙按察使 浙 西」或 浙西。 程雪樓集卷八何瑋神道碑作「出爲江南浙西道提刑按察使」。 新元史已校 此處「江浙 」當
- 四 八 都 (高) [馬辛] 據程雪樓集卷八何瑋神道碑改。 按八都馬辛時爲中書右丞。 新元史已校。
- **35.** 明 年 蒲 津南濟潼關 此句不文。 蒙史于「蒲津」上增「自」字。
- . ✓ 梁州 按宋、元四川 無「梁州」「梁」字誤。 蒙史改作「渠州」。

- 較左帥闍別略地漢南 按此時蒙古軍略地長城北、當與漢南無涉。「漢」字誤。 蒙史、新元史改
- 作「漠南」。
- [八]子六人 按下文所列共七人。此處史文有誤。
- <u>へ</u>た し 乙未孛魯以實子仲澤爲質子 蒙史改「孛魯」爲「塔思」,並注云:「按孛魯薨于戊子五月,

不得更有字魯。」

- [10] 〔秉溫〕 據本書原目錄補。
- 中統元年詔立十道宣慰司以瑨爲順天宣慰使 副之列。至三年,立十路宣慰司,乃以瑨爲使。 傳云元年,誤也。」 考異云:「案中統元年立十路宣撫司, **暗不預使**
- 監在至元十年正月丁卯、傳上文有「至元七年」、此書「明年」誤、「明」當作「十」。 明年授祕書少監 滋溪文稿卷二二趙秉溫行狀「明年」作「十年」。 按本書卷八世祖紀, 立秘書
- 編國朝集禮[成帝]特命其子彗襲侍儀使 原空闕、從北監本補。
- 雲國公 國公」,疑「雲」字誤。 按滋溪文稿卷四趙瑨神道碑陰記、卷十趙秉正神道碑銘、 卷二二趙秉溫行狀皆作「定
- 二吾 傳所見「按赤台」改。 按(亦)[赤]台那行 據本書卷一一八特薛禪傳、卷一一九木華黎傳附塔思傳、卷一二一按竺邇 此人本書又作一按赤帶」、「按只台」、「按赤帶」。

列

〇〇 丙申從諸王闆端破宋棗陽仇城等三縣 考異云:「案太宗紀,乙未歲皇子闊端征秦鞏,皇子曲

Cl+D 木華黎承制 出即闊出伐宋。十月曲出圍棗陽,拔之。則榮所從者,當是闊出,非闊端也。仇城字疑有誤。」 考異云:「案木華黎以癸未歲卒,子孛魯嗣爲國王。 上文已書國王孛魯矣,此却書

木華黎,何其前後不檢照也」

# 元史卷一百五十一

# 列傳第三十八

### 薛塔剌海

諸國,俱以礮立功。 都元帥,便宜行事。 歸,帝命佩金符,爲砲水手元帥,屢有功,進金紫光祿大夫,佩虎符,爲砲水手軍民諸色人 (均)[鈞]州三峯山、〇)敗金師。 薛塔刺海, 燕人也, 剛勇有志。 從征 太宗三年,睿宗引兵自洛陽渡河、塔刺海由隴右假道金、商、遂會師于 回回、河西、欽察、畏吾兒、康里、乃蠻、阿魯虎、忽纒 四年、三破南京及唐、鄧、(均)〔鈞〕、許諸州、取鄢陵、扶溝。 歲甲戌,太祖引兵至北口,塔剌海帥所部三百餘人來 、帖里麻 賽蘭 匠

四月卒。

列

傳第三十八

薛

塔刺海

釣魚山、[三苦竹崖、大(林)[良]平、[四青居山,破重慶、馬湖、天水, 子 奪失刺,襲爲都元帥,南攻江淮,有功。歲庚戌,卒。 弟軍勝襲、憲宗八年、從世祖攻 賜以白金、鞍馬等物。

中統三年,李璮叛濟南,又以礮破其城。至元五年,從圍襄陽。三月卒。

月,進階懷遠將軍,將兵平浙東諸郡。從征福建灤江,與宋兵力戰,破之,獲戰艦千餘艘。 六年,進階鎭國將軍,鎭揚州。 屠常州。十二月,取蘇州。十三年,攻鎭巢。七月,圍揚州,守臣李庭芝棄城走,追獲之。九 至建康。十二年,授武節將軍。六月,與宋將夏貴戰于峪溪口,奪其船二百餘艘。十一月, 八年,始襲父爵。十年冬十二月,襄、樊未下,至四家奴立砲攻之,明年正月,襄陽守呂文煥 繼從丞相伯顏南伐,十月,至郢州,先登。師旣渡江,四家奴自鄭州下沿海諸城堡,〔云〕 丞相阿朮欲以千戶劉添喜攝帥府事,子四家奴,年方十六,請從軍自效,帝壯而許之。 二十二年,改爲萬戶。

### 高閙兒

金符,總管,管領山前十路匠軍。 高鬧兒,女直人。事太祖,從征西域,復從闊出太子、察罕那演,連歲出征,累有功,授

馬總管。 鎭季陽。 歲已未,憲宗憫其老,命其子元長襲其職,從世祖渡江攻鄂,還鎭隨州。 十年、從攻樊城、先登。十一年、從渡江、鼓戰艦上流、與宋人戰、殺三百餘人、奪 五年,從元帥阿朮修立白河口、新城、鹿門山等處城堡,圍襄樊。 七年, 充季陽軍 至元二年,移

其船及鎧仗,以功賜虎符,陞宣武將軍。 奪 其船 及 。 鎧仗無算, 敗夏貴于焦湖 從征常州 進兵丁家洲, 、先登 與宋臣孫虎臣等大戰,殺五百餘人, 又攻杭州 |宋平, 護送宋太后 至京

師。以功進懷遠大將軍、萬戶。

敵 軍 二年,陞 合戰,中毒 二十一 安遠 年,領軍 大將 矢 而 死 軍 二千,從太子 、季陽萬戶 府萬 脫歡征交趾,追襲交趾世子于大海口,奪其戰艦以還。 戶。 是年夏,復以兵追襲交趾世 子于海之三叉口 與與

贈 年 懷遠大將軍 移戍袁州 子 滅 里干,初 盗陀頭以衆犯境,悉剿除之。 、季陽萬戶府萬戶、輕車都尉、渤海郡侯。 直 · 信衞,襲父職,領兵鎭廣東,尋移戍惠州,平盜譚大獠、朱珍等。 **尋廣之南恩盜起,復領兵平之。** 還,沒于袁州 元貞元

#### 王義

行 河 朔 縣 二匹,授寧晉 事 盜 王義字宜之,真定寧晉人,家世業農。 起,縣 尋 號 人聚 爲 令,兼趙 都 而謀曰:「時事 統。 太師、 州 以南招撫使。 國 王木華黎兵至城 如此,吾儕欲保全家室,宜有 是時兵亂,民廢農耕,所在人相食, 義有膽智,沉默寡言,讀書知大義。 下,義率衆,以寧晉歸焉。 所 統 屬。 乃 相 與推 寧晉 入 難 金 東有藪澤, 太祖,賜駿 義 人遷汴, 爲 長、攝

義

列

傅

將李直守寧晉,身率衆保歷城,由是全活者衆 周 回百 里,中有 小堡 曰瀝城,義曰:「瀝城雖小而完,且有魚藕菱芡之利,不可失也。」留偏

撫使。 拔束鹿,進攻深州,守帥以城降。 門,遇金監軍納蘭率冀州節度使柴茂等,將兵萬餘北行。 承制授義趙州太守、趙 冀二州招撫使。丁丑,大軍南取鉅鹿、洛州二城,還軍至唐陽西九 趨來迎戰,因稍却,誘之近桑林, 長梯,疾趨,夜四鼓,四面齊登,殺守埤者。城中亂,伯祥挺身走天壇寨,一州遂定。 歲(己)[乙]亥,(己)金將李伯祥據趙州,木華黎遣義擣其城。 伏起,金兵大亂,奔還,獲納蘭二弟及萬戶李虎。戊寅, 順天都元帥張柔上其功,陞深州節度使、深冀趙三州招 義伏兵桑林,先以百騎挑之,納蘭 會天大風雨,義帥壯士,挾 木華黎

有餘, 龍 使送銀牌十一命義賜有功者。 虚 虎衞上將軍(武安)[安武]軍節度使, 云行深冀二州元帥府事,賜金虎符。 一銳來攻,義隨機應拒,積三十日不能下,大小數十戰皆捷。 仙軍亂,乘暗攻之,殺數千人。仙率餘衆遁還真定,悉獲其軍資器仗。木華黎聞之,遣 金將武仙以兵四萬來攻束應,仙諭軍士曰三束應兵少無糧,城無樓櫓,一日可拔也。」 然外無援兵,糧食將盡,豈可 庚辰,拔冀州,獲柴茂,械送軍前, '坐而待斃。」惟牛饗士,率精銳三千,銜枚夜出,直擣仙 一夕,義召將佐曰:「今城守雖 木華黎、張柔復上其功,授

之不 船 義 洲 |祥 可 帥 玉 率衆 西 堅 接 使夫懷 府 、史天澤 能 一, 則 敎 走,二子死焉。 壁 先 監 王 令,招 玉 下。 是, 不 來 軍 躍 , 下,压 附 於紀家莊 登彼 一,攻敗 以 金將 趙 甲 ۱Ľ) 趙 集散亡、勸 領 州 忱附 午,義引兵薄其城 於 船, 力 州 本 寧晉 武 或 武 部 四 戰,流矢 仙旣降 家 仙,生 奮戈疾擊,敵莫能當 邢州 人。 十寨隸焉 軍,從攻那 那 率 盜 擒義斌、駐軍 長身駢脅 復叛, 殺元帥 ||仙圍之數匝,殺其子寧壽。 中 ·種藝,深、冀之間,遂爲樂土云。 號 流,邀擊之,義士 左 趙大王,聚衆數千,據任 洛 目, 竟拔 、磁三州 多力,金季爲萬戶,鎭 鼓 寧晉東里寨。 下之,獲趙大王、侯縣令等數人殺之,餘黨悉平。 以其城。 史天倪。 殺 濟南 千餘 叉 諸郡 人, 破平陽, 宋將彭義斌在大名,陰與仙合, 擒秀。 仙 一縣固 號 **玉聞之,領數騎突其圍,斬** 遣 道州。 人齎 長漢萬戶。 下太原、汾、代等州 城 伯祥退保歷城,義 水寨,真定史天澤集諸 **誥命**,誘 太師、國王木華黎下中原, 從攻澤、路諸 王 妻 介妻拒 引 師 兵拔之,伯

列

傳

第

 $\equiv$ 

+

八

 $\Xi$ 

玉.

三五六七

獲數百人

玉從

笑乃

州

獨

潞

日

妾豈

具

舟楫

一、截

其下

卒 皆

水

鄕

人,

善水

戦,回

旋

開

闔

往

來

加

風

雨,

道兵攻

義

辛

已,仙復遣其

將盧秀、李伯祥,率兵謀襲趙州,幷取

歷城,率戰艦數

白

艘,

沿

江

而

下。

脫走, 使。 而還。 ,棄骸滿 斬其將四十三人, 眞定逐平。 仙 遣 人追之, 道。 玉從史天澤 不敢進, 諸將 皆曰:「 撃仙 王將 加定遠將軍, 於 軍 趙州 膽氣驍雄 仙糧 權 真定五路萬戶, 我輩非敵 絕,走雙門寨, 也。」仙乃盡 假趙州 圍之。 慶源軍 會大風 發玉先世 節 仙 獨

民。 有民 負西域賈 元年二月卒,年七十。 入銀, 倍其母,不能償, 子忱。 压出銀五千兩代償之。 又出家奴二百餘 爲

良

宗薨于潛邸,忱建言:「陛下春秋高,當 簿。 言徵 打算大小 北京 授山 忧字允中,幼讀 一切諸 宣 北 慰 遼 司 東道提刑按察司 積 衙門等事」凡十二字,追繫官吏至數 年逋 書,明敏有 負, 計可得鈔二十萬錠。 副使。 才 識。 早建儲 駙馬伯忽里,數馳獵踩民田,忱以法 平章趙璧,引 嗣。 帝遣使覈實, 平章不忽木 見裕宗潛邸,語稱旨 百 人。 忱驗問,知 以聞,帝嘉 熙懼事 了露,擅 其詐,熙乃款伏。 一,命宿 納 繩之。 增制語,有「幷 衞 掌 憲 吏耿 錢 一穀計 裕 熙

唇,嘗俘於兵,旣自贖,主家利其貲,復欲以爲奴。又有誣息州汪淸爲奴, 叉省部以正軍 改 河 北 河南道提刑按察副 餘 田 出 調發,忱言:「士卒衝冒寒暑,遠涉江 使。 忱以江南 人鬻子北方, 海,宜加優恤。」 名為養子,實爲奴 殺而奪其妻子及田 皆從之。 也, 乞禁之。 潁州朱

弩,立賞募能挽者,迪能之,卽署眞定尉,遷藁城尉 拜中奉大夫、雲南行省參知政事,未行,卒。 累遷嶺南廣西、河東 太祖兵至藁城,迪率衆迎降。 獄久不決, 忱皆正之。 祖大悟,抵唐兀台 Щ 西 幼孤,事母孝, 兩 劾罷鎭南帥唐兀台,唐兀台結援大臣,誣奏于帝,繫忱 道肅 · 迪 乃 召 迪治軍嚴,所過無犯。 歲壬午,改藁城爲永安(軍)[州]、[10]以迪同知節度使事 人在城 政 罪。 廉訪使, 其人謂曰:「吾懼若屬爲 按察司改廉訪司,起忱為燕南河北道 中者,得男女千餘人,諸將欲分取之,迪曰:「是 多力善騎射。 江陵、汴梁 ,陞爲丞 而 金末爲義軍萬戶。 去。 兩路總管。 他將 至大(三)(元)年,(五 郡將出六鈞 肅 政 廉 至京 訪 副

#### 趙 辿

師,得

面

陳

其事。

世

使,

宅者。

趙迪,眞定藁城人也。 强

嘗從帝西征,他將校豪橫俘掠,獨

皆 大塚 索 我 以 收壓。 歸 (所掠,當以歸我。) 諸將許諾 先是, 之我。 真定旣破,迪亟入索藁城 壬子歲卒,年七十。子七人,椿齡,眞定路轉運使。 今縱汝往,宜各遂生產,爲良民。」衆感泣 時兵荒之餘,骸骨蔽野,迪爲 所得,則分奴之矣,故

# 即順 [第][]]

盜 常,築兩寨于石城 據 城 邸順 叛,民皆穴地以避之,盜發地 ,保定行唐人,占籍於曲陽縣。 、玄保, 分據以守。 而噉其人,順擒數百 歲甲戌,率衆來歸,太祖 金末 **盗起,順會諸族,集鄉人豪壯數百** 人殺之。 授行唐 朝廷陞 令。 曲 丙子, 陽 爲 人, 眞定饑 恒 川,以順 與其弟 羣

爲

安撫使。

走。 州縣, 元 帥。 以功,賜 金 順擒道章殺之, 將 庚辰 武 武仙 仙據真定, 順名 察納 屯兵 、于黄、堯兩 仙退眞定以自保。 合見,陞驃騎 帥衆來攻,順與戰,大敗之,賜金虎符, 山,順及弟常又擊敗之。 衛上 將軍 順從木華黎攻之, ,充山前都元 帥,弟常,賜 時西京 敗之於王 加鎭國上將軍、恒州等處都 郝 道章, 柳口 名金那合兒。 陰結 何 逐棄眞定 武仙 抄 南 掠

營,順 撤 戶 管領諸路 辛 耨傑 掩 卯 殺 春 其衆,生 金銀符,仍隸 ,從太宗攻河南諸 元 差軍五千人。 獲 十五 麾下。 人。 郡,招降民十餘萬,以順 從 丙辰 癸 <del>卫</del> 大軍破 春,順卒,年七十四 ,攻漣水。 歸 德府, 甲寅 留順 舉部屬 戊戍之。 知 中山 (育撤八、 耨隣之功以 丁未, 府。 己亥, 駐師 五. 佩金符, 河 口 爲 宋 行 上賜 兵 夜 軍 肖 襲 萬

子浹、襲職。 己未,從世祖渡江,圍 鄂州 有 戰 功。 中統元年,世祖即位,浹以所部張宣

等十二人奏聞于朝,遂以金銀符賜之。三年,圍李壇,還守息州。至元十一年,賜虎符,授 金州招討副使,後又遷懷遠大將軍、金州萬戶。十三年,改襄陽管軍萬戶。三月,以樞密院

奏,行淮西總管萬戶府事,守廬州。

德萬戶,鎮守吉安。未幾,統領江西各萬戶,集兵七千戍廣東,凡二載。 大德三年卒,年七 起,行省遷元帥府以鎭之。二十一年,元帥府罷,復爲萬戶。二十三年,佩元降虎符,爲歸 有功。十七年,陞鎭國上將軍、都元帥,鎮龍興諸路,兼管本萬戶府事,賜銀印。吉、贛盜 十七。贈輔國上將軍、北庭元帥府都元帥、護軍、追封高陽郡公、諡裏敏 十四年,移龍興,仍管領本翼軍人。十五年,復爲管軍萬戶,攻贛州崖石寨、太平岩賊

子榮仁,襲佩其虎符,爲宣武將軍、歸德萬戶,鎭廣東惠州,咸瘴疾,不任事。

子貫襲。

貫卒,子士忠襲。士忠卒,子|文襲。順族弟**踪。** 

力戰,流矢中臍,明年卒。 授管軍總押,管領七路兵馬,鎭徐州。宋兵入境,琮戰却之。己亥,從大將察罕攻滁州,自己 癸巳,從元帥倴盞滅金于蔡,有功,眞定五路萬戶選充總管府推官。 宗,太祖時從族兄行唐元帥常來降。歲**乙酉**,金降將武仙,復據眞定叛,琮敗之于黃 尋奉旨,賜金符,

列 傳 第 Ξ 十 八 诹 顓

州及 謙,襲爲潁州萬戶。 古漢軍萬戶,尋遷潁州翼,會徽州績溪縣盜起,澤討平之。 山山 (靜江,累官懷遠大將軍、管軍萬戶、郴州路總管府達魯花赤。二十二年,改授廬州 十一年,從沙洋奪六艦,自己皆論功受賞有差。十二年,授武德將軍、管軍總管,從 子澤 襲, 移鎭 潁州。 元謙卒,子祺襲。 宋兵攻潁, 澤戰敗之。 祺卒,子忠襲。 至元 四年,從元 二十八年,移鎭杭州,卒。 帥 阿朮,克平塞寨及 子沅 老鵐 攻潭

# 七善 子慶端附

推善爲長。 智略,尤精騎射。 王善字子善,真定藁城 善約束有法,備禦有方,盜不能犯,擢本縣主簿。 金貞祐播 遷,田疇荒蕪,人無所得食,善求食以奉母。 人。 父增,監本縣酒務,以孝行稱。善資儀雄偉,其音若鐘, 乙亥,羣盜蜂起,衆

來歸,授金符,同知中山府事。 爭自奮, 逐誅濟、安。 乃論其黨曰:「造釁者,李、郭耳, 圖之。己卯秋,濟、安張宴伏兵,召善計事。 勿以 戊寅,權中山府治中。時武仙鎭眞定,陰蓄異志,忌善威名,密令知府李濟、府判郭安 我累汝家,當取吾首獻帥府。」 是年冬,以兵三百攻武仙,仙遣將率精銳二千拒戰,善擒斬 衆曰:「公何爲出此言,我輩 善覺,卽還治衆,倉卒得八十人,慷慨與盟,人 餘無所問。」善夜臥北城上,戒麾下 惟有效死而已。」 逐 一率衆

之。 仙走獲鹿,委其佐段琛城守, 復戰拔之,入據其城, 軍勢大振, 自中山以南 降州 郡四

戰,却之。 |善奏:「仙狼子野心,終必反覆,請修城隍備之。」未幾, 定,其部曲多來降。丙戌,以功賜金虎符,仍行帥府事 匡 國軍、日即以善行帥府事。 庚辰,遷中山眞定等路招討使, 。仙使其部下宋元,俘老幼四千人南奔,善追奪之,俾復故業。 癸未,進金吾衞大將軍、左副元 尋加右副元帥、驃騎大將軍,屯藁城。 仙果 叛, 帥。 率衆來攻,火及西門, 仙窮迫請降,詔命復舊鎭 仙自是不敢復入眞 壬午,陞藁城爲 善出

贈 輒 Щ 從善北渡者以萬計,授之土田,以安集之。丙申,兼河北 否?願以城降之。」善直前,免胄與語,伯堅果率衆出降。 銀 府 出家貲代 青榮祿大夫、司徒,追封冀國公,諡武靖。 事,屬縣新樂,地居衝要,迎送供給,倍於他縣,皆取於民。善均其勞逸,所徵或未給, 壬辰,從征河南,至鄭州 輸,民德之。 又放家僮五百人爲民,咸懷其思。 癸卯卒,年六十一。 州將馬伯堅素聞善名,登陴大呼曰:「藁城王元 子慶淵,爲行軍千戶,征淮南死,次慶端 西路兵馬副都總管。 善令軍中秋毫無犯,民皆按堵,願 辛 皇慶元年, <u>.</u>: 伸 一,授知中 在 軍 中

慶端 字 正甫,初爲郡筦庫, 進水軍提領,訓練士卒,常如臨敵。 敗李壇於老僧口 ,以功

列

廬,使各安業。 北征、還、遷右〔衞〕親軍副都指揮使、自己進侍衞軍都指揮使、建威武營,以處衞兵、經畫田 創力戰,城得以全。羣盜四起,復擊走之。 佩金符,為千戶。 別立神鋒軍,親敎以蹶張弩技,作整暇堂〈屏〉【犀】利局。日心浚渠構室, 監築大都城。移戍清口,宋兵來攻,守將戰死,城欲陷,慶端拔刀誓衆,裹 進武節將軍、管軍總管,領左右中衛兵。從世 祖 如

端 以所部從,時年六十餘,與士卒同甘苦,晝則擐甲執兵迎敵,夜臥不解衣,暇則俾士卒爲軍 實告,卒曰:「軍中惟知將軍令,不知其他。」近侍以聞,帝賞以黑貂裘。 ,自相懋遷。 征東之功, 慶端贊畫居多。 ,慶端對曰:「兵民等耳,何間焉」即命與之。帝嘗遣近侍夜出伺察,爲邏卒所執,近侍以 至元十九年,改詹事丞,時有司欲就威武貸粟數萬石,濟饑民。 裕宗在東宮,以問慶 及親征乃顏,命慶端

都 威衞使,進階資德大夫。大德二年,加榮祿大夫、平章政事、僉書樞密院事,兼使如故。 成宗卽位,論翼戴功,拜金吾衞上將軍、中書(左)[右]丞, [1七]行徽政副使,兼隆福宮左

#### 杜豐

以疾卒。

列 傳 第 = + 八 杜

兵法 馬都提 杜豐 仕)金, 控。 字唐臣,汾州西河人。 從國 爲平遙 元帥左監軍。 王按察兒攻平陽, 義 軍謀克, 金人南 父珪,以積德好施,鄉稱善人。 佩 銀 先 登。 遁,遂以豐守 符。 太祖取太原, 克絳州 河北 解州諸堡, 豐率所 招 部 豐少有 集流 來 降。 民三 大志, 皇舅 一萬餘家。 按赤那 倜儻 不 以 延授 · 羣, 功賜 兵 通

金虎

符

型

征行

計 破 軍 河 溫谷 獲 庚辰, 東南 生 木澗 口 北 甚 上 等寨,輒先登。 衆。 路兵馬都 |黨[公]張開以萬衆寇汾州 金將武仙等,往來 元 帥 ,便宜行 攻洪洞 鈔掠平陽、太原 事 西山、斬首六百餘 o CIO豐率精騎五 逐破 压女、割渠等寨,俘獲千餘 間,行路梗塞。 級。 一千敗之。 攻松平山, 從國王阿察兒, 壬午,授豐龍 破 人。 之, 賊墮 崖 虎 下懷孟, 衞 死以萬 上將

諸 官,長官者,國初 遂 辰,疾卒于家,年六十有七。 縣皆 略 地登、萊、降島民萬餘。 丙 成,從按赤那延攻益都,金守將突圍出 下。二五辛卯, 高 爵也。 命豐撫定平陽、太原、眞定及遼、沁未降山 在沁十餘年, 寬徭薄 己丑,以本部取沁州, 沁 人立 |祠,歲時祀焉 一豐戰 賦, 视之, 勸課農桑,民以富足。 由 是 銅鞮、武鄉、襄垣、綿(山)〔上〕、沁源 斬首千級,捕虜二十人,益都下, 寨,皆平之。 丁未,請 乙未,陞沁州 長 丙

敗,臺臣皆罷去,思敬 思明,思忠,思敬。 以 帝所眷 知,獨留。 思敬事世 祖 出爲安西路總管,僉陝西行省事,歷 潛邸,由平陽路同知累遷治書侍御史。 汴梁 總管,再 阿合馬

赴,陞中書左丞。 入中臺爲侍 御 史。 致仕,年八十六卒,諡文定。 時桑哥 以罪誅,風 紀爲之振肅。 未幾,拜參知政事,改四川行省左丞,不

# 石抹孛迭兒

用,奏釋之,因請隸麾下,從平高州。 華黎覲太祖於雄州,佩以銀符,充漢軍都統。 師、國王木華黎率師至霸州,孛迭兒迎降,木華黎察其智勇,奇之,擢爲千戶。 石抹孛迭兒,契丹人。 父桃葉兒, 徙霸州。 帝次牛闌山、欲盡戮漢軍、木華黎以孛迭兒可 字选兒仕金,為霸州平曲水寨管民官。 歲甲戌,從木

吉、隰、岢嵐、汾、石、絳州、河中、潞、澤、遼、沁。 矢石,率衆先登,遂拔之。 又從奪忽闌(闇)[闇]里必徇地 乙亥、授左監軍、佩金符、與北京都元帥吾也兒、分領錦州紅羅山、北京東路漢軍二萬。 丁丑,從平益都、沂、密、萊、淄。 山東、江田以大名。比至洛州,城守甚堅,師不得進,孛迭兒不避 戊寅,從定太原、忻、代、平陽、

安水寨。 庚寅,朝太宗于行在所,賜金符。 辛巳,木華黎承制陞孛迭兒爲龍虎衞上將軍、霸州等路元帥,佩金虎符,以黑軍鎭守固 旣至,令兵士屯田,且耕且戰,披荆棘,立廬舍,數年之間,城市悉完,爲燕京 辛卯、從國王塔思征河南。 癸巳,從討萬奴於遼東,平之。 外蔽。

三五七七七

幸选兒始從征伐,及後爲將,大小百戰,所至有功,年七十,以疾卒于官。 子<u>糺</u>查剌、查

茶刺。

### 賈塔刺軍

穴城先入,破之,即軍中拜元帥,改銀青(光)[榮]祿大夫。[三]從睿宗入散關,略關 將之。及攻益都,下之,加龍虎衞上將軍、行元帥左監軍,便宜行事。 興元,渡漢江,略唐、鄧、申、裕諸州,鼓行而東,河南平。陞金紫光祿大夫、總領都元帥。 烏孫國也。歲己丑,自己將所部及契丹、女直、唐兀、漢兵,攻斡脫刺兒城。 賈塔刺渾,冀州人。太祖用兵中原,募能用砲者籍為兵,授塔剌渾四路總押,佩金符以 師還、駐謙謙州、即古 塔刺渾督諸軍, 外四州,經 從

大帥|太赤攻徐、邳、平之。十六年、卒。

弟六十八襲。至元五年、諸軍圍襄樊。九年,六十八帥所部戍駱駝嶺一字城, 子抄兒赤襲,從諸王也孫哥、塔察兒南征。戊午,卒於軍。子冀驢襲,卒。

立砲樊

城南,不發,以怠敵心,俄帥銳卒突出,攻其城西,破之。 以功賜銀幣、鞍馬、弓矢。

砲摧 其城壁,以納諸軍。 十一年,諸軍南征,渡江。明年,加宣武將軍。 宋援兵突至,力戰却之。 常州既克,帥府令總新附砲手軍。 宋常州守臣姚胄,堅守不下,六十八發 臨安

十年,罷都元帥,更授砲手軍匠萬戶,佩三珠虎符。二十六年,卒。 領南 降,加懷遠大將軍,從諸軍追宋二王至海,下三十餘城。十四年,加昭勇大將軍。 軍精銳者入衞,加輔國上將軍。十八年,論功,授奉國上將軍,管領砲手軍都元帥。

### 奥敦世英

爾、驅之死戰,何忍殺之耶」遂止。世英從數騎巡部定襄,卒於軍。 率衆欲復山西。世英與戰,克之,將盡殺所俘,其母責之曰:「汝華族也,畏死而降,此卒伍 英及弟保和迎降,皆授以萬戶。世英倜儻有武略,由萬戶遷德興府尹,時金經略使苗道潤, 奥敦世英,女真人也。其先世仕金,爲淄州刺史。歲癸酉,太祖兵下山東,淄州民奉世

給戶、食其租。年五十六、致仕。保和四子:希愷、希元、希魯、希尹。 定、順德諸道農事,凡闢田二十餘萬畝。改眞定路勸農事,兼領諸署,賜居第、戎器、裘馬, 保和由萬戶陞昭勇大將軍、德興府元帥,錫虎符,改雄州總管。 尋以元帥領眞定、保

舞法,民甚苦之。希愷知其弊,蠲煩苛而民不擾。尋以勸農使兼知冀州。 南征時,置軍儲倉于汴、衛,歲輸河北諸路栗以實之,分冬月三限,失終限者死,吏徵斂 希愷襲勸農事,皇太后錫以錦服,曰:「無墜汝世業。」郡縣有水旱,必力請蠲租調,民賴 希愷至,為東約,

列傳第三十八 奧敦世英 田雄

中。 健 訟 三月. 之俗爲變。 ,改順德。 蒙古軍取民田牧,久不歸,希愷悉奪歸之,軍無怨言。 又踰月,陞 知河 中府,秩滿歸調。 時 阿合馬專政, 官以賄 至元二年,遷順天治 成, 希愷 不往

見之,降武德將軍,知景州,數月卒。

希元

彰德

漕運使。

希魯、澧州路總管。

哈必赤賞銀五十兩。 贼 自效。 希尹 · 壇旣就擒,至元十一年,樞密錄其功,自右衞經歷,六遷至同知廣東道宣慰司事,卒。 ア,中統一 試其騎射、壯之、命充眞定路行軍千戶。 三年,李璮叛濟南 希尹請築外城圍之,深溝高壘,俟其糧絕,不戰而 一世祖命丞相史天澤討之。 與賊戰,矢無虛發,賊敗走 希尹謁天澤,面陳利害,願擊 坐待其困,天澤從 入城 中,諸王

#### 田雄

府州 太祖 壬午,以木華黎命,授河 有 功, 縣二十有九,平錦州張鯨兄弟之亂,從攻柏鄉、邢、相。 軍至 田 木華黎承制授雄隰、吉州刺史,兼鎮戎軍節度使,行都元帥府事,平汾西霍山諸栅。 雄字毅英,北京人也。 北京,雄 率衆出降。 中帥,聽石天應節制。 幼孤,能樹立,以驍勇善騎射知名,金末署軍都統。 太祖以雄隸太師、國王木華黎麾下,從征 辛巳,從攻鄜、坊、綏、腹諸州 興中、廣寧諸郡,定 歲辛未り

治。 福,招徠四 巳,授鎭 按堵,而別部將校,縱兵虜掠,民惶懼悔降, 爲 御 事聞 前先鋒。 太宗時,從攻西和、興元諸州,又從攻變、萬諸州。 撫陝西總管京兆等路事。 ,賜金符。 山堡寨之未降者,獲其人,皆慰遣之,由是來附者日 頃之,使攻破楨州雷家堡。 定宗時,入覲于和林。 時關中苦於兵革,郡縣 奉旨招納河南降附, 以疾卒,年五十八。 雄力爲救護,至出 論功尤最,賜金符,授行 蕭然。 得戶十三萬七千有奇,民皆 己財與之,民得免於害。 衆。 後追封西秦王 雄披荆棘,立官府、開陳 雄乃教民力田 軍千戶,召 京兆大 癸 禍

子八人,大明,襲職,知京兆等路都總管府事。

### 張拔都

漢都 都虎卒,無子,以拔都代之。 都,自是漢都虎亦專任之。 虎 張拔都, 昌平人。歲辛未, 太祖南征, 拔都率衆來附, 願為前驅, 遂留備 西征 回紇、河西諸蕃,道隴、蜀入洛,屢戰,流矢中頗不少卻。 甲午,金亡,以漢都虎爲砲手諸 及漢都虎兄子膽闍少長,拔都請于朝,歸其 色軍民人匠都元帥,守眞定。 帝聞 (政而 जा 終老 宿衞。 壯之 焉 賜名拔 從近 臣 漢

元年,賜銀符,預議砲手軍府事。 子忙古台,從憲宗攻蜀釣魚山、苦竹二壘,冒犯矢石,屢挫 尋易金符,爲行軍千戶,從征襄樊有功,卒。 一而不 沮 遂以勇敢聞。 中統

列 第 = + 八 張 拔 都 張 祭

拜宣武將軍、行軍總管。未幾,遷副萬戶,加明威將軍。 吾蒙其餘澤,荷國厚恩,當輸忠王室,增光前人,豈可苟爲自安計耶!」力請代之,凱還,人服 舉,將校舊嘗往者,許留恤之。有脫歡者,當行,適病,不能起,世澤曰:「吾祖父以武勇稱, 子 世澤襲,從丞相伯顏南征,大小十餘戰,皆有功。 從鎮南王脫歡伐交趾,旣還,及再 又從平廣西。 明年,收瓊、萬諸州,

#### 張樂

其義云。

師當在何時。」一揆請以一月爲期,乃督工匠,造船百艘,遂濟河。 西五路。 名兀速赤。 八月,至西域莫蘭河,不能涉。太祖召問濟河之策,榮請造舟。 元 帥 左都監。乙亥正月,奉旨略東平、益都諸郡。戊寅,領軍匠,從太祖征西域諸國。 張榮,清州人,後徙鄢陵。歲甲戌,從(金)太保明安降,[三]太祖賜虎符,授懷遠大將軍、 十月,攻鳳翔,砲傷右髀,帝命賜銀三十錠,養病於雲內州。 癸未七月,陞鎭國上將軍、砲水手元帥。甲申七月,從征河西。 太祖嘉其能,而賞其功,賜 太祖復問一一舟卒難成,濟 庚寅七月卒,年七十 乙酉,從征關 庚辰

子奴婢,襲佩虎符、砲水手元帥,領諸色軍匠。太(祖)[宗]伐金、[三]命由關西小口,收附

領蒙古、漢軍,守(均)[鈞]州。戊申九月,宋兵襲(均)[鈞]州,奴婢拒戰,大敗宋師。己酉十 金昌州等郡。乙未,金亡。至立戊戌,授懷遠大將軍。癸卯三月,陞輔國大將軍。甲辰二月, 一月,復與宋兵戰,流矢中右臂。中統三年卒,至三年七十五。

常州 陛見,各以功受賜。帝親諭之,令還鎭。十一年,從軍下漢江,至沙洋。丞相伯顏命率砲手 破。十年,襄陽降。參政阿魯海牙以宋降將呂文煥入朝,奉旨召蒙古、漢人萬戶凡二十人 元八年,調守襄陽一字城、橐駝嶺,攻南門牛角堡,破之。攻樊城,親立砲摧其角樓,樊城 之。十二年,從大軍與朱將孫虎臣戰于丁家洲,復從丞相阿朮攻揚州,是年冬,又從諸軍破 軍攻其北面,火砲焚城中民舍幾盡,遂破之,賜以良馬、金鞍、金段。又以火砲攻陽邏堡,破 子君佐、襲佩虎符、砲水手元帥、戍蔡州。五年,都元帥阿朮、命將砲手兵攻襄陽。至

上將軍,仍砲水手元帥。 道,賊不敢入,乃寇黃州。 人原及司空山天堂賊,將攻安慶,君佐密察知之。時城中軍僅數百人,君佐命搤賊出沒要 庭芝、都統姜才棄城走,揚州平,以君佐爲安慶府安撫司軍民達魯花赤。十四年春,安慶野 十三年,陞懷遠大將軍,仍砲水手元帥。秋,岩佐屯軍眞、楊間,絕炔糧道。 十九年,命率新附漢軍萬人,修膠西閘壩,以通漕運。二十一年, 行省命君佐率衆復黃州,因以爲黃州達魯花赤。十五年,加鎭國 宋制置李

## 趙天錫 章亨

嚴實。 旭 保冠氏有功,授冠氏 如故。 遣兵南 趙天錫字受之,冠氏人。 實素知天錫名, 下,防禦使蘇政以爲冠氏 丞,俄陞爲令。 遂 擢 隸帳 屬金季兵起, 下, 令,乃挈縣人壁桃源、天平諸山。 大安末,天錫 從征上黨, 其祖以財雄鄉里,爲衆所歸。 入粟佐軍 ,補修武 校尉 俄遷元帥左都監, 歲辛巳春,歸行臺東平 監治水縣酒。 貞祐之亂,父林, 兼令

行在所,上便民事,優韶從之。 總管事。 後舉,乃率將佐往依大將孛里海軍。 日,個自將萬人來攻,天錫率死士乘城,力戰三晝夜,個度不能下,乘風霾 甲申、宋將彭義斌據大名、冠氏元帥李全降之,人心頗搖。 李全在大名,結其帥蘇椿,納金河南從宜鄭倜,日 戊戌、征宋、駐兵蘄、黃間、 未幾,破義斌于真定,授左 被病還,卒于冠氏,年五十。 以取冠氏為 一副元 天錫令衆姑少避其鋒,以圖 帥 事。 同 知大名路兵馬都 遁去。 天錫每戰輒勝, 己 丑,朝 子六

列

傳

賊出 俱反,季文龍自署爲兩浙安撫使,據處州天慶觀。 貴亨率衆圍 合二萬衆來攻,陣惡溪南。 招討使,率兵平之。 江、「三」與宋將孫虎臣、張世傑大戰于焦山、殺掠甚衆。 年, 劉 軍 - ,征宋,攻襄樊。 整朝京 修東、西正陽城。 戰,以精騎踩之,遂棄城突圍散走, 十四年,授虎符、懷遠大將軍、處州路總管府達魯花赤。 實亭字文甫 師,命爲征行千戶,賜 襲行軍千戶。 **賁亨出抄蘄、黄,以五百人拔野人原寫** 未幾, 三月,敗夏貴于淮,益以濟南、汴梁二路新軍。 處州 賁亨分兵拒守,自將精銳亂流 金符,及衣帶鞍馬。 青田縣季文龍、章焱殺趙知府以叛,賁亨獲其黨,始知 已未, 從 斬首三級、賁亨入城、乃招散亡、立官府。 國兵渡江 文鄂, 攻樊城,冒矢石,擁盾先登,破之。 十三年,江南平,以功陞宣武 衝擊,屬萬戶忽都台以援兵至,自 山寨,修白河 有功。 未行,適盜發澉浦,行省檄爲 一之,將騎士三百陣于 至元五年, 十二年正月,從攻鎮 新城。 總管山 七年,偕 下河門。 章焱復 將 。 十 東 七縣 軍。 渚 元 帥 黧

士五 |百往討,與賊將鄭先鋒、陳壽山三千餘人戰于||雲鄉,斬首三百餘級。 + 克. 年,龍泉縣張三八合衆二萬,殺慶元縣達魯花赤也速台兒,且屠 其家。 三八軍于縣西 賁亨將騎

杖之,仍各求所失還之,州民悅服

曰:「我受命來監此郡,賊固

一可殺,

良民何辜」不從。

將士虜掠子女金帛,賁亨捕得倡率者

巳至亥,賊方退,文龍

溺死。

忽都台以處即亂山爲州,

無城壁可恃,

且

一反側,

欲屠之,賁亨

賊三戰俱敗,軍還,賊衆水陸俱設伏,賁亭擇步卒驍悍者使前,賊不敢近。旣而衢州賊陳千 聚二萬 人,遂昌葉丙六亦聚三千人助之,賁亨前後斬首三千餘級,悉平之。 十七年,改處

州路管軍萬戶。二十二年,還冠氏,卒,年五十七。

### 校勘記

- [1](均)[鈞]州 從道光本改。下同。
- 四年 按本書卷二太宗紀五年癸巳正月戊辰條、 卷一二一速不台傳及金史卷一八哀宗紀天興
- 年 正 月戊辰 條、蒙古破金南京在元太宗五年。 蒙史改「四」爲「五」、是。
- |漢 憲宗八 軍伐宋。 年從世祖攻釣魚山 九年七月、帝崩于釣魚山。世祖紀戊午冬十一月、碼牙于開平東北。 本證云:「案憲宗紀,八年戊午十一月,命忽必烈即世祖統諸路蒙古、 己未八月渡淮。

九 月朔 親 王穆哥自合州釣魚山遣使以憲宗凶問來告。 是攻釣魚山者乃憲宗,非世祖 且事 亦

在九年也。」

- **2**9 三拜延傳、卷一 大(林)[良]平 六五趙匣刺傳、卷一九七郭狗狗傳改 據本書卷六、九世祖紀至元三年十一月丙辰條、十三年十一月丙午條、 卷一三
- Ħ. 十年冬十二月襄樊未下 下文有明年正月,襄陽守呂文煥降」。 按本書卷八世祖紀、卷一二八

列

傳

簿

=

+

八

校勘記

阿里海牙傳,呂文煥請降在至元十年正月,此處「十年冬」當作「九年冬」。

- **一次**山 師旣渡江四家奴自鄭州下沿海諸城堡 按鄭州不沿海、且早爲元有。 此處史文有誤。
- [47 歲(己)[乙]亥 道光本與紫山集卷一八王義行狀合,從改。 按後文有丁丑年。
- (武安) [安武] 軍節度使 據紫山集卷一八王義行狀改正。 安武軍原係宋冀州節度軍額, 金仍

之。王義據冀州,故有此節度使銜。

- 八九山 至大(三)[元]年 據滋溪文稿卷二三王忱行狀、元文類卷六八王忱神道碑改。
- 改藁城爲永安(軍)[州] 安州、號其衆爲匡國軍。 考異云:「案王善傳, 壬午, 陞藻城爲匡國軍。 永安乃州名,非軍名也。 傳誤。」從改。 董俊傳, 陞藁城縣爲永
- (二) 〔琮〕 據本書原目錄補。
- 己亥從大將察罕攻滁州 本書卷一二〇察罕傳與靑崖集卷五邸琮神道碑「己亥」皆作「戊戌」

疑「己亥」誤。

- 從沙洋奪六艦 多所俘馘」。 青崖集卷五邸琮神道碑作「戰青山磯、獲戰艦 此句不文。牧庵集卷一七野澤神道碑作「從拔新城、 沙洋、下」、「從戰青山磯
- 陞藁城 四八董俊傳有一陞藁城縣爲永安州, 為匡 國軍 按常山貞石志卷一五李冶王善神道碑作「陞藁城爲永安州匡國軍」, 號其衆爲匡國軍」。藁城以縣升州, 非陞縣爲軍, 匡國 本書卷

係節度軍額。此處「匡國軍」上當有「永安州」。新元史已校。

- 二吾 遷右〔衞〕親軍 副都指揮使 據常山貞石志卷一七閻復王慶端 神道碑補。 蒙史已校
- (二六) (屏)(犀)利局 道光本與常山貞石志卷一七汪慶端神道碑、 程雪樓集卷一七王慶端墓碑 從

改。

- 中書(左)[右]丞 據常山貞石志卷一七王慶端神道碑、程雪樓集卷一七王慶端墓碑改。
- 上黨[公]張開 據平遙縣志卷一一李鼎杜豐神道碑補。 按金史卷一一八張開傳,張開景州人,

封上黨公。

- 銅鞮武鄉襄垣綿(山)[上]沁源諸縣 據本書卷五八地理志改。 金史卷二六地理志亦作「綿上」。
- 忽闌」 奪忽闌(闇)[闍]里必 元名臣事略卷一引東平王世家作「奪忽闌徹里必」。「闍里必」,官名,「闍」字誤,今改。 本書卷一五〇石抹也先傳作「脫忽闌闍里必」,卷一一九木華黎傳 作「掇

新元史已校。

- 率 歲己丑 師 親 征 ,取訛答刺城」。 己丑係元太宗元年, 訛答刺卽斡脫刺兒。 無攻斡脫刺兒城事。 蒙史改作「己卯」。 本書卷一太祖紀十四年己卯六月條有 市帝
- 銀青榮祿大夫,無「銀 改銀青(光)[榮] 祿大夫 青光祿大夫」。 按本書卷九一百官志、金史卷五五百官志, 後文云「陞金紫光祿大夫」,則此處應爲「銀靑榮祿大夫」, 文散官有金紫光祿大夫、

列傳第三十八 校勘記

「光」誤,今改。

太保在降蒙古之後。紫山集卷一六張榮神道碑作「明安太保」、本無「金」字、據删 歲甲戌從(金)太保明安降 考異云:「案石抹明安仕金未嘗爲太保,此云金太保,誤。」按明安稱

太(祖)[宗]伐金 據紫山集卷一六張榮神道碑改。蒙史已校。

乙未金亡 蒙史云:「金亡于甲子正月,舊傳乃云乙未金亡。如此大事,歲月猶差。」按蒙史是,

中統三年卒 按紫山集卷一六張樂神道碑云,子忠仁即奴婢卒于丁卯二月。丁卯爲至元三年,

此作「中統」當誤。

此傳紀年多與史實不符。

十二年正月從攻鎭江 七月〕此處「正」當作「七」。 按本書卷八世祖紀至元十二年七月辛未條、卷一二八阿北傳,攻鎭江在

# 兀史卷一百五十二

# 列傳第三十九

## 張晉亨 好古

實 恩州刺史,兼行臺馬步軍都總領,再遷鎭國大將軍。 免於難。<br />
實遣子忠貞入質,命晉亨與俱。丁亥,從國王孛羅征益都,以功遷昭毅大將軍,領 實器之,以女妻焉。 定城,俘其將士十有五人。略信陽,執復州將金之才。攻六安,拔之。 之衆,附嚴實于靑崖,後從實來歸,進顯安武軍節度使,西征,戰沒。 入觀,命爲東平路行軍千戶。圍安慶,其守將走,邀擊之,斬首百級,俘獲無算。 歲戊寅、太師、國王木華黎承制,署晉亨襲顥爵。晉亨涉獵書史,小心畏愼,臨事周密, 張晉亨字進卿,冀州南宮人也。其兄同知安武軍節度使事、領寨强令顥,以冀州數道 實征澤、潞、偏將李信、晁海相繼降于宋、晉亭跋涉險阻,畫伏夜行,僅 實征淮楚、河南,晉亨畢從。甲午,從 大小數十戰,策功 攻光之

列

傳統

居多。

「虎符,國之名器,長一道者所佩,臣隸忠濟麾下,復佩虎符,非制也。臣不敢受。」帝益喜, 乎。今天顏咫尺,知而不言,罪也。承命而歸,事不克濟,罪當何如!且五方土產各異,隨 改賜璽書、金符,恩州管民萬戶。 言以對, 帝是之, 乃得蠲戶額三之一, 仍聽民輸他物, 遂爲定制。欲賜晉亨金虎符, 辭曰: 其產爲賦,則民便而易足,必責輸銀,雖破民之產,有不能辦者。」大臣以聞,明日召見,如其 賦銀六兩,諸道長東有輒請試行於民者,晉亨面責之曰:「諸君職在親民,民之利病,且不知 訟,日不暇給,歷七年,吏畏而民安之。辛亥,憲宗卽位,從忠濟入覲。 實 卒,其(其)子忠濟奏晉亭權知東平府事。[1]東平貢賦率倍他道,迎送供億,簿書獄 時包銀制行,朝議 戶

管、尋無軍事。十一年、詔伐宋、晉亭在選中,聞命就道、曰:「此報效之秋也。」分道由安慶 營,以時種藝,選千夫長督勸之,事成,期年皆獲其利。至元八年,改懷遠大將軍、淄萊路總 渡江,丞相伯顏留之戍鎭江,兼與民政,壹以鎮靜爲務,戰焦山、瓜洲,皆有功。十三年,卒 符,分將本道兵充萬戶,戍宿州。首言:"「汴堤南北,沃壤閒曠,宜屯田以資軍食。」乃分兵列 中統三年,李壇叛,晉亭從嚴忠範戰於遙牆濼,勝之,改本道奧魯萬戶。四年,授金虎 名。 其功 槍與金軍戰死,衆推蘇椿代領其衆。 得其所矣。」弟好義襲,下江淮有功。 據濟南,宋人攻蘄,好古率兵迎擊,力不敵,死之。時晉亭在濟南軍中,聞之,哭曰:「吾兒死 宿州,忠濟命兼恩州刺史,訪民瘼,革吏弊,立爲條約。 鐵槍,聚衆保鄉里。太祖遣兵攻破河朔,鐵槍以兵應之,行營帥按只署珍軍前都彈壓。 制 以好古權其父軍,戍宿州。戊午,奏眞授行軍千戶,攻樊城,身中流矢,戰不少卻,主將旌 珍棄其家,間道走還軍中,按只嘉其誠,待遇益厚,以爲假子。 ,賞銀百兩。略揚,循泰興、海門而還。擊邵伯埭,拔之。從大軍攻鄂。 好古字信甫,少讀書,善屬文,器識宏遠,勇而有謀。 王珍字國寶,大名南樂人,世爲農家,珍慷慨有大志。 宋將彭義斌帥師侵大名,椿戰不利,降之,義斌遂據大 未幾,移戍蕲(州)[縣]。[三] 金末喪亂,所在盜起,南樂人楊 父晉亨權知東平府事,嚴忠濟承 復從速魯忽擊走義斌, 中統元年,還 李璮叛,

蘇椿 稱歎。 以大名降, 授鎭國 上將 珍妻子故在,珍語之曰:「吾非棄汝輩,誠不以私愛奪吾報國之心耳。」 聞者 軍、 大名路治中、軍前行元帥府事。俄以取寧海、胙城功,遷輔國上將

列

傅 第

 $\equiv$ 

十

九

王 珍

軍 ,復授統 攝開曹滑濬等處行元帥府事,兼大名路安撫使。

死 行 大 斌 名路 省事 仙 于 蘇椿 驃騎 十人奪之,宋人遁,乘勝進師, 鄭州 尙 書省下都元 從軍伐宋,破光州、棗陽、廬、壽、滁 復 衞上將軍、同 ,復與金人戰于蕭 欲叛歸金, 加,將 珍覺之, 知大名府事、兼兵馬都元 其軍。 縣, 與元 斬 或 其將。 連破濠 用安據徐、邳,珍從太赤及 (帥)梁仲先發兵攻椿,椿開南門而遁。 頃之, 泗、涸、渦 州,珍常身先諸將,屢有 帥。 仲死。  $|\Box$ 從(刺)[速]不台經略河南 國王命 阿术魯攻拔 仲妻冉守眞 功。 宋城 國王斡眞授仲行 (權行 之,授同愈大名 五. 河口 省事 破 丁,珍爲 珍帥 金將

ス 逋 貸 糧。 借 朝定宗, 西 歲 域 已 庚子,入見太宗,授總帥本路軍馬管民 賈 而 [四] 進本路 朝 人銀八十鋌,及逋糧 廷 議 分蒙古、漢軍 征行 萬戶,加 戍河南、以 五萬斛,若復 金 虎 符。 珍成雕州,修城隍,明斥候,宋兵不 在鎭 【徵之,民無生者矣。」 詔官償 次官,佩金符。 九年,卒,年六十五 珍言於帝曰:「大名困於賦調, (所借) 敢 銀 犯。 復 盡蠲其

逮 李 璮 一叛,從哈必赤討平之,哈必赤論功,語以官賞, 子 文幹,善騎射,襲爲行 軍萬戶。 百事、雑綵 己未,從世 數百練賞之,文幹悉頒之軍 祖攻鄂州,先登,中流 文幹對日:「增秩 則 、榮及 中 矢,賜以良馬、 身,賜 金 金帛 則思

中統三年,制一父兄弟子並仕同塗者,罷其弟子。」文幹弟文禮爲千戶,文幹自陳,願解

其鄂 于官,年五十八。 州之功,陞僉東川行 而留文禮,韶從之。 發其篋中,錢僅七緡,貧不能歸葬,人以此稱之。 改同知大名路總管府事,累遷 樞 密院事,歷全州、衛輝、東平總管,改江東建康道提刑按察使,卒 河東山西道提刑按察副 使。 近臣言

### 楊傑只哥

阿北 然曰:「姑待之。」凡三往,乃降。 死耶。」傑只哥無懼色,從容言曰:「今齊、魯、燕、趙、地方數千里,郡邑聞風納降, 從攻遼左,及從元帥阿朮魯定西夏諸部, 「彼恃巨浸,我師進不得利,退不得歸,不若往說之。」進見其來,怒曰:「吾已斬二使,汝不懼 城,內無軍儲,外無兵援,亡可立待。爲君計者,不如請降,可以保富貴而免死亡。」進默 魯知其材略出諸將右,命裁決軍務。 楊傑只哥, 燕京寶坻人, 家世業農。 有功。己丑,睿宗賜以金幣,命從阿朮 信安城四面 傑只哥少有勇略,太祖略地燕、 阻水,其帥張進數月不降,傑只哥曰: 趙, 率族屬降附 魯攻信安, 獨君恃此

臌兵操舟楫 也。」衆是 辛卯,大名守蘇椿叛, 其言。由是滑、濟等州 伏草澤中,率勁卒數人,憑河擊之,悉奪舟楫, 討獲 聞 之, 風 衆議屠城,傑只哥曰:「怒一人而族萬家,非招 (納款。 壬辰,師次徐州,阻河不 衆遂得渡, ·得濟。 獲河南諸郡降人三萬 傑只 哥 來 探 知 之道 有

列

傳

而還。 餘 户。 進攻 皇太弟國 徐州 王駐兵河上, 金將 國 [用安拒戰,傑只哥率百餘騎突入陣中,迎擊於後, 見之,賜名拔都,授金符,命總管新附軍民。 大敗之, 擒 將

徳城 筏渡濠抵城下,梯城先登,拔之。 ,傑只哥率衆拒戰,敗之。 乙未,太宗特賜傑只哥 種田民戶租賦。 率舟. 由是進攻, 師追擊、轉戰 丁酉,從阿朮魯攻歸德, 得五州十 中流、溺死、年四十。 縣四堡二寨。 己亥, 傑只哥摩諸將縛草作 宋兵至,已登歸

子孝先、孝友。 孝先, 愈江北淮 東道肅政廉訪司 事。 孝友,鎭江 路總管。

#### 劉通

撤去 丙辰卒。 德州總管、行 人鼓譟而 丘」。至實薦于太師木華黎, 宋 劉通字仲達, 人懼 進、宋 其向己也、大潰、義斌僅以數騎免。 軍千戶。 人 驚懼,墜溺死者甚衆。 東平齊河 太宗錫金符,陞上千戶。 人也。 以通 爲齊河 初從嚴實來歸, 明 總管,尋授鎭國 日復 合, 宋將彭義斌攻齊河城,率衆 歲丁 圍 繼 酉,遷德州等處二萬戶軍民總管。 城 從 三匝,通令守陴者植槊如櫛,俄從 上將軍、左副都 收濮、曹、 相、 元帥 潞 夜登,通與六七 定陶、楚(兵) 濟南 知府 歲

子復亨,製爲行軍千戶,從嚴實略安豐、通、泰、淮、濠、 泗、嘶、黄、安慶諸州。 憲宗西

列傳第三十九 劉通

旨成和林,還,授虎符,進武衞軍副都指揮使。李璮叛,遣使招復亨,復享立斬之。 征,復亨攝萬戶,統東平軍馬攻釣魚山苦竹寨,有功,師還,棄德州軍民總管。 中統元年,奉 時遺兵

討賊,集濟南,乏食,復亨盡出其私蓄以濟師,世祖嘉之,賜白金五千兩,復亨固辭。

總管,俄授鎭國上將軍,爲淮西道宣慰使都元帥。 還,招降淮南諸郡邑。十二年,授昭信路總管。十四年,遷黃州宣慰使。十五年,改太平路 經略使。十年,遷征東左副都元帥,統軍四萬、戰船九百,征日本,與倭兵十萬遇,戰敗之。 至元二年,進左翼侍衞親軍都指揮使。四年,遷右翼。九年,加昭勇大將軍、鳳州等處 二十年,加奉國上將軍。三月,卒。

湖北道宣慰使。澧,知長寧州。 子五人:浩,澤,澧,淵,淮。浩,中統四年襲千戶,至元八年歿于兵。澤,由近侍出爲荆 俱蚤卒。

戰有 張弘範征閩、廣、漳、韶諸州,以功授武德將軍。十六年,從攻崖山,弘範命淵領後翼軍,水 宋人戰昭信軍南靖平山。 清河,敗之,擒十四人,奪其輜重。 九月,從右丞別[乞]里迷失攻(惟)[淮]安。[t]十三年,與 邏泗州,至淮河九里灣,遇宋軍,戰勝,奪其船三十餘艘。十二年三月,與宋安撫朱煥戰于 功。 淵,至元十一年,佩金符,授進義副尉,爲徐、邳屯田總管下丁莊千戶。至九月,領兵巡 十七年,進安遠大將軍,爲副招討。二十一年,遷潁州副萬戶。二十四年,從征交 俱有功。 十四年,北觀,進武略將軍、管軍總管。十五年,從元

還。 趾 鎭 二十八年,捕寇浙東, 南王脱歡 命領水步軍二萬,攻萬劫江,擒十六人。 獲其酋長三人。三十一年, **棄領紹興浙江五翼軍** 繼攻靈山城,賊衆迎 守杭州 敵,大敗之,師 ,繼以

年 ,改河南江 子 無晦 了至大元年,襲授昭信校尉、潁州副萬戶,俄進武德將軍。延祐五年,以病免。六 北行 省都鎭撫。 泰定四年,加宣武將軍。

疾卒,大德十一年卒。〔六〕

#### 岳存

張。 會金從宜鄭倜 存率 岳 存字意誠,大名冠氏人。初歸東平嚴實,承制授存武德將軍、帥府都總領,保冠氏。 死 士百餘,突出 復 據大名,距冠氏僅三十里,遣兵來攻。 西門,勇氣十倍。 金人退走,存追之,越境乃還。 倜不得志,復自將萬 人合圍 , 其 勢 甚

不與。 曰:「彼衆我寡,不可 、步卒三百,自彰德北還。 鼓作氣,無不一當百,開衆大潰,追二十餘里,不損一卒而還。 歲己丑 辛丑,陞本縣丞。 ,從嚴實及武仙戰于彰德西,敗之,遷明威將軍,行冠氏主簿。 輕動,當聽吾鼓聲爲 庚戌,移治楚丘,數年,有惠政。 至開州南,與金將張 節。」乃命騎士居前,步卒次之,與敵 開遇,開衆 乙卯,告老退休田里。 萬餘,存軍 破河南,攻淮 依 明年,存率騎兵 大林, 相 中統三年, 漢,無役 去僅二十 戒 其

等堡。 築正陽 子 東 天禎 天 西 禎 城,及於 率銳士,冒 ,襲父職冠氏縣 頻江 5矢石 造戰船,天 、從樊城 軍民彈壓,從圍裏樊, 禎 東 咸 北 董 先登,爲 其役。 人糧木 帥府 戰 焦山 所 承 傷,墮 制授管軍 ,平奉化 地 財、錄 復躡 百戶,修立百丈山 梯 功 以登 陞管軍千戶 手刃 '數人。 鹿門

紀遺 尤溪 ) 愛焉。 賊。 江 南 秩滿,改 平,從元 至大二年,卒于建康,年七十二。 吉州 帥 張 弘 ,平永新 範觀帝于柳林, 賊,後遷贛州。 賜 金錦、 子果,會昌 七年,日遷建康, 銀鞍勒。 州同 授昭勇大將軍、福 知 首定救荒之政, 州 路總管,平 民立碑以

#### 張子良 懋

全 夏全 新 間 ,耕稼已絕, 所 城 數萬 劫 劫 張 其 老 子良字漢臣,涿州范陽 幼 民 П, 數萬 出 就 逐聚州 雞 食 以還。 東平,東平守納 口 , 人, 李敏據州 全怒, 阻水, 連徐、 人。 治舟筏、取蒲 之。 子良率麾下造敏 金末四方兵起, 邳之軍來攻。 久之,守棄東平還汴,檄子良 魚自給、 所在募兵自保。 ,從之者衆,至不 子良與宿 敏欲害之, 帥斫其營, 走 歸宿, 南屯 能容。 子良率千餘 宿州 全失其 因 以 子 叉 宿 良 軍符 南 帥 部 人 勒定 屯 之 入燕、薊 壽州 走 衆 興、 奪 死

列

州

將 無 穟 仍 用 良 、敢掠其 治 安請 圖 以 與 宿州。 之,子良與麾下十數人,即軍中生縛其守。 食,子良嚴兵護之,以防鈔掠。 時 偏將 因 金 受重 財 以徐、宿授子良。 物。 當是時,令已不行於陝,而用安 ,畫伏夜行 重 於汴, ,得入汴,達用安意。 聲援盡絕,有國用安者,圖以漣水之衆入援, 明年 ,子良進米五百石于汴 猝遇敵 亦卒不得志。 ,子良被重傷,乃率其衆就食泗州。 金君 民不欲北歸者,欲走傍郡 臣 以爲 ,授榮祿大夫,總管陝 自天降也,曲賜勞來,凡 徐、宿之間,民無食者,出 道阻 一,游兵不能進。 子良資 西 泗守閱兵, .所欲,皆如 東路兵馬, 以舟楫, 城 治穭 子

都 庚 子,賜· 總 帥 歲 一授銀 戊戌、率泗 金符。 大青榮禄 自兵興以來,子良轉徙南北,依之以全活者,不可勝計 州 大夫,陞京東路行尚書省兼都總帥,管領元 .西城二十五縣、軍民十萬八千餘口,因元帥阿朮來歸。 附軍民,進金紫光祿 太宗命為東路

路 侯、諡 總管,兼府尹。 降虎符,仍管領 癸丑 一憲宗命爲 八年,卒,年七十八。贈昭勇大將軍、僉樞密院事、上 泗州 歸德府總管,管領元 軍民總管。 七年,[10]罷元管戶, 附軍民。 中統二年夏四月,世 隸諸郡縣,改授昭 輕車都尉,追封清河 祖命爲歸德、泗 勇大將軍、大名 州 總

子二人"長懋,次亭。 亨,佩金虎符,爲管軍千戶。 子與立襲,卒。子鑑襲。

翼敏

列傳第三十九 張子良

以 其軍鎭之。 懋字之美,未弱冠,已有父風。 移鎭下邳,知歸德府事。 侍子良官京東,故懋領其衆,從丞相 李瓊叛濟南,以其兵戍蔡州。 中統元年了三宣授泗 阿朮軍,立歸德府

州軍總把,佩金符。

平 塹穽,安營設伏, 出納奇計, 安,滅宋,以其主及母后羣臣北還。 其 行 陣以鏵車弩爲先,而衆軍繼之。 至元七年, 擢濟南諸路新軍千戶。 伯顏信用之,擢爲省都鎭撫,水陸並進,其任甚重。 懋以勇鷙, 九年, 將弩前行, 從破襄樊有功。十一年, 凡所過山川道 路 丞相伯顏 險 陿,通梁筏, 師壓臨 南

以逆順 州路總管。 安撫司 十三年,懋馳驛至上都,伯顏 巢」、口三安豐、壽春、懷遠、 駐瓜洲、 爲總管府,置宣慰使以統之,拜同知淮西道宣慰 禍福,辭旨雄厲,貴受命頓首,上地圖、降書。 ,伯顏命懋往諭淮西夏貴,副以兩介,將騎士直趨合肥。 上其功,宣授懋明威將軍、 淮安、濠等州郡、皆下。復使之徧諭列城軍民,使知 馳還報,伯顏 司事。 泗州安撫司達魯花赤。 十六年,改授懷遠大將軍 貴出迎, 大喜。 復令行徇鎮(東) 設賓禮。 十四年,改 帝 之德意。

懋惡 衣 概食,率之以儉,愼刑平政,處之以公,新府治,設義倉,雖能吏不過也。 部使者

率爲生祠以祀之。十七年二月卒,年六十三。贈昭勇大將軍、龍興路總管、上輕車都尉,追 封淸河郡侯,諡宣敏。 **畫劫城者,懋聞之,率從騎擣其穴,縛其酋長以歸。民之流亡,與遠郡之來歸者數千家,相** 目,民甚苦之。乃上其實於憲府,盡誅十虎者,奪良虎符而黜之,民大悅。羣盜有率衆將白 劉宣韙之,凡有所懲治,朝至夕報,豪强竦然。 郡萬戶蘇良,恃勢爲暴,爲之翼者,有十虎之

爲高安縣尹,有異政,由是擢爲江西檢校,拜南臺御史,繼爲淮西、江西二道廉訪僉事,用能 子二人:文煥,以父蔭,任承務郎,江州路瑞昌縣尹。文炳,三汊河巡檢。 文煥子珪,初

#### 唐慶

世其家云。

唐慶,不知何許人,事太祖,爲管軍萬戶。 太祖伐金,以慶權元帥左監軍。

虎符,授龍虎衞上將軍,使金。

殺慶,及其弟山祿、 再往,令金主黜帝號稱臣,金主不聽,慶輒以語侵之。 壬辰,太宗復以慶爲國信使,取金質子,督歲幣,以金曹王來,見帝於官山。 興祿,幷從行者十七人。旣滅金,購求慶屍不得,厚恤其家,賜金五十 金君臣遂謀害慶,夜半,令兵入館舍, 七月,使慶

# 斤,詔官其子,仍計其家人口,給糧以養焉。

#### 齊榮顯

堤,榮顯偕數騎前行覘敵,值邏騎數十,從者將退走,榮顯曰:「彼衆我寡,若示以怯,必爲所 斷戟拔孝忠出,復逐北,入其郛而還。 屢立戰功。攻濠州,宋兵背城爲陣,榮顯薄之,所向披靡。其屬王孝忠力戰,中鈎戟,榮顯 兒戲,畫地爲戰陣,端坐指揮,各就行列。九歲,代父任爲千戶,佩金符,從外舅嚴實來歸, 援弓策馬,射殺兩人,乃還。 齊榮顯字仁卿,聊城人。父旺,金同知山東西路兵馬都總管。 主帥察罕壯之,賜馬鎧銀器。 榮顯幼聰悟,總角 兵趨五河口,抵大

愬之、得折充賦稅、民賴以不困。 隸東平,榮顯力辯於朝,逐止。及攻淮南,道出東平,民間供給,費銀二萬錠,榮顯詣斷事官 悉爲蠲貸。從實入朝,授東平路總管府參議,兼領博州防禦使。時十投下議各分所屬,不 本路諸軍鎭撫,兼提控經歷司。值斷事官鈎校諸路積逋,官吏往往遭詬辱,榮顯從容辦理, 進拔五河口,陞權行軍萬戶,守宿州。 中統元年,謁告侍親,閑居十年,卒。 **墮馬傷股,不能復從軍,改提領本路課稅,又改** 

#### 石天祿

義斌。 數與金人戰,未嘗敗北 上將軍、東平路元帥,佩金虎符。 石天祿,父珪,山東諸路都元帥,陷金,死節,見忠義傳。 又敗金將武仙,屢立戰功。 時宋將彭義斌取大名及中山,天祿與孛里海率兵敗之,獲 丙戌, 孛魯以功奏, 遷金紫光祿大夫、都元帥, 鎮戍邊隅, 天祿襲爵,孛魯承制授龍虎衛

寒,戰退宋兵,扎刺溫火兒赤賞以戰馬。 千戶,濟、瓷、單(三)[三]州管民總管。[三乙未,從扎刺溫火兒赤渡淮,攻隨州,至襄陽夾河 過望風附降。 營,殺三百餘人。 壬辰,皇太弟拖雷南渡河,天祿爲前鋒,戰退金兵,奪戰船數艘。夜至歸德城下,襲其 癸巳秋九月,破考城,復圍歸德。 金將陳防禦出兵追圍天祿,天祿潰圍復戰,金兵退走。 又從攻蘄、黃,功居其首。 冬十二月,歸德降。 甲午,入覲,改授征行 提兵掠亳及徐,所

以子興祖 時 詔 製。 天祿括戶東平,軍民賦稅並依天祿已括籍册,嚴實不得科收。 明年,天祿卒,年五十四。 天祿以病不任職,

沿淮諸郡,獲床覘伺者十餘輩,統軍司賞馬二十匹、銀五百兩、錦二十端。十二年,攻常州 子十人,興祖襲千戶,官武略將軍。 己未,從伐宋,攻鄂州。 至元四年,蘇宿州率兵抄

爲先鋒,功在諸將上。 兵圍之,斬首千餘級,招輯南溪山寨歸農者三萬餘戶。 宋亡,第分,建宣武將軍、管軍總管,戍溫州。 一種嗣 十六年,陞顯武將軍,佩金虎符。 土賊林大年等構亂,出

### 石抹阿辛[]

九

年七月,卒于軍。

子

石抹阿辛,迪列(稅)[糺]氏。[三歲乙亥,率北京等路民一萬二千餘戶來歸,太師、

鐵,查刺命偏將先警其東北,親奮長槊大呼,登西南角,摧其飛櫓,手斬陴卒數十人,大軍乘 南兵遇于河,查刺大呼馳之,陷其陣,渡河再戰,盡殪之,所遇城邑爭先款附,長驅擣汴州, 入自仁和門,收圖籍,振旅而還。論功,黑軍爲最。及從國王軍征萬奴,圍南京,城堅如立 歲己卯、詔黑軍分屯眞定、固安、太原、平陽、隰、吉、岢嵐間。 木華黎奏授鎭國上將軍、御史大夫。從擊蠡州 之。遂克南京。 子 查刺,仍以御史大夫領黑軍。 請旦,木華黎解錦衣賞之。累授真定路達魯花赤,卒于柳城 初,其父阿产所將軍,皆猛士,衣黑爲號,故曰黑軍。 死焉。 頃之南征,以黑軍爲前列。

與

從征李壇、先登、飛矢中額而卒。 子庫祿滿襲職,從攻襄樊,與從弟度剌, 立雲梯衝其堞,度劇死焉。 中統三年,庫祿滿

51 傳 第 Ξ + ル 石 天 廫 石 抹阿辛

#### 劉斌思敬

先登,被其城 五十餘里,遇敵 難之,斌叱之曰:「彼恃險,不我虞,取可必也。」乃率百騎夜發,獲敵人,使道之前,行汙澤中 其鋒者,斌也。」移屯襄陽,軍乏食,斌知青陵多積穀,前阻大澤,水深不 率衆夜破之。 辰,攻河南,以功授中翼都 劉斌,濟南歷城縣人。 又擊走太康守兵,擒其將,三日,太康陷。 兵、斌捨馬揮槊突敵,敗之,得其糧數千斛。 統。 少孤,鞠于大父。 攻睢陽軍、日公軍杏堆、距陳州 有勇力,從濟南張樂起兵,爲管軍千戶。 榮言於帥阿朮魯曰:「太康 遷官知中外諸軍事,從攻六安, 七十里,聞陳整軍於近郊,斌 可涉,陳可 `取狀。 之平,摧 嵗壬 衆

將憚之。 贈中奉大夫、參知政事、護軍、彭城郡公、諡武莊。 癸卯,擢濟南推官。 己未,病,謂其子曰:「居官當廉正自守,毋黷貨以喪身敗家。」語畢而逝,年六十有 辛亥,授本道左副元帥。 乙卯,陞濟南新舊軍萬戶,移鎭邳州,宋 子思敬。

失,傷甚,帝親勞賜酒,易金符。 思敬,賜名哈八兒都,襲父職,爲征行千戶。 中統二年,授武衞軍千戶。從討李壇,賜銀六十錠。 世祖南征,從董文炳攻臺山寨,先登,中流 四年,

授濟南武衞軍總管,捕盜有功,又賜銀千兩。 至元三年,授懷遠大將軍、侍衞親軍左翼副都

指揮使。四年,命築京城。

焉。 拜 門,巷戰,殺王安撫等,遂克瀘州。 部,悉來降。十三年,圍重慶,敗宋將張萬,得其舟百餘。 復 八兒都邀擊,敗之。 中奉大夫、四川行省參知政事。 攻嘉定,取之。。瀘、。後、忠、涪諸部,及巴縣籌勝、龜雲、石筍等寨十九族,及西南夷五十六 乃率兵討擒其將任慶,攻破盤山寨,俘九千餘戶,又獲其將劉雄及王世昌等。 八 年,授廣威將軍、西川副統軍,佩金虎符。 戰于靑城,宋兵大敗,奪所俘二千人還。十二年,轉同僉行樞密院事, 行省罷,改四川北道宣慰使。 復攻重慶,其將趙牛子降,禽守臣張珏。 九年,宋嘉定守臣皆萬壽乘虚攻成都,哈 六月,瀘州復叛,哈八兒都妻子沒 十六年,蜀平, 夜入東

贈推忠宣力果毅功臣、平章政事、柱國、封濱國公、諡忠肅。 十七年,授正奉大夫、江西行省參知政事,治古、赣盗,民賴以安。 二十年卒,年五十

子思恭,[1+]字安道,累官昭毅大將軍、右衞親軍都指揮使。 思義,宣武將軍、昌國州

軍民達魯花赤。

#### 趙柔

友資、李純等亦各聚衆數千、聞柔信義、共推爲長。 歲癸酉,太祖遣兵破紫荆關,柔以其衆降,行省八札奏聞,以柔爲涿、易二州長官,佩金 趙柔,淶水人。有膽略,善騎射,好施予。金末避兵西山,棚險以保鄉井。 柔明號令,嚴約束,重賞罰,爲衆所服。 時劉伯元、蔡

符。 夫,卒。至順元年,追封天水郡公,諡莊(帶)[靖]。日公曾孫世安,榮祿大夫、江西行省左丞。 都元帥,佩金虎符,兼銀冶總管。 丙戌,羣盜並起,柔單騎偏入諸栅, 說降其衆, 以功遷龍虎衛上將軍、眞定涿等路兵馬 庚寅,太宗命兼管諸處打捕總**管**。 丙申,加金紫光祿大

#### 校勘記

(一)其(其)子忠濟 從北監本删。

蘄 (州) [縣] 據本書卷五世祖紀中統三年二月壬子、丙辰條改。 按蘄縣在今安徽, 蘄州在今

湖北,係兩地。蒙史已校。

(刺)[速]不台 據本書卷一二一速不台傳改。 新元史已校。

己酉入朝定宗 按定宗已于戊申年三月死,己酉年定宗后斡兀立海迷失稱制。 此處史文當有

訛脫?

万五二 楚(兵)[丘] 按元無「楚兵」其地。本書卷一一九木華黎傳、 卷一四八嚴實傳作「楚丘」,據改。

蒙史已校。

ヘベン 爲徐邳屯田總管下丁莊千戶 本書卷九二百官志有「出丁壯五千名者爲萬戶,五百名者爲千

蒙史改 莊」爲「壯」,疑是。

「十つ 從右丞別 [乞] 里迷失攻(准)[淮]安 原脫「乞」,據本書卷九、一〇世祖紀至元十三年七月丙

M ス し 繼以疾卒大德十一年卒 辰、十六年正月丙子條補。參見卷一二七校勘記[三]。又、「准」誤,從北監本改。 此處史文有誤。道光本作「繼以疾去,大德十一年卒」。

七年 按上文有「江南平」、事在至元十三年,下文有「至大二年」,中云「七年」、當作「大德七

年-。 蒙史已校。

年也。 脫至元二字。」 考異云:「此蒙上中統之文、然中統紀元止于四年、此傳之七年、八年者,至元之七年、八

中統元年 按上文有「李璮叛濟南」,事在中統三年,此處不當倒返「中統元年」,疑「中統」當

作「至元」。

鎭(東)[巢] 列 傳 第三十 宋淮南無「鎭東」其地。 校 勘 按宋史卷八八地理志,淮南西路有壽春府,有濠州,有安

九

趙 柔

記

三六〇七

、鎭巢、懷遠等軍,與此處「行徇」「安豐、壽春、懷遠、淮安、濠等州郡」地望全符,據改。

- 濟兖單(三)[三]州 按本書卷五八地理志,濟、宛、單各爲一州,據改。新元史已校
- 石抹阿辛 考異云:「阿辛即也先,譯音偶異,史家遂分爲二人,各立一傳矣。」石抹也先傳見卷
- [1吾] 迪列(稅)[糺]氏 據本書卷一八八石抹宜孫傳改。

五〇。

- 攻睢陽軍 州,又爲睢陽郡」。此處「睢陽」卽指「歸德」,疑沿用舊稱,誤「郡」爲「軍」。 按宋、金、元皆無「睢陽軍」。本書卷五九地理志河南江北行省下有「歸德府、唐宋
- 子思恭 事附于思敬附傳後、「子」當作「弟」。新元史已校。 按本書卷一一五齊宗傳有「參政劉思敬遣其弟思恭以新民百六十戶來獻」。此處思恭
- 莊(静)[靖] 據滋溪文稿卷一一趙晟神道碑銘、石田集卷一三趙公先德碑銘改。

## **兀史卷**一百五十三

### 列傳第四十

#### 劉敏

其貌偉,異之,召問所自,俾留宿衞。習國語,閱二歲,能通諸部語,帝嘉之,賜名玉出干,出 興禪房山。 入禁闥,初爲奉御。 劉敏宇有功、宣德青魯〔里〕人。〔〕歲壬申,太祖師次山西,敏時年十二,從父母避 兵至,父母棄敏走,大將憐而收養之。一日,帝宴諸將於行營,一敏隨之入,帝見 帝征(遼西)[西遼]諸國, 三破之, 叉征回回國, 破其軍二十萬, 悉收其 地德

長,命敏總其役,賜玉 工匠千餘戶,及山東、山西兵士,立兩 癸未、授安撫使、便宜行事、兼燕京路徵收稅課、漕運、鹽場、僧道、司天等事、給以西域 一印,佩金虎符。 奏佐東宋元爲安撫副使,高逢辰爲安撫僉事,各賜銀 軍戍燕。置二總管府,以敏從子二人,佩金符,爲 二府

地,敏皆從行。

列停

第

者,爲司天太史氏,興學校,進名士爲之師。 財,官不能禁,敏戮其渠魁,令諸市。又,豪民冒籍良民爲奴者衆,敏悉歸之。選民習星曆 章, 佩金符,李臻爲參謀。初,耶律楚材總裁都邑,契丹人居多,其徒往往中夜挾弓矢掠民

山、〔三奉御李簡詰問得實,罷牙魯瓦赤,仍令敏獨任。 二十年,參贊之力居多。 忙哥兒誣敏以流言,敏出手詔示之,乃已。帝聞之,命漢察火兒赤、中書左丞[相] 粘合重 瓦赤自西域回,奏與敏同治漢民,帝允其請。 己丑、太宗卽位、改造行宮幄殿。乙未、城和林、建萬安宮、設宮聞司局、立驛傳、 旣成,宴賜甚渥。 辛丑春,授行尚書省,詔曰:卿之所行,有司不得與聞。」俄而牙魯 牙魯瓦赤素剛尚氣,恥不得自專,遂俾其屬 復辟李臻爲左右司郎中,臻在幕府 以便

帝諭 與牙魯瓦赤同政。 世亨以不從命者黜之。 丙午,定宗卽位,詔燉與鄭朝同行省事。辛亥夏六月,憲宗卽位,召赴行在所, 甲寅,請以子世亨自代,帝許之,賜世亨銀章,佩金虎符,賜名塔塔兒台。 又賜其子世濟名散祝台、爲必闍赤、入宿衞

出巡,義當扈從,敢辭疾乎! 世祖南征,過年豐,敏入見,爺之曰:「我太祖勵精圖治, 帝伐宋,幸陝右,敏輿疾請見,帝曰「卿有疾,不召而來,將有言乎。」敏曰:「臣聞天子 但中原土曠民貧,勞師遠伐,恐非計也。」帝弗納,敏還,退居年 見而知者惟卿爾。 汝春秋高,

#### 王楫

山光 第,乃入終南山 帥府。 王檝字巨川, 尋用元 讀 書,涉獵孫、吳。 鳳翔號縣人。父霆, 帥高琪薦,特賜進士出 泰和 中,復下第一 金武節將軍、麟游主簿。 身,授副統軍,守涿鹿 詣闕上書, 隘 論當 **橄性倜儻**,弱冠舉進士不 世急務,金主俾給 事網

使孫吳堅守不下、熾入城喻以禍福、吳遂以城降。 統, 獨 不 佩 懼 太祖 以金符, 死 乎? 將 兵南 對曰:「臣以布衣受恩,誓捐軀報國,今旣償軍,得死爲幸」。帝義而 令招集山西潰兵。 下 ,<br />
微塵戰三日,<br />
兵敗見執,將戮之,<br />
神色不變,<br />
太祖問曰:「汝曷敢抗我師, 從大軍破紫荆關、取涿、易、保州、中山、軍次雄州。 釋之,授都 節 度

糶, 故 雲、順等州 牛,十取其一,以給農民。」用其說,得數千頭,分給近縣,民大悅,復業者衆。 天下,不可失信於民,宜禁虜掠,以慰民望。」時城中絕粒, 甲 土 改,授宣撫使,棄行尚書六部事。從三合拔都、太傅猛安率兵南征,下古北口,攻薊、 得 ·所過迎降,得漢軍數萬,遂圍中都。 金帛,而民獲粒食。 又議。「田 野久荒,而 乙亥,中都降。 兵後無牛,宜差官瀘溝橋索軍 人相食,乃許軍 **| 機進言曰:「國家以仁義取** 士給糧,入城轉 三合、猛安俾 回所 驅

列

傳

第

檝 從猛安入覲,授銀青榮祿大夫,仍前職,兼御史大夫,世襲千戶。 招諭保定、新城、信安、雄、霸、文安、清、滄諸城、皆望風款附,乃置行司于滄州以鎮之。遂

以殺爲」」孛禿曰:「汝能保此輩不復反耶。」人聞曰:「可。」即移文保任之,俱得全活。 哉!殲其渠魁足矣。釋此輩,遷之近縣,强者使從軍,弱者使爲農,此天之所以畀我 間,得軍民萬口。孛禿惡其反復欲盡誅之,懺解之曰:「驅羣羊使東西者,牧人也,羊何 時河間、清、滄復叛,帝命檝討之,復命駙馬孛禿分蒙古軍及凶、漢軍三千屬檝,遂復 也,何 知 河

菜禮,仍取舊岐陽石鼓列廡下。 是職。」遂命檝掌之。 海具列諸大臣名以聞,帝曰:「朕有其人,偶忘姓名耳。」良久曰:「得之矣,舊人王宣撫 之。」遂以前職,棄判三司副使。 後又命省臣總括歸附工匠之數,將俾大臣分掌之。 帝命闍里畢與皇太弟國王分撥諸侯王城邑,渝闍里畢曰:「漢人中若王宣撫者,可任使 時都城廟學,旣燬於兵,檝取舊樞密院地復創立之,春秋率諸生行釋 太師 可任 阿

結 券,假之賈人,而斂不及民,人心稍安。 ||檝 北山盜李密,轉掠近縣,懺曰:「都城根本之地,何可 夜督士卒運木石,比曉,橋成,軍乃得進。戊子,奉監國公主命,領省中都。 丙戌,從征<u>西夏。及秦州,夏人盡撤橋梁爲備,軍阻不得前,帝問諸將,皆不知計所出。</u> 遺男守藤率軍討諸盗,平之。 無備。」引水環城,調度經費,機自爲 屬盜起信安,

列傳第四十 王守道

宋, 宗人甚禮重之, 卽遣使以金幣入貢。 族。」果得族人數十口以歸。 人重賵之,仍遣使歸其柩,葬于燕。子六人。 庚寅,從征關中,長驅入京兆,進克鳳翔,請于太宗曰:「此臣鄉邦也,願入城訪求親 壬辰、從攻汴京。癸巳、奉命持國書使宋,以兀魯剌副之。 

#### 王守道

諸寨,執守道家人,以重幣誘之,守道不顧,日與史氏部曲昆弟徵發調度以復讎,卒逐仙遁 天倪之弟天澤爲主帥,攻仙。時史天安在白霫,聞變,率兵亦至,遂復眞定。仙走保西山 爲備。」天倪不以爲然,未幾,果爲所害。及仙以城反爲金,史氏之人與屬縣旁近豪傑,納 仙降,署爲史天倪副帥,守道謂天倪曰:「是人位居公下,意有不平,安能鬱鬱於此!宜先事 令丞及屬吏。宣撫司署守道爲縣尉,衆悅之,因轉攝令,改眞定主簿。史天倪爲河北西路 兵馬都元帥,鎭眞定,旣收大名、澤、潞、懷、孟城邑之未附者,以爲府經歷。及金恒 王守道字仲履,其先属定平山人。。金亡羣盗並起,州縣東多乘亂貪暴不法,民往往殺 山公武

後擢慶源軍節度使,天澤爲五路萬戶,署守道行軍參謀,兼檢察使。莊聖太后以眞定

樂祿 爲湯 拜 大夫、大司徒、追封壽 左 沐邑,守道在鎭,以幕僚頻歲致覲,敷對稱旨,得賜金符、錦衣、金錢。 丞相 7 即授眞定等路萬戶府參謀。 國公、諡忠惠。 仁宗卽位,復加推忠協力秉義功臣、 至元七年卒。 至大元年,以子 題貴,特贈銀青 中統三年,天澤 金紫光祿大

#### 高宣

夫、大司徒、上柱國。

青榮祿大夫、大司徒,追封營國公,諡簡僖。 都 兵不血刃,民心悅服。 出 總管府統之,以宣爲都總管,賜金符,仍令子孫世其職。卒。 師 ,伐罪弔民,願勿嗜殺,以稱上意。」睿宗召元帥朮乃諭之,下令軍中 高宣,遼陽人。太宗元年,詔宣爲元帥,賜金符,統兵從睿宗攻大名,宣進曰:「今奉命 四年正月,從破金兵三峯山,降宣者二千餘戶,籍以獻,立打捕鷹坊 皇慶二年,贈宣力功臣、銀 如宣言。 及城破,

總管。 張文謙曰:「農桑者、衣食之本、不務本、則民衣食不足、教化不可興、古之王 願留意焉。」丞相以聞,帝悅,命立司農司,以天錫爲中都山北道巡行勸農使,兼司農丞。尋 子 天錫,事世祖潛邸,爲必闍赤,入宿衞 四年,改燕京諸路奧魯總管,遷按察副使,仍兼鷹坊都總管。 一。甚見親幸。中統二年,授以其父官,爲鷹坊都 天錫語 丞相 一政,莫先於此, 孛羅、左丞

院使。

退居于家,卒。

遷司農少卿、巡行勸農使,又遷戶部侍郎,進嘉議大夫、兵部尚書,卒。 後贈推忠保義功臣、

太保、儀同三司、上柱國、追封營國公、諡莊懿。

從之。 符寶郎董文忠曰:「汝爲我奏請,以諒所管民戶隸於我,庶得諒盡力爲我用。」文忠入奏,帝 子諒,裕宗初封燕王,以諒爲符寶郎,俄命襲其父官,爲鷹房都總管。 未幾,授諒嘉議大夫,遷兵部尚書。 卒。 仁宗時、贈推誠保德贊治功臣、 裕宗甚愛之,謂 太師、開府

儀同三司、上柱國,追封營國公,諡宣靖**。** 

召入 改朝列大夫、利用監丞。八年,陞少監。 皇慶元年春,改授嘉議大夫、同知崇祥院事。 宿 子塔失不花,成宗命世其祖父官,以居喪辭。 衞 至大三年冬,遷少中大夫、納綿府達魯花赤,且諭之曰:「此先世所守舊職也。」 武宗卽位,授中議大夫、秘書監丞。 冬,進資德大夫,爲院使。 大德元年、授奉議大夫、章佩監丞。四年, 仁宗居東宮、

司農。 之,獎諭曰:「汝能輔太子以正,朕甚嘉之。」命置圖書東宮,俾太子時時觀省。六年,改集禧 延祐 英宗居東宮、塔失不花撰集前代嘉言善行,名曰承華事略,幷畫豳風圖以進。帝覽 四年夏四月,帝謂塔失不花曰:「汝祖嘗爲司農,今復以授汝。」遂遷榮祿大夫、大

#### 三六一六

#### 王玉汝

代之行。夏津災,玉汝奏請復其民一歲。濟州長官欲以州直隸朝廷,大名長官欲以冠氏等 官。以事至京師,遊楚材門,待之若家人父子然。實年老艱於從戎,玉汝奏請以本府總管 十七城改隸大名,玉汝皆辨正之。 據剛,署玉汝爲豫史,稍遷,補行臺令史。中書令耶律楚材過東平,奇之,版授東平路奏差 王玉汝字君璋,鄆人。少習吏事。金末遷民南渡,玉汝奉其親從間道還。行臺嚴實入

帝前陳愬。玉汝進言曰:「嚴實以三十萬戶歸朝廷,崎嶇兵間,三棄其家室,卒無異志,豈與 |公之地分裂,而不能救止,無面目還報,將死此荒寒之野,是以哭耳。」 |楚材惻然良久,使詣 嚴公事業存者無幾矣。」夜靜,哭於楚材帳後。明日,召問其故,曰:「玉汝爲嚴公之使,今嚴 他降者同。 戊戌,以東平地分封諸勳貴,裂而爲十,各私其入,與有司無相關。 玉汝曰:「若是,則 遷行臺知事,仍遙領平陰令。 今裂其土地, 析其人民, 非所以旌有功也。」帝嘉玉汝忠款, 且以其言爲直, 由是

不自便,定宗即位,皆聚闕下,復欲剖分康平地。 辛丑,實子忠濟襲職,授左右司郎中,遂總行臺之政。分封之家,以嚴氏總握其事,頗 是時,衆心危疑,將俛首聽命,玉汝力排羣

糾率諸路管民官,愬之闕下,得滅三分之一。 言,事遂已。 憲宗即位,有旨令常賦外,歲出銀六兩,謂之包垛銀。 累官至龍虎衛上將軍、泰定軍節度使,兼兖州 玉汝曰『民力不支矣』

管內觀察使,充行臺參議。

月既望,有星隕庭中,已而玉汝卒。 爲吾分憂。」、玉汝堅辭,以參議印强委之,不得已起視事,僅五六日,裁畫署置,煥然一新。八 壬子, 以病謝事杜門,日以經史自娛。 乙卯,忠濟使人謂玉汝曰:「君閒久矣,可暫起,

#### 焦德裕

郡公、諡正毅。 令陞千戶,守雄<u>州北</u>門。 殺,復舊官。 焦德裕字寬父,其遠祖贊,從宋丞相富獨鎭瓦橋關,遂為雄州人。父用,仕金,由東鹿 徇地 山東,未嘗妄殺一人。年六十二卒,後以德裕貴,追贈中書左丞,封恒山 太祖兵至,州人開南門降,用猶力戰,遂生獲之,帝以其忠壯,釋不

以德裕薦。 走,其黨趙貴、王顯、齊福等保仙故壘,數侵掠太行。太宗擇廷臣有才辯者往招之,楊惟 德裕通左氏春秋,少拳勇善射,從其舅解昌軍中。 遂使真定,降齊福,擒趙貴, 王顯亡走,德裕追射殺之,其地悉平。 金將武仙殺眞定守史天倪,仙旣敗 詔賜井陘北 中

列傳

第

四十

E

波

參議。 障城田 德裕夜薄貴營,令卒各持三炬,貴驚走,追及鵝谿,馘千人,獲馬畜兵仗萬計。 宋臣夏貴圍宣撫使張庭瑞于虎嘯山, 中統三年,李璮平, 世祖命德裕曲赦益都。 實薪土塞水源,人無從得飲。 四年, 賜金符,爲閬蓬等處都元帥府 帥府檄 德裕援 陞京畿

漕運使。

平章阿合馬譖丞相伯顏殺丁家洲降卒事,奏以德裕爲中書參政,欲假一言證成之,德裕辭 其魁,欲盡阬其徒,德裕諫止之。 伯顏南征,授僉行中書省事。 至元六年,僉陝西道提刑按察司事。 久之,復僉行省事 遂從下安慶。至鎭江,焦山<u>寺主僧誘居民叛,丞相阿</u>朮旣誅 命德裕先入城撫定。宋平,賜予有加。 八年,轉西夏中興道按察副使。十一年,從丞相 奉旨求異人異書。

諡忠肅 官。 有地 **械郡守許定國等四人,使承反狀,將籍其家。** 拜福建行省參知政事。 有民,盈所望矣,方誓報效,安有 + 四年,改淮東宣慰使。 二十五年卒,年六十九。 淮西賊保司空山、燉淮東四郡守爲應、元帥帖哥邏 他覬。 德裕言:「四人者,皆新降將, 奈何以疑似殺四守, 贈榮祿大夫、平章政事,追封恒國公, 寧 知 非 反間耶。」盡復其 天子旣寵綏之, 得 其檄,即

子簡,餘姚州知州,潔,信州治中。

#### 石天麟

不習。 石 天麟字天瑞、順州人。 帝命中書令耶律楚材釐正庶務,選賢能爲參佐,天麟在選,賜名蒙古台。 年十四,入見太宗,因留宿衞。 天麟好學不倦、於諸 宗王 國 書語無 四

域,以天麟爲斷事官。

安王 政、恐徒貽廟堂羞、不敢奉詔。」帝嘉其誠、褒慰良久、從之。 與 天麟辭曰 其 司 用事臣相親狎,因語以宗親恩義,及臣子逆順禍福之理,海都聞之悔悟,遂遣天麟與北 憲宗六年,遣天麟使海都,拘留久之,旣而邊將劫皇子北安王以往,寓天麟所。 歸。 :「臣奉使無狀、陛下幸赦弗誅,何可復叨榮寵。 天麟被拘留二十八年,始得還,世祖大悅,賞賚甚厚。 况臣才識淺薄,年力衰憊,豈能任 拜中書左丞,兼斷事官, 天麟稍

與道 安童 未聞 杖 此 有禁令也。」事遂寢。 士交惡,發其事,將置之極刑,帝以問天麟,對曰:「遼國主后銅像在西京者,今尙有之, 不拒絕之,所以釋其疑心,導其臣順也。」帝怒乃解。 有譖 丞相安童嘗受海都官爵者,帝怒,天麟奏曰:「海都實宗親,偶有違言,非仇敵比, 天麟年七十餘,帝以所御金龍頭杖賜之,曰:「卿年老,出 江南道觀,偶藏宋主遺像,有僧素

保德翊戴功臣、開府儀同三司、太師、上柱國,追封冀國公,諡忠宣。 醉,命御輦送還家。武宗卽位,進平章政事。至大二年秋八月卒,年九十二。贈推誠宣力 成宗卽位,加榮祿大夫、司徒,大宴玉德殿,召天麟與宴,賜以御藥,命左右勸之酒,頗

襲斷事官。 南臺御史中丞,卒。次子懷都,初襲斷事官,累遷刑部尚書、荆湖北道宣慰使。孫哈藍赤, 子珪,累官治書侍御史,遷樞密副使,復爲侍御史,拜河南行中書省右丞,陞榮祿大夫、

#### 李邦瑞

居太原。守臣惜其材,具鞍馬,遣至行在所,中書以其名聞。 至太原、爲金將小史、從守閻漫山寨。國王木華黎攻下諸城堡, 李 邦瑞字昌國,以字行,京兆臨潼人,世農家。邦瑞幼嗜學,讀書通大義。嘗被掠,逃 金將走,邦瑞率衆來歸,復

乞歸尋訪。」帝諭速不能 乃議 送,宋仍拒之。 復奉旨以行,邦瑞道出蘄、黄,宋遣賤者來迎,邦瑞怒,叱出之,宋改命行人, 如約而 歲庚寅,受旨使宋,至寶應,不得入。未幾,命復往,仍諭山東淮南路行尚書省李全護 還。 太宗慰勞、賜車騎旃裘衣裝、及銀十錠。 察军 匣刺達海等: 邦瑞馳驛南京, 詢訪親戚, 或以隸諸部者, 悉 邦瑞因奏:「干戈之際、宗族離散、

歸之。

軍儲使。乙未夏六月卒。子榮。 甲午,從諸王闊出經路河南,凡所歷河北、陝西州郡四十餘城,繪圖以進,授金符、宣差

#### 楊奐

父以爲文明之象,因名之曰與。年十一,母歿,哀毁如成人。 俭末舉進士不中,乃作萬言 楊奐字煥然,乾州奉天人。母嘗夢東南日光射其身,旁一神人以筆授之,已而奐生,其

策、指陳時病、皆人所不敢言者、未及上而歸、教授鄉里。 歲癸巳,金元帥崔立以汴京降,奐微服北渡,冠氏帥趙壽之卽延致奐,待以師友之禮

門人有自京師載書來者,因得聚而讀之。東平嚴實聞與名,數問其行藏,與終不一詣

基本萬一之助。」楚材甚善之。 幾,烹鮮之喻,正在今日,急而擾之,糜爛必矣。願假以歲月,使得撫摩瘡痍,以爲朝廷愛養 |材曰:「僕不敏,誤蒙不次之用,以書生而理財賦,已非所長。 又況河南兵荒之後,遺民無 上,謁中書耶律楚材,楚材奏薦之,授河南路徵收課稅所長官,兼廉訪使。與將行,言於楚 戊戌、太宗詔宣德稅課使劉用之試諸道進士。與試東平,兩中賦論第一。從監試官北 與旣至,招致一時名士與之議,政事約束一以簡易爲事。按

列

耶。 行境 十年,乃請老于燕之行臺 卽 內,親問 减 元額四之一,公私便之。 鹽務月課幾 何、難易若何。 不踰月,政成,時論翕然,以爲前此漕司未之有也。 有以增額言者,與責之曰:「剝下欺上,汝欲我 為之 在官

事 如平時 壬子,世 ·,引觴大笑而 祖在潛邸,驛召與參議京兆宣撫司事,累上書,得請而歸。 卒,年七十。 賜諡 文憲 乙卯,疾篤,處置後

也。 猶勉强 , 雖 ]號 所 奐 為之。 多 著有還山集六十卷、天興近鑑三卷、正統書六十卷,行于世。 博覽强 士,至名未有出與右者。 人有片善,則委曲 記,作文務去陳言,以蹈襲古人爲耻。 稱獎,唯恐其 **奥不治生** 名不聞 產,家無十金之業,而喜周人之急,雖 "或小過失,必盡言勸止, 朝廷諸老,皆折行輩與之交。 不計其怨怒 力不 關中(書) 贍,

## 賈居貞「鉤」(名

制 未立,人以 一兩,以 賈居貞字仲明、真定獲鹿人。年十五、汴京破、奉母居天平。 施其 )賄賂 廉。 相 世祖 交結。 在 潛邸,知其賢,召用之,俾監築上都城。 有飽黄金五 十兩者, 居貞卻之。 太宗 次 聞 而 甫冠,爲行 訖 事 嘉 ·, 以 歎, **D** 毫從 敕 喪歸 有 司 事。 月給. 時法

世

祖卽位,中統元年,授中書左右司郎中。

從帝北征,每陳說資治通鑑,

雖在軍

中,未

傳第四十 買居貞

列

然,不可以臣而紊制。」劉秉忠奏居貞爲參知政事,又辭曰:「他日必有由郎官援例求執 將何 五年,再爲中書郎中,時阿合馬擅權,忌之,改給事中。同丞相史天澤等纂修國史。 以處之。」不拜。至元元年,參議中書省事,詔與左丞姚樞行省河東山西,罷侯置 日,帝問:「郎俸幾何。」居貞以數對。 帝謂其太薄,敕增之,居貞辭曰:「品秩宜

留右 民。 商 是發倉廩以賑流亡,宋宗室子孫流寓者,廩食之,不變其服,而行其楮幣。東南未下州郡, 彼所乘,則鄂危矣。」驛聞。十二年春,命阿里海涯領兵取江陵,居貞以僉行省事留鄂。於 遷徙之民盈城,復皆疾疫,芻薪乏闕,杜門不敢樵採。不乘隙先取之,迨春水漲,恐上流爲 旅 留滯者,給引以歸之。免括商稅幷湖荻禁。 丞阿里海涯與居貞分省鎭之。居貞曰:「江陵要地、乃宋制閫重兵所屯。聞諸將不睦、 十一年,丞相伯顏伐宋,居貞以宣撫使議行省事。旣渡江,下鄂、漢,伯顏以大軍東下, 一方安之。 造舟百數[十]艘,[刊]駕以水軍,不致病

婁安邦以信陽來歸,遣入觀,裨將陳思聰屠其家。居貞以計召至,數思聰罪而誅之。 宋幼主旣降,其相陳宜中等挾二王逃聞、廣,所在扇惑,民爭應之。 蘄州寇起司空山,

高變姓名逃逸,獲而戮之。 鄂」屬縣民傳高 亦起兵應。「台」居貞移檄諭以禍福,其下往往渙散,壓以官軍,遂削平之。 初,遺鄭萬戶討賊,鄭言三鄂之大姓,皆與傅高通,請先除之,以

絕禍 死,其事始彰。 所善部將,戒曰:「聞吾還軍,汝卽舉烽城樓,內外合發,當盡殺城中大姓。」會其人戰敗獨 本。」<br />
居貞曰:「高鼠子無知,行就戮矣,大姓何預!<br />
吾能保其無他。」<br />
鄭旣領兵出,留其

人恃以無恐。及行,鄂之老幼號送于道,刻其像于石,祠之泮宮。 十四年,拜湖北宣慰使,命未下,居貞閉門不出,而驕將悍卒,合謀擾民,乃復出視事

復爲 巨室姓名百數來上,云與賊連,居貞曰:「元惡誅矣,蔓延何爲。」命火其牒。 居貞慮將帥出兵擾民,請親往,卒纔千人,營于城北,遣人諭之。 賊衆聞居貞至,皆散匿,不 取財者,取人子女爲奴妾者,皆痛繩以法。大水壞民廬,居貞發廪賑之。南安李梓發作亂, 急,坐繫巨室三百餘,居貞至,悉出之,投其文帖于水火。 用。 十五年,遷江西行省參知政事,未至,民爭千里迎訴。時逮捕民間受宋二王文帖者甚 梓發閉妻子一室,自焚死。比還,不戮一人。杜萬一亂都昌,居貞調兵擒之,有列 士卒有挾兵入民家,誣爲藏匿以

未行,以疾卒于位,年六十三。贈推忠輔義功臣、銀青榮祿大夫、中書平章政事,追封定國 十七年,朝廷再征日本,造戰艦于江南,居貞極言民困,如此必致亂,將入朝奏罷其事

公。

仲子)的。

釣名譽。 入爲刑部郎中,改右司郎中、參議中書省事。 仁宗即位, 拜參知政事, [5] 議罷尚書省所立 遷僉書樞密院,復參知政事,賜錦衣、寶帶,寵賚有加。 鈞字元燔,幼讀書,淵默有容。 皇慶元年,從幸上都,遇疾,卒于家。前後詔賻鈔三萬貫,供葬事。 由権茶提舉,拜監察御史,愈淮東廉訪司事、行臺都事 爲政持大體,風裁峻整,不孑孑 子汝立嗣。

#### 校勘記

- □□ 宣德青魯□□□人 按遺山集卷二八劉氏先塋碑有「劉氏世居宣德縣北鄉之青魯里」,據補
- 帝征(遼西)[西遼] 諸國 錢大昕諸史拾遺已校。 按遺山集卷二八劉氏先整碑作「車駕征契丹餘族, 是爲西遼」,

據改

Ę

- = 中書左丞〔相〕粘合重山 據本書卷二太宗紀三年辛卯八月條、 卷一四六點合重山傳補。
- . . 29 \_\_/ 中統三年天澤入拜左丞相 「二」、左丞相「左」當作「右」。 按本書卷一一二字相表、卷一五五史天澤傳,中統三年「三」當作 道光本據改,是。
- 八五 二 關中(書)[雖]號多士 從北監本改。
- **一六** ン (鉤) 據本書體 例 補

列 (A) Ħ 四 + 校 勘 記

- [4] 造舟百數[十]艘 據元文類卷六一賈居貞神道碑補。蒙史已校。
- 蘄州寇起司空山〔鄂〕屬縣民傅高亦起兵應 據元文類卷六一賈居貞神道碑補。蒙史已校。
- へたし 仁宗卽位拜參知政事 本證云:「案武宗紀鈞兩拜參知政事,一在至大二年十月,一在三年二

月。傅云仁宗,誤也。」

## 元史卷一百五十四

## 列傳第四十一

洪福原 俊奇 君祥 萬

迎降,與哈赤吉等共擊之,降其元帥趙(忠)[冲]。[1] 壬午冬十月,又遣着古與等十二人窺 入高麗。丁丑九月,奪江東城池據之。戊寅冬十二月,太祖命哈赤吉、扎剌將兵追討,大宣 唐城。父大宣,以都領鎭麟州,福源爲神騎都領,因家焉。歲丙子,金源、契丹九萬餘 覘納款虛實,還,遇害。 洪福源,其先中國人,唐遣才子八人往教高麗,洪其一也。子孫世貴於三韓,名所居曰 衆竄

與阿兒禿等進至王京。 二人以鎭之,師還。 辛卯秋九月,太宗命將撒里答討之,福源率先附州縣之民,與撒禮塔併力攻未附者,又 壬辰夏六月,高麗復叛,殺所置達魯花赤,悉驅國人入據江華島,福源 高麗王廠乃遣其弟懷安公請降,三遂置王京及州縣達魯花赤七十

列

傅

招 王京 集 北界四 處仁城,撒禮塔中流矢卒,其副 + 餘城遺民以 待。 秋八月, 帖哥引兵還,唯福 太宗復遣撒禮塔將兵來討, 源 留 屯。 福源 盡率所部 合攻之,

來歸 於 仍令招討本國未附 東京居之,優加恩禮擢 ,處於遼陽、瀋陽之間,帝嘉其忠。 癸巳冬十月,高麗悉衆來攻西京, 人民。 用,若大兵旣加,拒者死,降者生,其降民令福源統之。 又降旨諭 高麗之民,有執王喻及元搆難之人 甲午夏五月,特賜 屠其民, 劫大宣以 東。 金符,為管領歸附高 福源遂盡以所招集北界之衆 來朝者,與 麗軍民長官 (洪福) 源 同

城, 叉拔之。 爲前 叉拔 鞍勒等。 拔之。 後 金山、歸、信、昌、朔州。〔三己亥春二月,入朝, 乙未,帝命唐古拔都兒 歸附高麗軍民長官。 乙巳,定宗命阿母 甲寅, 與扎刺台合兵攻光州、安城、 罕將兵與福源共拔威州平廣城。 與福源進討, 癸丑,從諸王 攻拔龍崗、咸從 耶虎攻不 忠州、玄(鳳)[風]、四 賜以鎧甲弓矢,及金織文段、金銀器、金 Щ 東州、春州、三角 一縣,鳳、 辛亥,憲宗卽位,改授虎符,仍 海、洞三州山 珍原、甲向、玉果等城 山、楊根、天龍等 城及慈州

福 源 于帝, 戊午,福源遣其 遂 見殺,年五十三。 子茶丘從扎刺台軍,會高麗族子王綽入質,陰欲併統本國 後贈嘉議大夫、 瀋陽侯, 諡忠憲。 子七人, 俊奇、 歸順 人民,譖 君祥 最

知

名。

列傳第四十一 洪福源

之澤。 秋,茶丘 俊奇 可 雪父冤,世 就帶元降 小字茶丘,福源第二子 虎符,襲父 祖 憫 之,韶諭 職 ,管領歸附高麗 也。 之曰:「汝父方 幼從 軍,以驍勇受知, 加 軍民總管。 寵 用 誤絓 世祖嘗以小字呼之。 刑 章、故 於已廢之中 ,庸 中統二 沛 維 年 新

羅 永 島 招 帝 五 朝 遣侍 等七人, 月, ,獲通精,殺之,悉免其脅從者,高麗始平。 而 所有臣 賜 不 至元 茶丘 鈔百緡。 從 衞 ,擊之未晚。」從之。 親 民, 六年,高麗權臣 俾招之,通精 奉旨 軍千戶王岑,與茶丘 復 林衍 歸 王京。 偕 經略 餘黨裴仲孫等,立高麗 林衍 不從, 十二月,帝命茶丘 使 欣 俄奉旨往羅 都進兵討之,破其軍 叛。 留金永, 議 征 冬十一月, 取之策,茶丘 餘盡 州道 率兵往 王 一般之。 植 韶以其 監造 親屬承 鳳州等處,立 表 **製船** 殺 十年,韶茶丘 軍三千從國王頭輦哥討 陳二通精 承化侯,其黨金通 化侯為王,引三別抄 且招 降躭羅,茶丘得通精 之黨, 屯 [興欣都率兵渡海,擊破射 田 總管府。 多在王京,可 精 軍 率餘 平之, 據 八年二月,入 珍島 衆 使 走 之姪金 遷江華 招 躭 以 叛。

如 故。 渡海征日本,拔對馬、一岐、宜蠻等島。 十一年, 己卯,命茶丘 叉命 監 造 戰 船, 提點高麗農事。 經營日 八月,授東征 本國事。 十四年正月,授鎭國上將軍、東征 三月,授昭 右 副都元帥, 勇大將軍、安撫使,高麗軍民總管 與都元 帥忽敦等領 都元 帥 那 鎭高 師

麗。 猝 與賊遇 二月, 一、茶丘 率蒙古、高麗、女直、漢軍,從丞相伯顏北征叛臣只魯瓦歹等。 突陣無前,伯顏 以其勇聞,賜白金五十兩、金鞍勒、弓矢。 四 月,至脱刺河,

州合浦 復業。 艘,以圖後舉。二十一年十一月, 合兵登岸,兵未交,秋八月,風壞舟而還。 + 以進,時右 七年,授龍虎衞上將軍、征 丞 范文虎等將兵十萬,由慶元、定海等處渡海,期至日本一岐、平戶 東行省右丞。 復授征東行省右丞。 十九年十月,命茶丘於平灤黑堝兒監造戰船七 十八年,與右丞欣都將舟師四萬,由高麗金 二十三年,命往江浙等處 遺漢 等島 入 百

旄,掩暎林木,張設疑兵,乃顏兵大驚,以爲官兵大至,遂降。 顏騎兵萬餘,時茶丘兵不滿三千,衆有懼色。 陽等處行尙書省右丞。二十七年,以疾辭。 二十四年,乃顏叛,車駕親征,賜以翎根甲、寶刀,命率高麗、女直、漢軍扈從。 茶丘夜令軍中,多裂裳帛為旗幟,斷馬尾爲 帝聞之,厚加旌賞,凱還,授遼 猝遇乃

帝遣闍里台孛羅兒賜以金字圓符,命茶丘以便宜行事。 叛王哈丹等竄入高麗,侵撓其國西京,距遼陽二千里皆騷動,中書省特起茶丘鎭遼左, 二十八年,以疾卒,年四十八。子

四人,長日萬。

列傳第四十一 洪福源

易,左丞相伯顏、樞密副使合達,以君辟應旨,奏對詳明,帝悅,酌以巨觥。 帝親諭之曰:「爾守志忠勤,朕所知也。」帝嘗坐便殿,閱江南、海東輿地圖,欲召知者詢 籍高麗民三百人爲兵,令君祥統之。從禿花禿烈、伯顏等軍,築萬壽山,復從開通州運河 之, 秉忠曰:「是兒目視不凡, 後必以功名顯, 但當致力于學耳。」 令選師儒誨之。 至元三年, 君祥小字雙叔,福源第五子也。年十四,隨兄茶丘見世祖于上京,帝悅, 顧謂伯顏曰三是 命劉秉忠相 其險

帥孛魯罕襲淮東之〔射〕陽湖,至俘其男女牛馬。 六年,林衍叛,從頭輦哥征之。八年,戍河南。 九年、掠淮西、破其大凹城。

兒,遠大器也。」

以聞,時伯顏方朝上京,見君祥,甚喜,遂從南伐。 及與俱入朝,宴勞甚厚。從元帥字魯罕攻淸河,拔之。 後伯顏旣渡江,帝命禿滿歹還軍蕭縣。時君祥奉使伯顏軍中,宋黃州制置使陳奕降,其子 守,遂命右衞指揮使禿滿歹,率輕銳二萬攻淮安,以牽制之,君祥以蒙古漢軍都鎭撫從行 知漣水軍,伯顏遣三十騎往招之,因令君祥入奏,帝曰三卿可急還,陳知府降, 十一年,入朝。帝命伯顏伐宋,朝議以宋之兵力多聚兩淮,聞我欲渡江,彼必移師拒 海州安撫丁順約降,孛魯罕令君祥 卽偕來也。」

伯顏克淮安,至揚州,分兵攻淮西。 宋制置夏貴遣牛都統以書抵伯顏曰:「諺云:殺人

樞密院事。 降, 陞武略將軍、中衞親軍千戶。十五年, 命簽江南民兵。 智巴邀去,惟三宮未行,宜早定計,以活生民。」伯顏遂令洪都統護宋三宮,令君祥隨之。 因厚遇之。師進、次臨平山,距臨安五十里,洪都統來報曰「宋丞相陳宜中、殿帥張世傑 指揮使。 宋洪都梳者, 為都督府將, 伯顏謂君祥曰:「汝同姓, 可往招致也。」 洪都統即欣然來見, 君祥 見智三日。還軍中。仍傳旨輸伯顏曰:「事難遙度,宜臨機審圖之。」伯顏師次鎭江,諜報有 萬。自損二十。願勿廢國力,攻奪邊城,若行在歸附,邊城焉往。」伯顏遣君祥以牛都統入 十七年,進昭勇大將軍。 十九年,授樞密院判官。二十三年,轉昭武大將軍、同僉 還,陞明威將軍、中衞親軍副都

院留, 改僉書樞密院事 **灤河**,運糧至上都,奉旨與中書右丞阿里相其利害,還,極言不便,罷之。 之。 凱還,加輔國上將軍。 二十四年,乃顏叛,從世祖親征。 復居舊職。 俄加集賢大學士, 類次車駕起居,為東征錄。二十八年,授遼陽行省右丞,用 依舊同僉樞密院事。 每駐蹕,君祥輒以兵車外環爲營衞,布置嚴密,帝嘉 議者欲自東南海口产橋開河合 復奉使高麗,還, 樞密

「君祥始終一心,可勿遷也。」大德二年,詔使高麗, 成宗卽位,詔裁減久任官,知樞密院暗伯等奏:「君祥在樞密十六年,最爲久 臺臣劾君祥以他事,中道追回,已而事 者。」帝曰:

列傳第四十一 洪福源

三年,奉使江浙,問民間疾苦。使還,退居昌平之皇華山,絕口不論時事者五年。

章政事,俄改商議行省事。至大二年卒。子邁,奉訓大夫、同知開元總管府事 位,徵爲同知樞密院事,進榮祿大夫、平章政事,商議遼陽等處行中書省事,改遼陽行省平 朝:宜新省治,增巡兵,設儒學提舉官、都鎭撫等員,以興文化,修武備。事未成,會武宗卽 大德九年,擢司農,俄拜中書右丞。十年春,改江浙行省右丞。秋,改遼陽右丞,請於

總管,仍佩父茶丘所佩虎符。 萬小字重喜。至元十三年,入宿衞。十八年,襲職,爲懷遠大將軍、安撫使、高麗軍民

扎 漢 將黃海戰,大敗之。又從世祖與塔不台戰,又敗之。是月,至乃顏之地,奉旨留蒙古、女直、 刺麻秃,與金家奴戰,敗之,追至蒙可山、那兀江等處,遂平金家奴、塔不台等。 軍鎭哈剌河。 二十四年,乃顏叛,率兵征之。六月,至撒里禿魯之地,同都萬戶闍里鐵木兒,與乃顏 復選精騎扈駕,至失刺斡耳杂,從御史大夫玉速帖木兒討乃顏。七月,至 九月,

十二月,次木骨不刺。 哈丹、八刺哈赤再叛,十月,重喜從諸王愛牙哈赤、平章塔出、都萬戶閣里鐵木兒征之。 時諸王脫歡、監司脫台以兵四千餘人與其黨戰,稍却,重喜率騎兵援

月,從平章薛闍干至高麗靑州。五月,與哈丹戰八日,又戰,大敗之。六月,班師,授昭勇大 之。二十七年六月,賜白金五十兩、甲一襲。九月,至禪春,與哈丹禿魯干戰。二十八年二 金五十兩,授龍虎衞上將軍、遼陽等處行中書省右丞。 將軍,佩三珠虎符,職如故。十月,薛闍干以重喜入朝,且以其功聞,帝嘉之,賜玉帶一、白 率兵先涉與戰,勝之。十月,又從玉速帖木兒往征木八蘭。十二月,與古土禿魯于戰,克 師,五月,至貼列可,與哈丹禿魯干戰,獲功。至木骨兒抄剌,又戰。八月,至貴列河,重喜 术站, [+] 又戰于黑龍江,又戰于貼滿哈處, [<] 皆敗之。二十五年,重喜又從玉速帖木兒出 之,冒鋒陷陣,大破其衆。又從諸王乃蠻〔帶〕、〔日〕愛牙哈赤、平章薛闍干,與叛王兵戰于兀

即位,重喜朝于上都。七月,復授遼陽行省右丞。至大二年,謫漳州,行至杭,遇赦而止。 明年卒。子滋,襲爵。 月,改資德大夫、遼陽等處行中書省右丞。大德十年,以其叔父君祥代之。十一年,武宗 二十九年,仍佩元降虎符,總管高麗、女直、漢軍萬戶,兼安撫使、高麗軍民總管。六

## 鄭鼎(制宜)云

鄭鼎,澤州陽城人。幼孤,能自立,讀書曉大義,不妄言笑。旣長,勇力過入,尤善騎射。

幾,宋將余侍郎燒絕棧道,以兵圍興元,鼎率衆修復之,破宋兵,解興元之圍。乙巳,遷陽城 初爲澤、潞、遼、沁千戶。 歲甲午,從塔海紺不征蜀,攻二里散關,屢立戰功,還屯秦中。 未

縣軍民長官。 朝、自己帝問以時務,鼎敷對詳明,帝嘉納之,賜名曰也可拔都。 理 嘗背負憲宗以行。[10]敵據扼險要,鼎奮身力戰,敵敗北,帝壯之,賜馬三匹。至金沙河,波 了,晝夜急攻,城陷,禽其主,大理平。師還,命鼎居後,道經吐蕃,全軍而歸。 [洶湧,帝臨水傍危石,立馬觀之。 庚戌,從憲宗征大理國,自六盤山經臨洮,下西蕃諸城,抵雪山, 鼎諫曰:「此非聖躬所宜。」親扶下馬,帝嘉之。 山徑盤 屈,含騎徒 俄圍大

尉,責以懦怯,不忠所事 奉朕命,毋得輕與敵接。」、秋九月,帝駐蹕江滸,命諸將南渡,先達彼岸者,舉烽火爲應,鼎首 聞,帝曰:「爲將當慎重,不可恃勇輕進。」**遂分**畀衞士三百人,以備不虞,且戒之曰:「自今非 勝獨進,前陷泥淖,遇伏兵突出葭葦間,鼎奮擊,連殺三人,餘衆遁去。 奪南岸,衆軍畢渡。 己未,賜白金千兩。 進圍鄂州 ,斬之。 從世祖南伐,攻大勝關,破之。 ,戰益力。 別攻興國軍,遇宋兵五千,力戰破之,擒其將桑太 繼破臺 山寨, 禽其守者胡知縣, 帝急召鼎還,使者以 乘

中統元 年, 以功遷平陽、太原兩路萬戶。 阿藍答兒、渾都海之亂, 鼎分率本道兵討之。

冰,溉民田千餘頃,開潞河鵬黃嶺道,以來(天)[上]黨之粟。[三]修學校,厲風俗,建橫澗故橋 以便行旅,民德之。 二年,詔鼎統征西等軍,戍雁門關隘。遷河東南、北兩路宣撫使。三年,改授平陽太原宣慰 至元三年,遷平陽路總管。是歲大旱,鼎下車而雨。平陽地狹人衆,常乏食,鼎乃導汾

月,改授淮西宣慰使。十三年,加昭毅大將軍,賜白金五百兩。 <u>李越,悉獲戰船。八年五月,改軍前行尚書省事。十一年,從伐宋。十二年,鎭黃州。</u> 七年,改僉書西蜀四川行尚書省事,將兵巡東川。 過嘉定,遇蜀兵,與戰江中,擒其將

其子納懷。」帝從之。贈中書右丞,諡忠毅。後加贈宣忠保節功臣、平章政事、柱國,追封潞 舟覆溺死,年六十有三。十七年,董文忠等奏:「鄭也可拔都遇害,其叛人家屬物產,宜悉與 國公,諡忠肅。子制宜。 十四年,改湖北道宣慰使,移鎮鄂州。夏五月,蘄、黃二州叛,鼎將兵討之,戰于樊口,

徙旁居民,制宜不從,改投寬地,居民德之。城中屢災,或言于制宜曰:「恐姦人乘間爲變, 仍成鄂州。 制宜 小字納懷,性聰敏,莊重有器局,通習國語。至元十四年,襲父職太原、平陽萬戶, 時鄂闕守,俾攝府事。十九年,朝廷將征日本,造樓船何家洲。 洲 地狹,衆欲

列傳第四十一 鄭鼎

問 有 宜 盗伏 之無驗,行省疑其非,將釋之,不從。 |捕其疑似者,痛治之。」|制宜曰:「吾但嚴守備而已,奈何濫及無辜!」不笞一人,災亦遂息。 、訊之,乃與前數男子同爲盜者,遂正其罪,一郡帖然。 ,近郊,晨暮剽劫,流言將入城。 俄有數男子自城外至, 顧盻異常, 明日,再出城東,遇一人,乘白馬,貌服殊異,制宜叱 制宜命 吏縛入獄,

泉。 往,按圖籍以正之,訟由是息。 曰:「彼以贓敗,臣復取之,寧無污乎。」帝賢其所守,賜白金五千兩。未幾,徵拜內臺侍御 父死王事,賞未汝及。近者,要東木伏誅,已籍沒其財產人畜,汝可擇其佳者取之。」制宜 宜遜辭,帝曰:「汝豈漢人比耶!」竟留之。二十八年,遷湖廣行省參知政事,陛辭,帝曰:「汝 年,車駕幸上都。舊制:樞府官從行,歲留一員司本院事,漢人不得與。 至是,以屬制宜。 行 陣。」制宜請愈力,乃命從月兒呂那顏別爲一軍,以戰功授懷遠大將軍、樞密院判官。 安西舊有牧地,圉人恃勢,冒奪民田十萬餘頃,訟于有司,積年不能理。 二十四年,扈駕東征乃顏,請赴敵自效。 帝顧左右曰:「而父歿王事、惟有一子、毋使在 制宜奉韶而 對 制 明

年,匿兵器 被 三十年,除湖廣行樞密副 制宜率偏師徇二州,道經廬陵 爲姦,旣捕獲,其家納賂以緩獄事,制宜悉以勞軍,斬計龍于市,自是湖以南無復 使。 湖南 永新 地闊遠, ,獲首賊及其黨,皆殺之。 羣寇依險出沒,昭、賀二州及廬陵境,民常 茶鄉譚計龍者,聚惡 少少

盜 賊。 俄入朝,特授大都留守,領少府監,兼武衞親軍都指 元貞元年,有制: ·· 行樞密院添置副使一員,與制宜連署。 揮 使,知屯田 制宜以員非常設、先任 事

國公、諡忠宣。 敢飲,終日無情容,帝察其忠勤,屢賜內醞,輒持以奉母,帝聞之,特封其母蘇氏爲潞 **兼行,至則親入里巷,撫瘡殘,給粟帛,存者賴之。成宗素知其名,眷遇殊厚,每侍宴,** 十年,制宜以疾終,年四十有七。 |大德八年,[1三]晉地大震,平陽尤甚,壓死者衆,制宜承命存恤,懼緩不及事, 子阿兒思蘭 贈推忠贊治功臣、銀青榮祿大夫、平章政事, 晝夜 追封澤 國 倍道 太夫 輒不

#### 李進

逆戰,進以兵十五人載一舟,轉鬭十餘里,奪一巨艦,遂以功陞百戶。 岡者,宋境 李進,保定 也。 曲陽 歲庚戌春,張柔引兵築堡岡上。 人。 幼隸軍籍, 初從萬戶張柔屯杞之三叉口,時荆山之西九十里 會淮水汎漲,宋以舟師卒至,主帥察罕率軍 日龍

月,至定遠七十關,其關上下皆築連堡,宋以五百人守之,巴渠江水環堡東流。 是年秋九月,道由陳倉入興元,度米 戊午,憲宗西征,丞相史天澤時爲河南經略大使,選諸道兵之驍勇者從,遂命進爲 倉關,其地荒塞不通,進伐木開道七百餘里。 天澤命進 冬十

列傳第四十一 李進

追至 往關 懸 七十人,掩其不備,攻之,脫門樞而入者二十人。守門者覺,拔刀拒之,進被傷,不以 門 1俄閉 下說降之,不從。 上堡、殺傷盆衆、宋兵不能敵、棄走。 ,<br />
諸軍不得入,<br />
進與二十人力戰,殺傷三十人。<br />
後兵走上堡,<br />
進乃段懸門,納 進潛視間道,歸白天澤曰:「彼可取也。」是夜二鼓, 夜將旦,進遂得其堡,守之,關路始通,諸軍盡度。 天澤遣進率勇士 諸軍, 爲病。

進以功受上賞

臂突而 號令於衆曰:「聽吾鼓,視吾旗,無少怠也。」頃之,聞鼓聲,視其旗東指,諸軍遂鼓譟而入,兵 爲前鋒,北軍之船七十餘泊峽西,相距一里許。帝立馬東山,擁兵二萬,夾江而陣,天澤乃 大 交, 宋前鋒潰走, 戰艦繼亂, 順流縱擊, 死者不可勝計。 戰三槽山 己未春二月,天澤兵至行在所,圍合州釣魚山寨。夏五月,宋由嘉陵江以舟師來援,始 前者,誰也。」天澤以進對,賞錦衣、名馬。八月,又戰浮圖關,前後凡五戰,皆以功受 西。 六月、戰山之東、有功。秋七月、宋兵戰艦三百餘泊黑石峽 帝指顧謂諸將曰:「白旗下服紅半 東,以輕舟五十

八年,領兵赴襄陽。十二年,從略地湖北、湖南。 軍二千,屯田河西中興府。十四年,加武略將軍,陞千戶。十五年,移屯六盤山,加武毅將 世 祖 即位,入爲侍衞親軍。 中統二年,宣授總把,賜銀符。三年,從征李璮有功。 宋平,以兵馬使分兵屯鄂州。十三年,領 至元

域別石八里。 軍 ·,賜金符。 十七 年,陞明威將軍、管軍總管。 十九年,賜虎符,復進懷遠大將軍,命屯田西

百貫。 <u>惨八里,遁還,至和州,收潰兵三百餘人,且戰且行,還至京師,賞金織紋衣二襲、鈔一千五</u> 一十三年秋,海都及篤娃等領軍至洪水山,進與力戰,衆寡不敵,軍潰, 二十五年,授蒙古侍衞親軍都指揮使司僉事。明年,改授左翼屯田萬戶。元貞元年 進被擒。 從至

宗念其父進嘗北征被掠,特賜雯中統鈔五百錠以恤之。 子雯,襲授武德將軍、左翼屯田萬戶,佩虎符。皇慶二年,加宣武將軍。延祐六年,仁 泰定元年春,以疾辭。 子朶耳

### 石抹按只

渡,按只擊敗之。時宋兵於沿江撤橋據守,按只相地形,造浮橋,師至無留行。 韓都統。 軍,從都元帥紐璘攻成都。時宋兵聚於(虛)[靈]泉,口即按只以所部兵與戰,大敗之,殺其將 石抹按只,契丹人,世居太原。父大家奴,率漢軍五百人歸太祖。 又從都元帥按敦攻瀘州,按只以戰艦七十艘至馬湖江,朱軍先以五百艘控扼江 歲戊午,按只代領其 宋欲撓其

居多。 牛皮,作渾脫及皮船,乘之與戰,破其軍,奪其渡口,爲浮橋以濟師。 鋒奔察火魯赤以聞,憲宗遣使慰諭,賞賜甚厚。 岸軍多漂溺,按只軍東岸,急撤浮橋,聚舟岸下,士卒得不死,又援出別部軍五百餘 役,兵出輒敗,自馬湖以達合江、涪江、淸江,凡立浮橋二十餘所。 還,道病卒。行省承制以其子不老代領其軍。 於眉、簡二州、軍中賴之。九年、從征 只身被二創,戰愈力,敗之。六年正月,也速帶兒領兵趨瀘州,遣按只以舟運其器械、糧食, 橋水手軍總管,佩金符,以立浮橋功也。 般等城?[K]不老功最 由水道進。 一年,嘉定降,宋將鮮于都統率衆遁,不老追至大佛灘,盡斃之。 己未,宋以巨艦載甲士數萬,屯清(河)[江]浮橋,[三相距七十日。 至元四年,從行省也速帶兒攻瀘州,按只以水軍與宋將陳都統、張總制戰于馬湖江,按 不老從攻嘉定,以巨艦七十艘載勇士數千人,據其上流,於府江紅崖灘造浮橋以渡。十 宋兵復扼馬湖江,按只擊敗之,生獲四十人,奪其船五艘,復以水軍一千,運糧 多。 及諸軍圍重慶,不老先以戰艦三百艘列陣於觀灘,絕其走路。十 建都蠻,歲餘不下,按只先登其城,力戰,遂降之。 敍州守將橫截江津,軍不得渡,按只聚軍 行院汪田哥攻取紫雲、瀘、 中統三年,授河中府船 及四川平, 浮橋之功 水暴漲,浮橋壞,

軍

冱

列 傳

第 四 +

石 抹

按 只

三六四

不老 勒 率舟 慶城 三年,領隨翼軍五百人,會招討藥刺海,竪栅於白水江岸以爲備。 所部兵攻神臂門,蟻附以登,斬首 師 先登,殺其守陴卒數十人,宋都統趙安以城降, 十人,奪戰 下,攻千斯門,宋軍驚潰,溺死者衆, 來援,不老擊敗之於廣陽坦,生獲六十餘人,奪其船十艘。 艦 五十 艘。 五十級。 生擒三十餘 明日復戰,破之。 總管黃亮乘舟遁,不老追擒之,及其兵 人,獲其旗 十五年,復攻重慶太平門, 幟甲仗以獻。 十四年,從攻瀘州 不老乘夜襲宋軍,直抵重 宋涪州 、守將 不老

誓用等降,其餘峒 萬戶。[1+]十八年,大小盤諸峒蠻叛,命領諸翼蒙古、漢軍三千餘人戍施州,旣而蠻酋向貴 十六年,命襲父職,爲懷遠大將軍、船橋軍馬總管,更賜金虎符,兼夔路(守鎭)[鎭守]副 蠻之未服者悉平,遂以爲保寧等處萬戶。

### 謁只里

挺佐之。 能記 時議論不協,必誤大計,儻有異同,臣請得以上聞。」帝可其奏, 誦,及長,以孝友聞。 謁 只里,女直 此行,入奏曰:「關陝要地,軍務非輕,阿脫仰剌國之元臣,陛下方委任之,伏慮臨 人也。 大父昔寶味也不干,登金進士第,金亡,歸太宗。 事世 祖潛邸,得備宿衛。 中統初, 命参議 賜宴而遣之。 陝西行 樞密院 謁只里幼 未幾,改行省 事, 領悟っ 以商

列傳第四十一 謁只里 鄭溫

斷 事官,復入宿衞。 李璮平,朝議選宿衞之士監漢軍,謁只里佩虎符,監 軍於毗陽。

次郢 賴以 速,機不 以還,因 李庭等皆隸 定遠大將軍。 州 濟。 至元 將數 一殺獲 可失,宜及 元兵東下,宋將夏貴 七 麾下。 年, 騎 四 人。 而 命 出,與宋兵遇,有部卒墮馬,爲其所得,謁 爲監戰,以所領諸軍 其未 攻樊城,率其軍先登,破之,所受賞賜, 時糧儲不繼,諸將以爲憂,謁只里乃西攻江 定而擊之。」 迎戰於陽邏狀, **逐直前衝** 圍 襄陽 貴 伯顏 築一字堡以張 軍, 、未至, 獲戦. 船百餘, 悉分將士。 衆欲少俟之, 只里單騎橫戈, 軍 一勢,一 一陵龍 貴敗走。 灣堡, 時名 十一 謁 將 直入 年, 只里曰:「兵貴 取 伯 唆都、 其 顏 從 八其軍 粟 上其功,加 丞 萬 劉 相 石 國 伯顏 取之 傑、 神 衆

拜 年, 鎭 宋降,伯顏 國 十二年,攻常州, 子 上將軍 亦老溫 命 、浙東宣慰使,鎭守紹興。 襲爲萬戶、累遷江 謁 只 里監守其宮,號令嚴肅 謁只里造雲梯繩橋以登, 東廉訪使,脫脫,淮東宣慰使。 十九年卒,年四 秋毫 遂克之。 無犯。 十二。 入朝, 奉省檄徇安吉諸州, 錄 功,遷昭勇大將軍。未幾, 皆下。

#### 鄭溫

鄭 溫,眞定靈壽人。 初從中書點合南合南征,有功,爲合必赤千戶。 從丞相 史天澤,爲

警邏釣魚山。 賜名也可拔都,賞以鞍勒。 新 軍萬戶鎭撫。 憲宗征西川,溫四月不解甲,天澤以溫見,具言其功,帝曰:「朕所親見也。」 還至閬州,奉旨分軍守邏青居、釣魚等山,天澤命溫統四千人,

命溫率兵三千,往定益都。以功復受上賞,命爲侍衞親軍總管。 將楊拔都等乘夜斫營,溫力戰至黎明,賊退,諸王哈必赤、丞相史天澤厚賞之。七月,城破, 中統元年,佩金虎符,爲總管。三年,李璮叛,詔溫以軍還討。至濟南,大軍圍其城,賊

江(州)[陵]、口心沙市、潭州,皆有功,平章阿里海涯賞銀十錠。十四年,入朝,遷昭勇大將 部軍萬人,渡海征躭羅,平之。十二年,陞右衞親軍都指揮使,率三衞軍萬人,從攻岳州、 至元六年,進懷遠大將軍、右衞副都指揮使。九年,詔溫統慶古、漢人、女眞、高麗諸

軍、樞密院判官。

山(泉)[白水]塘立屯田。[1元]二十八年卒,年八十一。 |州官田三十頃。二十二年,召還。二十三年,陞江浙左丞,命以新附漢軍萬五千,於淮安雲 十八年,改輔國上將軍、江淮行省参知政事。「杭民饑,出米二十萬石糶之。 俄賜以常

子飲,利用監丞,紅,権茶都運使,銓,右衞親軍千戶,鏞,袁州路判官。

### 校勘記

- 趙(忠)[冲] 據本書卷二〇八高麗傳改。 按高麗史卷一〇三有趙冲傳。
- [1] 懷安公 見卷二校勘記[1]。
- 叉拔 金山 歸信昌朔 州 按高麗史卷五八地理志, 龜州與昌、朔州同屬安北大都護府,信州與前

文之鳳州皆屬黄州牧。 又按同書卷二三高宗世家 蒙古軍于丙申年侵入慈、朔、龜、黃等州。

疑

此處「歸」當作「龜」。

- . 6] 玄(鳳)(風) 見卷三校勘記(三)。
- 1 Ŧī. 〔射〕陽湖 按本書卷四世祖紀中統元年六月乙巳條、卷二〇六李瓊傳均作「射陽湖」 據補。

湖在淮南府南。蒙史已校。

. <u>ベ</u> リ 諸王乃蠻(帶) 據本書卷一五、一六世祖紀至元二十六年六月庚申、閏十月癸未、二十七年十

二月乙未、卷二二武宗紀至大元年七月壬午條補。按此卽壽王,卷一〇七宗室世系表作「乃蠻

台」、卷一〇八諸王表作「乃蠻歹」,卷一二一博羅歡傳作「乃馬帶」,卷一三一伯帖木兒傳作「乃

麻歹一。

- 兀朮站 按本書卷一三一伯帖木兒傳作「斡麻站」、疑此處「朮」爲「木」之誤。
- 貼滿哈 按本書卷一三一伯帖木兒傳「貼滿哈」作「帖麥哈必兒哈」,此處有脫文。 此名蒙古語,

義爲「駝肋」。

- 「た」〔制宜〕 據本書原目錄補。
- 庚戌從憲宗征大理 國至 背負憲宗以行 按本書卷四世祖紀,蒙古征大理在癸丑年,蒙史改「庚

戌」爲「癸丑」,疑是。 又考異云:意者,世祖征大理時,鼎實在行間,史家誤以爲從憲宗耳。」

此處史文有誤。

辛亥入朝 按元憲宗元年辛亥, 爲憲宗三年癸丑攻大理之前二年,而此云鄭鼎入朝在攻大理

之後。「辛亥」誤,蒙史删。

(天)(上)黨 從道光本改。 按本書卷五八地理志,平陽路潞州古稱上黨,元時屬縣亦有上黨,與

此處史文地望全符。

大德八年 清容集卷三二鄭制宜行狀及本書卷五〇五行志均作「七年」。 道光本改「八」爲

「七」,是。

- [13] (虛)[靈]泉 據本書卷一二九紐璘傳改。蒙史已校。
- 二吾 清(河)[江] 蒙史改作「清江」,並注云:「卽遂寧之清江、舊誤清河。」從改。
- 汪田哥 按汪田哥死於元憲宗末年。傳此處敍元世祖至元十二年事,田哥」二字誤。 蒙史改

作催证」。

၍

記

- [1七] (守翼)[鎮守] 副萬月 據本書多見之文改。蒙史已校。
- 從攻岳州江(州)[陵] 按本書卷八世祖紀至元十二年四月丁未條、卷一二八阿里海牙傳,此役

所下者爲江陵,與江州無涉,據改。蒙史已校。

二之

淮安雲山(泉)[白水]塘 一〇〇兵志、卷一六九謝仲溫傳及元文類卷四一經世大典序錄屯田皆有淮安路 白水塘」。 據本書卷八七百官志所見「雲山白水」改。按本書卷五九地理志、

卷

三六四七

# 元**火**卷一百五十三

## 列傳第四十二

汪世顯德臣 良臣 惟正

「吾征四方,所至皆下,汝獨固守,何也。」對曰:「臣不敢背主失節耳。」又問曰:「金亡已久, 便宜總帥。金平,郡縣望風款附,世顯獨城守,及皇子闊端駐兵城下,始率衆降。皇子曰: 民,是以降也。」皇子大悅,承制錫世顯章服,官從其舊。 汝不降,果誰爲耶?對曰:「大軍迭至,莫知適從,惟殿下仁武不殺,竊意必能保全闔城軍 汪世顯字仲明,鞏昌鹽川人。系出旺古族。仕金,屢立戰功,官至鎭遠軍節度使,鞏昌

兵相爲掎角,世顯單騎突之,殺數十人。黎明,大軍四合,殺其主將,入武信,遂進逼資、普。 軍葭萌,宋將依山爲棚,世顯以數騎往奪之,乘勝定資州,略嘉定、峨眉。進次開州。時方 列 **(**\$\dot{x} 绡 四 + = 狂. 世 鮂

即從南征,斷嘉陵,擣大安。田、楊諸蠻結陣迎敵,世顯以輕騎馳撓之。

宋曹將軍潛

暑,乃 之,宋 致,臣 泥 由 龍 師 何 預 歸 大 間道攀緣以達。 焉 擾,追奔至夔峽,過巫山 \_! 覲太宗,錫金符, 朱軍屯萬州南岸,世顯即水北造船以疑之, 易其名曰中山, ,與宋援軍遇,斬首三千餘級。 且歷數其功,世顯 奔謝曰:「此皆聖明 明 年, 夜從上游鼓革舟襲破 師還攻重慶 福德所 了,會大

封 簡 隆之覺之,世 顯 雕 精 曰:「顧 銳五 世 西公、諡義武。 癸 辛 顯先已遘疾,至是加劇,皇子遣醫,絡釋往療,竟不起,年四十九。 、卯春,皇子第功,承制拜便宜總帥,秦、鞏等二十餘州事皆聽裁決,賜虎符、錦衣、玉 丑 龆 百人,擣漢州,州兵三千出戰,城閉,盡沒。 ,蜀帥陳隆之貽書請戰,聲言有衆百萬,皇子集諸將議之,咸謂隆之可生擒也。 敵 顯曰:「事急矣 何 如,無庸誇辭爲!軍薄成都,隆之戰屢却,堅壁不出。 延祐七年,加封隴右王。 !」亟梯城入救顯,得與從者七十餘人出,獲隆之,斬之。 三日,大軍薄其城,又三日,克之。 其部曲 中統三年,論功追 田 顯約夜降, 世 顯復

次翰臣,奧魯兵馬都元帥,佐臣,鞏昌左翼都總領,歿於王事,清臣,四川行樞密院副使。 

德臣,賜名田哥,字舜輔。 年十四,侍太子游獵,矢無虛發。 襲爵鞏昌等二十四路便宜

列傳第四十二 汪世題

都總帥,從征蜀,將前軍出忠、涪,所向克獲。 進攻運山、率麾下先、所乘馬中飛石死、步戰,

拔外城。宋將余玠攻漢中,德臣馳赴之,玠聞,遁去。

于沔, 遇伏 威名,諸郡環 廬 乘夜斫營,覺之,殺千人,生擒百人。 部署官屬,數日 兵,與戰,獲其統制羅廷鶚。 入見, 乞免益昌賦 憲宗 通販 次素聞 鬻,給飽餉。 視,莫敢 其名,及入覲,所陳悉嘉納,賜印符,命城沔州。 m 出關。 集。進攻嘉定,敵潛 《稅及徭役·漕糧、屯田爲長久計,並從之。 奏乞以兄忠臣攝府事,使己得專事益昌。 又詔德臣城益昌,諸戍皆聽節制。 進次隆慶,宋軍仍夜出,與力戰,盡殺之。 軍夜出,德臣迎戰,殺百人。 沔據嘉陵要路, 即命置行部于鞏,立漕司 益昌爲蜀喉襟,蜀人憚其 世 還至左綿雲頂,宋軍 祖以皇弟 德臣繕治室 有 及馬 事 漕溝, 西南,

之!盡殺所乘馬饗士。 之,復得糧五千石。 甲 寅春,早,嘉陵漕舟水澀,議者欲棄去,德臣曰:「國家以蜀事託我,有死而已,奈何棄 旣而魚關、金牛水陸運偕至,屯田麥亦登,食用遂給。 襲嘉川,得糧二千餘石。雲頂呂(遠)[達]將兵五千邀戰,[1] 卽陣擒

都統甘閨,以兵數萬城紫金山,德臣即選精本,銜枚夜進,大破之,閏僅以身免。 東南戍卒數百有去志,德臣揣知之,給券縱去,皆泣謝。未幾,山寨相繼輸款。 夏,獲宋提轄崔忠、鄭再立,縱令持檄諭苦竹,守將南淸以城降,所俘城中民,悉歸之。 宋將余晦遣 南清北觀,

又敗之,獲糧百餘艘。魚關至沔水,迂回爲渡百有八,至是,悉爲橋梁。 其下殺清妻子以叛,蜀將焦遠領兵餉之,德臣擊敗遠, 盡獲所餉資糧。 冬,蜀兵二萬復至,

虚譽 將王德新 我家。」飲以葡萄酒,解玉帶賜之,曰:「飲我酒,服我帶,疾其有瘳乎」」德臣泣謝。 而已,建橋非所知也。」旣而橋果無功。 石紀功。 舟爲梁,一夕而成,如履坦途。 |水交會,勢洶急,帝問:「船幾何可濟。」|德臣曰:「大軍百萬,非可淹延,當別爲方略。」即命繫 對曰:「賴陛下洪福,未嘗一來。」帝曰:「彼憚卿威名耳。」賜金帶,且俾立石紀功。 山,謂德臣曰:「來者言汝立利州之功,今見汝身甚小,而膽甚大,不知敵曾薄汝城否。」德臣 之,約曰:「先破敵者,奏領此城。」圍遂解。詔候江南事定,如約以城與之。帝幸益昌,駐北 邪 戊午歲,帝親征,次漢中,德臣朝行在所。初,諸路軍成都,猝爲宋人所圍,德臣遣將赴 」宋將趙仲武納款,而楊禮 苦竹旣逆命,至是攻之,巖壁峭絕,或請建天橋,帝以問德臣,曰:「臣知先登陷 ,遣所親願效順,以郡民爲祈,奏如其請。 帝顧謂諸王曰:「汪德臣言不虛發。」賜白金三十斤,仍命刻 猶 拒戰,奮擊,盡殺之。 乃率將士魚貫 進攻長寧,拔之,斬守將王佐。 而進,帝望見,數曰:「人言其膽勇,豈 德臣微疾,帝勞之曰:「汝疾皆爲 朱龍州守 嘉陵、 陣

請,旦日,大淵率衆降。 帝東下,德臣爲先鋒,抵大獲 已而運山 山,奪水門。 青居、大梁皆降。 宋將 楊大淵遣子乞活數萬 攻釣魚山,守臣三堅負險, 人命,引至帝前為 五月不下,

列傳第四十二 汪世顯

感疾。帝遣使問勞,俾還益昌,奏曰:「陛下尊爲天子,猶冒寒暑,服勞于外,臣待罪行伍,死 德臣單騎至城下,大呼曰:「王堅,我來活汝一城軍民,宜早降」語未旣,幾爲飛石所中,遂

其分也。」又遣丞相兀眞賜湯劑,卒不起,年三十有六。中統三年,追封隴西公,諡忠烈。 子六人一長惟正,次惟賢,大司徒,惟和,昭文館大學士,惟明,以質子爲元帥,惟能,征

西都元帥,惟純,權便宜都總帥。

營舟車,水陸無壅,儲積充切。 定四川。」帝曰:「行軍飽餉,所係不輕,汝任其責,自可立功。」良臣旣奉命,治橋梁,平道路, 盤,良臣還鞏昌,供億所須,事集而民不擾,詔權便宜總帥府事。良臣奏:「願與兄德臣效力 丑歲,以德臣薦,爲鞏昌帥,領所部兵屯田白水,蜀邊寨不敢復出鈔略。 良臣,年十六七卽從兄德臣出征,每戰輒當前鋒,以功擢裨帥,兼便宜都府參議。 有旨賜黃金、弓矢,旌其能。 憲宗親征,軍至六

前。 安危,勝則富貴可保,敗則身戮家亡。苟能用命,縱死行間,不失忠孝之名。」衆聞,踴躍而 營,按兵不戰者凡二月。俄大舉至耀碑谷,兩軍相當,良臣慷慨誓諸將曰:「今日之事,係國 會大風揚沙,晝晦,良臣手刃數十人,賊勢沮,衆軍乘勝擣之,賊大潰,獲阿藍台兒、渾 世 祖卽位,阿藍台兒、渾都海逆命,劫六盤府庫,西垂騷動,詔良臣討之。兵至山丹,置

都海、殺之、西鄙輯寧。捷聞、賜金虎符、權便宜都總帥。

城日 臣塞其歸路,引兵橫擊之,斷敵兵爲二,敵敗走趨城,不得入,盡殺之。 戰船二百,泝江而上,欲掩靑居。 功之有!世祖 武勝 三年,授閬蓬廣安順慶等路征南都元 中統二年,火里叛,復討平之。 ,以扼其往來。 嘉其能讓,復賜金鞍、甲冑、弓矢,轉同僉鞏昌路便宜都總 四年春,良臣攻重慶,命元 良臣伏甲數十艘其後,身先逆戰,萬壽敗走,伏發, 入覲,賜 帥。 燕,屢稱其功,良臣拜謝曰:「臣奉諸王成算,何 良臣以釣魚山險絕,不可攻,奏請就近 帥康 土禿先驅,與宋將朱禩孫兵交,良 帥。 宋將昝萬壽 幾獲 地 築 帥

雲、瀘、敍相繼款附。 悉軍出戰,大破之,伏尸蔽江,萬壽乞降,良臣奏免其死,居民按堵。 復授 一年,進攻嘉定,昝萬壽堅守不出,良臣度有伏兵,大搜山谷,果得 成都被兵久,須卿安集之。」授鎮 良臣昭勇大將軍 至元六年,授東川副統軍。 還圍 八年,兄子惟正請於朝,謂良臣久勞戎行,乞身代之。九年, 國 上 將軍 、樞密 副 使、西川行樞密院事,蜀 丽 良臣統兵順流 殺之,進壘薄城。 明年,召入,帝 人安之。十 而 下。 萬壽

據瀘州,良臣還軍平之,復攻重慶。 十三年,宋涪州 安撫楊立,帥兵救重慶者再,良臣皆敗走之。 十五年春,張珏悉衆鏖戰, 良臣奮擊,大破之, 宋安撫張珏,遣將 身中四 乘虛襲

列傳第四十二 汪世顯

儀同三司、陝西等處行中書省平章政事、柱國,追封梁國公。 王相,不赴。十八年夏,疾卒,年五十一。贈儀同三司,諡忠惠。 良臣陳治蜀十五事,世祖喜納。良臣至成都,以蜀瘡痍之餘,極意循撫。 川悉平,捷聞,世祖喜甚,召良臣入覲,授資善大夫、中書左丞、行四川中書省事,賜白貂裘 明日,督戰益急。 压所部趙安開門納降,**珏潛**遁。 良臣禁俘掠,發粟賑饑,民大悅。 加贈推誠保德宣力功臣、 行省罷,改授安西

永,征西都元帥;惟恭,階州同知;惟仁,人匠總管達魯花赤;惟新,漢軍千戶。 子七人:惟勤,雲南諸路行省平章政事,惟簡,保寧萬戶,惟某,同知屯田總管府事,惟

宗遣渾都海以騎兵二萬守六盤,又遣乞台不花守青居,至是,渾都海叛,乞台不花發兵爲 應,惟正卽命力士縛乞台不花,殺之。 從騎爲攻守狀。父卒于軍,皇姪壽王俾權襲父爵,守靑居山。世祖卽位,遂眞授焉。 惟正字公理,幼穎悟,藏書二萬卷,喜從文士論議古今治亂,尤喜談兵,時出游獵,則勒 世祖嘉其功、詔東川軍事悉聽處分。 初,憲

戰不得,休則撓之,若是者兩月,知其糧盡勢蹙,曰:「可矣。」與戰,屢捷,火都遣三十人來約 曰:「火都今若猘犬,方肆狂齧,苟一戰不利,則城邑爲墟,當勝 中統二年,入朝,賜甲冑、寶鞍。三年,詔還鞏昌。部長火都叛,民大擾,惟正謂 以不戰。」乃發兵踵之, 賊欲 將 吏

降, 刨 遣其十人還,俾火都自來,因潛兵躡其後,出其不意擒殺之。

顏 子 襄陽,議 兵掠忠、涪,獲令、簿各一,破寨七,擒守將六,降戶千六百有奇,捕虜五 間 安西王 下 ,編竹爲籠,中置火炬,順地勢轉走,照 邪 至元 ·嘉陵下夔峽,與伯顏會錢塘。」 帝優詔答曰:「四川 」未幾,兩川樞密院合兵圍 取宋,惟正奏曰:「蜀未下者 出鎭秦蜀,召惟 七年,宋人修合州,詔立武勝軍以拒之。 ÏE 還。 [重慶,命益兵助之,惟正奪其洪崖門,獲宋將何統制。 ,數城耳,宜併力攻餘杭,本根旣拔,此將焉往 百步外,以防不虞,宋人知有備,不 惟正 事重,舍卿誰託 臨嘉陵江作栅,阨其水道,夜懸燈栅 1 百。 異日蜀平,功豈伯 敢 近。 會丞 相伯 ! 九年 願 以 顏 訓 本 克

速帶 金 擒叛將 兵銳者八十人與俱,至六盤。 於是矢下 一尊杯、貂裘。 里許,皆下馬,手弓。 不 + 燕只哥,復進兵,土魯亦就擒。 習兵,師行無紀,惟正爲正部曲,肅行陣,嚴斥候,凡軍政一倚重焉。進次平涼,簡 几 如雨,突騎中者三之一,餘盡馳還,土魯軍遂走。 年冬,皇子 王妃賜其母珠絡帽衣,且曰:「吾皇家兒婦也,爲汝母製衣,汝母眞福人也。」 北役,而藩王土魯叛於六盤,王相府命別速帶領兵進討,惟正爲副。 土魯遺百騎突陳,惟正 土魯先據西山,惟正分安西兵為左右翼,鞏兵獨居中,去土 安西王至,惟正迎謁,王歷稱其功。 令引滿 一册發,將及,又命曰:「視必中而 惟正麾兵逐之,三踰 明日,大燕,賞以 山、至蕭 發。 河, 魯 別

列傳第四十二 史天澤

撫循,人便安之。二十年,進階資德大夫。二十二年,改授陝西行中書省左丞。 去蜀遠,乃命惟正分省于蜀。 慰使。回十七年,遷龍虎衞上將軍、中書左丞,行秦獨中書省事,賜玉帶。 韶惟正入朝,世祖推玉食食之,賜白金五千兩、錦衣一襲,授金吾衞上將軍、開(城)[成]路宣 蜀土荐罹兵革,民無完居,一聞馬嘶,輒奔竄避匿,惟正留意 以省治在長安, 入覲上都,

得腹疾,還至華州,卒,年四十四。 諡貞肅。

二子:嗣昌,武略將軍、成都管軍副萬戶,壽昌,資德大夫、江南行御史臺中丞。

### 史天澤格

之讎,義所當復,雖死不避,況未必死邪」即傾貲裝,易甲仗,南還,行次滿城,得士馬甚衆。 燕,曰:「變起倉猝,部曲散走,多在近郊,公能迴轡南行,不招自至矣。」天澤毅然曰:「兄弟 天澤攝行軍事,遣監軍李伯祐詣國王孛魯言狀,且乞濟師 眞定。 史天澤字潤甫,秉直季子也。 乙酉,天倪遣護送其母歸北京,旣而天倪爲武仙所害,府僚王縉、王守道追及天澤於 身長八尺,晉如洪鍾,善騎射,勇力絕人,從其兄天倪帥

合勢進攻盧奴。 天澤時爲帳前軍總領,孛魯承制命紹兄職爲都元帥。 仙驍將萬鐵槍者,擁衆萬人來拒戰,天澤迎擊之,身先士卒,勇氣百倍。 俾笑乃解將蒙古軍三千人援之, 賊

中山 退 阻 略 派河,乘夜而遁,天澤追及之,生擒葛鐵槍,餘衆悉潰,獲其兵甲輜重,軍威大振。 無極,拔趙州,進軍野頭。會天澤兄天安亦提兵來赴,擊仙敗之,仙奔雙門,遂復 遂下

|斌勢蹙,焚山自守,天澤遣銳卒五十,摧鋒而入,自以鐵騎繼其後,縛義斌斬之。 未幾,宋大名總管彭義斌陰與仙合,欲取眞定,天澤同笑乃傳扼諸贊皇,仙不得進。 義

取蟻尖、馬武等寨,而相、衞亦降。 流散,存恤困窮。以抱犢諸寨,仙之巢穴,不即剪覆,終遺後患,急攻下之,仙乃遁去。 十,踰城東出,至藁城,求援於董俊。 「彼皆吾民,但爲賊所脅耳,殺之何罪!」力爭得釋。 三百餘人,仙從數騎,走保西山抱犢寨。 未幾,仙復令諜者,結死士於城中大曆寺爲內應,夜斬關而入,據其城。 俊授以銳卒數百,夜赴眞定,而笑乃,解兵亦至,捕叛者 。**笑乃**怒忿民之從賊,**驅萬餘人**將殺之,天澤曰: 乃繕城壁,立樓櫓,爲不可犯之計,招集 天澤引步卒數

南五路萬戶。庚寅冬,武仙復屯兵於衞,天澤合諸軍圍之。 戰不利, 己丑,太宗卽位,議立三萬戶,分統漢兵。天澤適入覲,命爲眞定、河間、大名、東平、濟 諸將皆北,天澤獨以千人繞出其後,敗一 都尉軍,與大軍合攻之,仙逸去,遂復 金將完顏合達以衆十萬來援,

衞州。

償之。 午春 沒。 德,天澤追至歸德,與諸軍會。 帝北還,留睿宗總兵 千陳於峭石灘,天澤挾二舟載死士,直前擣之,覆溺者萬計。 爲 駐兵之地乎!彼若來犯,則進退失據矣。」不聽,會天澤以事之汴,比還,撒吉思不花 軍夾擊之,白撒等敗走蒲城,天澤尾其後,白撒等兵尚八萬,俘斬殆盡。 已合,天澤奮戈突至城下,呼守者曰:「汝等勉力,援兵且至。」復躍出,其衆皆披靡,遂 償 正月,蔡破,金主自經死,天澤還眞定。 金主遷蔡,帝命元帥倴盞率大軍圍之。 癸巳春,金主突 時 金亡,移軍伐宋。 本 叉請 政 辰春,太宗由白(波)[坡]渡河,[三詔天澤以兵由孟津會河南,至則睿宗已破 煩賦 息 以 而 乃命略 中戶爲軍,上下戶爲民,著爲定籍,境內以寧。 止。 重,貸錢於西北賈 繼以歲饑,假貸充貢賦,積銀至一萬三千錠,天澤傾家貲,率族屬官吏代 地京東、招降太康、柘縣、瓦岡、睢州、追斬金將完顏慶山奴於陽邑。 圍而出,令完顏白撒自黃龍岡來襲新衛。 乙未,從皇子曲出攻棗陽,天澤先登,拔之。及攻襄陽,宋兵以 新衛達魯花赤撒吉思不花,欲薄城背水 人以代輸,累倍其息,謂之羊羔利,民不能給。 天澤當其北面,結栰潛渡汝水,血戰連 天澤率輕騎馳赴之,比至,圍 丁酉,從宗王口溫不花圍光 而營,天澤 金主以 單舸 天澤奏請官 曰:「此豈 可。 全軍 東

與大

走

歸

甲

皆

列

傳

第

四

+

史 天 濹

三六五

南,所向輒克。 天澤獨當一面,宋兵夜出斫營,天澤手擊殺數人,麾下兵繼至,悉驅其兵入淮水死,乘勝而 破,則復自潰。」親執桴鼓,督勇士四十人攻其栅,不踰時, 州、天澤先破其 外城,攻子城,又破之。師次復州,宋兵以舟三千鎖湖面爲栅,天澤曰:「栅 棚破,復人懼,請降。進攻壽春,

不我責,而罪餘人,我何安乎」」由是得釋者甚衆 答兒鈎較諸路財賦,鍛鍊羅織,無所不至,天澤以勳舊獨見優容,天澤曰:「我爲經略使,今 天澤爲經略使。 壬子,入覲,憲宗賜衞州五城爲分邑。 至則興利除害,政無不舉,誅郡邑長貳之尤貪橫者二人,境內大治。 世祖時在藩邸,極知漢地不治,河南尤甚,請以 阿藍

將呂文德以艨艟千餘,泝嘉陵江而上,北軍迎戰不利。 注 射,親率舟師順流縱擊,三戰三捷,奪其戰艦百餘艘,追至重慶而還。 戊午秋,從憲宗伐宋,由西蜀以入。己未夏,駐合州之釣魚山,軍中大疫,方議班師,宋 帝命天澤禦之,乃分軍爲兩翼,跨江

宣撫使、俄兼江淮諸翼軍馬經略使。 賄賂以防奸,庶能上下丕應,內外休息。」帝嘉納之。 立省部以正 <u></u>中統元年,世祖卽位,首召天澤,問以治國安民之道,卽具疏以對,大略謂:「朝廷當先 紀綱,設監 司以督諸路,霈恩澤以安反側,退貪殘以任賢能,頒奉秩以養 繼命往鄂渚撤江上軍,還,授河南等路 廉, 禁

秋九 定省規十條,以 月, 年 扈從 夏五月,拜中書右丞相。天澤旣秉政,凡前所言治國安民之術,無不次第舉行。又 世 祖 正 一庶務。 親征 阿里不哥,次昔木土之地, 憲宗初年,括 戶餘百萬, 韶丞相線眞將右 至是,諸色占役者太半,天澤 軍,天澤將左 悉奏罷之。 軍,合勢蹙

之

उम्

里

不

哥

敗

走

迎 生 而 命 降。 擒 兵精,不 天澤往, 壇,斬 年春,李璮陰結宋人,以益都叛,遂據濟南,詔親王哈必赤總兵討之,兇勢甚盛。 于軍門,誅同惡者數十人,餘悉縱歸。 宜力角,當以歲月斃之。」乃深溝高壘,絕其奔軼,凡四月,城 天澤聞 |壇入濟南,笑曰:「豕突入苙,無能爲也。」至則進說於哈必赤曰:「壇多譎 明日,引軍東行、未至益都,城中人已開 中食盡,軍潰出降, 繼 門

謂 臣 職,天倪有二子,一子管民政,一子掌兵權,臣復入叨寄遇,一門之內,處三要職,分所當辭, 是 慰 史氏 李璮 一勞之,悉歸功於諸將,其愼密謙退如此。 可 ·退休矣。」帝曰:「卿奕世忠勤,有勞於國,一門三職,何愧何嫌!」 初 子姪,即日解兵符者十七人。 之變,由諸侯權太重。 天澤將行,帝臨軒授詔,責以專征,俾諸將皆聽節度。天澤未嘗以詔示人,及還,帝 天澤遂奏:「兵民之權,不可併於一門,行之請自臣家始。」於 天澤在憲宗時嘗奏三臣始攝先兄天倪 竟不許。 至是,言者或 軍 民之

列

傅

以絕 右 議攻襄陽,詔天澤與駙馬忽剌出往經畫之,賜白金百錠、楮幣萬緒。至則相 丞 |相安童諭旨曰:「兩省、院、臺、或一月、一旬、遇大事、卿可商量,小事不煩卿也。」 ·其聲援,爲必取之計。 七年,以疾還燕。 八年,進開府儀同三司、平章軍國重事,仍敕 爲 至 輔 完 元 國 一上將軍、樞密副使。 年,加· 光祿大夫,右丞相如故。三年,皇太子燕王領中書省,兼判 四年,復授光祿 大夫,改中書左丞相。 六年,帝以宋未附, 要害, 樞密院事,以 立城堡,

附奏曰:「臣大限有終,死不足惜,但願天兵渡江,慎勿殺掠。」語不及它。以十二年二月七 師,進封鎭陽王,立廟 阻 宗以來,躬擐甲胄,跋履山川,宣力多矣。又卿首事南伐,異日功成,皆卿力也。 日 自 薨,年七十四。 行爲憂,可且北歸,善自調護。」還至眞定,帝又遣其子杠與尚醫馳視,賜以藥餌。 襄 陽 十 水陸 年春,與平章阿朮等進攻樊城,拔之,襄陽降。十一年,韶天澤與丞相伯顏總大軍, 並進。 計聞,帝震悼,遣近臣賻以白金二千五百兩,贈太尉,諡忠武。 天澤至郢州遇疾,還襄陽,帝遣侍臣賜以葡萄酒,且諭之曰:「卿自朕祖 後累贈太 勿 以 天澤因 小疾

**韋澳告周墀之語曰:「願相公無權。** 讀 書,尤熟於資治通鑑,立論多出人意表。 天澤平居,未嘗自矜其能,及臨大節、論大事,毅然以天下之重自任。 年四十,始折節 **<b>
育祿刑賞**,天子之柄,何以權爲!因以謝之,言者慚服。 拜相之日,門庭悄然,或勸以權自張,天澤舉唐

傳第四十二 史天澤

列

之專如: 送至眞定,署爲參謀。衞爲食邑,命王昌齡治之,舊人多不平,而莫能間,其知人之明、用人 當金末,名士流寓失所,悉爲治其生理而賓禮之,後多致顯達。破歸德,釋李大節不殺,而 此。 是以出入將相五十年,上不疑而下無怨,人以比於郭子儀、曹彬云。

丞, 杞, 淮東道廉訪使, 梓, 同知澧州, 楷, 同知南陽府, 彬, 中書左丞。 子格,湖廣行省平章政事,樟,真定順天新軍萬戶,棣,衛輝路轉運使,杠,湖廣行省右

其罪。 撫留戍 復大戰,中流矢,鵬飛身亦被七創,乃敗走。其後樞密院奏格輕進,請罪之,帝念其功,而薄 戶擇一人爲帥統之,格居其一。格軍先渡,爲宋將程鵬飛所却,格被三創,喪其師二百,尋 陽下,賜白金、衣裘、弓矢、鞍馬。衆軍渡江,平章阿朮將二十(三)[五]萬戶居前,四一每五萬 爲鄧州舊軍萬戶。旣又代張弘範爲亳州萬戶,而以故所將鄧州舊軍授弘範。從攻襄陽,襄 格字晉明。歲壬子,憲宗賜天澤以衞城,授格節度使。憲宗崩,格北留謙州,五年而歸, 俾從平章阿里海牙攻潭州,砲激栅木,傷肩,矢貫其手,裹創先登,拔之,遂以軍民安

礌蔽地,車不可至,乃伺隙率衆攀堞,蟻附而上,拔之。 徇廣西十(三)[八]州、(邑)廣東三州, 入覲,加定遠大將軍,賜以天澤所服玉帶。 從攻靜江,衆以轒輼自蔽鑿城,格所當,砲

皆 格 節 度 靜 陞 江 受 廣 西宣 兵 之 撫 初 使,改 溪 洞 鎭 諸 國 夷 沿降 F 將 雲 軍 南 廣 格 南 遣 匹 道 使 宣 諭 之, 慰 使 來者 五. + 州 雲南 爭 之, 事 聞 詔

降, 其 之。 議 擊 貴 其 棄 所 已 官 廬 劇 廣 懼 復 宋 軍 |永 棚 亡 賊 東 邪 瀕 畏 ),陳 蘇 之 江 <u>-</u> 暑,不 民 肇 仲 待 州 踐 皆 宜 集 慶、 貴 郡 其禾稼 中 城 敢深 (踰嶺 潰卒 德慶、 張 守 諸 ٠, 入,横、 戍 世 審 羅 仲窮 據鎭 封 將 傑 雅 不 州 以 挾 可 重 **爱**,遂 象 龍 江 益 永 北 併 賓 路 Щ 王 歸 兵 是、 稱 旣 儿 降 戍 貴 王 絕 <u>-</u>L 吾 廣 梧州 几 與 月 劫 不 E 益 州 諸 不 掠 昺 王 Ö 可 -j. 君 皆 於 據 餘 北 格 取 外 被 福 衆 E 歸 塗 其害。 州 圳 破 雲南 耕 宣 皆 潯 棄 植 <u>V</u>. 潘 託 州 地 益 於 而 澤 格 計 ) 撤 內 歸 王 民 築 斬 事. 備 ' ', 至 傳檄 間 李 堡 未 還 辰 示 道 於 秋 靜 爲 ( 云 其界, 嶺 來 畢 敵 不 江 告 可,敢 海, 穫。 以 李福 急 怯 格 守 欲 聞 日 輒 格 以 不 復 大 棄 可, 其 分 上 兵至 靜 君 戍 兵 地 兵 江 宜 哉 等 赴 北 令官 則 詐 增 \_ ! 亦 抵(泉) 僞 兵 行 爲 言 殄 軍 出 戍 虚 夏

平。 子 爲 奔 食 碙 張 益 弘 王 範 死 漕 詩復 。衛 世 欽、廉 傑將 王 將亳州 立. 兵數 高、化 趣 軍 萬 廣 乃還 諸 欲 州 州 復 壁海 格 糧 取 鄧 以 雷 中崖 州 給 州 舊 戍 Щ, 軍 將 世 o 遭 傑 劉 拜 曾 解 仲 参 淵 海 圍 知 子 去 撃走 政 據 事 雷 之。 部 州 格 行 後 諭 戍 廣 之 雷 悉 南 降 州 衆 西 來 道 圍 宣 衞 聽, 王 一慰使。 城 死 進 中 兵 絕 廣 攻之, 入 東 糧 觐 四 拜 悉 以 淵

資德大夫、湖廣行中書省右丞。 移江西右丞,尋復爲湖廣右丞,進平章政事。 卒,年五

十八。

子燿,福建行省平章政事;榮,鄧州舊軍萬戶。

### 校勘記

[一] 呂(遠)[達] 據隴右金石錄卷一 五汪德臣神道碑改。 按宋史卷四四理宗紀寶祐二年春二月乙

已條亦作「呂達」。

(□)開(城)(成)路 見卷一○校勘記(10)。

三)白(被)(坡) 見卷一二二校勘記(三)。

將二十(三)(五)萬戶居前 據元文類卷六二史格神道碑改。 蒙史已校。

徇廣西十(三)[八]州 按史格神道碑作「行徇定昭、賀、悟、潯、藤、容、象、貴、鬱林、柳、融、賓、

邕、横、廉、欽、高、化廣西之州十八」,所列舉州名,恰符十八之數,據改。 新元史已校

<u>—</u> У, 李辰 元文類卷六二,史格神道碑作「李應辰」,蒙史據補「應」字,疑是。

[七](泉)[全]永 據元文類卷六二史格神道碑改。按全州、永州相毗鄰,泉州在閩,與此無涉。 蒙史

已校。

列傳第四十二 校勘記

# 元史卷一百五十六

## 列傳第四十三

董文炳 〔世元 世選〕〔〕

治家嚴,篤於敎子。 董文炳字彥明,俊之長子也。父歿時年始十六,率諸幼弟事母李夫人。夫人有賢行, 文炳師侍其先生,警敏善記誦,自幼儼如成 人。

於 年間民食以足。 代償。」乃以田廬若干畝計直與貸家,復籍縣閒田與貧民爲業,使耕之。於是流離漸還,數 蝗,而徵斂日暴,民不聊生。 以恩濟威。未幾,同列束手下之,東抱案求署字,不敢仰視,里人亦大化服。縣貧,重以旱 人,而貸家取息歲倍,縣以民蠶麥償之。文炳曰:「民困矣,吾爲令,義不忍視也,吾當爲 歲乙未,以父任爲藁城令。 朝廷 初料民,令敢隱實者誅,籍其家。文炳使民聚口而居,少爲戶數。 文炳以私穀數千石與縣,縣得以寬民。前令因軍興乏用,稱貸 同列皆父時人,輕文炳年少,吏亦不之憚。 文炳明於聽斷, 衆以

府、三府欲中害之、文炳曰:「吾終不能剝民求利也。」即棄官去。 曰:「吾亟聞董令,董令顧亦人耳,何其明若神也」」時府索無厭,文炳抑不予。 或讒(知)〔之〕 大減、民皆富完。 爲不可,文炳曰:「爲民獲罪,吾所甘心。」 民亦有不樂爲者,文炳曰:「後當德我。」 由是賦斂 旁縣民有訟不得直者,皆詣文炳求決。<br />
文炳嘗上謁大府,旁縣人聚觀之,

由是日親貴用事。 文忠解尚廏五馬載糗糧迎文炳。旣至,世祖壯其忠,且閔其勞,賜賚甚厚。有任使皆稱旨, 然志益厲,期必至軍。 及至吐番,止兩人能從,兩人者挾文炳徒行,躑躅道路,取死馬肉續食,日行不能三二十里, 世祖在潛藩,癸丑秋,受命憲宗征南詔。文炳率義士四十六騎從行,人馬道死殆盡 會使者過,遇文炳,還言其狀。時文炳弟文忠先從世祖軍,世祖即命

忠 捷,世祖方駐香爐峯,因策馬下山問戰勝狀,則扶鞍起立,竪鞭仰指曰:「天也!」且命他師毋 以 師次陽羅堡。 **炳脫冑呼曰:「吾所以不極兵威者,欲活汝衆也,不速下,今屠寨矣。」守者懼,遂降。** 載艨艟 國,勢必死守,不奪其氣不可,臣請嘗之。」即與敢死士數十百人當其前,率弟文用、文 己未秋,世祖伐朱,至淮西臺山寨,命文炳往取之。文炳馳至寨下,諭以禍福,不應,文 鼓權 宋兵築堡于岸, 陳船江中, 軍容甚盛。 文炳請於世祖曰:「長江天險,宋所恃 疾趨,叫呼畢奮。 鋒旣交,文炳麾衆趨岸搏之,宋師大敗。 命文用輕舟報 九月,

解甲,明日將圍城。旣渡江,會憲宗崩。閏十一月,班師

Щ 旦 遽 東 東 東路宣撫使。 庚 以 申 ·, 世 法,不可。 祖 即位于上都,是爲 方就道,會立侍衛親軍,帝曰:「親軍非文炳難任。」即遙授侍衛親軍都指 危疑者尚多 了,宜赦 中統 天下,與之更始。」世 元年,命文炳宣慰燕南 祖 從 諸道。 之, 反側者遂安。 還奏曰:「人 久 二年, 弛 擢

揮

使,

佩金虎

符

取死 | 堕所脅耳,殺之恐乖天子仁聖之意。 文炳 也。」主將從之。 人,[三勇 也。」田縋 日:「窮寇可 三年,李璮反 而善戰,主將怒其與賊,配 城降。 然他殺之者已衆,皆大悔 冷齊南。 以計擒。」乃抵 田, 壇劇賊,善用兵。 壇之愛將,旣降, 城下, 諸軍,使陰殺 向天子伐南 呼瓊將田 文炳會諸軍圍之, 衆逐 詔, 之。 都 亂 帥 禽壇 或妄殺人, 文炳當 者曰:「反者瓊耳, 以獻。 殺二千人,言于主將 壇不 雖大將亦罪之,是不宜殺 遭兵有 -得遁。 浙 餘來卽 **外之,贼** 漣 兩 吾 日... 軍二 人, 勢 日蹙, 一萬餘 彼爲 毋自

 立 峇 相 聽 安切懼 與 之庭,曰:「壇在 璮 之。 伏誅,山東猶未靖,乃以文炳爲山東東路經略使,率親軍 閨 經 略使得 九月,文炳至益都,留兵于外,從數騎 賊, 詿誤 便宜 除擬將更,汝等勉取金銀符,經略使不敢格 汝等。 瓊已誅死,汝皆爲 衣冠 王 民,天子 而 入。 居府, 以行。 ·至仁 上命不予有功者。」所 聖, 遺經 不設警衞, 出金銀符 略 使 五. 召壇 十,有 撫汝 故 將 功

部大悦,山東以安。

築堡, 爲便。又將校素無俸給,連年用兵,至有身爲大校出無馬乘者。 地利,宜使河北耕以供軍,河南戰以關地。 戶、河南等路統軍副 人,百戶二人,聽其雇役,稍食其力。」帝皆從之,始頒將校俸錢,以秩爲差。 至元三年,帝懲李璮之亂, 爲備禦計。 帝嘗召文炳密謀,欲大發河北民丁。 使。 到官,造戰艦 欲潛銷方鎭之橫,以文炳代史氏兩萬戶爲鄧州光化行 五百艘,習水戰, 俟宋平,則河北長隸兵籍,河南 文炳曰:「河南密邇宋境,人習江 預謀取宋方略,凡愿塞要害皆 臣卽 所部千戶私役兵士 削籍 爲民。 如是 軍萬 列 四四 淮 栅

腹心。 之。 炳命收州縣所移文。衆諫以違詔,文炳曰:「但止之。」乃遣使入奏,略曰:「敵 虚實,一 九年,遷樞密院判官, 七年,改山東路統軍副使,治沂州。 不可,邊民供頓甚勞,重苦此役,二不可;因吾民以懼來者,三不可。」 行院事於淮西。 沂與宋接境,鎮兵仰內郡餉運。 築正陽 兩城, 兩城夾准相望,以綴襄陽及擣宋 有詔 人接壤,知吾 和糴本部,文 帝大悟, 罷

文炳 箙 中矢盡 登城 十年,拜參 (禦之。 ,顧左右索矢,又十餘發,矢不繼,力亦困,不能張滿**,**遂悶絕幾殆。 知政事。[2] 夏、霖雨、水漲、宋淮西制置使夏貴帥舟師十萬來攻、矢石 一夕,貴去復來,飛矢貫文炳左臂,着脅。 文炳拔矢授左右 發 明日,水入外 四十餘矢。 雨下,

列傳第四十三 董文炳

郭 起 ·,文炳 束創 手手 **廖**士 劍 督 卒卻避,貴乘之,壓軍 戰。 士選以戈擊貴 而 將 陣。 仆,不死, 文炳 病 獲 之以 創甚,子士選請代戰,文炳壯 獻。 貴遂去,不敢 復來 而遣之,復自

吾兵 华 言于伯顏 正 當 月 是歲,大舉兵伐宋, 會伯顏 前 行。 日:「采石 伯顏許之。 于安慶。 當江 之南 安慶守將范文虎 丞相伯顏自襄陽 宋都督賈似道 和州 對 ·峙,不取,必有後 來禦, 東 以 下, 城降。 與 師陳 宋 文炳請于伯顏 人戰陽羅堡。 於蕪湖 顧。」遂進攻之,降 似道 日·「大軍 文炳以· 棄師走。 知 九月發 州 旣 次當 事 疲 王喜 於 塗, 文炳 正陽,十一 陽羅堡, 復

許。 逻。 州 走, 大 短 曰:「吾弟 艦萬 兵 蘇州 文炳追及于夾灘 三月, 俘 相 文炳 艘,碇焦山下江 单 接 旣 土萬 僅 乘輪船,建大將 降 宋 有詔 汝一子,脫吾與土選不返, 兵 復叛。 餘 亦 以 人,悉縱 殊 時 張 死 向 中,勁 世傑、 職、聲震天地、横 世傑收潰卒復戰,又破之,遂 暑熱, 不 旗 殺,獲戰船七百艘,宋力自 鼓,士選、士表船翼之,大呼突陣, 孫虎 卒居前。 命伯顔 臣 約眞、楊兵誓死戰,眞、楊兵戰每敗,不敢出。 軍駐 士元、 文炳身犯之,載士選別船。 屍委仗,江水爲之不流。 建康、文炳軍 士秀猶足殺敵,吾不忍汝往 東 走於海。 此 駐鎭江。 逐 諸 文炳船· 將繼 時揚州、眞州 自寅至 弟之子 進, 小,不可入海, 午,宋 飛 士表請從,文炳 也。」士 矢 師 蔽 堅守不下,常 表 大敗 日。 世傑等陳 固請, 世傑 戰酣, 顧

涥 諸 軍 分三道 而 進,文炳居左,由江並海趨臨安。 先是,江陰軍愈判李世修欲降不

果,文炳檄諭之,世修以城來附,令權本軍安撫使。所過民不知兵,凡獲生口,悉縱遣之,無 敢匿者,威信前布,皆望旗而服。 士選單舸至<br />
瑄所、<br />
諭以威德、<br />
瑄降、<br />
得海舶五百。 張瑄有衆數千,負海爲橫,文炳命招討使迅世强及士選往

臨安城南,戍浙江亭。 耶。」於是遣人入城諭意,縣降。遂會伯顏于臨安城北。 曰:「縣去臨安不百里,聲勢相及,臨安約降已有成言,吾輕殺一人,則害大計,況屠 十三年春正月,次鹽官。 世傑計不行,乃竊宋主弟吉王昰、廣王昺南走,而宋主㬎遂降。 鹽官,臨安劇縣,俟救至,招之再返不下。 張世傑欲以其主逃之海,文炳繞出 將佐請屠之,文炳 一縣

居多。」帝曰:「文炳吾舊臣,忠勤朕所素知。」乃拜資德大夫、中書左丞。 受寶者,惟文炳無名。 時翰林學士李槃奉詔招宋士至臨安,文炳謂之曰:「國可滅,史不可沒。 宋十六主,有天下 符上於伯顏。伯顏以宋主入覲,有詔留事一委文炳。 史院。宋宗室福王與芮赴京師,徧以重寶致諸貴人,文炳獨卻不受。及官錄與芮家,具籍 三百餘年,其太史所記具在史館,宜悉收以備典禮。」乃得宋史及諸注記五千餘册,歸之國 伯顏命文炳入城,罷宋官府,散其諸軍,封庫藏,收禮樂器及諸圖籍。文炳取宋主諸璽 伯顏入朝奏曰:「臣等奉天威平宋,宋旣已平,懷徠安集之功,董文炳 禁戢豪猾,撫慰士女,宋民不知易主

時張世傑奉吉王昰據台州, 而閩中亦爲宋守。 敕文炳進兵,所過禁士馬無敢履踐田

據之, 之罪 若干、戶口若 相 麥,日:「在倉者吾旣食之,在野者汝又踐之,新邑之民 毋 向。 取 小斬 子女,毋掠民有。」衆曰:「諾。」其守將火城中逃,文炳 其民 次台州 以徇。 何罪。 干。 逾嶺 世傑 閩 敢有不縱所 遁。 人感文炳德最深,廟 闖 人扶老來迎 諸將先俘州民,文炳下令曰:「台 原者,以軍法 漳、泉、建寧 而 記祀之。 ·論。」得 
名數萬 邵 武諸郡皆送款來附。 何以續命。」是以南 人首效順於我, 亟 命 口。 滅火, 至溫州 追擒 我不 人感 溫州 其將, 凡得 暇 之,不 未下,令曰: 有 州若干、縣 數 其 忍以 故 、殘民 世傑 兵

壽 宋 謝,不許 此 帝曰:「朕召卿,意不 不虞,便宜 之,復敕太子曰:「董文 人未洽 庚 至,帝日問來 下 家主 恕其 十四四 年,帝在 吾德, 專擅之罪、」帝大嘉之,更賜金虎符。 市 虚置 因奏曰:「臣在 舶 謂宜 以 期。 遽苦之以 聞。 上都,適北 在是 及 重其事權,使爲我扞海寇,誘諸 至。卽 中書省、樞密院事 **炳所任甚重,見畢卽遣行。」旣見,慰諭** 也。 臨安時,阿 財,恐非安懷之道。」卽詔 召入。 邊有警,欲親將北伐。 豎子 盗兵, 朕自撫定。 文炳拜稽首曰:「今南 里伯 奉詔 無 大小,咨卿 檢括宋諸藏貨寶, 燕勞畢, 罷之。 正月,急召文炳。 蠻巨服, Щ 以 而 卽聽 行,已敕主者,卿 南 方已平,臣 又曰:「昔者泉州 ,國之根本也,盡以 懇至。 陛 因解所 解。 追索沒匿 L無所效 文炳 文炳 佩 四月,文炳至自臨安。 金 虎 留 求見皇太子 甚細,人實苦之。 其 力,請 符 浦 勉之。」文炳避 選宿衛 佩 壽 託 壽庚 庚 卿。 事 以 北 城降, 矣,惟 卽 卒有 邊。 日

就道,凡在上都三日。

託本意。吾是以預其大政,而略其細務也。」 付託者,在根本之重,非文移之細。且吾少徇則濟姦,不徇則致讒。 太子聞之,謂宫臣竹忽納曰:「董文炳深慮,非爾曹所知。」後或私問其故,文炳曰:「主上所 畏文炳,奸狀爲之少斂。嘗執筆請曰:「相公官爲左丞,當署省案。」請至再四,不肯署。 至大都,更日至中書、樞密,不署中書案。平章政專阿合馬方恃寵用事,生殺任情,惟 讒行則身危,而深失付

是。」每尙食,上食輒輟賜文炳。是夜,文炳疾復作,敕賜御醫日來診視。 拜。 城,令所過有司以禮弔祭,贈金紫光祿大夫、平章政事,諡忠獻。 男能騎馬者,勉力報國,則吾死瞑目矣。」言畢,就枕卒。 篇,洗沐而坐,召文忠等曰:「吾以先人死王事,恨不爲國死邊,今至此,命也。 炳至上都,奏曰:「臣病不足領機務,西北高寒,筋骸舒暢,當復自愈,請盡力北邊。」帝曰: 「卿固忠孝,是不足行也。 八月天壽節,禮成賜宴,帝命坐文炳上坐,諭宗室大臣曰:「董文炳,功臣也,理當坐 十五年夏,文炳有疾,奏請解機務,詔曰:「大都暑熾,非病者宜,卿可來此,固當愈。」文 樞密事重,以卿僉書樞密院事,中書左丞如故。」文炳辭,不許,遂 帝聞,悼痛 子士元、士選。 良久,命文忠護喪葬藁 九月十三日,疾 願董氏世有

蔚率鄧州一軍西行。師次釣魚山,宋人堅壁拒守。 能言,卽令讀書。」數歲,從名儒受學。及長,善騎射。 士元,一名不花,字長卿,文炳長子也。 自襁褓喪母,祖母李氏愛之,謂文炳曰:「俟兒 士元請代文蔚攻之, 以所部銳卒先登, 憲宗征蜀,士元年二十三,從叔父文

役。 帝知其忠勤可任以事。會文蔚病卒,無子,命士元襲爲千夫長。出師南征襄、漢,分禁 中統初,文蔚入典禁兵,士元以世家子選供奉內班,從車駕巡狩北方,嘗預武定山之

力戰良久,以它軍不繼而還。

。憲宗壯之,賜以金帛。

兵戍淮上,土元在軍中修敕武備,號令肅然。

戰,阿里趣令左旋,已乃遁去。一士元與哈刺禿以部兵赴敵 乃棄馬步戰,至四更,敵衆始退。及旦,阿里來視戰地,見士元臥泥中,身被十七槍,甲裳盡 將姜才乘隙來攻。阿里素不習兵,率輕騎數百出堡,(元士)〔士元〕與別將哈剌禿以百騎從 博魯歡 赤,肩舁至營而絕,年四十二。哈剌禿亦戰死。 之。[三]日已暮,宋兵至者萬餘,士元謂左右曰:「大丈夫報國政在今日,勿懼也。」方整陣欲 丞相伯顏克江南,宋兵保兩淮未下,士元數與戰,拔淮安堡,以功遷武節將軍。 攻揚州,駐師灣頭堡。時方大暑,博魯歡病還京師,以行省阿里代領諸軍。 死戰,鼓譟震地,泥淖馬不能馳, 揚州 從太師

江淮旣平,伯顏 入朝言於帝曰:「淮海之役,所損者二將而已。」帝問其人,以士元與哈

列傳第

公、改諡 刺 軍、僉 對 忠愍。 書 帝日 樞 密院 …「不花健捷過人,畫戰必能制敵,夜戰而死,甚可惜也。」 事 , 諡節愍。 後加贈推誠效節功臣、資德大夫、中書左丞、護軍,追封趙郡 至大元 年,贈鎭國上

衛親 嘉其意,命士秀將前衞,而以士選同愈行樞密院事於湖廣,久之召還。 宮,取宋主降表及收其文書圖籍,靜重識大體,秋毫無所取,軍中稱之。 勇,遺使問之,始知爲文炳子。 兵戰金山,日日土選戰甚力,大敗之,追至海 軍諸衞,以土選爲前衞指揮使,號令明正,得士大夫心。未幾,以其職讓其弟土秀。 士選字舜卿,文炳次子也。幼從文炳居兵間, 晝治武事, 夜讀書不輟。 奏功,佩金符,爲管軍總管。 而還。 及降張瑄等,丞相伯顏臨陣觀之,壯 戰數有功。 朱平,班師,詔置侍 宋降、從文炳入宋 文炳總師與宋 其驍

遣舶商海外未至,請留以待之,<u></u>士選曰:「海商至則捕錄之,不至則無如之何,不係斯人之存 及 士用之,以易其弊,於是召士選論議政事,以中書左丞與平章政事徹理往鎭浙西,聽辟 乘輿前,土選等出步卒橫擊之,其衆敗走。 宗王 至部,察病民 乃顏叛,帝 (事)悉以帝意除之,民大悅。 親征,召士選至行在所,與李勞山同將漢人諸軍以禦之。 緩急進退有禮,帝甚善之。 有聚斂之臣爲奸利, 事發得罪且死, 詐言所 桑哥事敗,帝求直 乃顏 軍飛矢 舉僚

外竦然。

亡也。 以種藝,水無所居積,故數有水旱,土選與徹理力開復之。 苟此人幸存,則無以謝天下。」遂竟其罪。 浙多湖泊, 廣蓄泄以藝水旱, 率為豪民占

謂之曰:「董公上功簿邪。」使者曰:「某且行,左丞授之言曰:『朝廷若以軍功爲問,但言鎭撫 贼巢不百里,命擇將校分兵守地待命。察知激亂之人,悉置于法,復誅奸民之爲囊**橐者**。 测其所爲。至職境,捕官吏害民者治之,民相告語曰:"不知有官法如此。」進至興國縣,去 自往、衆欣然託之。卽日就道,不求益兵,但率掾史李霆鎭、元明善二人,持文書以去,衆莫 無狀,得冤罪幸甚,何功之可言!』」因出其書,但請黜贓吏數人而已,不言破賊事。 名具在。 於是民爭出請自效,不數日遂擒賊魁,散餘衆歸農。軍中獲賊所爲文書,旁近郡縣富人姓 衆至萬餘。朝廷遣兵討之,主將觀望退縮不肯戰,守吏又因以擾良民,賊勢益盛。」士選請 歎其知體而不伐。拜江南行御史臺中丞,廉威素著,不嚴而肅,凜然有大臣風。 成宗卽位,僉行樞密院於建康。未幾,拜江西行省左丞。 **霆鎮、明善請焚之,民心益安。 遣使以事平報于朝。 中書平章政事不忽木召其使 贛州盗劉六十爲立名號,聚** 廷議深

木以平章軍國重事繼之,方正持大體,天下望之,而已多病,遂以屬之土選。風采明俊,中 入僉樞密院事,俄拜御史中丞。 前中丞崔彧久任風紀,善斡旋以就事功。 旣卒,不忽

慨然曰:「董二哥之言驗矣,吾愧之。」因賜上尊以旌直言,始爲罷兵,誅劉深等。 臣之所當。他日以不言罪臣,臣死何益一一帝麾之起,左右擁之以出。未數月,帝聞師敗績, 諭之,諭之不從,然後聚糧選兵,視時而動。豈得輕用一人妄言,而致百萬生靈於死地。」帝 畢,同列皆起,士選乃獨言:「今劉深出師,以有用之民而取無用之地。 就令當取,亦必遣使 役,則無功可見於後世。」帝入其言,用兵意甚堅,故無敢諫者。 文炳曰董大哥,故帝以二哥呼士選。 久之出為江浙行省右丞, 遷汴梁行省平章政事, 又遷 色變,士選猶明辨不止,侍從皆爲之戰慄,帝曰:「事已成,卿勿復言。」士選曰:「以言受罪, 驅民 由是民死者亦數十萬, 轉粟餉軍,谿谷之間不容舟車,必負擔以達。一夫致粟八斗,率數人佐之,凡數十日乃 時 丞 |相完澤用劉深言,出師征八百媳婦國,遠冒煙瘴,及至未戰, 士卒死者十已七八。 中外騷然。而完澤說帝:「江南之地盡世祖所取,陛下不興此 **士選率同列言之**,奏事殿中 世祖嘗呼

篤。 以所學教授。遷南行臺,又招汲子集與俱,後又得范梈等數人,皆以文學大顯於時。故世 旣 又得吳澄 時言世家有禮法者,必歸之董氏。其禮敬賢士尤至。在江西,以屬掾元明善爲賓友, |選平生以忠義自許,尤號靡介,自門生部曲,無敢持一毫獻者。 治家甚嚴,而孝弟尤 而師之,延虞汲於家塾以敎其子。 諸老儒及西蜀遺士, 皆以書院之祿起之, 使

貲,故老而益貧,子孫不異布衣之士,仕者往往稱廉吏云。 稱求賢薦士,亦必以董氏爲首。晚年好讀易,澹然終其身。 每一之官, 必賣先業田廬爲行

子守忠、雲南行省參知政事、守慇、侍正府判官、守思、知威州。

### 張弘範

犯者。 計 壽陽 張 行 弘範字仲疇,柔第九子也。善馬槊,頗能爲歌詩。年二十時,兄順天路總管弘略上 都,留弘範攝府事,吏民服其明決。蒙古軍所過肆暴,弘範杖遣之,入其境無敢

益深廣,瓊不知也。明日,果擁飛橋來攻,未及岸,軍陷壕中,得跨壕而上者,突入壘門,遇 以奇兵來襲,謂我弗悟也。」遂築長壘,內伏甲士,而外爲壕,開東門以待之,夜令士卒浚壕 勉之。」弘範營城西,瓊出軍突諸將營,獨不向弘範。 罷 伏皆死,降兩賊將。 汝圍城勿避險地。 大藩子弟之在官者,弘範例罷 中統初,授御用局總管。三年,改行軍總管,從親王合必赤討李璮於濟南。柔戒之曰: 汝無怠心,則兵必致死。主者慮其險,苟有來犯,必赴救,可因以立功, 柔聞之曰:「眞吾子也。」壇旣誅,朝廷懲壇盡專兵民之權,故能爲亂,議 弘範曰:「我營險地,瓊乃示弱於我,必

列

授順 活其民,使不致逃亡,則歲有恒收,非陛下大倉庫乎」。帝曰:「知體,其勿問。」 說也。」對曰:「今歲水潦不收,而必責民輸,倉庫雖實,而民死亡殆盡,明年租將安出?曷若 天路管民總管,佩金虎符。二年,移守大名。歲大水,漂沒廬舍,租 至元 朝廷罪其專擅,弘範請入見,進曰:「臣以爲朝廷儲小倉,不若儲之大倉。」帝曰:「何 元年,弘略旣入宿衞,帝召見,意其兄弟有可代守順天者,且念弘範有濟南之功, 稅無從出,弘範輒

兵千人戍萬山 城,我師坐視,無禦之者。而其境南接江陵、歸、峽,商販行旅士卒絡繹不絕,寧有自斃之時 曰:「國家取裏陽,為延久之計者,所以重人命而欲其自斃也。 李壇所教練之卒,勇悍難制,故命領之。戍應門堡,以斷宋餉道,且絕野之救兵。 宜城萬山以斷其西,棚灌子灘以絕其東,則庶幾速斃之道也。」帥府奏用其言,移弘範 六年,括諸道兵圍宋襄陽,授益都淄萊等路行軍萬戶,復佩金虎符。朝廷以益都兵乃 曩者,夏貴乘江漲送衣糧入 弘範建言

動,再進再却,弘範曰:「彼氣衰矣。」鼓之,前後奮擊,宋師奔潰。 攻其後,親率二百騎爲長陣,令曰:「聞吾鼓則進,未鼓勿動。」宋軍步騎相間突陣,弘範軍不 與 浴諸 君在此 旣 城、與將士較射出東門、宋師奄至。將佐皆謂衆寡不敵、宜入城自守。 何事、敵至將不戰乎? 敢言退者死。」卽擐甲上馬, 立遣偏將李庭當其前,他將 弘範曰:「吾

列傳第四十三 張弘範

從之。 樊 相為唇 年 明 - ,築一字城逼襄陽。破樊城外郭。九年,攻樊城,流矢中其肘,裹瘡見主帥曰:「襄、 日 協、故 ,復出銳卒先登,遂拔之。襄陽旣下,偕宋將呂文煥入覲,賜錦衣、白金、寶鞍, 不 可破。若截江道,斷其援兵,水陸夾攻,樊必破矣。人樊破則襄陽何所恃。」

將校行

賞有差。

待。 繼之,宋師潰,弘範長驅至建康。十二年五月,帝遣使諭丞相毋輕敵貪進,方暑,其少駐以 取之無遺策矣。豈宜迂緩,使敵得爲計耶。」丞相然之,馳驛至闕,面論形勢,得旨進師 渡江,弘範爲前鋒。 弘範進曰:「聖恩待士卒誠厚,然緩急之宜,非可遙度。今敵已奪氣,正當乘破竹之勢, 十 一年,丞相伯顏伐宋,弘範率左部諸軍循漢江,東略郢西,南攻武磯堡,取之。 朱相賈似道督兵阻蕪湖,殿帥孫虎臣據丁家洲。弘範轉戰而前,諸軍 北兵

弘範 以 城 出 萬戶,後賜名拔都 門,斬首萬餘級,自相蹂藉溺死者過半。 揚子橋。 軍從旁橫衝之,宋師遂敗。 引却。 十二年,次瓜洲,分兵立栅,據其要害。 弘範佐都元帥阿朮禦之,與宋兵夾水陣。弘範以十三騎徑度衝之,陣堅不動, 一騎躍馬揮刀,直趣弘範,弘範旋轡反迎刺之,應手頓斃馬下,其衆潰亂,追至 追至圖山之東,奪戰艦八十艘,俘馘千數。 宋將張世傑、孫虎臣等率水軍於焦山決戰,弘範 揚州都統姜才所統兵勁悍善戰,至是以二萬人 上其功,改亳州

誅其爲首者而已。 决。 弘範將命入城,數其大臣之罪,皆屈服,竟取稱臣降表來上。十三年,台州叛,討平之, 從中書左丞董文炳,由海道會丞相伯顏,進次近郊。宋主上降表,以伯姪爲稱,往返未 十四年,師還,授鎭國上將軍、江東道宣慰使。

汝之副也,不用令者,以此處之。」將行,薦李恒爲己貳,從之。 汝嘉。」面賜錦衣、玉帶,弘範不受,以劍甲爲請。帝出武庫劍甲,聽其自擇,且諭之曰:「劍, 恨,良由委任不專故也,豈可使汝復有汝父之悔乎。今付汝大事,能以汝父之心爲心,則予 其破安豐也,汝父欲留兵守之,察罕不從。師旣南,安豐復爲宋有,進退幾失據,汝父深悔 陛辭奏曰:「漢人無統蒙古軍者,乞以蒙古信臣爲首帥。」帝曰:「汝知而父與察罕之事乎? 十五年, 宋張世傑立廣王昺于海上, 閩、廣響應, 俾弘範往平之, 授蒙古漢軍都日

**虞也。** 五坡嶺,使之拜,不屈,<br />
弘範義之,<br />
待以賓禮,<br />
送至京師。 虚破其北門,拔之。 兵向之,寨中持滿以待。 軍法重,我不敢以私撓公,勉之。」弘正所向克捷。進攻三江寨,寨據隘乘高,不可近, 至揚州、選將校水陸二萬,分道南征,以弟弘正爲先鋒,戒之曰:「選汝驍勇,非私 忽麾軍連拔數寨,迴擣三江,盡拔之。至漳州,軍其東門,命別將攻南門、西門,乃乘 攻鮑浦寨,又拔之。 弘範下令下馬治朝食,若將持久者。持滿者疑不敢動,而他寒不 由是瀕海郡邑皆望 獲宋禮部侍郎鄧光薦,命子珪師 風 降附。 獲宋丞相文天祥于 汝也 因連

斷其汲路,燒其宮室。 東西對峙,其北水淺,舟膠,非潮來不可進,乃由 在。 以戰艦二,使守北面 辛酉,次崖山。 十六年正月庚戌,由潮陽港發舶入海,至甲子門,獲宋斥候將劉青、顧凱, 宋軍千餘艘碇海中,建樓櫓其上,隱然堅壁也,弘範 世傑有甥在弘範軍中, 三使招之,世傑不從。 .山之東轉南入大洋,始得逼其舟,又出奇兵 甲戌,李恒 引舟 師赴之。 乃知廣王所 自廣州至, 崖山

授

吾樂作乃戰,違令者斬。」 先麾北 之曰:「聞金聲起戰,先金而妄動者死。」飛矢集如蝟,伏盾者不動。 其東南北三面,弘範 李恒追至大洋不及。 火石交作,頃刻幷破七舟,宋師大潰。 且宴,少懈,弘範舟師犯其前,衆繼之。 之陽,勒石紀功而還 二月癸未,將戰,或請先用砲。 自將一軍相去里餘,下令曰:「宋舟潮至必東遁,急攻之, 世傑走交趾,風壞舟,死海陵港。 面一軍乘潮而戰,不克,李恒等順潮 弘範曰:「火起則舟散,不如戰也。」明日,四分其軍,軍 豫構戰樓於舟尾,以布模障之,命將士負盾而 宋臣抱其主昺赴水死。 其餘將吏皆降。 獲其符璽印章。 舟將接,鳴金撤障,弓弩 流退。 嶺海悉平, 磨崖山 樂作,宋將以 勿令得去,聞 世傑先道, 伏,令

爲

十月,入朝,賜宴內殿,慰勞甚厚。 未幾,瘴癘疾作,帝命尚醫診視,遺近臣臨議用藥,

列 傳 第 + Ξ

張 31. 粒

淮陽王、諡獻武。 郊運功臣、太師、開府儀同三司、上柱國、齊國公,改諡忠武。 而卒。 樂,與親故言別。 敕 衛士監門,止雜 年四十三。 出所賜劍甲,命付嗣子]珪曰:「汝父以是立功,汝佩服勿忘也。」語竟,端坐 人毋擾其病。 贈銀青榮祿大夫、平章政事、諡武(略)[烈]。[刊]至大四年,加贈推忠效節 病甚,沐浴易衣冠,扶掖至中庭,面闕再拜。 延祐六年,加保大功臣,加封 退坐, 命酒作

### 校勘記

〔士元士選〕 道光本與本書原目錄合,從補。

子珪,自有傳。

- 或讒(知)[之]府 從北監本改。 按元文類卷七〇元明善藁城董氏家傳「知」作「之」。
- = **璮兵有浙漣兩軍** 愛碑作「漣海兩軍」。 董氏家傳、藁城嘉靖縣志卷九王磐董文炳神道碑,疑原已誤。 按李璮據山東, 道光本從類編改「浙」爲「沂」。 浙江非其勢力所及,「浙」字見於元文類卷七〇元明善藁城 藁城嘉靖縣志卷八王磐董文炳遺
- 29 十年拜參知政事 符、係沿元明善藁城董氏家傳之誤。 卷八世 祖紀至元十一年三月辛卯條符。 藁城嘉靖縣志卷八、九王磐董文炳遺愛碑、神道碑此事皆繫十一年, 「十」當作「十一」,本證已校。按此傳繫年多與史實不 與本書

記

[五](元士)[士元] 從北監本改正。

ハベン 與宋兵戰金山 按本書卷八世祖紀至元十二年七月庚午、辛未條、卷一二八阿北傳、本卷董文

炳傳及吳文正集卷三二董士選神道碑了金山」皆作「焦山」。新編改「金」爲「焦」,疑是。

諡武(略)[烈]

(中)

合、從改。

道光本與道園學古錄卷一四張弘範廟堂碑、牧庵集卷一張弘範贈齊國忠武公制

# 元史卷一百五十七

## 列傳第四十四

劉秉忠「東恕」こ

木華黎取邢州,立都元帥府,以其父潤爲都統。事定,改署州錄事,歷鉅鹿、內丘兩縣提領, 遼,爲官族。曾大父仕金,爲邢州節度副使,因家焉,故自大父澤而下,遂爲邢人。庚辰歲, 劉秉忠字仲晦,初名侃,因從釋氏,又名子聰,拜官後始更今名。其先瑞州人也,世仕

所至皆有惠愛。

十七,爲邢臺節度使府令史,以養其親。居常鬱鬱不樂,一日投筆嘆曰:「吾家累世衣冠,乃 照禪師遺徒招致爲僧,以其能文詞,使掌書記。後遊雲中,留居南堂寺。 汨沒爲刀筆吏乎!丈夫不遇於世,當隱居以求志耳。」卽棄去,隱武安山中。久之,天寧虛 秉忠生而風骨秀異,志氣英爽不羈。八歲入學,日誦數百言。年十三,爲質子於帥府。

三六八七

列

歲,奔父喪,賜金百兩爲葬具,仍遣使送至邢州。 遁甲之屬,無不精通。 顧問。 世祖 在潛邸,海雲禪師被召,過雲中,聞其博學多材藝,邀與俱行。既入見,應對稱旨, 秉忠於書無所不讀,尤邃於易及邵氏經世書,至於天文、地理、律曆、三式六壬 論天下事如指諸掌。世祖大愛之,海雲南還,秉忠遂留藩邸。後數 服除,復被召,奉旨還和林。上書數千百

于五代,一千三百餘年,由此道者,漢文、景、光武,唐太宗、玄宗五君,而玄宗 下。勤勞憂苦,遺大寶於子孫,庶傳萬祀,永保無疆之福。 也。然治亂之道,係乎天而由乎人。天生成吉思皇帝,起一旅,降諸國,不數年而取天 典章、禮樂、法度、三綱五常之敎,備於堯、舜,三王因之,五覇敗之。漢興以來,至 不無疵

之可察。當擇開國功臣之子孫,分爲京府州郡監守,督責舊官,以遵王法,仍差按察官 也。 下善事,夜以繼日,每得一事,坐以待旦,以匡周室,以保周天下八百餘年,周公之力 君上,兄也,大王,弟也。思周公之故事而行之,在乎今日。千載一時,不可失也。 內外相濟,國之急務,必先之也。然天下之大,非一人之可及,萬事之細,非一心 君之所任,在內莫大乎相,相以領百官,化萬民,在外莫大乎將,將以統三軍,安四 愚聞之曰「以馬上取天下,不可以馬上治」。昔武王,兄也;周公,弟也。 周公思天

列傳第四十四 劉秉忠

守,治者升,否者黜。天下不勞力而定也。

行 乞取,民不能當,是以逃竄。 儀仗, 使 復業,再行定奪。 威 福 天下戶過百萬,自忽都那濱斷事之後,差徭甚大,加以軍馬調發,使臣煩擾,官吏 ,進退生殺惟意之從,宜從禁治。 家足身貴。 官無定次,清潔者無以遷,污濫者無以降。 有犯於民, 設條定罪。 宜比舊減半,或三分去一 威福者君之權,奉命者臣之職。 ,就見在之民以定差稅, 可比附古例,定百 今百官自 官官 招 一
爵
禄 逃者

者皆提察然後決,犯死刑者覆奏然後聽斷,不致刑及無辜。 令旣設,則不宜繁,因大朝舊例,增益民間所宜設者十數條足矣。 天下之民未聞敎化,見在囚人宜從赦免,明施敎令,使之知畏,則犯者自少也。 教令旣施,罪不 至死 敎

陪償無名,虛契所負,及還過元本者,並行赦免 算官民所欠債負,若實爲應當差發所借,宜依合罕皇帝聖旨,一本一利,官司歸還。 家者,置府庫,設倉廪,亦爲助民;民有身者,營產業,關 天子以天下爲家,兆民爲子,國不足,取於民,民不足,取於國,相須如魚水。 田 野,亦爲資國 用 也。 今宜打 有 凡 國

所費 以準差發。 納 糧就遠倉,有一廢十者,宜從近倉以輸爲便。 關市津梁正稅十五分取一,宜從舊制。 當驛路州城,飲食祗待偏重,宜計 禁橫取,減稅法, 以利百姓。

員,率天下百姓務農桑,營產業,實國之大益 麗,廢爲塵而無濟,甚可惜也。 之所出,淘沙鍊石,實不易爲。 人不得僭越。 加 耗甚重,宜令權量度均為一法,使錙銖圭撮尺寸皆平,以存信去詐。珍貝金銀 今地廣民微,賦斂繁重,民不聊生,何力耕耨以厚產業。宜差勸農官一 宜從禁治。除帝胄功臣大官以下章服有制外,無職之 一旦以纒絲縷,飾皮革,塗木石,粧器仗,取一時之華

開選擇才,以經義爲上,詞賦論策次之,兼科舉之設,已奉合罕皇帝聖旨,因而言之,易 也。開設學校、宜擇開國功臣子孫受教、選達才任用之。 古者庠序學校未嘗廢,今郡縣雖有學,並非官置。 宜從舊制,修建三學,設教授**,** 

往往科取民間。 州郡,宜設館,不得於官衙民家安下。 徵,無從獻利之徒削民害國。 資軍馬之用,實國之大事。移刺中丞拘權鹽鐵諸產、商賈酒醋貨殖諸事,以定宣課,雖 使從實恢辦,不足亦取於民,拖兒不辦,已不爲輕。奧魯合蠻奏請於舊額加倍權之, 關西、河南地廣土沃,以軍馬之所出入,治而未豐。宜設官招撫,不數年民歸土闢,以 天下莫大於朝省,親民莫近於縣宰。雖朝省有法,縣宰宜擇,縣宰正,民自安矣。 科權並行,民無所措手足。宜從舊例辦權,更或減輕,罷繁碎,止科 鰥寡孤獨廢疾者,宜設孤老院,給衣糧以爲養。使臣到

名儒,循舊禮,尊祭上下神祗,和天地之氣,順時序之行,使神享民依,德極於幽明,天 之基。王道之本。今天下廣遠,雖成吉思皇帝威福之致,亦天地神明陰所祐也。宜訪 近代禮樂器具靡散,宜令刷會,徵太常舊人敎引後學,使器備人存,漸以修之,實太平 下賴一人之慶。 見行遼曆,日月交食頗差,聞司天臺改成新曆,未見施行。宜因新君卽位,頒曆改 孔子爲百王師,立萬世法,今廟堂雖廢,存者尚多,宜令州郡祭祀,釋奠如舊儀。

業不墜於後世,甚有勵也。 元。令京府州郡置更漏,使民知時。國滅史存,古之常道,宜撰修金史,令一代君臣事

「君子不可小知而可大受,小人不可**大受而可**小知。」蓋君子所存者大,不能盡小人之 養才勵人之大也。明君用人,如大匠用材,隨其巨細長短,以施規矩繩墨。孔子曰: 事,或有一短;小人所拘者狹,不能同君子之量,或有一長。盡其才而用之,成功之 有營運產業者,會前聖旨,種養應輸差稅,其餘大小雜泛並行蠲免,使自給養,實國家 國家廣大如天,萬中取一,以養天下名士宿儒之無營運產業者,使不致困窮。或

君子 不以言廢人,不以人廢言,大開言路,所以成天下、安兆民也。 天地之大,

之覆邦家者」,此之謂也。 人,小人得勢,必排於君子。 明君在上,不可不辨也。 孔子曰「遠佞人」,又曰「惡利口 君子之心,一於理義,懷於忠良,小人之心,一於利欲,懷於讒佞。君子得位,有容於小 之, 蔽一心也; 人君有之, 蔽天下也。常選左右諫臣, 使諷諭於未形, 忖畫於至密也。 日月之明,而或有所蔽。且蔽天之明者,雲霧也,蔽人之明者,私欲佞說也。

阡陌,後世因之不能復。今窮乏者益損,富盛者增加。宜禁行利之人勿恃官勢,居官 者在位,能者在職,此皆一人之睿知,賢王之輔成也。古者治世均民產業,自廢井田爲 在位者勿侵民利,商賈與民和好交易,不生擅奪欺罔之害,真國家之利也。 各路課稅所,以定權辦,其餘言利者並行罷去。古者明王不寶遠物,所寶惟賢,如使賢 今言利者衆,非圖以利國害民,實欲殘民而自利也。宜將國中人民必用場治,付

省,以爲政本。 職無不備,紀綱正於上,法度行於下,是故天下不勞而治也。今新君卽位之後,可立朝 刑宜禁治,以彰愛生之德。立朝省以統百官,分有司以御衆事,以至京府州郡親民之 笞箠之制,宜會古酌今,均爲一法,使無敢過越。禁私置牢獄,淫民無辜,鞭背之 其餘百官,不在員多,惟在得人焉耳。

世祖嘉納焉。又言:「邢州舊萬餘戶,兵興以來不滿數百,凋壞日甚,得良牧守如眞定張耕、

洛水 劉 肅者治 之,循 可完復。」朝廷卽以耕爲邢州安撫使, 肅爲副 使。 由是流民復業,升那

爲順德府。

日 ,不妄戮一人。 癸 1: 一,從世 祖征大理。 己未,從伐宋,復以雲南所言力贊於上,所 明年,征雲南。 每贊以天地之好生,王者之神武不 至全活 不可 勝 計 殺,故克城之

咸 宜 於今者,條 見 錄 中 甪 統元年,世 文物 列 粲然 以 聞 祖 即位,問以治天下之大經、養民之良法, 新。 於 是下韶建元 紀歲,立中書省、 宣撫 司。 秉忠采祖宗舊 朝廷 一舊臣、 典, Щ 林遺 參以古制之

拜光祿 者,知 坊, 御極 爲 名臣。 且 萬 秉忠久侍藩邸,積 秉忠 無不言,言無不 以 ·大夫,位太保,參(預)[領]中書省事。[I] 物惟 少府宮籍監戶給之。 雖 居左 新,而 一右,而 秉忠猶仍其 聽,帝寵任愈隆。 有 猶不改舊服, 歲年,參帷幄之密謀,定社 秉忠旣受命,以天下爲己任,事 野服散號,深所 時人稱之爲聰書記。 燕閑 顧問,輒推 詔 未安,宜正其衣冠,崇以 以 稷之大計, 翰林侍讀學士竇默 薦 人物可備器使者,凡 至元元年,翰林學士承旨王鶚奏 無巨細 忠勤 勞績, 顯秩。」帝覽奏, 之女妻之,賜第 凡有關於 宜被褒崇。 所甄 或 拔,後悉 家 卽 大體 奉 聖 明 日

初, 帝命 秉忠相地於恒州東**灤水北**,建城郭于龍岡,三年而畢,名曰 開平。 繼升爲上

列

以中都爲大都。他如頒章服、舉朝儀、給俸祿、定官制、皆自秉忠發之、爲一代成憲。 ,而以燕爲中都。 四年,又命秉忠築中都城,始建宗廟宮室。八年, 奏建國號曰大元,而

仁宗時,又進封常山王。 郎趙秉溫護其喪還葬大都。十二年,贈太傅,封趙國公,諡文貞。成宗時,贈太師,諡文正。 陽術數之精,占事知來,若合符契,惟股知之,他人莫得聞也。」出內府錢具棺斂,遣禮部侍 五十九。帝聞驚悼,謂羣臣曰:「秉忠事朕三十餘年,小心愼密,不避艱險,言無隱情,其陰 十一年,扈從至上都,其地有南屛山,嘗築精舍居之。秋八月,東忠無疾端坐而卒,年

散人。 東<br />
忠自幼好學,至老不衰,雖位極人臣,而<br />
齊居蔬食, 每以吟詠自適,其詩蕭散閑淡,類其爲人。有文集十卷。無子,以弟秉恕子蘭璋後。 終日澹然,不異平昔。自號藏春

嫌於 受而散之,以二百兩與秉恕,秉恕曰:「兄勤勞有年,宜蒙茲賞,秉恕無功,可冒恩乎。」終 Щ ·野鄙人,僥倖遭際,服器悉出尙方,金無所用。」<br/>世祖曰:「卿獨 私親,獨不及秉恕。 秉恕字長卿。 好讀書、年弱冠、受易於劉肅、遂明理學。兄秉忠、事世祖、以薦士自任, 左右以聞,召見,遂同侍潛邸。 世祖嘗賜秉忠白金千兩,辭曰:「臣 無親故遺之邪。〕辭不允,乃

不受。

列傳第四十四 張文謙

管。 他 天、太原 府 所至,皆有惠政。 平陽歲荒,民艱食,輒開倉以賑之,全活者衆。 中 賜金虎符,爲順德安 統 五路總管。淄萊府 元 年,擢禮 部侍郎、邢州 召除 感禮部尚 撫 有死囚六人, 使。 書。 安撫 至元 出 副使。 元 爲 年,轉官法 獄已具。 淮西宣慰使, 二年,賜金符, 秉恕疑之, 年六十,卒于官。 行,改嘉議 會省宣慰司, 遷吏部 詳讞得其實,六人賴 大夫,歷彰德、懷孟、淄萊、順 侍郎。 歷湖州、 三年,升邢 平陽 以不 兩路: 爲順 死。

### 張文謙

那州 治,洗滌蠹敝,革去貪暴,流亡復歸,不期月,戶增十倍。 法, 府,文謙與東忠言于世祖曰:「今民生困弊,莫邢爲甚。 要 自文謙發之。 衝 則天下均受賜矣。」於是乃選近侍脫兀脫、尚書劉肅、侍郎李簡往。 分地, ,初分二千戶爲 張文謙,字仲謙,邢州沙河人。 秉忠薦文謙 勳臣食邑,歲遣人監領,皆不知撫治, 可 用。 歲丁未,召見,應對 幼聰敏,善記誦,與太保劉秉忠同學。 稱旨, 盍擇人往治之,責其成效,使四 命掌 由是世祖盆 徵求百出,民弗堪 王 府 書記, 重儒士,任之以 三人至邢, 日 見信任。 世祖 命。 居潛邸, 或 協 訴 那州 政, 於王 方取 心 當 爲

歲辛亥, 憲宗 卽 位。 文謙與秉忠數以時務所當先者言於世祖, 悉施行之。 世祖 征大

分命諸將毋妄殺,毋焚人室廬,所獲生口悉縱之。 言:「王者之師,有征無戰,當一視同仁,不可嗜殺。」世祖曰:「期與卿等守此言。」旣入宋境, 高祥爾,非民之罪,請宥之。」由是大理之民賴以全活。己未,世祖帥師伐宋,文謙與秉忠 理,國主高祥拒命,殺信使遁去。世祖怒,將屠其城。文謙與秉忠、姚樞諫曰:「殺使拒命者

損,何以供給。」文謙曰:「百姓足,君孰與不足!俟時和歲豐,取之未晚也。」於是蠲常賦什 况當大旱,不量減稅賦,何以慰來蘇之望。」」文統曰:「上新卽位,國家經費止仰稅賦,苟復減 之四,商酒稅什之二。 否,積不能平,文謙遽求出,詔以本官行大名等路宣撫司事。 明 利病,以安國便民爲務。詔令一出,天下有太平之望。而文統素忌克,謨謀之際屢相可 |中統元年,|世祖卽位,立中書省,首命|王文統爲平章政事,文謙爲左丞。 臨發,語文統曰:「民困日久, 建立綱紀,講

阿合馬領左右部,總司財用,欲專奏請,不關白中書,詔廷臣議之,文謙曰:「分制財用,古有 是理,中書不預,無是理也。 二年春,來朝,復留居政府。始立左右部,講行庶務,鉅細畢舉,文謙之力爲多。三年, 若中書弗問,天子將親蒞之乎。」帝曰:「仲謙言是也。」

士陷於俘虜者五六人,理而出之,使習吏事,旬月間簿書有品式,子弟亦知讀書,俗爲一變。 至元元年,詔文謙以中書左丞行省西夏中興等路。 羌俗素鄙野,事無統紀,文謙得蜀

首惡 州妖 爲 斷 人胡王 足矣。」韶卽 三年,還朝。 奴之未占籍者,歸之勢家可也,其餘良民無爲 感衆,事覺,逮捕百餘人。 命文謙 諸勢家言有戶數千,當役屬爲私奴者,議久不決。 往決其獄,惟三人坐棄市 丞相安童以文謙言奏曰:「 ,餘皆釋之。 奴之理。 議遂定, 愚民. 無知,為 文謙謂以乙未歲戶帳 守以 爲法。 所誑 五年,淄 誘,誅其

文謙 帝 位,年六十八。三 曆 靈 默 ,乃授文謙昭文館大學士,領太史院,以總其事。 前 請立 高 奏復其舊。 極 七 論 年,拜大司 其價以配民,創立行 罷之。 國子學。 十三年,遷御史中丞。 然自知 · 農卿,奏立諸道勸農司,巡行勸課,請開籍田,行祭先農先蠶等禮。 詔以 許衡爲國子祭酒,選貴冑子弟敎育之。 爲姦臣 ;戶部 上所 忌, 於 東平、大名以造鈔、及諸路轉運司、干政害民、文謙悉於 力求去。 阿合馬慮憲臺發其姦,乃奏罷諸道按察司以揻之, 會世祖以大明曆歲久寖差, 十九年,拜樞密副使。歲餘,以疾薨于 時阿合馬議 拘民 命許衡等造新 間鐵,官鑄 復 與

薦 前 ,莫非堯、舜仁義之道。 人材為己任,時論益 文謙蚤從劉秉忠,洞究術數,晚交許衡,尤粹於義理之學。爲人剛明簡重,凡所陳於上 以是多之。 數件權倖,而是非得喪,一不以經意。 累贈推誠同德佐運功臣、太師、開府儀同三司、 家惟藏書數萬卷。 上柱國 尤以引

列

追封魏國公、諡忠宣。

長子晏,仕至御史中丞,贈陝西行省平章政事,封魏國公,諡文靖。

#### 郝經

無不通。往來燕、趙間,元裕每語之曰:「子貌類汝祖,才器非常,勉之。」 米爲養,暮則讀書。居五年,爲守帥張柔、賈輔所知,延爲上客。二家藏書皆萬卷,經博覽 以蜜和寒葅汁,決母齒飲之,卽蘇。時經九歲,人皆異之。」金亡,徙順天。家貧,晝則負薪 父思溫辟地河南之魯山。河南亂,居民匿審中,亂兵以火熏灼之,民多死,經母許亦死。 郝經字伯常,其先路州人,徙澤州之陵川,家世業儒。祖天挺, 元裕嘗從之學。金末,

動,宋不足圖也。」世祖以經儒生,愕然曰:「汝與張拔都議邪。」經對曰:「經少舘張柔家,嘗 德布惠,敦族簡賢,綏懷遠人,控制諸道,結盟飭備,以待西師,上應天心,下繫人望,順時而 亡之釁,我乃空國而出,諸侯窺伺於內,小民凋弊於外。經見其危,未見其利也。 王府。是時,連兵於宋,憲宗入蜀,命世祖總統東師,經從至濮。會有得宋國奏議以獻,其 言謹邊防,守衝要,凡七道,遂下諸將議,經曰:「古之一天下者, 以德不以力。 彼今未有敗 憲宗二年,世祖以皇弟開邸金蓮川,召經,諮以經國安民之道,條上數十事,大悅,遂留 王不 如修

列傳第四十四 郝經

等路 公 聞 同 其 受 宣 論 命 一撫使 議。 南 征, 經經 此則經臆 爲副,將歸德 不聞受命還汴也。」惟中 說耳,柔不知也。」 軍,先至江上,宣布恩 怒, 進七道議七千餘言。 弗聽 信,納降附。 經率麾下揚旌 乃以楊惟中爲江淮 惟中欲私還汴、經 一而南 惟中懼 謝, 荆湖南 日 乃與經 我與 北

經聞憲宗在蜀,師久無功,進東師議,其略曰:

俱

行

往 禍 所 踰 者 下十八, 向 二十年。 無 不 經 失 不 聞 摧 而 圖 破。 來者得遂,是尤難也。 天下之事 盡元魏、金源 何囊 滅金源,并西夏、蹂荆、襄,克成都,平大理, 時掇取之易,而今日圖 於未然則易,救天下之事 故 地而 加 國家 多,廓然莫與侔 以 惟之難 一旅之衆 於已然則難。 也? 大也。 一奮起朔 惟宋不下,未能混一,連兵構 漠,斡斗極 蹦轢諸 已然之中復有未 夷 ′`,奄征 以 圖 天下,馬首 四 然者,使 海, 有

是以 以 者,是以其 術 其術得成,而卒能混 則 夫 取 不可急,急則僥倖而難成。 天下,有可以力并,有可 力不 弊, 而 卒能保大定功。 \_\_\_` 0 或久或近,要之成 以術圖。 故自漢、唐以 晉之取吳, 隋之取陳, 皆經營比依十有餘 幷之以力則不可久, 久則 來,樹立攻取,或五 功各當其可,不妄爲 六年, 未有踰 頓弊而不振,圖之 而 已。 年, 十年 

或 家 建 極開 (統垂五十年,而一之以兵,遺黎殘姓,游氣驚魂,虔劉劘盪,殆欲殲盡。

東 是 輕 足用 井 其 擐 Ĺ 兵捷 師 īm 井 術 古 甲 未 正 胄 不 用 ,屯農以 不不 則 出 一天伐。 兵未 出 未 ,跋履山 撓 了, 大王 一乃於 : ; 批亢 盡 不紊,任老 也。 有 足食,內治旣舉,外禦亦備。 自東 如是之久且多也,其力安得不弊乎! 間 仁明,則猶有未然者,可不 、抵脅,以爲奇兵。 川 苟於 . 歲遽爲大舉,上下震動,兵連禍結,底安于危,是已然而莫可 海 成 諸 國 至于襄、鄧 爲 大舉,以之伐宋 國旣平之後,息 輔 相,起英特爲將 重 帥臣 兵數 得 師撫民,致治成化,創法立制,敷 而 道,聯幟接武, 人,師出以律,高拱九重之內,而海 議平 如 温 其不服,姑以文誥,拒而 帥,選賢能爲任使,鳩智 混 \_\_\_\_ 且括兵率赋, 以志則 以爲正兵。 殺,以 力則 朝下令而 自漢 計 不從,而 强,以 爲 布條綱, 機衡 中至于大理, 夕出! 土 外 後伺 . 有 止 一平賦以 則 師,躬 一者也。 截矣。 大,而 隙觀

去,似無意於 入石泉、威、茂以取蜀,為示遠之謀,自臨洮、 長 約 軍 於用奇也。 把 日 方萬 稍 或 獵 家用兵,一以國俗爲制,而 里不 取之若禽獸然。 、取者。 一式,得兵家之詭道,而長於用奇。 旣 而 爲斡腹之舉,由金、房繞出 旣破回鶻,滅西夏,乃下兵關陝以敗金師,然後 聚如丘 不師古。 山,散如 不計 風 吐番穿徹西南以平大理。 · 潼關之背以攻汴,爲擣虛 雨,迅如雷電,捷如鷹鶻,鞭弭 自澮 師之衆寡,地之險易, 河之戰,乘勝下燕、雲, 知所 敵之强弱,必合 一之計,自 皆用奇也。 以深 所屬,指期 遂遺兵而 取之, 西和 是 徑 夫

攻其 鐘 親 而 出 竭 掩 無備,出其不意,而後可以用奇。 其耳、囓其臍而磁 天 下 ·, 倒 四海,騰 其目, 擲字宙,軒 如是 用奇乎? 豁 豈有連百萬之衆,首尾萬餘里,六飛 天 地 大極 是執千金之璧而 於遐徼之土, 投瓦石 細 窮 於 也。 委巷 之民, 雷 動, 撞 乘興 其

險以 驟 勇同 鋒 所 〔力,冒 新 勝。 計 制 銳 强弩之末不能射魯縞 其 1無限 奇則 今限 初 不能行 民物稠夥,擁 以奇 易。 之〕險,至 以大山深谷 勝也關隨 與無計! 況 於客主勢懸, 而 雖有奇謀 同。 擠之,那 江淮 者也。 泰山 之北,平原曠 心秘略, 邑自潰,而吾長於攻, 蘊蓄 壓 卵之勢, 情露, 無所用之。 河海濯 無虜掠以爲資,無俘獲 野之多, 蒸之舉, 擁遏 力 無所用與無力同, 而吾長 故所擊無不 於騎, 頓 滯, 破。 故所向 以 備 盤 奇 勇無所 是以 役, 桓而 則 不 難 以 ·能禦。 用 不 施 彼 其奇 有 ·得進, 與不 之 限之 因 兵

m

鬭 以 弁 , 猝入于巖阻, 見之者辟易 命,我 **今之計**, 必其 取、無出 則宜 救已然之失,防未然之變而已。 以 自悔,兵連 不暇,又焉 禍 結 能 以 何時 理 相 m 喻 트 使之逡巡 匹 師 旣構,猝不 自退。 一可解, 彼 知 其 如兩虎相 竭 國

質。 彼 殿 必 下 宜遣 受命,姑爲之和,偃兵息民,以全吾力,而 人禀 命 於行 在 所,大軍 ·壓境,造使 喩宋,示 圖 [後舉, 天地 以 大信, 人神之福 令降 名進幣, 也。 割 禀命不 地納

使聞 徒 伯 肄 入 攻 殺 假 從 內外備禦 以疲 《便利之地爲久駐之基,示必 (``彼恃城壁以不戰老吾, 吾合長圍以不 者,使沿 ·,使吾府大官元臣分師總統, 軍,爲 非 西師 门 殿 望重臣爲之撫育,總押近裏故屯,爲鎭守之卒。 好攻戰關土 下之義盡,而 多方以 以爲奇而 帳下之卒, 無 :邊進築,與敵郡邑犬牙相制,爲屯戍之卒。 有缺綻, 誤,以弊其力。 用 地, 後進吾師,重愼詳審,不爲躁輕飄忽, 吾 舉老成 則制 正。 不得已 節以 此 知兵者俾爲將 師南轅,先示恩信,申其 而 進。 取之勢。 爲戰攻之卒。 用兵之意。 旣入其境,敦陳固列, 毋焚廬舍,毋傷人民,開其生路,以攜其 攻困 師,更直宿衞,以備不虞。 誠意昭著,恩信流行 彼,吾用 其新入部曲曹不知兵, 使掣肘之計 文移、喻以禍 吾之所長,彼不能用 推擇單弱,究竟逃匿,編葺部 爲前定之謀,而一 緩爲之行。 不行,妄意之徒屛息, 然後閱實精 福,使知殿 其餘 雖名爲兵其實役 彼善於守而 師 其長。 之以正 衆 下 勇, ,各畀侯 心,亟 | 而不 吾不 別 選 伍 爲 出

恃其巖阻, 締構,各具 孤 城,示不足取。 兵勢旣振,蘊蓄旣見,則 舟楫,聲言徑渡。 兵皆柔脆,用兵以來未嘗一戰,焉能當我百戰之銳。 即進大兵,直抵 彼 以輕兵掠 必震疊, 于 江、沿江 兩淮、杜其樵採而遏其糧路,使血脈斷絕, 自 起 上下 變故。 列 屯萬 蓋彼之精銳盡 竈,號令明 在 肅 處崩壞,則望風皆 兩淮 部 曲 江 嚴整,首尾 面 開越 各守

潰 相 肱 髀不續,外內限絕,勇者不能用而怯者不能敵, 必 我 乘。 是兵家 所謂避堅攻瑕 ,避實擊虛 者 也。 背者不能返而面者不能禦, 水陸

爲

門不 合為 鳥 荆 淮之腹心,抉長江之襟要也。 銳 以 自 門,揚子江面,密彼京畿,必皆備禦堅厚,若遽攻擊,則必老師費財。 拾湖濼,奪 兵 1失之。 江 江、采石 輕兵(級)[掇]襄陽,(於) 氣 襄則 吸海 守,大勢順流,即幷兵大出,摧拉荆、郢,橫潰湘、潭,以成掎角。一軍出 裏陽,輕兵捷出,穿徹均、房,遠叩歸、峽,以應西師。 幷 長圍,示以必取。 如 欲 取 可 存養兵力,漸次 :`,並著威信,遲以月時,以觀其變。 是所謂圖緩持久之勢也。 今當從彼所保以爲吾攻,命一軍出襄、 荆 以保淮甸,有淮甸則 ·廣布戍邏,偵江渡之險易,測備禦之疏密,徐爲之謀,而後進師。 取關 Щ 险,據濡須 ,駕淮爲梁,以通 而 絕其糧路,重兵皆趨漢陽,出其不意,以伺江隙。 以輕兵出通、泰,直塞海門、瓜步、金山、柴墟 以進,以圖 ()塞皖口,南入舒、和,西及於蘄、黃,徜徉恣肆, 一軍出維揚,連楚蟠亘,蹈跨長淮,鄰我 可以保江南」。 南北。 萬 .全,則 輕兵抄壽春,而重兵支布於鍾離、合 先荆後 先是,我嘗有荆 鄧,直渡漢水,造 淮,先淮後江。彼之素論,謂「有 如交、廣、施、黔選鋒透出,變 (襄,有 舟爲梁, 當以重 强對。 淮甸 河口,游騎 三道並出 ,有上 不然, 兵臨 以覘江口 壽春,乘其 淝之間,掇 水 通、泰、海 所謂潰 陸 維揚, 一濟師。 上下, 流、皆 則重 兩 0

失一日或可救也。 連衡 了<br />
殿下或處一軍,<br />
為之節制,使我兵力常有餘裕,如是則未來之變或可弭,

者,崛起無賴之人也。 況彼渡江立國,百有餘年,紀綱修明,風俗完厚,君臣輯睦,內無禍釁,東西南北輪 衆,而能克國者,或者有之,僥幸之舉也。豈有堂堂大國,師徒百萬,而爲僥幸之舉乎? 而後舉楚。 「非六十萬不可。」秦王曰:「將軍老矣。」命|李信將二十萬往,不克,卒畀|翦以兵六十萬 不可謂弱。 里,亦未可小。 矣。晉取吳,則六道進,隋取陳,則九道進,宋之於南唐,則三面皆進。 與爭地之術異,併力一向,爭地之術也,諸道並進,取國之術也。 昔之混一者,皆若是 議者必曰、三道並進、則兵分勢弱、不若併力一向,則莫我當也。 世 可 蓋衆有所必用,事勢有不可懸料而倖取者。 自敗盟以來,無日不討軍實而申警之,彷徨百折,當我强對,未嘗大敗, '蔑視, 謂秦無人,直欲一軍倖而取勝乎? 故王者之舉必萬全,其倖舉 秦王問王翦以伐荆,翦曰: 曾不知取 未聞 以一旅之 國之術

敵 迅,銳而圖 人所乘,悔可及乎! 嗚呼 '! 西師之出,已及瓜戍,而猶未卽功。 功,一舉而下金陵、舉臨安則 . 固宜重愼詳審, 圖之以術。 可也。 如兵力耗弊,役成遷延,進退不可,反為 國家全盛之力在於東左, 若亦直 若前所陳,以全吾力,是所謂坐勝 前 振

列 傳 第 四 + 四 郝 響

國 也。 叉措置 內空虛,易爲搖蕩。 雖然,猶 一失宜,無以挫英雄之氣,服天下之心,則稔惡懷姦之流,得以窺其隙 有可憂者。 臣愚所以諄諄於東師,反覆致論,謂不在於已然而在於未然者, 國家掇取諸國,飄忽凌厲,本以力勝。 今乃無故 而爲 而 投 大舉,若 其

遂 會兵渡江, 圍鄂州, 聞憲宗崩, 召諸將屬議, 經復進議曰:

此

也。

矣。 剛毅,足以有斷。進退存亡之正,知之久矣。嚮在沙陀,命經 自出師以來,進而不退,經有所未解者,故言于眞定,于曹、濮,于唐、鄧。 字最當整理。」又曰:「可行之時,爾自知之。」大哉王言,「時乘六龍」之道,知之久 易言:「知進退存亡而不失其正者,其惟聖人乎」殿下聰明睿知,足以有 曰:「時未可也。」又曰:「時 臨 亟言不 發强

已,未賜開允。 乃今事急,故復進狂言。

哥罕立,政當安靜以圖寧謐,忽無故大舉,進而 當復進 定大事,不當復進也而遽進。 以爲有 國家自平金以來, 也而 命不敢自逸,至于汝南,旣聞凶計,卽當遣使徧告諸帥各以次退,修好于宋, 又進。 旣不宜渡淮,又豈宜渡江。旣不宜妄進,又豈宜攻城。若以機不可 惟務進取, 以有師期,會于江濱,遣使喻宋,息兵安民,振旅 不遵養時晦,老師費財,卒無成功,三十年矣。 不退,界王東師,則不當亦進也而遽進。 而

春之交,疫必大作,恐欲還不能。 渡,城不當攻而攻,當速退而不退,當速進而不進,役成遷延,盤桓江渚,情見勢屈,舉 天下兵力不能取一城,則我竭彼盈,又何俟乎。且諸軍疾疫已十四五,又延引月日,冬 耳,則宋亦 可縱,亦旣渡江,不能中止,便當乘虛取鄂,分兵四出,直造臨安, 可圖。 如其不可,知難而退,不失爲金兀朮也。 師不當進而進,江不當渡 疾雷不及掩 而

遏也, 破 則突入江、浙,擣其心腹。 西之兵盡集隆興,嶺廣之兵盡集長沙,閩、越沿海巨舶大艦以次而至,伺隙 無韓世忠之儔。且鄂與漢陽分據大別,中挾巨浸,號爲活城,肉薄骨幷而拔之,則彼委 截於江、黃津渡,邀遮于大城關口,塞漢東之石門,限郢、復之湖濼,則我將安歸? 壁狐 彼旣上流無虞,呂文德已幷兵拒守,知我國班,闕氣自倍,兩淮之兵盡集白鷺,江 城而去,泝流而上,則入洞庭,保荆、襄,順流而下,則精兵健櫓突過滸、黃,未易 則亦徒費人命, 我安所得哉!區區一城, 聞臨安、海門已具龍舟,則已徒往,還抵金山,幷命求出,豈 勝之不武, 不勝則大損威望, 而 進,如遏 復何 無已

人民,不易其衣冠,不毁其墳墓,三百里外不使侵掠。 雖然,以王本心,不欲渡江,旣渡江,不欲攻城,旣攻城,不欲幷命,不焚廬舍,不傷 或勸徑趨臨安, 日其民人稠夥,

置,汝十萬衆不能勝,殺人數月不能拔,汝輩之罪也,豈士人之罪乎!益禁殺人。 若往,雖不殺戮,亦被踐蹂,吾所不忍。 竟不往。 諸將歸罪士人,謂不可用,以不殺人故不得城。 若天與我,不必殺人,若天弗與,殺人何益, 曰彼守城者祇一士人賈制 歸然 而

一仁,上通于天,久有歸志,不能遂行耳。然今事急,不可不斷也。

省肱髀相依,在於背脅,西域諸胡窺覘關隴,隔絕旭烈大王,病民諸姦各持兩端,觀望 受遺詔,便正位號,下詔中原,行赦江上,欲歸得乎? 行皇帝事矣。雖大王素有人望,且握重兵,獨不見金世宗、海陵之事乎!若彼果決,稱 矣。且阿里不哥已行赦令,令脫里赤爲斷事官、行尚書省,據燕都,按圖籍,號令諸道, 所立,莫不覬覦神器,染指垂涎。一有狡焉,或啓戎心,先人舉事,腹背受敵,大事去 宋人方懼大敵,自救之師雖則畢集,未暇謀我。第吾國內空虛,塔察國王與李行

騎歸,渡淮乘驛,直造燕都,則從天而下,彼之姦謀僭志,冰釋瓦解。 靈輿,收皇帝璽。 先命勁兵把截江面,與宋議和,許割淮南、漢上、梓夔兩路,定疆界歲幣。 昨奉命與張仲一觀新月城,自西南隅[抵東北隅]、[4] 萬人敵,上可並行大車,排 遣使召旭烈、阿里不哥、摩哥及諸王駙馬,會喪和林。 歸耳。斷然班師,亟定大計,銷禍 遣 一軍逆蒙哥罕 差官於汴京、 置輜重,以輕 於未然。

京兆 成都 、西涼、東平 ·、西京、北京,撫慰安輯,召真金太子鎮燕都,示以形勢。 則大寶

有歸,而社稷安矣。

會宋守帥賈似道亦遣間使請和,迺班師。

仍敕沿邊諸將毋鈔掠。 明年 一世祖 即位,以經爲翰林侍讀學士,佩金虎符,充國信使使宋,告卽位,且定和議 經入辭,賜蒲萄酒,詔曰:「朕初卽位,庶事草創,卿當遠行,

待之,我觀宋祚將不久矣。」居七年,從者怒鬭,死者數人, 相伯顏奉詔南伐,帝遣禮部尚書中都海牙及經弟行樞密院都事郝庸入朱,問執行人之罪, 不進,我之罪也。 鑰戶,晝夜守邏,欲以動經,經不屈。 徒,款兵誤國。」又數上書宋主及宰執,極陳戰和利害,且請入見及歸國,皆不報。 爲功,恐經至謀泄,竟館經眞州。 南,壇以書止經,經以壇書聞于朝而行。 議高翻請入國日期,不報。 朕者, 亟以聞。」經奏便宜十六事, 皆立政大要, 鮮多不 時經有重名,平章王文統忌之。 入宋境,死生進退,聽其在彼,我終不 遺書宰相及潍帥李庭芝,庭芝復書果疑經,而賈似道方以却敵 經乃上表宋主曰:「願附魯連之義,排難解紛,豈知唐儉之 旣行,文統陰屬李壇潛師侵宋, 經待下素嚴, 宋敗壇軍于 又久覊困,下多怨者。 淮安,經至宿州,遣副使劉仁傑、〇〇多 載。 經獨 ·能屈· 與六人處別館。 身辱命。 欲假手害經。 汝等不幸,宜忍以 經諭 曰:「嚮受命 叉九 驛吏棘 經至濟 年,丞 垣

卒,年五十三,官爲護喪還葬,諡文忠。 宋 醫近侍迎勞,所過父老瞻望流涕 懼,遺總管段佑以禮送經 歸。 賈似道之謀旣泄,尋亦竄死。 明年夏,至闕,錫燕 明年,宋平。 大庭,咨以政事,賞賚有差。 經歸 道 病,帝敕樞密院及尙 秋

書。」後題曰:「至元五年九月一 池,得緊帛,書詩云:「霜落風高恣所如,歸期回首是春初。 拘床十六年,從者皆通於學。 原古錄、通鑑書法、玉衡貞觀等書及文集,凡數百卷。 經爲 人尙氣節,爲學務有用。及被留,思託言垂後,撰續後漢書、易春秋外傳、太極演、 書佐苟宗道,後官至國 日放 雁 ,獲者勿殺,國信大使郝經書于眞州忠勇軍營新舘。」 子祭酒。 其文豐蔚豪宕, 上林天子援弓繳,窮 經還之歲, 善議論 沙中 民射 海纍臣 詩 多奇崛。 雁 金明 有帛

家 **郑**知林州 一弟彝、庸,皆有名。 至 山南 江北道肅政 蘇字仲常,隱居以壽終,庸字季常,終潁州守。 廉訪使。 子采麟, 亦賢,

起

其忠誠

如

此。

### 校勘記

[1] 〔秉恕〕 據本書原目錄補。

列

傳

第

四

+

四

校

勘

記

參(預) [領] 中 書 省 據元名臣事略卷七太保劉文正公改。 按藏春集卷六收張文謙劉秉中行

狀、徒單公履劉秉中墓誌等「預」皆作「領」。

薨于位年六十八 按元名臣事略卷七左丞張忠宣公作「薨,年六十七」,元文類卷五八李謙張

文謙神道碑作「享年六十有七」。 新元史改「八」爲「七」,疑是。

/^\ Z 晉之取吳隋之取陳皆經營比依十有餘年 陵川集卷三二東師議作「晉之取吳,隋之取陳,宋之

取唐、皆經營比依十有餘年」。按漢下文有「晉取吳、則六道進,隋取陳、則九道進,宋之於南唐、

則三面皆進」,此處當有「宋之取南唐」,方得呼應,疑脫。

ハ五し 以有限之[力冒無限之]險 道光本與陵川集卷三二東師議合、從補。

へなし 以輕兵(級)[掇]襄陽 據陵川集卷三二東師議改。

自西南隅(抵東北隅) 道光本與陵川集卷三二班師議合、從補。

劉仁傑 按本書卷四、五、八世祖紀中統元年四月丁未、中統三年十月庚申、至元十二年二月庚

午條作「劉人傑」。蒙史改「仁」爲「人」,疑是。

# **兀史卷一百五十八**

## 列傳第四十五

姚樞

象,刊諸經,惠學者,讀書鳴琴,若將終身。時許衡在魏,至輝,就錄程、朱所註書以歸,謂其 徒曰:「爨所授受皆非、今始聞進學之序。」既而盡室依樞以居。 長,分及之。樞一切拒絕,因棄官去。攜家來輝州,作家廟,別爲室奉孔子及宋儒周惇頤等 得程頤、朱熹之書。辛丑,賜金符,爲燕京行臺郎中。時牙魯瓦赤行臺,惟事貨賂,以樞幕 之,樞力辨非詔書意,他日何以復命,乃蹙數人逃入篁竹中脫死。拔德安,得名儒趙復,始 觀太宗。歲乙未,南伐,詔樞從惟中即軍中求儒、道、釋、醫、卜者。 姚樞字公茂,柳城人,後遷洛陽。少力學,內翰宋九嘉識其有王佐略,楊惟中乃與之偕 會破棗陽,主將將盡坑

进 l祖在潛邸,遣趙璧召樞至,大喜,待以客禮。 詢及治道,乃爲書數千言,首陳二帝三 91 傳 第 四 + 五 姚 樞

賦之阜,有 富溢、 兵權,供億之需取之有司,則勢順理安。」世祖曰:「慮所不及者。」乃以聞,憲宗從之。 遺 貸之家。 不婾 驛傳 各疏(弛)[施]張之方,曰其下本末兼該,細大不遺。世祖奇其才,動必召問,且使授世子經。 顯連無告者有養。 而冤 法律,審刑 辟才行,舉逸遺,慎銓選,汰職員,則不專世爵而人才出。 入止 一之道,以治國平天下之大經,彙爲八目,曰:修身,力學,尊賢,親親,畏天,愛民, 憲宗 於文華。 一則州郡 ,動耕織者日就饑寒。 抑有伸。 次及救時之弊,爲條三十,曰:「立省部,則庶政出一,綱舉紀張,令不行於朝而變於夕。 即位 廣儲蓄、復常平以待凶荒,立平準以權 加 問曰:「頃者諸臣 獄,則收生殺之權于朝,諸侯不得而專,丘山之罪不致苟免,毫髮之過免罹極 漢 不困於需索。修學校,崇經術,旌節孝,以爲育人才、厚風俗、美敎化之基,使士 重農桑,寬賦稅,省徭役,禁游惰,則民力紓,不趨於浮僞,且免習工技者歲加 一,韶凡 設監司,明黜陟,則善良姦窳可得而 地 者乎? 布屯田以實邊成,通漕運以廩京都。倚債負,則賈胡不得以子爲母,破稱 軍民在赤老溫山南者,聽世祖總之。 軍民吾盡有之,天子 .皆賀,汝獨默然,何耶。」對曰:「今天下土地之廣,人民之殷,財 肅軍政,使田里不知行營[往復]之擾攘。[1] ,何爲? :物估,卻利便以塞倖塗,杜告訐以絕訟源。」 舉刺。 異時廷臣間之,必 世祖旣奉詔,宴羣下,罷 閣徵斂,則部族不橫於誅求。 班俸祿,則贓穢塞而公道開。 復悔而 周匱乏,恤鰥寡,使 見奪,不若惟持 好善, 酒 將 樞叉 簡

請置 中 自 屯 擇 其 田 經略 0 司於汴以圖宋,置都運司于衞,轉粟于河。 樞 曰:「南京 河 徙無常 力土薄水 淺,爲鹵生之,不若關中厥田 憲宗大封同姓,敕世祖於南京、 上上,古名天府陸 關

海。一

於是

世

祖

願

有關

中。

賀 止 त्ते 日 殺之令,分號街 不 易 壬子 肆 聖人之心,仁明如 夏,從 事。 明 世 日, 祖征 陌,由是民得相完保。 世祖據鞍呼曰:「汝昨夕言曹彬不殺 大理,至曲先腦兒之地。 此,生民之幸,有國之福 夜宴,樞陳宋太祖遣曹彬取南唐不 也。 明年,師及大理城,飭樞裂帛 者,吾能 爲 之,吾能爲之!樞馬上 殺一人、 爲旗,書

莫若 悉誅 此 條 推 因罷鈎考局。 之。 集經· 盡 丙 辰 世 一略宣: 樞 祖 ·妃主自歸朝廷,爲久居謀,疑將自釋。」及世祖見憲宗,皆泣下,竟不令有所白而 入見。 聞之不樂。 一撫官吏,下及征商無遺,曰:「俟終局日,入此罪者惟劉黑馬、 或讒 王府 樞曰:「帝,君也,兄也,大王爲皇弟,臣也。 得 中土心,憲宗遣阿藍答兒大爲鈎考,置局關中,以百四十二 事難 與較,遠將受禍。 史天澤 以 聞,餘

中書, 均 赋 (役)罷鐵官。二年,○三拜太子太師。 事見許衡傳。 即位,立十道宣撫使,以樞使東平。 改大司農。 樞奏曰:「在太宗世,詔孔子五十一代孫元措仍襲封衍聖 樞曰:「皇太子未立,安可先有太師。」以 旣至郡,置勸農、檢察二人以監之,推物力以 所受制 還

世

祖

列

公,卒, 守臣。 隱。」及修條格成,與丞相史天澤奏之,帝深嘉納。 故實,宜令提舉禮樂,使不致崩壞。」皆從之。 顧、孟三族諸孫俊秀者教之,乞眞授庸教官,以成國家育材待聘風動四方之美。 辭避台司,朕甚嘉焉。 曲阜有太常雅樂,憲宗命東平守臣輦其歌工舞郎與樂色俎豆至日月山, 員闕充補,無輟肄習。 其子 )與族 人爭求襲爵、訟之潛藩、帝時曰:『第往力學、俟有成德達才、我則官之。』又 省中庶務,須賴一二老成同 且陛下閔聖賢之後詩、書不通,與凡庶等,旣命洛士楊庸選孔、 詔赴中書議事,及講定條格,且勉諭 心圖贊,其與尚書劉肅往盡乃心,其尚無 帝親 臨 觀,飭東平 曰:姚樞 王鏞 練習

樞曰:此 侯應援,此成擒耳。」帝曰:「今賊將安出。」對曰:「出下策。」初,帝嘗論天下人材,及王文統, 心,爲上策。 李 壇謀叛,帝問:「卿料何如。」對曰:「使壇乘吾北征之釁,瀕海擣燕,閉關居庸,惶駭人 人學術不 與宋連和 ·純,以游說干諸侯,他日必反。」至是,文統果因壇伏誅 ,負固持久,數擾邊,使吾罷於奔救,爲中策。 如出兵濟南,待山東諸

四 年, 拜 中書左丞,奏罷世侯,置牧守。 或言中書政事大壞,帝怒,大臣罪且不測者。

樞上言:

自 昔 在潛,聽聖典,訪老成,日講治道。 太祖 開創,跨越前古,施治未遑。 自後數朝,官盛刑濫,民困 如邢州、河南、陝西、皆不治之甚者、爲置安撫、 財殫。陛下 天資仁聖,

列傳第四十五 紫樞

官吏遷轉,政事更新,皆陛下克保祖宗之基、信用先王之法所致。 經略、宣撫三使司。 叛繼繼不絕,然能使官離債負,民安賦役,府庫粗實,倉廩粗完,鈔法粗行,國用粗足, 開聖人,續承大統,即用歷代遺制,內立省部,外設監司,自中統至今五六年間,外侮內 及三年,號稱大治。 其法,選人以居職,頒俸以養廉,去污濫以清政,勸農桑以富民。不 諸路之民望陛下之拯己,如赤子之求母。先帝陟遐,國難並興,天

朝廷政令日改月異,如木始栽而復移,屋旣架而復毀。遠近臣民不勝戰懼,惟恐大本 當 可以光先烈,成帝德,遺子孫,流遠譽。以陛下才略,行此有餘。邇者伏聞聰聽日煩, 廢,遠業難成,爲陛下之後憂,國家之重害。 國,開經筵以格心,修邊備以防虞,蓄糧餉以待歉,立學校以育才,勸農桑以厚生。是 今創始治道,正宜上答天心,**下結民心**,睦親族以固本,建儲副以重祚,定大臣以

帝怒爲釋。

非右丞相安童、 自夏徂秋, 兵不踰 十年,回拜昭文館大學士,詳定禮儀事。其年,襄陽下,逐議取宋。樞奏如求大將, 時,西起蜀川, 城不降,皆由軍官不思國之大計,不體陛下之深仁,利財剽殺所致。揚州、 知樞密院伯顏不可。十一年,至 樞言:「陛下降不殺人之詔。伯顏濟江, 東薄海隅,降城三十,戶踰百萬,自古平南,未有如此之神捷者。今

旨。 恩信必行,聖慮不勞,軍力不費矣。」又請禁宋鞭背、黥面及諸濫刑。 生惡 山 十七年,卒,年七十八,諡曰文獻 淮安 死,人之常情,蓋不敢也,惟懼 人殊 死戰,我雖克勝,所傷亦多。 吾招徠止殺之信不堅耳。 宋之不能爲 國審 宜申止殺之詔, 使賞罰必立, 矣, 十三年,拜翰林學士承 而臨安未肯輕下,

見言色。 樞 天質含弘 有來卽謀,必反復告之。 而仁恕,恭敏而儉勤,未嘗疑人欺己。 有負其德,亦不留怨。 憂患之來,不

子牌,仕爲平章政事;從子燧,官至翰林學士承旨,以文章大家知名,卒諡曰文。

#### 許衡

始得易王輔嗣說。 然遭世 大過人者,吾非其師也。」遂辭去,父母强之不能止。 已乎。」師大奇之。 幼有 許衡字仲平, 亂,且貧無書。嘗從日者家見書疏 異質,七歲入學,授章句,問其 懷之河內人也,世爲農。 時兵亂中,衡夜思畫誦, 每授書,又能問其旨義。 師日 義,因請寓宿,手抄歸。旣逃難(岨崍)〔徂 身體而力踐之,言動必揆諸義而後發。 久之, :「讀書何 父通,避地河南,以泰和九年九月生衡於新鄭 師謂其父母曰:「兒穎悟不凡, 如是者凡更三師。 爲。」師曰:「取科第耳」 稍長,嗜學 曰:「如 ||徠]|山 他日 如饑渴, 嘗暑中 必有 斯 而

過 河陽,渴甚,道有梨,衆爭取啖之,衡獨危坐樹下自若。或問之,曰:「非其有而取之,不可

也。」人曰:「世亂,此無主。」曰:「梨無主,吾心獨無主乎。」

鄉人,學者寖盛。家貧躬耕,粟熟則食,粟不熟則食糠覈菜茹,處之泰然,謳誦之聲聞戶外 京師,以其雪齊居衡,命守者館之,衡拒不受。庭有果熟爛墮地,童子過之,亦不睨視而去, 不可一日而亡於天下,苟在上者無以任之,則在下之任也。」凡喪祭娶嫁,必徵於禮,以倡其 禮樂、名物、星曆、兵刑、食貨、水利之類,無所不講,而慨然以道爲己任。 嘗語人曰:「綱常 如金石。財有餘,卽以分諸族人及諸生之貧者。人有所遺,一毫弗義弗受也。 姚 其家人化之如此。 樞得伊洛程氏及新安朱氏書,益大有得。尋居蘇門,與樞及竇默相講習。凡經傳、子史、 轉魯留魏,人見其有德,稍稍從之。居三年,聞亂且定,乃還懷。往來河、洛間,從柳城 樞嘗被召入

學。 祖南征,乃還懷,學者攀留之不得,從送之臨潼而 秦人新脫於兵,欲學無師,聞衡來,人人莫不喜幸來學。 甲寅、世祖出王秦中,以姚樞爲勸農使,教民畊植。又思所以化秦人,乃召衡爲京兆提 歸。 郡縣皆建學校,民大化之。 世

言治亂休戚,必以義爲本。文統患之。且實默日於帝前排其學術,疑衝與之爲表裏,乃奏 中統元年,世祖卽皇帝位,召至京師。時王文統以言利進爲平章政事,衡、樞輩 入侍,

謝病歸。 乃相與懷制立殿下,五辭乃免。改命樞大司農,獸翰林侍講學士,衡國子祭酒。未幾,衡亦 文統 太子位東西鄉,師傅坐,太子乃坐。公等度能復此乎。不能,則師道自我廢也。」樞以爲然, 以 不中,欲因東宮以避禍,與樞拜命,將入謝。衡曰:「此不安於義也,姑勿論。禮,師傅與 爲太子太師,默爲太子太傅,衡爲太子太保,陽爲尊用之,實不使數侍上也。 默以屢攻

萬分。孟子以「責難於君謂之恭,陳善閉邪謂之敬」,孔子謂「以道事君,不可則止」。臣 寧懇至,中書大務,容臣盡言。 臣雖昏愚,荷陛下知待如此其厚,敢不罄竭所有,裨益 之所守,大意蓋如此也。伏望陛下寬其不佞,察其至懷,則區區之愚,亦或有小補云。 不才,自甲寅至今十有三年,凡八被詔旨,中懷自念,何以報塞。 至元二年,帝以安童爲右丞相,欲衡輔之,復召至京師,命議事中書省。衡乃上疏曰: 臣性識愚陋,學術荒疏,不意虛名偶塵聖聽。陛下好賢樂善,舍短取長,雖以臣之 又日者面奉德音,叮

堂堂天下,可無一定之說而妄爲之哉。考之前代,北方之有中夏者,必行漢法乃可長 更,未見其可也。 故後魏、遼、金歷年最多,他不能者,皆亂亡相繼,史册具載,昭然可考。使國家而 昔子產相衰周之列國, 孔明治西蜀之一隅, 且有定論, 終身由之, 而

其一曰: 自古立國, 皆有規模。循而行之, 則治功可期。否則心疑目眩, 變易分

不恤流言,則致治之功庶幾可成矣。 心 十二日而 思之,日寒之與暑,固爲不同。 行 國 居朔漠, 堅而 俗, 题 ; 累朝勳舊,一旦驅之下從臣僕之謀,改就亡國之俗,其勢有甚難者。 燕食寒,蜀漢食熱,反之則必有變。 確 則無事論此也。 ·,事易而常,未有不可變者。 寒始盡。 暑之變寒,其勢亦然,是亦積之之驗也。 今日之治,非此奚宜。夫陸行宜車,水行宜舟,反之則不能 然寒之變暑也,始於微溫,溫而熱, 此在陛下尊信而堅守之,不雜小人,不責近效, 以是論 之,國家之當行漢法無疑 苟能漸之摩之,待以歲月, 熱而暑, 也。 (切)[竊]嘗 積 然萬世 百有八

已知 之道。」今里巷之談,動以古爲詬戲,不知今日口之所食,身之所衣,皆古人遺法 數者,誠以得其法故也。古人有言曰:「爲高必因丘陵,爲下必因川澤,爲政 益 手之爲也。 首,不以手 達者, 豈天下之大, 國家之重, 而古之成法反可違邪? 其亦弗思甚矣! 夫治人者法也, 哉 其 二曰:中書之務不勝其煩,然其大要在用人、立法二者而已矣。 近而譬之,髮之在 孰爲君子,孰爲小人,而復患得患失,莫敢進退,徒曰知人,而實不能用人,亦何 人莫不飲食也,獨膳夫爲能調五味之和; 莫不睹日月也,獨星官爲能步虧 ,理而 上之用人,何以異此。 以櫛理,食之在器,不以手取而以匕取。 然人之賢否,未知其詳,固不可得而遽用 手雖不能, 而用櫛與匕, 必必 也。 因 而 然或 是卽 食之 不可

守法 者人也。人法相維,上安下順,而宰執優游於廊廟之上,不煩不勞,此所謂省也。

求 俾 任子,版籍之數,續當議之,亦不可緩也。 就敍 漸可息矣。 夫 立 用,則失職之怨少可舒矣。 法用人、今雖未能遽如古昔、然已仕者當給俸以養其廉、未仕者當寬立條格、 再任三任,抑高舉下,則人才爵位略可平矣。至於貴家之世襲,品官之 外設監司以察污濫,內專吏部以定資歷,則非分之

童矣。 處,則他日之難有不可爲者矣。孔子曰:「爲君難,爲臣不易。」爲臣之道,臣已告之安 之地 至難之任,初不可以易心處之也。 而娛之也。 其三曰:民生有欲,無主乃亂,上天眷命,作之君師,此蓋以至難任之,非予之可安 至爲君之難,尤陛下所當專意也。臣請言其切而要者。 是以堯、舜以來,聖帝明王莫不兢兢業業、小心畏愼者,誠知天之所畀 知其爲難而以難處,則難或可爲;不知爲 難而 以易

之臣不過數十百人而止耳,而言猶若此,況天下之大,兆民之衆,事有萬變,日有萬機, 安世行一不妄語,七年而後成。夫安世一士人也,所交者一家之親、一鄉之衆也,同列 之所命而後日自違者,可否異同,紛更變易,紀綱不得布,法度不得立,臣下無所持循, 人君以一身一心而酬酢之,欲言之無失,豈易能哉。故有昔之所言而今日忘之者,今 夫人君不患出言之難,而患踐言之難。知踐言之難,則其出言不容不愼矣。昔劉

不以 身爲 間, 者蓋 畏 當 奸 人矣; 1然,不牽於愛,不蔽於憎,不因於喜,不激於怒,虛心端意,熟思 人因以為弊,天下之人疑惑驚眩,且議其無法無信一至於此也。 則其所務者皆快心事耳。快心則 鮮矣。 難 本,一言一動,熟思而審處之乎?此人君踐言之難,而又難於天下之人也。 處,而 舒肆本爲欲也,欲心盛則不畏天矣。以不畏天之心,與不畏人之心,感 奈何 以易處故 為 人上者多樂舒肆,爲人臣者多事容悅。 也。 苟從大學之道,以修身爲本,凡一言一動,必求其 口欲言而言,身欲動而動,又安肯兢兢業業,以修 容悦本為私 而審處之, 此無他,至難之地 也,私心盛則不 雖 然 有 與 合無 其所 不中

則 操予奪進退賞罰生殺之權,不幸見欺,則以非爲是,以是爲非,其害有不可 不 君 處難 寡之分焉。 而 假 催 能欺 足愛也,而誑譽之使愛,本無可憎也,而强短之使憎。 其 無喜怒也,有喜怒,則贊其喜以市恩,鼓其怒以張勢。 知 一愛以濟私,藉其懀以復怨。甚至本無喜也,誑之使喜,本無怒也,激之使怒,本 之。 之地,御難知之人,欲其不見欺也難矣。 之情僞有易有險,險者難知,易者易知, 然拯一京尹耳,其見欺於人,不過誤 寡則易知,衆則難知,故在上者難於 昔包拯剛嚴峭直,號爲明察,然一 此特係夫人之險易者然也。 一事、害一人而已。人君處億兆之上, 知下,而在下者易於知上,其勢然也。 若是,則進者未必爲君子,退 人君惟無愛憎也, 膀旣也。人 然又有衆 有愛憎, 小吏

得其 者未 舜不能也。 之人耳,好利之人耳,無恥之人耳。彼挾其詐術,千蹊萬徑,以蠱君心,欲防其欺,雖堯、 人君以知人爲貴,以用人爲急。用得其人,則無事於防矣。旣不出此,則所近者爭進 必爲小人,予者未必爲有功,奪者未必爲有罪,以至賞之、罰之、生之、殺之,鮮有 正者。人君不悟其受欺也,而反任之以防天下之欺,欺而至此,尚可防邪。大抵

所以重於進而輕於退者,蓋以此耳。大禹聖人,聞善卽拜,益猶戒之以「任賢勿貳,去 **、舜之安而後已,故其勢恒難合。** 己之過,務快己之心,而不務快民之心,賢者必欲匡而正之,扶而安之,如堯、舜之正、 哉!此特難進者也,而又有難合者焉。人君處崇高之地,大抵樂聞人過,而不樂於聞 之,賣小利,期近效,有用賢之名,無用賢之實,賢者亦豈肯尸位素餐以取譏於 天下 之,將見罪戾之不免,又可望其庶事得其正,而天下被其澤邪! 雖或接之以貌,待之以禮,然而言不見用,賢者不處也。或用其言也,而復使小人參 之,而無所援引,則人君無由知也。 被其澤,其於人國,重固如此也。夫賢者遭時不偶,務自韜晦,世固未易知也。雖或知 夫賢者以公爲心,以愛爲心,不爲利回,不爲勢屈,置之周行,則庶事得其正,天下 況夫奸邪佞倖,醜正而惡直, 人君知之,然召之命之,汎如厮養,賢者有不屑也。 自古及今,端人雅士 肆爲詆毀,多方以陷

邪勿疑」,後世人主宜如何也。此任賢之難也。

之喜怒 故千 明皇洞 之不悟者也 不敢議,近親不敢言,毒被天下而上莫之知,至是而求去之亦已難矣。 蹊萬徑而 奸邪之人,其爲心也險,其用 見其奸而 而迎合之,竊其勢以立己之威,齊其欲以結主之愛,愛隆於上,威擅於下, ,猶有說焉。 人莫能禦。 不能退。 如宇文士及之佞,太宗灼見其情而不能斥,李林甫 邪之惑人,有如此者,可不畏哉 其蹈似恭,其訐似直,其欺似可信,其佞似可近,務以窺 術 也巧。 惟險 也,故千態萬狀而 人莫能知; 惟巧 雖然,此特 **妬賢嫉能** 大臣 人主 人君 也,

禹 君,凡有恩澤於民,而民怨 見矣,及天下已定,而沙中有謀反者,又何邪?竊嘗思之,民之戴君,本於天命,初無不 去者,何邪。漢高帝起布衣,天下影從,滎陽之難,紀信至捐生以赴急,則 滅德,是以失望,漢高以寬仁得天下,及其已定,乃以愛憎行誅賞,是以 順之心,特由 ·抑洪· 而 實不 夫上以誠愛下,則下以忠報上,處應之理然 水以救民,啓又能 能副,故怨生焉。 使之失望,使之不平,然後怨怒生焉。 一敬承繼禹之道,其澤深矣,然一傳而太康 且怒者、皆類此也。夫人君有位之初、旣出美言而告天下矣, 等人臣耳,無大相遠,人君特以己之私而厚一人,則其薄者 也。 禹、啓愛民 然考之往昔,有不可以常情論者。 如赤子,而太康逸豫 失道,則萬姓仇怨而 不平。 人心之歸 古今人 以 口

得,又豈有失望不平之累哉! 已疾之矣,況於薄有功而厚有罪,人得不怒於心邪。必如古者大學之道,以修身爲本, 一言一動,舉可以爲天下之法,一賞一罰,舉可以合天下之公,則億兆之心將不求而自

謂「民爲重,君爲輕」,禮亦曰「天視自我民視,天聽自我民聽」。以是論之,則天之道恒 斯其所以召天變也。其變已生,其象已著,乖戾之幾已萌,猶且因仍故習,抑其下而損 在於下,恒在於不足也。君人者,不求之下而求之高,不求之〔不〕足而求之有餘,云 爲曷若直法文、景之恭儉愛民,爲理明義正而可信也。天之樹君,本爲下民。故孟子 出西方,彗出東方,去年冬彗見東方,復見西方。議者謂當除舊布新,以應天變。臣以 爲務,今年勸農桑,明年減田租,懇愛如此,宜其民心得而和氣應也。臣竊見前年秋孛 是將小則有水旱之災,大則有亂亡之應,非徒然而已也。而这、景克承天心,一以養民 其不足,謂之順天,不亦難乎? 三代而下稱盛治者,無如漢之文、景,然考之當時,天象數變,山崩地震未易遽數,

則 《紀綱可布,法度可行,治功可必。否則愛惡相攻,善惡交病,生民不免於水火,以是 此六者、皆難之目也。舉其要、則修德、用賢、愛民三者而已。此謂治本。本立,

爲治,萬不能也。

列

曰:「我非堯、舜之道,不敢以陳於王前。」臣愚區區,竊亦願學也。 日之比矣。 應對以至平天下之要道,十年已後,上知所以御下,下知所以事上,上下和睦,又非今 縣,皆設學校,使皇子以下至於庶人之子弟,皆入於學,以明父子君臣之大倫,自 畝,課之種藝,懇喩而督行之,十年之後,倉府之積,當非今日之比矣。 好生 令之難行,而不患法令無可行之地。 也。 迹無不合,蓋此道之行,民可使富,兵可使强,人才可使盛,國勢可使重,夙夜念之至熟 堯、舜之實也。 於「庶績咸熙」,此順承天道之實也。 承之,稷、契又知堯、舜之心而輔贊之,此所以爲法於天下,可傳於後 今國家徒知斂財之巧,而不知生財之由,徒知防人之欺,而不欲養人之善,徒患法 而 其 不私,堯與舜亦好生而 四日:語古之聖君,必曰堯、舜,語古之賢相,必曰稷、契。 二者之行,萬目斯舉,否則他皆不可期也。 臣嘗復熟推行,思之又思,參之往古聖賢之言無不同,驗之歷代治亂之 不私。 若「克明俊德」,至於「黎民於變」,「敬授人時」,至 誠能優 稷播百穀以厚民生,契敷五教以善民心, 「重農民,勿擾 是道也,堯、舜之道也。 一勿害,敺游惰之人而 蓋堯、舜能知 自都邑而 世 也。 歸 此輔贊 天 孟子 之南 洒 至州 道而 掃 道

順

之人有可安之理矣。 其 Ŧi. 曰"天下所以定者,民志定,則士安於士,農安於農,工商安於爲工商,則在上 夫民不安於白屋,**必求祿仕**, 仕不安於卑位, 必求尊榮。 四方萬

可也。 也,雖至親莫能移,是以號令簡而無悔,則無不中節矣。夫數變,不可也;數失信,尤不 數變,喜怒不節之故也。是以先王潛心恭默,不易喜怒,其未發也,雖至近莫能知其發 喜者則必悔其喜之失,無可怒者則必悔其怒之失,甚至先喜而後怒,先怒而後喜,號令 則觸事而遽〔喜怒〕,喜怒之色見於貌,〔亡〕言出於口,人皆知之。徐考其故,知其無可 天下者尚退讓。取也守也,各有其宜,君人者不可不審也。夫審而後發,發無不中,否 里 了輻輳並進,各懷無厭無耻之心,在上之人可不爲寒心哉! 臣聞取天下者尙勇敢,守 周幽無道,故不恤此,今無此,何苦使人之不信也。

召還,奏對亦秘。 耳。衡多病,帝聽五日一至省,時賜尙方名藥美酒以調養之。四年,乃聽其歸懷。五年,復 書奏,帝嘉納之。衡自見帝,多奏陳,及退,皆削其草,故其言多秘,世罕得聞,所傳者特此

答禀,因大言以動衡曰:「臺院皆宗親大臣,若一忤,禍不可測。」衡曰:「吾論國制耳,何與於 之體,衡曰:「中書佐天子總國政,院臺宜具呈。」時商挺在樞密,高鳴在臺,皆不樂,欲定爲 后妃、儲藩、百司所聯屬統制,定爲圖。七年,奏上之。翌日,使集公卿雜議中書、院臺行移 謙定官制,衡歷考古今分併統屬之序,去其權攝增置冗長側置者,凡省部、院臺、郡縣與夫 六年,命與太常卿徐世隆定朝儀,儀成,帝臨觀,甚悅。 又韶與太保劉秉忠、左丞張文

人。」遂以其言質帝前,帝曰:「衡言是也,吾意亦若是。」

若授之以位,則當斷自宸衷,不可使臣下有市恩之漸也。」 其子師可入,諭旨,且命舉自代者。 衡奏曰:「用人,天子之大柄也。臣下汎論其賢否則可, 從幸上京,乃論列阿合馬專權罔上、蠹政害民若干事,不報。因謝病請解機務。帝惻然,召 免,帝命左右掖衡出。衡出及閾,還奏曰:「陛下命臣出,豈出省邪。」帝笑曰:「出殿門耳。」 反,此反道也。」阿合馬由是銜之,亟薦衡宜在中書,欲因以事中之。 俄除左丞,衡屢入辭 財三者而已。今其父典民與財,子又典兵,不可。」帝曰:「卿慮其反邪。」) 衡對曰:「彼雖不 衡 每與之議,必正言不少讓。已而其子又有僉樞密院之命, 衡獨執議曰:「國家事權, 兵民 未幾,阿合馬爲中書平章政事,領尚書省六部事,因擅權,勢傾朝野,一時大臣多阿之,

長。 以明善, 高疑、白棟、蘇郁、姚燉、孫安、劉安中十二人爲伴讀。 詔驛召之來京師,分處各齋,以爲齋 中涵養數年,將必爲國用。」乃請徵其弟子王梓、劉季偉、韓思永、耶律有尚、呂端善、姚燧、 擇蒙古弟子俾教之。 衡聞命,喜曰:「此吾事也。國人子大樸未散,視聽專一,若置之善類 時所選弟子皆幼稚,衡待之如成人,愛之如子,出入進退,其嚴若君臣。 帝久欲開太學,會衡請罷益力,乃從其請。八年,以爲集賢大學士,兼國子祭酒,親爲 因明以開蔽,相其動息以爲張弛。 課誦少暇,卽習禮,或習書算。 少者則令習拜 其爲敎,因覺

列

傳第四

跪、揖讓、進退、應對,或射,或投壺,負者罰讀書若干遍。 久之,諸生人人自得, 下至童子,亦知三綱五常爲生人之道。 尊師敬業,

教人有法,諸生行可從政,此國之大體,宜勿聽其去。」帝命諸老臣議其去留,竇默爲衡懇請 之,乃聽衡還,以贊善王恂攝學事。劉秉忠等奏,乞以衡弟子耶律有尚、蘇郁、白棟爲助敎, 十年,權臣屢毀漢法,諸生廪食或不繼,衡請還懷。 帝以問翰林學士王磐,磐對曰:「衡

闚測 之遲疾。 至日躔,校舊曆退七十六分。 十分, 又增損古歲餘歲差法, 上考春秋以來冬至, 無不盡合。以月食衝及金木二星距驗冬 製儀象圭表,自丙子之冬日測晷景,得丁丑、戊寅、己卯三年冬至加時,減大明曆 氣。今所用、 集賢大學士兼國子祭酒,教領太史院事,召至京。衡以爲冬至者曆之本,而求曆本者在 宜 協 以守衡規矩,從之。 赤道宿度。 時正日。十三年,詔王恂定新曆。恂以爲曆家知曆數而不知曆理,宜得衡領之,乃以 國家自得中原,用金大明曆,自大定是正後六七十年,氣朔加時漸差。帝以海宇混一, 以赤道變九道定月行。 以四正定氣立損益限,以定日之盈縮。 以日轉遲疾中平行度驗月離宿度,加舊曆三十刻。 以遲疾轉定度分定朔,而不用平行度。 分二十八限爲三百三十六,以定月 以日月實合時刻 十九 以綫 代管 刻二

會者,一本天道自然之數,可以施之永久而無弊。自餘正訛完闕,蓋非一事。十七年,曆成, ", 而 不用虛進法。 以躔離朓朒定交食。 其法視古皆密,而又悉去諸曆積年月日法之傅

奏上之,賜名曰授時曆,頒之天下。

聚哭。有數千里來祭哭墓下者。 諭||衡曰:「公毋以道不行爲憂也,公安則道行有時矣,其善藥自愛。」十八年,||衡病革,家人 而卒,年七十三。是日,大雷電,風拔木。懷人無貴賤少長,皆哭於門。四方學士聞訃,皆 祠,衡曰:「吾一日未死,寧不有事於祖考。」扶而起,奠獻如儀。 旣撤,家人餕,怡怡如也。已 六月,以疾請還懷。皇太子爲請於帝,以子師可爲懷孟路總管以養之,且使東宮官來

慶二年,韶從祀孔子廟廷。延祐初,又詔立書院京兆以祀衡,給田奉祠事,名魯齋書院。魯, 敢忘。或未嘗及門,傳其緒餘,而折節力行爲名世者,往往有之。聽其言,雖武人俗 昏明大小皆有所得,可以爲世用。所去,人皆哭泣,不忍舍,服念其敎如金科玉條,終身不 大夫、司徒、諡文正。 翰林承旨王磐氣概 之徒,無不感悟者。 **衡善教,其言煦煦,雖與童子語,如恐傷之。故所至,無貴賤賢不肖皆樂從之,隨其才** 一世,少所與可,獨見衡曰:「先生,神明也。」大德(三)[元]年,(10)贈榮祿 丞相安童一見衡, 語同列曰:「若輩自謂不相上下, 蓋十百與千萬也。」 至大二年,加正學垂憲佐運功臣、太傅、開府儀同三司,封魏國公。皇 士異端

**衡居魏時所署齋名也。子師可。** 

## 竇默 李俊民附

蔡,默恐兵且至, 學自此始。 依 其 講習,至忘寢食。 曹,令習吏事,不肯就。 鄉。 母黨吳氏。 竇默字子聲, 家破,母獨存,驚怖之餘,母子俱 適中 醫者王翁妻以 書楊惟中奉旨招集儒、道、釋之士,默 繼還肥鄉,以經術教 又走德安。 初名傑字漢卿, 會國 兵伐金,默 女,使業醫。 孝威令謝憲子以伊洛性理 廣平肥鄉 授,由是知名。 得 爲所俘。 轉客蔡州, 疾,母竟亡,扶病藁葬。而大兵復至,遂南 人。 幼知 同時被俘者三十人,皆見殺,惟默 べ讀書, 遇名醫李浩, 乃 北 之書授之,默自 歸,隱於大名,與姚樞、許衡朝暮 毅然有立志。 授以銅人針法。 以爲昔未嘗學,而 族 祖 旺, 走渡河、 金主遷 爲 得 脱歸 郡 功

乃拜 無以 樞 日 ,即召用之。 凡三召與語,奏對皆稱旨,自是敬待加禮,不令暫去左右。 立於 命。 世 祖 世矣。」默又言:「帝王之道,在誠意正心,心旣正,則朝廷遠近莫敢不 旣至,問以治道,默首 在潛邸,遺召之,默變 俄命皇子眞金從默學,賜以玉帶鉤,諭之曰:「此金內府故物, 姓名以 以三綱五常爲對。 自 施。 使者俾其友人往見,而微服 世 祖 曰:「人道之端,孰 世祖 問今之明治道者 大於 踵 其後,默不得已 汝老人, 此 於 默 失此,則 正。 佩服 薦 姚

列傳第四十五 簽默

爲宜, 且使我子見之如見我也。」久之,請南還,命大名、 順德各給田宅,有司歲具衣物以

爲常。

拜 毅 右丞相,以默爲翰林侍講學士。 不屈 世 祖即位,召至上都,問曰:「朕欲求如唐魏徵者,有其人乎。」」默對曰:「犯顏諫 ,則許衡其人也。 深識遠慮,有宰相才,則史天澤其人也。」天澤時宣撫河南,帝卽召 時初建中書省,平章政事王文統頗見委任,默上書曰: 剛

娛悅 安社 救世一念,涵養有年矣。 上 稷爲心。 臣事陛 ιÇ, 其扇結別黨、離間骨肉者,皆此徒也。 下十有餘年,數承顧問,與聞聖訓,有以見陛下急於求治,未嘗不 時先帝在上,姦臣擅權,總天下財賦,操執在手,貢進奇貨,衒耀紛華,以 此徒當路,陛下所以不能盡其初心。 以利生民

他,意在 勤、乞憐 人端士,唇吻小人一時功利之說,必不能定立國家基本,為子孫久遠之計。 士,授以 今天順人應,誕登大寶,天下生民莫不歡忻踴躍,引領盛治。 重任 取寵者,使不得行其志,斯可矣。 擯斥諸賢,獨 一,則天 下 幸甚 執 政柄耳,此蘇、脹之流也,惟陛下察之。 若夫鈎距揣摩,以利害驚動人主之意者, 伏望別選公明有道之 然平治天下,必用 其賣利 無 獻

他 日,默 與王 鶚、姚 樞 俱 在帝前,復面斥文統曰:「此人學術不正,久居相位,必禍 天下。」帝

許衡 **竇漢卿一人。向使更有一二人言之,朕寧不之思耶。」召還,賜第京師,命有司月給廪祿,國** 有大政輒以訪之。 太子太傅,默辭曰:「太子位號未正,臣不敢先受太傅之名。」乃復以爲翰林侍講學士,詳見 曰:「然則 誰可相者。」、默曰:「以臣觀之,無如許衡。」帝不悅而罷。 默俄謝病歸,未幾,文統伏誅,帝追憶其言,謂近臣曰:「曩言王文統不可用者,惟 文統深忌之,乃請以默爲

帝惡其迎合,命杖之,釋獵者不問。旣退,秉忠等賀默曰:「非公誠結主知,安得感悟至此。」 以爲否,非善政也。」明日,復侍帝於幄殿。獵者失一鶻,帝怒,侍臣或從旁大聲謂宜加罪 言:「君有過舉,臣當直言,都兪吁咈,古之所尙。今則不然,君曰可臣亦以爲可,君曰否臣亦 選貴族子弟教之,以示風化之本。」帝嘉納之。 可其奏。默又言::「三代所以風俗淳厚、歷數長久者,皆設學養士所致。 兼 國史院,仍舊纂修國史,典制誥,備顧問,以翰林學士承旨兼修起居注 默與王磐等請分置翰林院,專掌蒙古文字,以翰林學士承旨撒的迷底里主之,其翰林 默嘗與劉秉忠、姚樞、劉肅、商挺侍上前,默 今宜建學立師,博 和禮霍孫主之。 帝

及諸器物往存問焉。 數年,留股左右,共治天下,惜今老矣」、悵然者久之。 至元十二年,默年八十,公卿皆往賀,帝聞之,拱手曰:「此輩賢者,安得請於上帝,減去 十七年,加昭文館大學士,卒,年八十五。 默旣老,不視事,帝數遣中使以 **計聞**,帝深爲嗟悼, 厚加赗

賜,皇太子亦賻以鈔二千貫,命有司護送歸葬肥鄉

謂汲 竇漢卿 黯無以過之。 默 之心,姚公茂之才,合 爲 人樂易,平居未嘗評品 帝嘗謂侍臣 而 爲 曰:「朕求賢三十年, 人物,與人居,溫然儒者也。 ,斯可謂全人矣。」後累贈太師, 惟得竇漢卿及李俊民二人。」 至論國家大計,面折延諍, 封魏國 公,諡 文正。 又曰:「如

履,集賢大學士。

山、三一後徙懷州、俄復隱於西山。 生者,授以邵雍皇極數。 未幾,棄官不仕,以所學教授鄉里,從之者甚盛,至有不遠千里而來者。 李俊民字用章,澤州人,得河南程氏傳受之學。 時之知數者,無出劉秉忠之右,亦自以爲弗及 旣而變起倉猝,人服其先知。 金承安中舉進士第一,應奉翰林文字。 俊民在 也 金源南遷,隱於嵩 河南時,隱 士 

令張仲一問以禎祥,及卽位,其言皆驗。 世祖在潛藩,以安車召之,延訪無虛 日。 遽乞還山,世祖 而俊民已死,賜諡莊靜先生。 重違其意,遣 中貴人護送之。

校勘記

不知 列 傳 行營[往復]之擾攘 第 四 + 五 校 勘 記 原墨釘,道光本與元文類卷六〇姚燧姚樞神道碑合,從補。

- = 各疏(弛)[施]張之方 據元文類卷六〇姚燧姚樞神道碑改。
- = 史失之」。「二年」上當有「中統」二字。 考異云「案此傳敍事」自世祖卽位以後、書二年、四年者, 中統之紀年也」, 「有年而無號,
- 四 し 十年 按元文類卷六〇姚燧姚樞神道碑有「至元之元」、「明年」、「五年」、「八年」、「十年」,此

「十年」上當書「至元」。 考異已校。

- 五 十一年 蒙史已校。 按元文類卷六〇姚燧姚樞神道碑繫此事于「十一年」之「明年」,此處「十一」當作「十
- ベリ (岨峡)[徂徠]山 據圭齋集卷九許衡神道碑改。 新編已校。
- . . -<del>u</del> \_ (切)[竊]嘗思之 據許文正公遺書卷七時務五事疏改。 類編已校。
- 不求之「不」足而求之有餘 道光本與許文正公遺書卷七時務五事疏合、從補。
- 一元 否則觸事而遽[喜怒]喜怒之色見於貌 據許文正公遺書卷七時務五事疏補。 類編已校。
- 大德(三)[元]年 據許文正公遺書卷首元朝詔誥、 考歲略及卷末附錄歐陽玄許衡神道 神改。
- 疑 「嵩山」當作「嵩州鳴鼻山」。 按元名臣事略卷八竇文正公引楊奐李俊民傳作「南遷」隱嵩州鳴皐山」,

金源南遷隱於嵩山

新編已校。

# 元史卷一百五十九

## 列傳第四十六

## 宋子貞

宋子貞字周臣,潞州長子人也。 性敏悟好學,工詞賦。 弱冠,領薦書試禮部,與族兄知

「柔同補太學生,俱有名於時,人以大、小宋稱之。

貞率衆歸東平行臺嚴實。 通慇懃,凡奏請,必先咨禀。丞相喜,自是交懽無間,實因此益委信子貞。 人請事于朝、托近侍奏決,不經中書,因與丞相耶律楚材有違言。子貞至,勸實致禮丞相, 金末、潞州亂、子貞走趙、魏間。 實素聞其名、招置幕府、用爲詳議官、兼提舉學校。先是、實每令 宋將彭義斌守大名,辟爲安撫司計議官。 義斌歿,子

中 逃歸者,言金兵且大至,人情恟懼。 太宗四年,實戍黃陵,金人悉力來攻。與戰不利,敵勢頗張,曹、濮以南皆震。 子貞請於實,斬揚言者首以令諸城,境內乃安。 有自敵 **汴梁** 

列傳第四十六 宋子貞

旣下,饑民 且薦 用 之。 北徙、餓殍盈 拔名儒張特立、劉肅、李昶輩於羈旅、與之同列。 道 0 子貞多方賑救, 全活者萬餘人。 金士之流寓 四方之士聞風 者,悉引見周給, 加 至,故東平

時

人材

多

於

他鎭

官或 子貞 勤,官府始有 民。 子貞 擢 七 罷 自將校,或起由民伍,率昧於從政。 年 歸 ·做前代觀察采訪之制,命官分三道糾察官吏,立爲程式,與爲期會, ,太宗命子貞爲行臺右司郎中。中原略定,事多草創,行臺所統五十餘城,州縣之 州縣。 紀綱、民得蘇息。 實初難之,子貞力言乃聽,人以爲 東平將校,占民爲部曲戶,謂之脚寨,擅其賦役,幾四 甚者,專以掊克聚斂爲能,官吏相 便。 與爲貪私 黜貪墯, 百所。 獎廉 以病

臨之。 廟學,延前進士康 實卒,子忠濟 齊魯儒風,爲之一 · 一下聲爲教官,招致生徒幾百人,出粟贍之,俾習經藝。 每季程試,必親 襲爵,尤敬子貞。 變。 請于朝,授參議東平路事,兼提舉太常禮樂。 子貞作新

定。 統 命者,特畏死爾,若投降者不殺,脅從者勿治,則宋之郡邑可傳檄而定也。」世祖善其言。中 元年,授益都路宣撫使。 李璮叛,據濟南,詔子貞參議軍前行中書省事。 歲己未,世祖南伐,召子貞至濮,問以方略。對曰:「本朝威武有餘,仁德未洽。所以拒 未幾,入觀,拜右三部尚書。 子貞單騎至濟南,觀壇形勢,因說丞相 時新立省部,典章制度,多子貞裁

史天澤曰:「壇獺衆東來,坐守孤城,宜增築外城,防其奔突,彼糧盡援絕,不攻自破矣。」議

與天澤合,遂擒瓊。

俄拜中書平章政事。 耶律鑄行山東,遷調所部官。還,授翰林學士,參議中書省事。奏請班俸祿,定職田,從之。 傳以世,非法賦斂,民窮無告,宜遷轉以革其弊。」又請建國學敎胄子,敕州郡提學課試諸 生,三年一貢舉。有旨命中書次第施行之。至元二年,始罷州縣官世襲。 綱,宜早刊定。 監司 子貞還,上書陳便宜十事,大略謂:「官爵,人主之柄,選法宜盡歸吏部。 總統一路,用非其材,不厭人望,乞選公廉有才德者爲之。今州縣官相 復陳時務之切要者十二策。帝頗悔用子貞晚。 遣子貞與 律令,國之紀 左丞相

便。」三年十一月、懇解、乃得請。特敕中書、凡有大事、即其家訪問。子貞私居、每聞 事不便,必封疏上奏,愛君憂國,不以進退異其心。 曰:「死生有命、吾年踰八十,何以藥爲。」病危、諸子請遺言、子貞曰:「吾平昔敎汝者不少、 今尙何言耶! 未幾,以年老求退,帝曰:「卿氣力未衰,勉爲朕留,措置大事,俟百司差有條理,聽卿自 卒年八十一。 始病,家人進醫藥,却之 朝廷

子勵,字齊彥,有才名,官至集賢學士。

### 挺

子 以 戦死。 師。 商 挺字孟 實卒、子忠濟嗣、辟挺爲經歷、出爲 挺年二十四,汴京破,北走,依冠氏 卿,曹州濟陰人。 其先,本姓殷氏,遊宋諱改焉。 曹州 趙 判官。 天 錫, 與元好問、 未幾,復爲經歷,贊忠濟興學養 楊奐遊。 父衡, 僉陝西行省員 東平嚴實聘爲諸 外郎, 士。

于雨必後期,後期罪死。 宴語,因日 癸丑 一,世 .....挺來時,李壇城朐山,東平當飽米 祖 在潛 邸,受京兆 請輸沂州,使壇軍取食,便。」 分地,聞 挺名,遣使徵 萬 石。 世祖 東平至 至鹽州。 日 胸山, "「愛民如此,忍不 入對稱旨, 率十石致一 字而 卿從。」 不名。 石, 且 間陪 車 淖

代,陞挺爲宣撫副 中 ,進賢良,黜貪暴,明尊卑,出淹滯,定規程,主簿責, 期月,民乃安。 楊惟 中宣撫關中 誅一 ,挺爲郎中。 大猾,羣吏咸懼。 兵火之餘,八州十 且 一請減關中常賦之半。 二縣,戶不滿萬,皆驚憂無聊。 印楮幣,頒俸祿, 明年,惟中罷,廉希憲來 務農薄稅, 通 挺佐 其有 惟

使。

煩官運,僕家有積粟,請以代輸。」挺大悅,載價與之,他輸亦如期。 挺曰:「他易集也,運米千里,妨我蠶麥。」郿長王姓者,平涼 丙辰, 徵京兆軍需 布 萬匹、米三千石、帛三千段,械器稱是,輸平涼軍。 人也,挺召 復命兼治懷孟,境內大 1與謀, 期迫甚,郡 對 曰:「不 人大

丁旦, 憲宗命阿藍答兒會計 河南、陝右。 戊午,罷宣 撫 司 ,挺還 東平。

軍 卿 幾敗大計。」 中當嚴 世 憲宗 祖 默 親 符信,以防姦詐。」文謙急追及言之。 征蜀 然久之,曰:「卿言正契吾心。」憲宗崩,世 速遣使至軍立約。 世 祖 將趨鄂、漢,軍于小濮,召問 未幾, 阿里不哥之使至軍中, 世祖 軍 祖北 大悟,罵曰 事。 還,道遣張文謙 挺 對 曰:「蜀道險遠, 執而 無 斬之。 \_\_\_ 人為 與 召挺北 我言 挺 計 萬乘豈宜 此 事。 非商 上 挺 至 |開 邨

平,挺與

廉希憲密贊大計

策。」 蜀。 北 盤,觀釁而 山,以兵應 直 道 而 擣 以 去 阳 已而 拒之。 中統 共前 阿 藍答兒自和林引兵南來,與哈刺 世 祖 藍答兒遂與 果然。 旣 元年夏五月, 動 合丹 阿里不哥。 旣陣、大風 |卽位,挺奏曰:「南師宜還扈乘輿,西師宜軍便地。」從之。以廉希憲及挺宣撫陝、 中策也; 勒 於是與希憲定議,令八春、汪良臣發兵禦之,事具希憲傳。 精 騎邀其歸路,大戰于甘州東,殺阿藍答兒、渾都海。 渾都海合軍 吹沙 挺謂 重裝北歸, 至京兆。 了良臣 希憲 ·
而南。 曰:「爲六盤,有三策:悉銳而 哈刺不花者,征蜀時名將也,渾都 令軍士下馬,以短兵突其左,繞出 以應和林,下策也。」希憲 不花、 時諸王合丹率騎 渾都海遇於甘州。 兵與 曰:「彼將何從。」挺曰:「必出下 八春、汪良臣兵合,乃分爲三 東,直擣京兆,上策也,聚兵六 哈刺不花 陣後 海 嘗爲之副, 潰 事聞 以 語不 其 六盤之兵旣北, 右而出,八春 ,帝大悦,曰: 合,引其兵 時駐六盤

「商孟卿,古之良將也。」改宣撫司爲行中書省,進希憲爲右丞,挺爲僉行省事

院 有功如是,猶自言有罪,若此,誰復爲朕戮力耶!卿等識之。」四年,賜金符,行四川行樞密 敢,請就戮。」挺旣出,帝顧駙馬忽剌出、樞副合答等,數挺前後大計,凡十有七,因嘆曰:「挺 也。 王文統者甚衆,卿獨無一言。」挺對曰:「臣素知文統之爲人,嘗與趙璧論之,想陛下猶能記 奏而釋之。興元判官費寅有罪懼誅,以借兵完城事訟挺與希憲于朝。帝召挺便殿,問曰: **卿在關中、懷孟,兩著治效,而毀言日至,豈同寅有沮卿者耶?抑位高而志怠耶?** 臣在秦三年,多過,其或從權以應變者有之。若功成以歸己,事敗分咎於人,臣必不 二年,進參知政事。宋將劉整以瀘州降,繫前降宋者數百人來歸,軍吏請誅以戒,挺盡 比年論

親軍。 年,陞副使。 胡 竇默、王鶚、 祗 [通、周砥等爲之,甚合帝意。 二年,分省河東,俄召還。 三年,帝留意經學,挺與姚樞· 九年,封皇子忙阿刺爲安西王,立王相府,以挺爲王相。十四年,詔王北征,王命挺曰: 至元元年,入拜參知政事。 汰不勝軍者戶三萬戶,一丁者亦汰去,丁多業寡,業多丁寡 楊果纂五經要語凡二十八類以進。六年,同僉樞密院事。 數軍食,定軍官品級,給軍吏俸。〔1〕使四千人 建議史事,附修遼、金二史,宜令王鶚、李冶、徐世隆、高鳴 屯田,開墾三萬畝,收其穫以餉 ?,財力相資,合出 七年,遷僉書。八

列傳第四十六 商挺

虞,厚民生,一事權,清心 命于朝,以子阿難答嗣。 關中 秃魯 事有不便者,可悉更張之。」挺曰:「延安民兵數千,宜使李忽蘭吉練習之,以備不虞。」 叛,以延安兵應敵,果獲其力。挺進十策於王,曰:睦親鄰,安人心,敬民時,備不 帝曰:「年少、祖宗之訓未習、卿姑行王 )源,謹自治,固本根,察下情。 王爲置酒嘉納。 一相府事。」 王薨,王妃使挺請

知挺 冬,始釋挺及臟。二十年,復樞密副使,俄以疾免。二十一年,趙氏子復訟父寃,挺又被繫, 不知 功臣、太師、開府儀同三司、上柱國、魯國公、諡文定。子五人:號、璘、瑭、瓛、琦 老,而嘆其康强。是歲冬十有二月卒。 固 氏子曰:「商孟 廷疑 百餘日乃釋。二十五年,帝問中丞董文用曰:「商孟卿今年幾何?」對曰:「八十。」帝甚惜其 一郭謀,臨刑,望以求生,始有曖昧語連挺及其子熾。帝怒,召挺,拘炳家,囐下獄。帝命趙 [聞之,殺人之謀,挺不與也。」帝默然。十六年春,有旨:挺不可全以無罪釋之,籍其家。是 向向 擅殺之,執踪、叔雲鞫問,伏辜,事具趙炳傳。 挺何如 初 「來之功可補今之過否。」<br />
帝不悅曰:「是同類相助之辭也。」<br />
符寶郎董文忠奏曰:「夢炎 通 使郭琮 人,臣以曩時推戴之功語之矣。」帝良久曰:「其事果何如。」對曰:「臣目未覩,耳 |卿,老書生,可與諸儒讞其罪。| 東部尚書靑陽夢炎以議勳奏曰:「臣宋儒,不 、郎中郭叔雲、與王相趙炳搆隙。 有詩千餘篇, 或告炳不法、妃命囚之六盤獄以死。 初無一毫及挺。 尤善隸書。延祐初,贈推誠協謀佐運 惟王府女奚徹徹,以預

徠,不三日雲集。 倡亂,行臺檄號按問。檢繫脅從者盈獄,號悉以詿誤縱遣之。黨與竄伏者猶衆,號揭牓招 之餘,盜賊屢起,顧尙循常例,安用憲臺爲哉」」吏議遂屈。都昌妖賊杜(辛)[萬]一,三一僭號 擒、其黨縱火來劫,民大擾,號亟誅其魁。 文法東賣號擅誅,行臺中丞張雄飛曰:「江南殘毀 湯氏財者,投戈于其家,誣爲反具。號知其冤,罪誣者而釋之。華亭蟠龍寺僧思月謀叛被 號字台符。至元十四年,以姚樞、許衡薦,拜江南行御史臺監察御史。建康戍卒有利

徒立,須人而行,人不濫用,惟賢是擇。」因舉天下名士十餘人。 帝從之,皆召用,待以不次。 躬行德化而弭也。」因條陳漢文時政以進。又言:「爲國之道,在立法、任人二者而已。法不 三十年,遷國子司業。 二十七年,徵拜中臺監察御史。 卒。 有彝齋文集。 屬地震,號上書言:「昔漢文帝有此異,而無其應,蓋以

晦道堂,蓋取七世祖宗嗣,宋仁宗時爲太子中舍人,年五十掛冠所築堂名也。 瑭字禮符。 **仕爲右衞屯田千戶。歲餘,謝病侍親,時年纔三十二。** 後還鄉里,築室曰

|泰定元年,遷秘書卿,病歸,卒。 |琦善畫山水。 中,不赴。 琦字德符。 皇慶元年,授集賢侍講學士。延祐四年,陞侍讀官、通奉大夫,賜鈔二萬五千貫。 大德八年,成宗召備宿衞。仁宗在東宮,奏授集賢直學士。 嘗使濁,持平守法,秋毫無私。 調大名路治

# 趙良丽

度使,諡忠閔,愍長子良貴,嵩汝招討使,良貴子讜,許州兵官,愍從子良材,守太原。 趙良弼字輔之,女直人也。本姓术要甲,音訛爲趙家,因以趙爲氏。父慇,金威勝軍節 俱

死

校京兆錢穀,煅煉羣獄,死者二十餘人,衆皆股栗。良弼力陳大義,詞氣懇款,二人卒不能 藍答兒當國,憚世祖英武,讒于憲宗。遂以阿藍答兒爲陝西省左丞相,劉太平參知政事,鈎 戶口增倍。 者,交搆嫌隙,動相沮撓。 掣制,則請諸藩邸,再閱歲,凡六往返,所請無不從。脫兀脫以斷事官鎭邢,其屬要結罪廢 司 ,擢良弼爲幕長。邢久不得善吏,且當要衝,使者旁午,民多逃去。良弼區畫有方,事或 良酮明敏, 世祖在潛藩時,分地在關陝,奏以廉希憲、商挺宣撫陝西,以良弼參議司事。 多智略,初舉進士,教授趙州。世祖在潛藩,召見,占對稱旨,會立邢州安撫 世祖時征雲南,良弼馳驛白其事,遂黜脫兀脫,罷其屬,邢大治, 511

禁焚廬舍、殺降民,所至宣布恩德,民皆按堵。旣渡江,攻鄂州,聞憲宗崩,世祖北還,良 己未七月,世祖南征,召參議元帥事,兼江淮安撫使。 親執桴鼓,率先士卒,五戰皆捷;

誣,故宣撫司 一無所

坐。

列

傳

第四

十六

趙良

酮

其 事 日 丽 兵 宗宗 有 陳 柄 時 不 意 務 王 一穆哥 十二 劉 太平 紐 事 鄰 無 霍魯 總秦、川蒙古諸軍 ,言皆有 他 Š 一, 宜 懷 徴。 以 今行 西 南 至衞 尚 六盤 書省 ", 造, ,多得秦、蜀 悉 事 如京兆察訪秦、 委屬之。 聲言辨 尺 心,年 渾都 集 糧 海 餉 蜀 小 屯 意勇,輕 人情事宜, 軍六盤 陰有 據 秦、 去 土 就 不 馬 蜀 踰 精 當 志 月, 强 寵 成 百 以 具 家 重 得 思 職 奴 實還 北 歸 疾 劉 報, 恐 黑 解

汪

惟

E

兄弟,蒙被

德惠,俱悉心俟

(命。) 其

言皆見采

用

行 使 中 ご副 止 劉 當 庚 太平將 先遺 社 良 申 稷 , 酮 良 安危, 使奉上旨 爲 趨六盤,聞 丽 參 凡五 議。 間 不容髮。」世 上言勸進,曰:「今中 促紐鄰 良 命 弼 先行 功 止 入 朝, ,謀諸斷事官八春 祖嘉之。 劉太平速還京兆。」八春從其議。 外皆願 旣 卽 位 大王 · 分. 日一一今渾都海 陝 早進 近四四 正宸, 川宣 日夜思北 以安天下,事 撫 司,復以 至則 歸 紐 新 紐 廉 鄰果 希 勢如 鄰 憲 移營將入 遷 一、商 此,豈容 延 不 挺為

卽

蜀 憲 帥 迷 等 立 人費寅以私憾誣廉希憲、商挺在京兆有異志者九事,以良弼爲徵。 時 源 火 後 止 者 渾 使者卽出此奏。」 帝 令囚 i 誅 之。 都 海 以 果叛 父俟報, 希憲及挺 北 歸 臣 稱 良弼與汪惟正、劉黑馬二宣 慮有 以爲 竟不 擅殺名,遣使入奏待罪。 問 張惶不便,宜急誅之,擅殺 ,使者以 奏白政府, 撫決議,執渾都 成以 良 阿具 良 在臣, 一酮爲 密 實 不 長 狀 者。 授 海之黨元帥乞台不花、 帝召良弼詰問 在宣 使者,言:「始遣捕二 陞 参議 一撫司? 陝西 若上怒希 省事 良阙

泣 有 疑二臣 曰:「二臣忠良、保無是心、願剖臣心以明之。」帝 意, 切責良酮, 無所不 至,至欲斷其舌。 意不釋。 良剛誓死不少變, 會平李璮,得王文統交通書,益 帝意乃解,費寅卒以

反誅

帝從其請。 秘 先是,至元初,數遣 書 監以行。 至元七年,以良弼爲經略使,領高麗屯田。良弼言屯田不便,固辭,遂以良弼奉使日本。 給兵三千以從,良弼辭,獨與書狀官二十四 良弼奏:「臣父兄四人,死事于金,乞命 使通 日本,卒不得要領,於是良酮請行 翰林臣文其碑,臣雖死絕域,無憾 人俱 ,帝憫其老,不許,良剛固請 一,乃授

兵環 授,何以示信」良弼曰:「隋文帝遣裴淸來,王郊迎成禮,唐太宗、高宗時,遣使皆得見王,王 何 來 其不 本示之。 得 求 也。」日本知不可屈,遣使介十二人入觀,仍遣人送良弼至對馬島。 獨 不見 書,且曰:「我國自太宰府以東,上古使臣,未有至者,今大朝遣使至此,而不以國書 恭罪,仍 之,滅燭大躁,良弼凝然自若。 舟 至金津島,其國人望見使舟,欲舉刃來攻,良弼捨舟登岸喻旨。 後又聲言,大將軍以兵十萬來求書。 大朝使臣乎。」復索書不已,詰難往復數四,至以 除以 禮意。 太宰官愧服,求國書。 天明,其國太宰府官,陳兵四山,問使者來狀。 良弼曰:「不見汝國王, 良酮曰:「必見汝國王、始授之。」越數日,復 兵脅良弼。 寧持我首去,書不可 金津守延入板屋,以 良殉終不與,但頗錄 良酮數 見

謂以有用之民力,塡無窮之巨壑也,臣謂勿擊便。」帝從之。 本,三問,良卿言:「臣居 多山水、無耕桑之利、得其人不可役、得其地不加富。 十年五月,良弼至自日本,入見,帝詢知其故,曰:「卿可謂不辱君命矣。」後帝將討 日本歲餘,覩其民俗,狠勇嗜殺,不知有父子之親、上下之禮。 況舟師渡海,海風無期,禍害莫測。是 其地 日

於儒 定律令,以戢姦吏。」卒皆用其議。 以 在國家所尙何 大軍,先擣錢唐。」後訖 人,皆通經書,學孔、孟。漢人惟務課賦吟詩,將何用焉」良屬對曰:「此非學者之病, 十一年十二月,以良弼同僉書樞密院事。丞相伯顏伐宋,良弼言:「宋重兵在揚州,宜 如耳。 尚詩賦,則人必從之,尚經學,則人亦從之。」 如其計。 帝嘗從容問曰:「高麗,小國也,匠工弈技,皆勝漢 又言:「宋亡,江南士人多廢學,宜設經史科,以育 "人材,

推忠翊運功臣、太保、儀同三司,追封韓國公,諡文正。子訓,陝西平章政事。 怒;必順理,然後可以忘怒。 與懷州,四與孟州,皆永 曰:「『必有忍」(乃其)[其乃]有濟。』(三人性易發而 良 丽 屢以疾辭,十九年,得旨居懷孟。 隸廟學,以贍生徒,自以出身儒素,示不忘本也。或問 能忍所難忍,容所難容,事斯濟矣。」二十三年,卒,年七十。 良酮別業在溫縣,故有地三千畝,乃析爲二,六 .難制者,惟怒爲甚。必克己,然後可 爲治, 以制 鯉

僮,給薪水,命后親製衣賜之,視其試服不稱,輒爲損益, 龍遇無與爲比。 士王鶚等。又令蒙古生十人,從壁受儒書。敕壁習國語,譯大學行義,時從馬上聽**壁**陳說, 趙璧字寶(仁)[臣],四雲中懷仁人。世祖爲親王,聞其名召見,呼秀才而不名,賜三 命馳驛四方,聘名

辭旨明貫,世祖嘉之。

請于帝曰:「此先朝賜臣印也,今陛下登極,將仍用此舊印,抑易以新者耶。」時壁侍旁,質之 退,世祖曰:「秀才,汝渾身是膽耶!吾亦爲汝握兩手汗也。」一日,斷事官牙老瓦赤持其印, 「朕亦不能爲此也。」自是牙老瓦赤不復用。 曰:「用汝與否,取自聖裁,汝乃敢以印爲請耶!」奪其印,置帝前。帝爲默然久之,旣而曰: 憲宗卽位,召璧問曰:「天下何如而治。」對曰:「請先誅近侍之尤不善者。」憲宗不悅。璧

瑞 盡還民女。 呼之爲翁。 應。」壁曰:「如董主簿比者,尙有其人,俟盡誅之,瑞應將大至矣。」劉屛氣不復敢出語,歸 壬子,爲河南經略使。 劉大鷲,時天大雪,因詣壁相勞苦,且酌酒賀曰:「經略下車,誅鋤强猾,故雪爲 其黨董主簿,尤恃勢爲虐,强取民女有色者三十餘人。 河南劉萬戶貪淫暴戾,郡中婚嫁,必先賂之,得所請而後行,咸 壁至,按其罪,立斬之,

列

傳

臥病而卒,時人以爲懼死。

江 江 世 爲界,且歲奉銀、絹匹兩各二十萬。」壁曰:「大軍至濮州時,誠有是請,猶或見從, 祖 己未 曰:「汝登城,必謹 何益!賈制置今焉在耶?」壁適見世祖旗動,迺曰:「俟他日復議之。」遂還。 ,伐宋,爲江淮荆湖經略使。 [視吾旗,旗動,速歸可也。] 壁登城,宋將宋京曰:「北兵若旋 兵圍鄂州,宋賈似道遣使來,願請行人以和,璧請行。 師,願割 今已渡

也, 壁 壇已據濟南 知 征,命還燕,以平章政事兼大都督領諸軍。是年,始製太廟雅樂。 音律在選中,爲造僞鈔者連坐,繫獄。|壁曰:「太廟雅樂,大饗用之,聖上所以昭孝報本 經畫饋運,相 豈可繫及無辜, 而廢雅樂之成哉! 奏請原之。三年, 李璮反益都, 從親王合必赤討之。 憲宗崩,世祖卽位。 ,諸軍乏食,壁從濟河得粟及羊豕以饋軍,軍復大振 繼 不絕。 中書省立,授平章政事,議加答剌罕之號, 中統元年,拜燕京宣慰使。 時供給閩軍,府庫已竭,及用兵北邊, 樂工党仲和、郭伯達,以 力辭不受。 二年,從北

鹿 成,帝大喜曰:「惟秀才曲盡我意。」改樞密副使。 六年,宋守臣有遣間使約降者,帝命壁詣 門山 自武昌泝流, 至元元年,官制行,加榮祿大夫。 帝欲作文檄宋,執筆者數人,不稱旨,乃召壁爲之。文 都元 帥 阿朮營密議。 入援襄陽。 命壁同行漢軍都元帥府事。 時漢水暴漲,壁據險設伏待之。 宋將夏貴,率兵五萬,饋糧三千 貴果中夜潛上,壁策馬出鹿

門,行二十餘里,發伏兵,奪其五舟,大呼曰:「南船已敗,我水軍宜速進。」貴懾不敢動。 旦,阿朮至,領諸將渡江西追貴騎兵,壁率水軍萬戶解汝楫等追貴舟師。 遂合戰於虎尾洲, 明

貴大敗走,士卒溺死甚衆,奪戰艦五十,擒將士三百餘人。

還之。 險,故使權臣無所畏忌,擅逐其主。今衍雖死,王實無罪,若朝廷遣兵護歸,使復國于古京, 可以安兵息民,策之上者也。」因遣使以聞,帝從之。時同行者分高麗美人,璧得三人,皆 事,聚兵平壤。時衍已死,壁與王議曰:「高麗遷居江華島有年矣,外雖卑辭臣貢,內恃其 高麗王植爲其臣林衍所逐,帝召壁還,改中書左丞,同國王頭輦哥行東京等路中書省

卒,年五十七。 大德三年,贈大司徒,諡忠亮。 日 [:「大不敬,當斬!」壁曰:「法止杖斷流遠。」其人得不死。十年,復拜平章政事。十三年, 師還,遷中書右丞。冬,祀太廟,有司失黃幔,索得於神庖竈下,已甚污弊。帝聞,大怒

子二人: 仁榮, 同知歸德府事, 仁恭, 集賢直學士。孫二人: 農, 郊祀署令, 弘, 左藏庫

提點。

# 校勘記

數軍食定軍官品級給軍吏俸 元名臣事略卷一一引元明善商挺墓碑作「數軍實,差萬戶、千戶

等三、給軍吏俸」。疑「數軍食」當作「數軍實」。

〔三〕杜(辛)〔萬〕一 按本書卷一五三賈居貞傳及元典章卷三二禁斷推背圖、 滋溪交稿卷一五趙伯

成神道碑皆作「杜萬一」,據改。

**≡** 必有忍(內共)[其乃]有濟 據元名臣事略卷一一引李謙趙良弼墓碑改正。「必有忍,其乃有濟」,

語出尚書。

趙璧字寶(亡)[臣] 九九張特立傳有「趙寶臣」,即趙璧。 據西巖集卷一九趙壁神道碑銘改。本書卷一四九劉伯林傳附劉元禮傳、

# **元史卷**一百六十

# 列傳第四十七

#### 王磐

興,補進義副尉。國兵破水年,將屠其城,禧復罄家貲以助軍費,衆賴以免。 王磐字文炳,廣平永年人,世業農,歲得麥萬石,鄉人號萬石王家。父禧,金末入財佐 金人遷汴,

乃舉家南渡河,居汝之魯山。

軍

實興學養士, 陽兵變,乃北歸,至洛西,會楊惟中被旨招集儒士,得磐,深禮遇之,遂寓河內。 涘。 大 四年經義進士第,授歸德府錄事判官,不赴。 及河南被兵,磐避難,轉入淮、襄間,宋荆湖制置司,素知其名,辟爲議事官。丙申,襄 磐年方冠,從麻九疇學于郾城,客居貧甚,日作糜一器,畫爲朝暮食。年二十六,擢正 迎譽爲師,受業者常數百人,後多爲名士。 自是大肆力於經史百氏,文辭宏放,浩無涯 東平總管嚴

列傳第四十七 王磐

國 大軍討之, 樂 濟 史。 南 青 ,得驛 州 中 風 統 土,乃 元 馬 帝命磐參議行(臺)[省]事。[1] 壇平, 遂挈妻子至東平。 年 馳去,入京師, 買 卽 拜 田 渳河 益都等路宣撫 之上,題其 因侍臣 以 副 居日 聞。 使,居頃之,以疾 鹿菴,有終焉之意。 世 祖 卽日召見,嘉其 免。 李 壇 及壇 誠 素 節,撫勞甚厚。 重 謀不 召拜翰林直學士, 響, 軌, 以 磐覺之,脫 延致之, 璮壉 同修 磐亦

夫 有趙清 數 于 獄 使 四萬 十。 家, 夜 殺 磐 出 拘繫榜掠。 捕 時府治寓城上,即擠諸城下,幾死,郡人稱快。 竟奏置諸法,籍其家貲,以半給淸。 淸 者 爲眞定、順德等路宣慰使。 人,以爲不足,欲牒鄰道 蝗,磐不 清逃 發其 罪,旣具 獲免,乃盡殺其父母 其人且恃勢干官府,直來 - 爲動 ,親率役夫走田 伏矣,適初置監司 助之。 (邢)[衡]水縣達魯花赤忙兀解, (三) 妻子。 磐 間,設方法督捕之,三日 曰:「四萬人多矣, 其妻 坐 郡 清訴諸官 廳 有 事,指 惺 西域大賈,稱貸 無以 ,權要蔽忙兀 未幾,蝗起眞定,朝廷 麾自若。磐大怒,叱 滅 П 何煩 召家 而 取 他郡 蝗 息, **解** 盡 人飲酒至醉, 」使者怒, 貪暴不 滅,使者驚 有 不為 不 時償 左 理, 遣 法,縣 右 使 又欲 粹下 者 責 者督 以 以 磐 爲 利啗之, 民苦之。 軱 反 捕 狀 神 遙之 其 置 一, 期 獄 具

之,以蘇民力。」由是運司遂罷。 復 入翰林爲學士,入謁宰相,首言:「方今害民之吏,轉運 阿合馬諷大臣,請合中書、尚書兩省爲 司 為甚, 至稅 一,拜右丞相 人白骨 :,宜罷 去

列

三公,陰欲奪其政柄。 舊,三公旣不 預 政 事,則不宜虛設。」其議遂沮。 有韶、 會議,磐言:「合兩省爲一,而以右丞相總之,實便,不然,則宜仍 遷太常少卿,乞致仕,不允

億萬計 惻 帝 磐言:「林廟戶 次者,殿中司糾察定罰,不應入而入者,準闌入罪,庶朝廷之禮,漸 有 疏 以天 差。 然憐之,盡原 曰:「按舊制 曲 時宮闕 下 阜 ,豈愛一六品官俸,不以待孔子哉。 宜令宣徽院,籍兩省而下百官姓名,各依班序,聽通事舍人傳 孔子 獄囚滋多,敕諸路自死罪以下,縱遣歸家,期秋八月,悉來京師聽決,囚 未建,朝儀未立,凡遇稱賀,臣庶雜 廟,歷代給民百戶,以供洒掃,復其家,至是,尚書省以括戶之故,盡 百家,歲賦 一天子宮門,不應入而入者,謂之闌入。 其罪。 他 (鈔不過六百貫,僅比一六品官終年俸耳。 日,命詞臣作詔,戒喻天下,皆不稱旨意,磐獨 且於府庫所益無多,其損 至帳殿前, 闌入之罪, 執法者患其諠 由第 可整 聖朝疆宇萬 國體甚大。」時論 呼 以縱囚 贊引,然後進。 一門至第三門, 肅。」於是儀制 擾, 不能禁。 之意命辭,帝 里, 如 收 期至,帝 財 避之。 爲民, 始定。 賦歲 磐上 其越 輕 重

之受祿亦可少安矣。」韶從之。 退者,得非生員 再 :乞致仕,不允。 (數少)、坐縻廪祿,有所不安耶?宜增益生員,使之施敎,則庶幾人材有成,衡 國子祭酒許衡將告歸,帝遣近臣問磐,磐言:「衡素廉介,意其所以求

喜

曰:「此股所欲言而

不能者,卿乃能爲朕言之。」嘉獎不已,取酒賜之。

月俸。磐不得已,復起。 堅乞致仕。 能退,彼旣不自知耻,朝廷亦不以爲非,甚不可也。」至是,以疾,請斷月俸毋給,自秋及春, 政,七十致仕,所以資其材力,閔其衰老,養其廉耻之心也。 今入仕者不限年,而老病者不 磐移 |疾家居,帝遣使存問,賜以名藥。 帝遣使慰諭之曰:「卿年雖老,非任劇務,何以辭爲。」仍詔祿之終身,併還所斷 醫嘗於會集議事之際,數言:「前代用人,二十從

罰罪,推廣恩信,所以撫安新附,銷弭寇盜。」其言要切,皆見施行。 卒難成。俟宋滅,徐圖之未晚也。」江南旣下,磐上疏,大略言:「禁戢軍士,選擇官吏,賞功 問 以便宜、磐言:「今方伐宋、當用吾全力、庶可一舉取之。若復分力東夷、恐曠日持 時 方伐宋,凡帷幄謀議,有所未決,卽遣使問之,磐所敷陳,每稱上意。帝將用兵日本, 人,功

與管民官常分彼此,豈暇顧細民之寃抑哉。」由是按察司得不罷。 畿州縣,尚有弗及,況能周偏外路千百城之事乎。若欲併入運司,運司專以營利增課爲職, 官污吏,侵害小民,無所控告,惟賴按察司爲之申理。若指爲冗官,一例罷去,則小民冤死 而 !無所訴矣。若曰京師有御史臺糾察四方之事,是大不然。夫御史臺,糾察朝廷百官、京 朝議汰冗官,權近私以按察司不便,欲併省之。聲奏疏曰:「各路州郡,去京師遙遠,貪

朝廷錄平宋功,遷至宰相執政者二十餘人,因議更定官制,磐奏疏曰:「歷代制度,有官

列傳第四十七 王磐

官,或賜五等爵號,如漢、唐封侯之制可也,不宜任以職位。」 **爵,有才有能,稱其所堪,處以職〔位〕,〔ē〕此人君御下之術也。臣以爲有功者,宜加遷散** 品,有爵號,有職位,官爵所以示榮寵,職位所以委事權。臣下有功有勞,隨其大小,酬以官

碧玉寶枕,因出賜之。 十,況無子嗣,他心欲何爲耶?」明日,帝遣侍臣以溫言慰撫,使無憂懼。後閱內府珍玩,有 曰:「臣赤心爲國,故敢以言,苟有他心,何爲從叛亂之地,冒萬死而來歸乎。今臣年已八 爲勿伐便。」帝震怒,謂非所宜言,且曰:「此在吾國法,言者不赦,汝豈有他心而然耶。」麐對 日本之役,師行有期,磐入諫曰:「日本小夷,海道險遠,勝之則不武,不勝則損威,臣以

平判官,以便養。每大臣燕見,帝數問譽起居狀,始終眷顧不衰。 子賜宴聖安寺,公卿百官出送麗澤門外,縉紳以爲榮。 皇太子聞其去,召入宮,賜食,慰問良久。行之日,公卿百官,皆設宴以餞。 磐以年老,累乞骸骨。 丞相和禮霍孫爲言,詔允其請,進資德大夫,致仕,仍給半俸終 磐無子,命其壻著作郎李穉賓爲東 明日,皇太

胡 側 <u>祇遹、孟祺、李謙,後皆爲名臣。</u> 目,弗顧 **轡資性剛方,閑居不妄言笑,每奏對,必以正,不肯阿意承順,帝嘗以古直** 也。 阿合馬方得權,致重幣求文于碑,磐拒弗與。 年至九十二,卒之夕,有大星隕正寢之東。 所薦宋衜、雷膺、 魏初、 稱之,雖權倖 贈端貞雅亮 徐琰、

佐治功臣、太傅、開府儀同三司,追封洺國公,諡文忠。

#### 王鶚

曰:「鶚也。是兒其有大名乎」」因名之。 王鶚字百一,曹州東明人。曾祖成,祖立,父琛。鶚始生,有大鳥止於庭,鄉先生張頹 幼聰悟,日誦千餘言,長工詞賦。

陷 書恒山公武仙進兵,金主覽書,問誰爲之,右丞完顏仲德曰:「前翰林應奉王鶚也。」曰:「朕 即位時狀元耶。」召見,惜擢用之晚。起復,授尚書省右司都事,陞左右司郎中。三年,蔡 州 ,將被殺,萬戶張柔聞其名,救之,輦歸,舘于保州 城父令。七年,改同知申州事,行蔡州汝陽令,丁母憂。天興二年,金主遷蔡,詔尚書省移 金正大元年,中進士第一甲第一人出身,授應奉翰林文字。六年,授歸德府判官,行亳

居大都,賜宅一所。嘗因見,請曰:「天兵克蔡,金主自縊,其奉御絳山焚葬汝水之傍,禮爲 舊君有服,願往葬祭。」世祖義而許之,至則爲河水所沒,設具牲酒,爲位而哭。 安知異日不能行之耶!歲餘,乞還,賜以馬,仍命近侍闊闊、柴禛等五人從之學。四繼命徙 經、書、易,及齊家治國之道,古今事物之變,每夜分,乃罷。 甲辰冬,世祖在藩邸,訪求遺逸之士,遣使聘鶚。及至,使者數輩迎勞,召對。 世祖曰:「我雖未能卽行汝言, 進講孝

非

爲己之學也。」

鶚

性樂易,

子之綱承其祀。

有

大事則遣使就問之。

臣復助之,衆知

相,吾不能插驢尾矣。」振袖而 立翰林學士院,鶚遂薦李冶、李昶、王磐、徐世隆、高鳴爲學士。 之後,設內外學士院,史册爛然,號稱文治。 ,附修遼、金二史。」又言:「唐太宗始定天下,置弘文舘學士十八人,宋太宗承太祖 有言事者,謂宰執非其 服者,皆出太祖皇帝廟謨雄 其非,莫敢言。 爲文章不事雕 著論語集義一 之綱,官至翰林侍講學士。 十年,卒,年八十四,諡文康 中統。 主 人,詔儒臣廷議 得失興廢 起,奸計爲之中止。 飾, 卷,汝南遺事二卷,詩文四十卷,日應物集。 鶚奮然擲筆曰:「吾以衰老之年,無以 首授翰林學 嘗曰:「學者當以窮 斷 可考者 所致,若不 可任宰相者。 堂堂國朝,豈無英才如唐、宋者乎」皆從之,始 ,以有史在 士承旨,制誥典章, 莊 乘時紀錄, 年,乞致仕,詔 理爲先,分章析句,乃經生舉子之業, 也。 時 िया 我國 合馬巧佞,欲乘隙 復奏立十道提舉學校官 竊恐久而遺亡,宜置局 皆所裁定。 家以神 有司 報國,卽欲舉任此 ·歲給廪祿終其身, 武定四方,天戈所 無子,以壻周鐸 至元 取相位,大 元年,加 纂就 人為 開 創

實錄

臨,無不臣

資

善大夫。

上奏:「自古帝

庚申,

世祖卽位,

建元·

#### 三七五八

#### 高鳴

西域,聞其賢,遣使者三輩召之,鳴乃起,爲王陳西征二十餘策,王數稱善,卽薦爲彰德路 高鳴字雄飛,真定人,少以文學知名。河東元裕上書薦之,不報。 諸王旭烈兀將征

臣職在奉憲,願舉察之,毋爲員外置人也。」 爲侍御史,風紀條章,多其裁定。尋立四道按察司,選任名士,鳴所薦居多,時論咸稱其知 人。天下初定,中書、樞密事多壅滯,言者請置督事官各二人,鳴曰:「官得人,自無滯政, 世祖卽位,賜誥命金符,已而召爲翰林學士,兼太常少卿。 至元五年,立御史臺,以鳴

議將從之,鳴諫曰:「制令天下上死囚,必待論報,所以重用刑、惜民生也。 官。不如一省便。」世祖深然之,議遂罷。川、陝盜起,省臣患之,請專戮其尤者以止盜,朝 萃于一堂,連署參決,自発失政,豈必別官異坐,而後無失政乎!故曰:政貴得人,不貴多 合,則有駁正,或封還詔書,議合,則還移中書,中書移尙書,尙書乃下六部、郡國。 方今天 下大於古,而事益繁,取決一省,猶曰有壅,況三省乎!且多置官者,求殆失政也,但使賢俊 七年,議立三省,鳴上封事曰:「臣聞三省,設自近古,其法由中書出政,移門下,議不 今從其請, 是開

列傳第四十七 高鳴 李冶

天下擅殺之路,害仁政甚大。」世祖曰「善」,令速止之。

年六十六,有文集五十卷。 政,就問可也。」賜太官酒肉慰勞之,其見敬禮如此。九年,遷東禮部尚書。十一年,病卒, 鳴每以敢言被上知,嘗入內,值大風雪,帝謂御史大夫塔察兒曰:「高學士年老,後有大

#### 李冶

冶微服北渡,流落忻、崞間,聚書環堵,人所不堪,冶處之裕如也。 李冶字仁卿,真定變城人。登金進士第,調高陵簿,未上,辟知鈞州事。 歲壬辰,城潰,

勢然耳。今儒生有如魏璠、王鶚、李獻卿、蘭光庭、趙復、郝經、王博文輩,皆有用之材,又皆 魏徵之賢,實難其人。」又問今之人材賢否,對曰:「天下未嘗乏材,求則得之,舍則失之,理 讜論,知無不言,以唐諍臣觀之,徵爲第一。<br/>彬伐江南,未嘗妄殺一人,儗之方叔、召虎可 也。漢之韓、彭、衞、霍,在所不論。」又問今之臣有如魏徵者乎,對曰:「今以側媚成風,欲求 如,對曰:「二人將略短少,任之不疑,此金所以亡也。」又問魏徵、曹彬何如,對曰:「徵忠言 他辭。」旣至,問河南居官者孰賢,對曰:「險夷一節,惟完顏仲德。」又問完顏合答及蒲瓦何 世祖在潛邸,聞其賢,遣使召之,且曰:「素聞仁卿學優才贍,潛德不耀,久欲一見,其勿

亢

賢王 誠能旁求於外,將見集於明廷矣。」 所嘗聘問者、舉而用之,何所不可,但恐用之不盡耳。 然四海之廣,豈止此數子哉。 王

辱,有罪者或反獲寵,是無法度也。 度、正紀綱而已。 名無實則亂,進小人退君子則亂,如是而治天下,豈不難於登天乎。 且爲治之道,不過立法 治,控名責實則治,進君子退小人則治,如是而治天下,豈不易於反掌乎。 自縱恣,以私害公,是無法度也。 又問天下當何以治之,對曰:「夫治天下,難則難於登天,易則易於反掌。 紀綱者,上下相維持,法度者,賞罰示懲勸。今則大官小吏,下至編氓,皆 有功者未必得賞,有罪者未必被罰,甚則有功者或反受 法度廢、紀綱壞、天下不變亂,已爲幸矣。」 無法度則亂,有 蓋有法度則

罰,愼征討,上當天心,下協 常,今之地震,或姦邪在側,或女謁盛行,或讒慝交至,或刑罰失中,或征伐驟舉,五者必有 于此矣。 又問昨地震何如,對曰:「天裂爲陽不足,地震爲陰有餘。夫地道,陰也,陰太盛, 夫天之愛君,如愛其子,故示此以警之耳。 人意,則可轉咎爲休矣。」世祖 苟能辨姦邪,去女謁, 嘉納之。 屛讒慝, 省刑 則變

懇求 敬齋文集四十卷,壁書聚削十二卷,泛說四十卷,古今(難)[黈]四十卷,臣測圓(鏡海)[海鏡] 水還山。 冶晚家元氏,買田封龍 至元二年,再以學士召,就職期月,復以老病辭去,卒于家,年八十八。 山下,學徒益衆。 及世祖即位,復聘之,欲處以淸要,治以老病, 所著有

#### 李昶

士,無之,時限年十六,已能爲程文,乃更其名曰彥。 廷試,不第,推恩授彭城簿,志壹鬱不樂,遂復求試。 東平敎授以卒。 二甲第二人,世 李昶字士都,東平須城人。父世弼,從外家受孫明復春秋,得其宗旨。金貞祐初,三赴 興定二年,父子廷試,昶果以春秋中第 。一夕,夢在李彥牓下及第,閱計偕之

州溫縣丞。 譏議紛紜, 監試者遠其次舍, 伺察甚嚴。 | 昶肆筆數千言, 比午, 已脫藁。釋褐, 授徵事郎、 孟 昶 穎悟過人,讀書如夙習,無故不出戶外,鄰里罕識其面。初從父入科場,儕輩少之, 正大改元,超授儒林郎、賜緋魚袋、鄭州河陰簿。三年,召試尚書省掾,再調漕

**運提舉**。

相尙,飲宴無度,庫藏空虛,百姓匱乏,若猶循習故常,恐或生變。惟閤下接納正士,黔遠小 嗣 國兵下河南,奉親還鄉里。行臺嚴實,辟授都事,改行軍萬戶府知事。實卒,子忠濟

列

士,若李謙、馬紹 浮華,敦樸 法 制 寢密, 、吳衍輩,皆出 素,損騎從,省宴游,雖不能救已然之失,尚可以弭未然之禍。」時朝 忠濟縱侈自若,昶以親老求解,不許。 其門 俄以父憂去官,杜門敎授, 一時名 廷 裁 抑

明年,世祖即位,召至開平,訪以國事 賢、立法、賞罰、君道、務本、淸源 歲己未,世祖伐宋,次濮州,聞昶名,召見,問治國用兵之要。起上疏:論治國,則以用 爲對;論 7, 昶知 用兵、則以伐罪、救民、不嗜殺爲對。 無不言,眷遇益隆。 世祖嘉納之。

供 十六七,止驗見戶,應輸循恐不逮,復令包補逃故,必致艱難。 良 以渴 億,則諸 聖上龍飛,首頒明詔,天下之人,如 時徵需煩重,行中書省科徵稅賦 仰之心太切,興除之政未孚故也。 人皆能之,豈聖上擢賢更化之意哉。」於是省府爲蠲逋戶之賦 ,雖逋戶不貸,昶移書時相,其略曰:「百姓困於弊政久 獲更生,拭目傾耳,以徯太平,半年之間 側聞 . 欲據丁巳戶籍,科徵租稅,比之見戶 苟不以撫字安集爲心,惟 ,人漸失望, , 或加多

善久之。 以 願 足 日 用,寬以養民,安不忘危,治不忘亂,恒以北征宵旰之勤,永爲南面逸豫之戒。」 新其德,雖休勿休,戰勝 中統 世祖嘗燕處,望見昶,輒斂容曰:「李秀才至矣。」其見敬禮如此。 二年春,內難平,昶上表賀,因進諷 不矜,功成不有,和輯宗親,撫綏將士,增修庶政 諫曰:「患難所以存儆戒,禍亂 將以開聖明,伏 會嚴忠濟罷 ,選用 百官、儉 世祖 以以 稱

其弟忠範代之,忠範表請昶師事之,特授翰林侍講學士,行東平路總管軍民同議官。 昶條

十二事,剗除宿弊。

年,授山東東西道提刑按察使,務持大體,不事苛細,未幾致仕。二十二年,昶年已八十〇〇 阿合馬議陞制國用使司爲尚書省,昶請老以歸。七年,詔授南京路總管兼府尹,不赴。 書,品格條式、選舉禮文之事,多所裁定。凡議大政,宰相延置上座,傾聽其說。 [三], [3] 復遣使徵之,以老疾辭,賜田千畝。二十六年卒,年八十有七。 至元元年,遷轉之制行,滅併路、府、州、縣官員,於是謝事家居。五年,起爲吏禮部尙 六年,姦臣

訂 ,附以己見,爲孟子權衡遺說五卷。 成編,及得朱氏、張氏解,往往脗合,其書遂不復出。獨取孟子舊說新說矛盾者,參考歸 |飛嘗集春秋諸家之說折中之,日春秋左氏遺意二十卷,早年讀語、孟,見先儒之失,考

#### 劉肅

羅 無正贓,殺之冤。」。全主怒,有近侍夜見肅,具道其旨,肅曰:「辨析冤獄,我職也,惜一己而戕 反珠,盜不時得,逮繫貨珠牙儈及藏吏,誣服者十一人。 刑部議皆置極刑,肅執之曰:「盜 劉肅字才卿,威州洺水人。金興定二年詞賦進士。嘗爲尚書省令史。時有盜內藏官

列

十一人之命,可乎」明日, 詣省辨愈力。右司郎中張天綱曰:「吾爲汝具奏辨析之。」奏入,

金主悟,囚得不死。

富。 杖八十。」奏可。 准。」告者以謀叛論,肅曰:「淮限宋境,一水耳,果欲叛,不難往也,口雖言而心無實,準律當 瀕淮民有竄入|宋境,籍爲兵而優其糧,間有歸者,頗艱於衣食,時出怨言曰:「不如渡 調新蔡令。先時,縣賦民以牛多寡爲差,民匿不耕,肅至,命樹畜繁者不加賦,民遂殷 繼擢戶部主事。

輸綿十萬兩、色絹萬匹,民不能堪,肅贊實奏罷之。 (庚)[壬]子,云 世祖居潛邸,以肅爲邢 金亡,依東平嚴實,辟行尚書省左司員外郎,又改行軍萬戶府經歷。 東平歲賦絲銀,復

州安撫使,肅興鐵冶,及行楮幣,公私賴焉。

官以新鈔如數易舊鈔。 憲,多所議定。 于外者,凡八千餘貫,公私囂然,莫知所措。 中統元年,擢眞定宣撫使。 未幾,兼商議中書省事。三年,致仕,給半俸。 中書從其第三策,遂降鈔五十萬貫。 時中統新鈔行,罷(鈔銀)[銀鈔] 不用。[10] 真定以銀鈔交通 肅建三策:一曰仍用舊鈔,二曰新舊棄用,三曰 二年,授左三部尚書,官曹典 四年,卒,年七十六。

性舒緩,有執守。 嘗集諸家易說,曰讀易備忘。 後累贈推忠贊治功臣、榮祿大夫、上

柱國、大司徒、邢國公、諡文獻。

## 王思廉

也。」每侍讀、帝命御史大夫玉速帖木兒、太師月赤察兒、御史中丞撒里蠻、翰林學士承旨 官引 謝 立察等,成聽受焉。 之也。」遂召見,授符寶局掌書。十三年,姚樞舉爲昭文舘待制,遷奉訓大夫、符寶局直 歸。 至皇后閤,講衍 十四年,改翰林待制, 王 思廉字仲常,真定獲鹿人。 至元十年,董文忠薦之,世祖問文忠曰:「汝何 帝嘗御延春閣,大賚羣臣,俾十人爲列以進,思廉偶在衞士之列,帝責 其說, 后曰:「是誠有益於宸衷。 嘗進讀通鑑,至唐太宗有殺魏徵語,及長孫皇后進諫事,帝 幼師太原元好問,旣冠,張德耀宣撫河東,辟掌 由 爾宜擇善言進講,愼勿以瀆辭煩 知王思廉賢?」對曰:「鄉人之善者稱 書記, 命內 -掇 復 聽

聚山林 詳 大都,辭連樞密副使張易。 也。 十八年,進中順大夫、典瑞少監。十九年,帝幸白海,時千戶王著,矯殺奸臣 贼害民物謂之亂,張易之事,臣實不能詳也。」帝曰:「朕自卽位以來,如李壇之不臣, 帝曰:「反已反已,何未詳也。」思廉徐奏曰:「僭號改元謂之反,亡入他國謂 帝召思廉至行殿,屏左右,問曰:「張易反,若知之乎。」對曰:「未 阿合馬於 之叛,羣

|董文忠曰:「思廉儒臣,豈宜列衞

士

ا \_

列

豈以我若漢高帝、趙太祖,遽陟帝位者乎。]思廉曰:「陛下神聖天縱,前代之君不足比也。」 帝歎曰:「朕往者,有問於竇默,其應如響,蓋心口不相違,故不思而得,朕今有問汝,能然 乎。且張易所爲,張仲謙知之否。」思廉卽對曰:「仲謙不知。」帝曰:「何以明之。」對曰:「一

人不相安,臣故知其不知也。」

判官。 謂留守段貞曰:「藩王反側,地大故也,漢鼂錯削地之策,實爲良圖,盍爲上言之。」貞見帝, 遂以聞,帝曰:「汝何能出是言也。」貞以思廉對,帝嘉之。二十九年,遷正議大夫、樞密院 固辭。二十三年,改嘉議大夫、同知大都留守,兼少府監事。藩王乃顏叛,帝親征,思廉間 建學官,俾左右近侍,嘗親正學,必能裨輔明德。」裕宗然之。裕宗嘗欲買甲第賜思廉,思廉 馬,給內廐馬五匹,盜竊所賜玉帶,更以玉帶賜之。一裕宗居東宮,思廉進曰:「殿下府中,宜 二十年,陞太監。思廉以儒素進,帝眷注優渥。嘗疾,賜御藥,顧問安否,扈蹕,失所乘

工部 奉大夫、太子賓客。 : 尚書,拜征東行省參知政事。 七年,總管大名路。 大德元年,成宗卽位,仁三遷中奉大夫、翰林學士,仍樞密院判官,以病歸。 八年,召爲集賢學士。十一年,授正 三年,起爲

仁宗卽位,以翰林學士承旨、資善大夫致仕。 延祐七年卒,年八十三。 贈翰林學士承

旨、資德大夫、河南江北等處行中書省右丞、上護軍,追封恒山郡公,諡文恭

李謙字受益,鄆之東阿人。 祖元,以醫著名。父唐佐,性恬退,不喜仕進。

爲 東平府教授,生徒四集,累官萬戶府經歷,復教授東平。 束脩 謙幼有成 ·,)謙辭曰:「家幸非甚貧者,豈可聚貨以自殖乎!」 人風,始就學,日記數千言,爲賦有聲,與徐世隆、孟祺、閻復齊名,而 先時, 教授無俸, 郡斂儒戶 謙爲首。

兩備

事:曰正心,曰睦親,曰崇儉,曰幾諫,曰戢兵,曰親賢,曰尙文,曰定律,曰正名,曰革弊。 制,扈駕至上都,賜以銀壺、藤枕。十八年,陞直學士,爲太子左諭德,侍裕宗於東宮。 殿,飲羣臣酒,世祖曰:「聞卿不飲,然能爲朕强飲乎。」因賜蒲萄酒一 裕宗崩,世祖又命傅成宗於潛邸,所至以賺自隨。轉侍讀學士。 汝不勝。」卽令三近侍扶掖使出。 翰林學士王譽以謙名聞,召爲應奉翰林文字,一時制誥,多出其手。 二十六年,以足疾辭歸 世祖深加器重,嘗賜坐便 鍾,曰:「此極醉人,恐 至元十五年,陞待 陳十

良醫,能愈疾。 三十一年,成宗卽位,驛召至上都。 旣見,勞曰:「朕知卿有疾,然京師去家不遠,且多 卿當與謀國政,餘不以勞卿也。」陞學士。一元貞初,引疾還家。 大德六年,召

列 傅

第 四

+ 七

李 鮾

爲翰林承旨,以年七十一,乞致仕。 九年,叉召。 至大元年,給半俸。仁宗爲皇太子,徵爲

太子少傅,謙皆力辭。

十九。 遷集賢大學士、榮祿大夫,致仕,加賜銀一百五十兩,金織幣及帛各三匹。歸,卒于家,年七 振肅紀綱、糾察內外,臺憲之官尤當選素著清望、深明治體、不事苛細者爲之。」帝嘉納焉。 本,課農桑以豐衣食之源,興學校以廣人材之路,頒律令使民不犯,練士卒居安慮危。 百官,崇孝治以先天下,選賢能以居輔相之位,廣視聽以通上下之情,恤貧乏以重邦家之 仁宗卽位,召十六人,謙居其首。乃力疾見帝于行在,疏言九事,其略曰:「正心術以正 至於

謙文章醇厚有古風,不尚浮巧,學者宗之,號野齋先生。 子侃,官至大名路總管。

# 徐世隆

「汝年少,學未至,毋急仕進,更當讀書,多識往事,以益智識,俟三十入官,未晚也。」世隆遂 徐世隆字威卿,陳州西華人。 弱冠,登金正大四年進士第,辟爲縣令。 其父戒世隆曰:

辭官。益篤于學。

歲壬辰,父歿。 癸巳,世隆奉母北渡河,嚴實招致東平幕府,俾掌書記。 世隆勸實收養

列傳第四十七 徐世隆

邸,召 濟,以世隆爲 寒 太常登歌 人 者,不嗜殺 見于 時 樂, H 名 東平行臺經歷,於是益贊忠濟興學養士 世 月 人,天下 上 祖遣使取之觀,世隆典領以行, Щ 多 ·歸之。 胩 可定、況蕞爾 方 圖 憲宗 征 雲南,以問 即位, 之西南 以爲 世隆 夷 拘惟燕京路課稅官, 乎 對 \_! |世 旣 日 見, 三孟子 祖 世 日二二 祖 有言 一欲留 誠 如 世隆 『不嗜殺 一之,世隆以 卿言,吾 固辭 事濟 人 0 者 母 壬 矣。」 老辭 能 子, 之。」夫 實 世 時 實子忠 祖 得 在 金 君 潛

還東平, 兼 干 數 曰:「責當 天 「汝爲 提 ,賜銀三十鋌。 以 舉 萬 中 京畿 本 計, 統 請增宮縣大樂、文武二舞,令舊 朕 路 我 元 芻秣 學校 根 直 坐。 年, 本 解進讀,我將聽之。」書成,帝命翰林承旨安藏譯寫 擢 地, 與 事。 逐 二年,移治順天,歲饑,世 其什器, 燕京等路宣 弗爲備,馬果不至。 煩擾之事, 必不為 四年,世 前 祖問堯、舜、禹、湯爲 期 一撫使, 戒備 世隆以新民善俗為務。 之。 世隆 清滄鹽課, 工教習,以備 隆 馬將不 曰:「國馬牧於 發廪貸之,全活 君之道,世隆取書所載帝 來。」東白:「此軍需 前政 大祀,制可。 虧 北方,往 不 甚衆。 及額, 中 書省檄諸路養禁衞 以進。 年無飼於南 世隆綜 三年, 除 世, 世隆 其責 宣撫 覈之,得增羨若 王 太常卿 事以對,帝喜 (勿輕。) 者。 司 罷 以掌之, 之羸馬, 上新 世 世 隆 隆 臨

隆奏三陛下帝中國,當行 至元 元 年,遷翰林侍講學士,兼太常卿,朝廷大政諮訪而後行,詔命典册多出 中國事。 事之大者,首惟祭祀,祭必有廟。」因以圖上,乞敕有司 【其手。 以

時興建,從之,踰年而廟成。 **遂迎祖宗神御,奉安太室,而大饗禮成。帝悅,賞賜優渥。** 

家,萬國會同,朝廷之禮,不可不肅,宜定百官朝會儀。」從之。七年,遷吏部尚書,世隆以 俄兼戶部侍郎,承詔議立三省:遂定內外官制上之。時朝儀未立,世隆奏曰:「今四海

銓選無可守之法,爲撰選曹八議。

卽以聞,已而帝意悟,其事亦寢。十七年,召爲翰林學士,又召爲集賢學士,皆以疾辭。 不從,世隆獨抗章辯明,行臺是之,釋不問。會征日本,世隆上疏諫止,語頗剴切,當路者不 財,有司繫其妻孥徵之。世隆曰:「瓊所匿者,故宋之物,豈得與今盜官財者同論耶?」同僚 數百人,世隆剖析詿誤者十八九,悉縱遣之。十五年,移淮東。|宋將|許瓊家童,告瓊匿官庫 亦化服,期年而政成,郡人頌之。十四年,起爲山東提刑按察使。時有妖言獄,所司逮捕凡 九年,乞補外,佩虎符,爲東昌路總管。至郡,專務以德率下,不事鞭箠,吏不忍欺,民

病辭,附奏便宜九事。 故,尤精律令,善決疑獄。二十二年,安童再入相,奏世隆雖老,尚可用。 世隆儀觀魁梧,襟度宏博,慈祥樂易。人忤之,無慍色。喜賓客,樂施與,明習前代典 賜田十頃。時年八十,卒。所著有瀛洲集百卷、文集若干卷。 遣使召之,仍以老

孟祺

孟祺字德卿,宿州符離 人。 世以財雄鄉里。 父仁,業儒,有節行。 壬辰,北渡,寓濟州

魚臺,州帥石天祿禮之,辟兼詳議府事。

事郎、山 應奉翰林文字,兼太常博士。 試,登上選,辟掌書記。 祺幼敏悟,善騎射,早知問學,侍父徙居東平。 東東西道勸農 副使 廉希憲、宋子貞皆器遇之,以聞于朝,擢國 時典册,多出其手。 時嚴實修學校,招生徒,立考試法,祺就 至元七年,持節使高麗,還,稱旨,授承 史院編修官。 遷從仕郎、

虜掠. 速進, 伯顏以兵事詣 伯顏曰:「汝言正合吾意。」乃草書,遣人至臨安,以安慰之,宋乃不復議遷閩 盜起臨安,三百年之積,焚蕩無遺矣。莫若以計安之,令彼不懼,正如取果,稍待時日耳。」 省諮議。 ,爭趨臨安,伯顏問計,祺對曰:「宋人之計,惟有簋閩爾。 十二年,丞相伯顏將兵伐宋。 以奪彼氣。」如其言,遂大破之。伯顏聞之,喜曰:「不意書生乃能 久之,遷郎中,伯顏雅信任之。 闕,政無大小,减與執政並裁決之。及戰焦山,宋軍 詔選宿望博學、可贊畫大計者與俱行,遂授祺承直郎、行 時軍書塡 塞,祺酬應剖決,略無疑滯。 若以兵迫之,彼必速逃,一 下 流。 知兵若是」諸將利 祺曰:「不若乘勢 師 駐 建康, 旦

三鼓,議未決,祺正色曰:「國勢至此,夫復何待」」遂定議。 先是,宋降表稱姪,稱皇帝,屢拒 不納。麒自請爲使,徵降表。 書成,宋謝太后內批用寶,攜之 至則會宋相于三省。夜

列

傅

第四

+

七

孟祺

所宜親,一有不謹,恐異時姦人妄相染污,終不可明。」遂止。 以 出,復起謝太后於內殿,取國璽十二枚出。伯顏將親封之,祺止之曰:「管鑰自有主者,非

虎符。 參知政事、護軍、魯郡公、諡文襄。 子二人:遵,遹。 太中大夫、浙東海右道提刑按察使,疾不赴。卒,年五十一。贈宣忠安遠功臣、中奉大夫、 江南平,伯顏奏祺前後功多,且言祺可任重。有旨褒陞,授少中大夫、嘉興路總管,佩 献至,首以興學爲務,創立規制。 在官未久,竟以疾解官,歸東平。 至元十八年,擢

#### 閻復

閻復字子婦,三其先平陽和州人。 祖衍,仕金, 歿王事。 父忠, 避兵山東之高唐, 遂

家焉。

儒 康曄。 復始生,有奇光照室。 時嚴實領東平行臺,招諸生肄進士業,迎元好問校試其文,預選者四人,復爲首 性簡重,美丰儀。 七歲讀書,穎悟絕人,弱冠入東平學,師事名

徐琰、李謙、孟祺次之。

同館副使,無接伴使。扈駕上京,賦應制詩二篇,寓規諷意,世祖顧和 歲己未,始掌書記於行臺,擢御史掾。 至元八年,用王磐薦,爲翰林應奉, 禮霍 孫曰:「有才如此, 以才選充會

列 傳 第 兀 + 七 图 徇

十六年,入爲翰 年,改集賢侍講 何 可 不 用」十二年,陞翰林修撰。 林直 學士,同領 學士,以州郡校官多不職,建議定銓選之法。十九年,陞侍講 十四年, 出僉河 北河南道提刑按察司 事, 階奉 學士,明 訓

(會同

館

事

哥輔 司為 如。〕復屢謝不足勝任,帝謂侍臣曰:「書生識義理,存謙讓,是也,勿强。」 書省罷,復立中書省,帝勵精圖治,急於擇相,一日,召入便殿, 政碑,桑哥旣敗,詔有司踣其碑,復等亦坐是觅官 肅 二十三年,陞翰林學士,帝屢召至榻前, 政 廉訪司,首命復為浙西道肅政 廉訪 使。 面諭詔旨,具草以進,帝稱善。 先是, 姦臣桑哥當國,嘗有旨命翰林撰桑 諭之曰:「朕欲命卿 御史臺改提刑按 二十八年,尚 執 何 察

以徴 人,卿 星變,又上疏言「定律令,頒封贈,增俸給,通調內外官」。 有司 翰林學士。 元貞元年,上疏言:「京師宜首建宣聖廟學,定用釋奠雅樂。」從之。又言:「曲阜守塚 租受杖,非所 併入民籍,宜復之。」其後詔 三十一年,成宗即位,以舊臣召入朝,賜重錦 爲股 舉所知。」 二年,詔賜楮幣萬貫。 以厲廉隅。 復 以哈剌哈孫對,帝大喜,卽遣使召入,相之;復亦拜翰林學士承旨,階 江南 賜孔林酒 公田 四年,帝召至楊前,密諭之曰:「中書庶 租重,宜減,以貸貧民。」後多采用。 掃二十八戶 、玉環、白金,除集賢學士,階正 、、祀田 且曰:「古者、刑不上大夫、今郡守 五千畝,皆復 務 之請也。 繁重 大德 一,左相 元年, 三年,因 議 万, 昨 大夫。 難 仍遷

# 正奉大夫。

時仁宗居東宮,賜以重錦,俾公卿祖道都門外。及卽位,遣使召復,復以病辭。 階榮祿大夫,遙授平章政事,餘如故,復力辭,不許。 月卒,年七十七,諡文康。 十一年春,武宗踐祚,復首陳三事:曰「惜名器, 有(靖)〔静〕軒集五十卷。二言 明賞罰,擇人材」,言皆剴切。 上疏乞骸骨,詔從其請,給半俸終養。 皇慶元年三 未幾,進

## 校勘記

- 參議行(臺)[省]事一據元名臣事略卷一二引王磐墓碑改。新元史已校。
- (邢)[衡]水縣 道光本與元名臣事略卷一二引王磐墓碑合,從改。按元無「邢水縣」, 衡水縣屬

腹裏眞定路深州。

- [ ] 」處以職[位] 原闕一字,從北監本補。
- [ B] 柴禎 疑「禎」當作「楨」。見卷五校勘記[]]。
- つまし 古今(難)〔黈〕 據元名臣事略卷一三李文忠公改。 按此書今存。
- **一次**し 測圓(鏡海)[海鏡] 據元名臣事略卷一三李文忠公改。 按此書今存。 新編已校。
- フセン 益古衍(疑)[段] 據元名臣事略卷一三李文忠公改。 按此書今存。 新編已校。

- [八] 二十二年昶年已八十(三CIII) 二年當八十三歲。 從北監本改。 按後文有「二十六年卒,年八十有七」,至元二十
- [元] (庚)[壬]子 據元名臣事略卷一〇劉文獻公改。按庚子係元太宗十二年,與此處史實無涉。
- [10] (鈔銀)[銀鈔] 據元名臣事略卷一〇引商挺劉肅墓碑改。按下文亦作「銀鈔」。蒙史已校。
- 〇二〕大德元年成宗即位 按元成宗即位于至元三十一年,大德元年爲其在位第四年。 此處史文有
- 閻復字子靖 清容集卷二七閻復神道碑「子靖」作「子靜」,新元史從改,疑是。

舛誤。

(二三) (端)(静)軒集 據清容集卷二七閻復神道碑改。新元史已校。

## **元史卷一百六十**

## 列傳第四十八

楊大淵 文安附

恭戦 | 楫爲管軍總管,從諸王攻禮義城。己未冬,拜大淵侍郎、都行省,悉以閩外之寄委之。 言于朝。 進攻禮義城,掠其饋運,獲總管黃文才、路鈴 高坦之以歸。 二年秋,調兵出通川,與宋將鮮 **閬州之大獲城,遣宋降臣王仲入招大淵,大淵殺之。憲宗怒,督諸軍力攻,大淵懼,遂以城** 憲宗命誅之,汪田哥諫止,乃免。命以其兵從,招降蓬、廣安諸郡,進攻釣魚山。 世祖中統元年,詔諭大淵曰:「尙厲忠貞之節,共成康乂之功。」大淵拜命踴躍,卽遣兵 楊大淵,天水人也。與兄大全、弟大楫,皆仕宋。 獲統制白繼源。 詔給虎符一、金符五、銀符五十七,令論功定官,以名聞。 秦蜀行省以大淵及靑居山征南都元帥欽察麾下將校六十三人有功, 大淵總兵守閬州。歲戊午,憲宗兵至 三年春,世祖命出開、 擢大

列

傳

第

與宋兵戰于 卒田 ,復戰于巴渠,擒其 知 軍 范燮、統制魏 興、路分黄 (迪、節 幹 陳 子 潤

兵來 秋七月,詔 後賞合州之功,復賜白金五 宋夔路提刑 寨,守將盧埴降。 爭。 先是, 文安悉力備禦,大淵 以大淵麾下將士有 大淵 鄭 子 建言, 發曰:「蟠龍, 復使文安相 謂取吳必先 十兩。 聞 功, 夔之咽 夔、達要衝 有宋兵, 賜金符十、銀符十九 取蜀 大淵 喉 欲於 城蟠 卽遣姪安撫使文仲將 取蜀 使敵 利州 必先據變, 龍 得據之, 大安軍 Щ ,別給海靑符二,俾事 Щ 則 以 四 乃遣其姪文安 鹽易 夔 面 難守矣, 巖 兵往援。 軍 阻 糧,請于朝 न् 此 以 文宋 宋兵宵遁,追敗之。 必爭之地 進攻退守,城未畢, 亟 门從之。 巴渠 則 馳 也。」遂率 以 至萬安 別,其

店、 漢軍 淵 嘯城,以 南 歸 冬,大淵 鈔 逼宋大良城,不踰 文安擒 一百錠。 入觀,拜東 之以 、聞, 韶: jij 都 時 談琳。 而 元 就。 帥 俾 五月, 兀 與 年,宋賈似道遣 (征南 世 都元 祖以大淵 帥 欽 及張 楊琳 察 同 大悦復 署 齎空名告身 事。 神 大淵還,復於渠江濱 Щ 功 及 〈蠟書、 詔獎諭 金幣, 仍賜蒙 誘大 築虎

屬 宜 於 加 內地,乃自率軍掩襲,遇之于椒坪,連戰三日,擒祁昌、向良等,俘獲輜重 優恤。 至元元年,大淵進花羅 冬十月, 今後以此 大淵諜知宋總統祁昌 自給,俟有旨乃進。」旣 、紅邊絹各百 由 間道運糧入得漢城,〔〕〕 五十段。 而大淵擅殺 詔曰:「所貢幣帛,已見忠勤,卿守邊陲, 其部將王仲,詔戒敕之, 并欲遷其郡守向良 以數千計。 及 令発 官官 1吏親 籍仲 明

列傳第四十八 楊大淵

日,宋 向 良等家人,往招得漢城,未下。 都統張思廣引兵來援,復大破之,擒其將盛總管,及祁昌之弟。 四月,大淵 以 疾卒。 八年,追封大淵閬 二年,大淵遣文安,以 中郡公,諡 肅翼。

子文粲,襲爲閬蓬廣安順慶夔府等路都元帥。 兄子文安。

兵攻大獲,大淵以郡降,授侍郎、都行省,文仲亦授安撫使。 使,諡愍忠,官其長子文仲。文安方二歲,母劉氏鞠之,依叔父大淵于閬州。 文安字泰叔,父大全,仕宋守敍州。 壬寅、國兵入蜀、大全戰死、贈武節大夫、眉州防禦 戊午,憲宗以

坦之。 遁,文安追擊,大敗之。 主盧植降。〔三〕遂築蟠龍城,以據夔、達要路。 范燮、統制魏興、黃迪、陳子閨等。曰授文安開達忠萬梁山等處招討使。 中統元年,授文安監軍。 二年,復出通川,與宋將鮮恭大戰,擒統制白繼源。三年,出開、達,戰屢勝, 四年,佩銀符,陞千戶,監軍如故,進築虎嘯城,以困 攻禮義城、殺傷甚衆、奪其糧船、繞出通川、獲宋將黃文才、高 宋兵來爭,相持半月,文仲以兵來援,宋兵宵 軍於巴渠,萬安寨 大良。 擒知軍

命文安赴援,敗宋師于射洪之納垻,斬獲甚衆。宋都統祁昌以重兵運糧餉得漢,且遷其官 襲,又敗之,擒裨將陳亮。 至元元年,宋都統張喜引兵攻蟠龍,大戰,敗之,喜潛師宵遁,出得漢城,文安遣 復築方斗城,爲蟠龍聲援,令裨將高先守之。 宋兵攻潼川,行省 兵追

屬 於 內 地 大淵 命文安先邀之,昌立栅椒原以守,合兵攻之,連戰三日,獲祁昌,俘得漢守臣

向良家屬,以招良,良以城降,以所俘獻闕下。

帥 開 州 運糧 以前 年 ·,改授金符,仍前 **餉達**,文安 後所俘入見。 率奇兵,間道邀擊之,獲總管方富等。 詔賜黃金、鞍馬有差。 職 ,還攻宋開 、達等州、擒其統制張剛、總管伏林。 還,攻奪宋金州斷虎隘, 行省 上其功, 命充 殺其將 夔東路征 八月,宋兵由 梁富 行元 擒

给

趙

貴等。

遣總把馬才、楊彪掠達州盧灘峽、與宋兵遇,擒其將蕭德 面,拔矢力戰,大破之,殺其將脹德等。二月,文安以創甚,還蟠龍,宋兵遂復開州。 惟 人入城,諭以堅守。四年春,行省命文安往援,即率兵斷其糧道,宋兵戰甚力,飛矢中文安 IE .投崖死,擒副將劉安仁,留兵戍其地。 遣其將李木波等由問道襲開州,文安遣千戶王福引兵助之。 三年春,與千戶李吉等略開州之大通,與宋將硬弓張大戰,獲統制陳德等。冬,總帥 宋諸路兵來救,圍城三匝,築壘城外, 福先登,破其城,宋將 文安密遣 文安乃 龐 汪

事。 民始復業。 閬 五 州 年,文仲卒,詔文安就佩金虎符,充閬州夔東路安撫使軍 累遭兵變,戶口 冬, 造千戶馬才、張琪略達州,擒宋將范伸、王德、解明等。 凋耗,文安乃敎以耕桑,鰥寡不能自 存, 願相配偶者,併爲一戶充 民元帥,仍相副都元帥府 六年,遣蔡邦光、

列傳第四十八 楊大淵

嵇 永 興,略達州之朱師 鄭 市,擒總管周德新、裨將 王遷。 遣總把王顯略達州 之泥

垻,擒總管張威。<br />
冬,遣兵掠大寧之曲水,擒副將王仁。

也 遣元 聞 詔 進 帥 賜白 文安階 蔡邦 年 ·, 從 金 光 嚴愈省攻重慶, 爲 略開 寶鈔、幣帛 明 威 州 將 擒宋將 軍 有差。 大戰于 陳俊。 秋, 龍 攻達州之聖耳 冬, 文粲入見, 帝諭 坎,敗宋兵。 城, 攻鏵 擒 宋 鐵 之曰:「汝兄弟宣 將 秦, 楊普、 擒其將袁宜、 時 仲, 芟 一力邊 其 何 世 禾 陲,朕所 賢等。 而 還。 知 叉 捷

水 秋 順 金銀、寶鈔、鞍馬、弓矢、幣帛 八月, 擒總管王道等。 時 八 宋 年 文安 以 春 朱 遣 會東川 禩 蔡邦光攻達州 孫 帥 軍還,以所 統軍 蜀 ,禩孫,閩 匣刺攻達州,三戰三 有差。 ,戰于聖耳城下, 俘入見,帝深加獎諭 人也 う、敷遣 間 捷。 諜,動搖 擒其將 ,擢昭勇大將軍、東川路征南招討使,賜 尋遣千戶 人心, 蒲桂。 嵇永興攻開州 文安屢獲其諜,閬 又戰開州之沙平,擒其 戰于平燩、 州 竟無虞。 將王 曲

宋 外城,獲寨主楊桂,縱兵焚掠 [光]會蓬州 兵必來爭,遣韓 兵,四邀宋師于永睦,戰勝之。 福出兵通川 而還。 以牽制之,與宋兵遇于避耳山,敗之,俘總管蔡雲龍等。 九月,築金湯 復遺嵇 城,以積 永興、楊彪追襲宋裨將劉威等, 心屯田 己糧, 且 以逼 宋龍 爪 破 城 重量 出 慮

九年秋,領軍出

小寧,措置屯

田,

造韓福

攻達州九君山,

擒宋將張俊。

遣元帥蔡邦(兒)

達州 牛門 一、斷宋兵回路,擒總管李佺、李德。 宋兵輸糧達州,遺兵于盧灘峽邀擊之,擒統制

孫聰、張順等。

羅 州,文安邀之于寫油坡,奪其糧,幷擒二將。宋開州守將鮮汝忠邀遮歸路,與戰敗之,獲總 轄秦興祖、譚友孫。 出兵迎敵,文安與戰,破之,擒總管王元而還。秋,宋都統閻 蓬 州 頂 兵攻拔龍爪城,東川統軍司命文安兼領之。 山輸糧開、達,遣蔡邦光、李吉伏兵遮之,擒裨將吳金等,覆其糧船。閏(十)[六]月,〔代〕 夏,遣元帥李吉略開州,至戰于瀉油坡,擒其提舉李貴,及石笋寨主雍德。 時蓬州兵已去,宋都統趙章復來據之,且 國寶、監軍張應庚,運糧于達 宋兵復由

德、楊彪等散掠宋境,文安自戍蟠龍以備之。 變東,拔高陽、變、巫等寨,擒守將嚴貴、資世忠、趙興,因跨江爲橋,以斷宋兵往來之路,宋 光、楊彪掠竹山寨,與趙統制戰,擒其將鄭桂、莊俊。 孫德、柳榮、趙威 兵來爭,戰却之。 十一年春三月,文安率軍屯小寧,得俘者言,鮮汝忠等將取蟠龍之麥,卽遣千戶王新 還攻牛頭城,以火箭焚其官舍民居。十一月,遺蘇邦光略九君山,擒其將 李吉略由山、戰于城下、擒其將葉勝。 秋,與蒙古漢軍萬戶怯必烈等, 遺蔡邦 攻宋

時宋以鮮汝忠、趙章易鎭開、達二州,而汝忠家屬尙留開。 文安曰:「達未易攻,若先拔 列傳第四十八 楊大淵

之日 使,賜鈔一千錠;文粲加授鎭國上將軍 兵招 經 入,及 帥 子 州 歷 李吉、嵇永興、千戶王新德等,將兵以鮮汝忠往招由山等處八城,皆望風迎降,凱還。 猶 州 而 陳德 [::「降 其 之,亦降。 率 盛兵 城 俘 所 中人知,則千戶景疇已立旗幟于城之絕頂 其 勝以鮮汝忠、趙桂楫等十餘人獻捷京師。 則 部 駐蟠龍,以爲聲援。 家屬,以招汝忠, 家屬得全,不降則闔城塗炭,汝宜早爲計。」汝忠遂遣趙榮來約降,王師能以 汝忠率所部將士,詣文安軍門降,悉還其妻孥財物。 兵巷戰,力屈,亦就擒。文安遷汝忠家屬于蟠龍,遣元帥王師能持檄往 獨洋州龍爪城守將謝益固守,併力攻之,擒統制王慶,益棄城走。 則達 。十二年正 可不煩兵而下矣。」乃遣蔡邦光率千戶呼延順等, 月,諸軍 夜銜枚,薄開 帝悦, 矣。 宋軍潰散,擒趙章, 加授文安驃騎衛上將軍,兼宣撫 州城下,遣死 趙章子桂楫,守師姑城,造 士先登,斬 而守將韓明 於是遺元 達州 往 關 攻開 遣 兵 招 父

安乃移兵攻萬州之牛頭城,殺守將何威,遷其民,進圍萬州,守將上官變戰守甚力。 勝 月 監軍楊應之、鎭撫彭福壽,會東川行院兵,出小江口以牽制援兵,果與之遇,戰敗之,擒總 軍爲固,力攻拔之,殺守將王智,擒部轄景福,圍梁山四十日,世安隨方備禦,竟不降。 ,兵至樂勝城,宋將蒲 文安尋遣其兄子應之,往招都勝、茂竹、廣福三城,自將大軍,以爲聲援,皆降之。 濟川降。 進攻梁山、宋將袁世安堅守。 文安焚其外城,梁山軍恃忠 文安乃 秋七 文

張 城 管 元 起巖 李 帥 渝降 蔡 皐 堅守 邦 守 花 光 將 茂 不出 萬 杜 實 戶 賦 等 门文安 紀天 叉招 萬 英 以 州 石 屯 師 固 馬 宁 老 守 鐵 不 乃還。 平、小 下 , 文安 宋 城 都  $\stackrel{\sim}{=}$ 乃解 統 聖 代德復 、油木 重 去。 據 车 攻石 開州 家 城 下 堡, 文安乃築 隘 等 諭 城。 降 守將 城 冬 神 譚 進 仙 汝 白白 Щ 和 帝 以 逼 城 攻 之, 夔 雞 帥 冠

文安 戰 外 逐 梁 而 城 降 Ш 復 死 守 十 傳 變守 將 秋 \_\_ 遭 萬  $\pm$ 七 袁 年 一蔡邦 旨 州 張 月,進軍 世 進 起巖 安遣 旣定,遣 諭 光 階 夜 夔 金 來救,遣 使約降。 攻萬州 攻, 使降,夔終不 吾 衞 使 殺 招 上 守 鎭 將 鐵檠、三寶 帥 文安 無彭 遣經 軍 何 艮, 以白 屈。 賜 歷 福 玉帶 奪其 徐 壽 文安 德 兩 迎 政 輝 城 0 撃 諭 城 守 盡 德 破破 守臣 銳 夏, 將 輝 楊宜 攻城 之, 上官 大 朝 喜, 廷遣安西王相 盡 黎拱辰 潛 夔降,夔不 殺 即遣文安 遣 其 勇 舟 降,分 上 師, 梯 從,圍 將 李德 城宵 俘 兵 兵 其 略 登, 一之數 奉 輝 將 施 經 王 宋 州 斬 旨 畫 明 匝 關 擒 往招 東 踰 統 而 萬 Ш 月, 入, 州 之,世 課程, 制 華忠, 奪氣, 夔巷 攻拔

迎 撫 堃 使 敵 鮮 從,乃列 十 汝 四 二月,潛造勇士,夜以梯衝攻破其北門, 忠 年夏,進 與宋兵 棚 攻 城。 兵攻咸淳府 力戰死,比曉,宋兵 冬十二月,潛 時 宋 遭 以六郡 大敗,堃 勇士躡 鎭 雲梯宵登,斬 撫使馬堃 一力屈 鮮龍大驚,收散卒力戰,兵敗就 就 擒。 爲守,文安與 + 關 納 Ŧi. 年, 外 · 兵 進 兵攻紹 堃 悉 里開, 力 巷 慶,守將 戰, 諭 之使降, 達 州 安

列傳第四十八 劉整

**瓤,文安以所得城邑繪圖** 挾變守將親屬 蜀境已定,獨變堅守不下。 往招之。 以獻,帝勞之曰:「汝攻城略地之功,何若是多也」,擢四川 文安乃遣元帥王師能,將舟 朝廷命荆湖都元帥達海,由巫峽進兵取夔州,而 師與 俱, 張起巖 竟以 城降 西 南道宣 夏, 川劉僉

慰

使,解白貂裘以

、賜之。

疾卒。 南道宣慰使。 總管,佩虎符,賜散毛兩子金銀符各一,幷賜其酋長以金虎符。 散 毛蠻而死,可念也。」帝曰:「散毛旣降而殺之,其何以懷遠」」乃擢蔡邦光之子,陞爲管軍 十七年,遣辯士王介諭降散毛諸洞蠻,以散毛兩子入覲,因進言曰:「元帥蔡邦光, 十九年春,入覲,擢龍虎衞上將軍、 中書左丞,行江西省事, 遙授文安參知政事,行四 到官踰月 一昔征 以 ]]]

子艮之,襲佩虎符、昭勇大將軍、管軍萬戶,歷湖南宣慰副使,岳州路總管,卒。

## 劉整

荆湖 制置使孟珙 劉 **珙大驚**, 整字武仲,先世京兆樊川人,徙鄧州穰城。 以爲 麾下。 唐李存孝率十八騎拔洛陽,今整所將更寡,而取信陽, **珙攻金信陽,整為前鋒,夜縱驍勇十二人,渡塹登城,** 整沉毅有智謀,善騎射。 乃書其旗曰賽存 金亂, 襲擒 其守,還 入宋,隸

孝。累遷潼川十五軍州安撫使,知瀘州軍州事。

訴 而 不白 臨安,又不得達。 整 ,以兪興 以 北 方 人,扞西邊有功,南方諸將皆出其下,呂文德忌之,所畫策輒 與整有隙,使之制置 及向 士壁、曹世 四川 雄二將見殺,整益危不自保,乃謀款 以 圖整。 興以軍事召整,不行,遂誣搆之, 附 擯 沮 有 整遣 功 輒 使 掩

賜 十合,敗之。 金虎符,仍賜金銀符以給其將校之有功者。 中統二年夏,整籍瀘州 復遣使以宋 所賜金字牙符及佩印入獻,請益屯兵、厚儲積爲圖宋計 十五郡、戶三十萬 入附。 俞興攻瀘州,整出寶器分士卒,激使戰,戰數 世祖嘉其來,授夔府行省,兼安撫

至,遁去,將擣潼川,又與整遇于錦江而敗。 帥,宣課茶鹽以 帥 ,立寨諸山 三年,入朝,授行中書省於成都、 以以 · 師軍。 扼宋兵。 四 年五月、宋安撫高達、溫和、進逼成都、整馳援之。 同列嫉整功,將謀陷之, 潼川 兩路, 至元三年六月,遷昭武大將軍、南京路宣撫使。 賜銀萬兩,分給軍士之失業者,仍兼 整懼,請分帥潼川。 隅,今天啓混一之機。 七月,改潼 宋兵聞賽存孝 ]][ 都元 都 元

都元帥。 下十七八,何置一 先攻襄陽,撤 四年十一月,入朝,進言:「宋主弱臣悖,立國 九月,偕都元帥阿朮督諸軍,圍襄陽,城鹿門堡及白河口,爲攻取計,率兵 其扞蔽。」 隅 不問,而自棄正統邪!」世祖曰:「朕意決矣。」五年七月,遷鎮 廷議沮之。 整又曰:「自古帝王, 非四 海 一家,不爲 正統。 臣願 或 效犬馬勞, 聖朝 五萬,鈔 上 一將軍、 有天

列傳第四十八 智整

于漢水 略 敵 千 惟 艘, 沿 水戰 江諸郡,皆嬰城避其銳,俘人民八萬。 日 不 中 練 流 如 水軍, 宋耳。 上置 雖 一弩砲, 奪彼 雨 不 所 下爲石 能 長,造 出, 闽五 亦畫 戰艦,習水軍 一,以 地爲船而 扼 敵船。 六年六月,擒都統唐永堅。 , 則 習之, 事 且. 濟 與 得 矣。」 阿朮 練卒七萬。 乘驛 計 曰:「我精 ·以聞, 八月, 制 七年三月,築實 兵突騎, 可。 復築外 旣 還, 所當 圍 造船五 E, 以 遏 · 者破, 八心臺

課 月 者 登 城 城觀 里,擒貴于櫃門關,餘衆盡殺之。 知文煥將遣張貴出城求援,乃分部戰艦,縛草如牛狀,傍漢水,綿亘參錯,衆莫測 貴果夜出,乘輪船,順流下走,軍士覘知之,傍岸蘇草牛如晝,整與阿朮麾戰艦,轉戰五 九月,陞 與 年 敵,整躍 君 五月、宋帥范文虎遣 決 参 勝負。」文煥不答,伏弩中整。 知河南! 馬前曰:「君昧於天命,害及生靈,豈仁者之事 行 中書省事 都統張順、張貴、駕輪船、饋襄陽衣甲、邀擊,斬順, ,。九年(三)[ 三月,破樊城外郭,斬首二千級,擒裨將 正月, 加諸翼漢 ! 軍都元帥。[刊]襄陽 而 又齷 齪不能戰,取羞 帥 獨貴得入 所用,九 十六人。 呂文煥 於 勇

易、 節 度使,封燕郡王,爲書,使永寧僧持送整所, 姚樞 十一 雜問,適整至 月, 詔統 水軍四萬戶。 自軍、言朱怒臣畫策攻襄陽,故設此以殺臣,臣實不知。 宋荆湖制置李庭芝以金印牙符,授整漢軍 期以 間 永寧令得之,驛以 都元帥、盧龍軍 聞于朝, 詔令整復 敕張 書

謂:「整受命以來,惟知督厲戎兵,舉垂亡孤城耳。 宋若果以生靈爲念,當重遺信使,請命朝

廷,顧爲此 小數,何益 於事

幣、良馬。 十年正月, 遂破|樊城, 屠之。 貫以鐵索。整言於丞相伯顏,令善水者斷木沉索,督戰艦趨城下,以回回砲擊之,而焚其栅。 時 重 裏陽已五年,整計樊、襄唇齒也,宜先攻樊城。 遣唐永堅入襄陽,諭呂文煥,乃以城降。 樊城人以栅蔽城,斬木列置江中, 上功,賜整田宅、金

作者不必善成,果然!」其夕,憤惋而卒,年六十三。贈龍虎衞上將軍、中書右丞,諡武敏。 渡江,首將止之,不果行。 行中書左丞,宋夏貴悉水軍來攻,破之于大人洲。十二年正月,詔整別將兵出淮南,整銳欲 遂 改行淮西樞密院事,駐正陽,夾淮而城,南逼江,斷其東西衝。十一年,陞驃騎衞上將軍、 子垣,嘗從父戰敗皆萬壽子通泉,埏,管軍萬戶,均,權茶提舉,垓,都元帥。 整入朝,奏曰:「襄陽破,則臨安搖矣。 丞相伯顏入鄂,捷至,整失聲曰:「首帥止我,顧使我成功後人,善 若將所練水軍,乘勝長驅,長江必皆非宋所有。」 孫九人,克

校勘記

仁,知房州。

朱總統祁昌 按本卷陽大淵傳附楊文安傳作「宋都統祁昌」,「都統」係宋軍官職,疑「總」當作

都。

- 陳子閏 北監本作「陳子潤」。按本卷楊大淵傳「閏」亦作「潤」。
- 盧植 北監本作「盧埴」。按本卷楊大淵傳「植」亦作「埴」。
- [图] 蔡邦(兒)[光] 從道光本改。
- ○五 〕 夏遣元帥李吉略開州 按前文敍至元九年九月事,後文又有十一年春三月事,此「夏」當指至

元十年夏。「夏」疑上脫「十年」。

- **个** 六 山 閏(十)公八月 誤,今改。參看前條校勘記。 按前文有至元九年,後文有十一年。至元九年至十一年,惟十年有閏六月,「十」
- トキノ 九年(三)(正)月加諸翼漢軍都元帥 月辛巳條有「命劉整總漢軍」,據改。 下文復有「三月」與此處重。 本書卷七世祖紀至元九年正

